

日涉编

陈堦

文硕阁

wenshuoge.com

目录

关于我们	3
序	5
日涉编卷一	9
日涉编卷二	45
日涉编卷三	76
日涉编卷四	110
日涉编卷五	139
日涉编卷六	171
日涉编卷七	198
日涉编卷八	231
日涉编卷九	263
日涉编卷十	294
日涉编卷十一	321
日涉编卷十二	351

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

重印日涉编序

日涉篇十二卷，明陈阶编辑。万历三十九年辛亥(一六一一)巡按陕西浙江道监察御史徐养量刻。今传世别有「白辉补辑日涉编」一种，及一名「编日新书」者，亦署「陈阶编辑」；此两书皆无刻刊年月。中央图书馆善本书目均有著录，并称「编日新书」为「明末叶周师旦金陵刊本」，实误。盖日涉编原刻罕见，故不易发见两书之有问题也。今为陈氏流传原著，所据系万历辛亥初刻本，始见后人作伪之迹。因加考案，明其真相。

白辉补辑本，实即日涉编之原板，剗改每卷第一页之前半，删除原文三条，另增「晋石艾白辉九峰甫补辑」一行，另补二行(附图一)。举正月为例：

「日涉编原刻」 「补辑本」

正月 晋石艾白辉九峰甫补辑

正月建寅寅津也谓生物之津途也 【合璧事类】 一日

大簇寅之气也正月建焉 【周礼】 夏建寅以正月朔为岁首

事实上，此为删减内容，未有补辑。且原刻有序文十三篇：李光元、周师旦、徐养量、董元学、岳万阶、张鹤鸣、张以谦、任彦棻、龙膺、祁光宗、张之厚、王道成、陈阶。补辑本删王道成序，存十二篇，其余内容悉同。推想当时白辉于湖北应城购得日涉编之原刻木板，即运回山西剗改重印，作为补辑之本。欺世盗名，盖亦明时风气使然耳。

附图一 白辉补辑本日涉编原刻

编日新书之内容，与日涉编相同，系翻刻日涉编而易其书名(附图二)，并删存校者「周化」一名及李光元、徐养量、周师旦、陈阶四序，另增贺逢圣序置书首。以所存四序与日涉编相对照，颇见窜易。如李光元序有句曰：「所以涉也，涉故能千百世而日不虚也」，两「涉」字皆改为「编」。序末并删「不然虽日涉未见成趣也而」及「万历辛亥岁献春」十八字，又易李光元「题」为「序」字。徐养量序改「日涉编成焉日涉者」为「编日新书成，编日者」八字，又改「从而谱之也」及「亦无从谱尔」两「谱」字为「编」。并于「明效也」下，删除「余友太史李麟初氏，有族敝邑，素闻陈君世古学，余以是书告，笑而谓之曰：此从古以来编日史也。麟初

唯唯。于是余刻以行，而麟初序其首。诸君子好古者并序云。万历辛亥孟陬日」七十字。仅补以「可当编日史矣，因以序诸首」两句。又易徐氏之官衔为「赐进士太仆寺少卿徐养量序」。窥其所以删改之意，在泯日涉之名，而掩初刻之迹，至为显然。

其次，删削最多者为周师旦序，仅取原序中间一段，而加以窜改增补，其文曰：
【(旁有圈者为原序文)】

附图二 托名周师旦纂枣之编日新书原刻

(缺图)

吾上蔡先君生平与吉藪陈公为莫逆交，陈公负当世才，与其尊人养吾公名相亚，意凌视一世，尝与先君言：「吾侪之不朽也，

【以上一段原序作夫一朝之日也一日之人也须眉七尺则应有所自立以瑰玮于世】
达者高视【原作睨】遐托，极其意之所底，不欲使【原作忍使当吾世有未竟以】
滋滋错鄂以留所未竟【原作人为两字】有尤达者，感愤无聊，亡【原作无】
所放其意，则【原序则下有谓不得志于今句】姑以【原作且】俟之不可知之千秋
【原序秋下有至其嬉酣淋漓出词落笔多能根裂金石牢骚鬼神句】然贵之千秋，陋
【原作轻】之当年，则其思益深而其志【原作致】亦【原作益】
足悲矣，古称子云嘿而好深沈【原作湛】之思，夫欲期后世有子云，欲
【原作无欲字】不深得乎【原序乎下有然子云禄位容颜不及动人句】
玄亦古无此体也，而桓谭何以知其必传，则知为子云者，不必后世有之矣。【原序
矣下有吾邑陈吉藪氏其先大夫养吾公第嘉靖甲辰进士称博雅着归云集数种盛传海内
吉藪生而凤毛咄咄殆逼先人而数弗偶也句】屡【原作十】蹶场屋
【自此以下仅取原序一二句】

故辄弃去为古文词，尤工近体，「其怨思悵惻，令人不可读，称遑绝【原作绝伦】
矣。更博搜古初上下，历十数年而编日新书【原作日涉编】成。惟是先君互相校讎，
至绾符上蔡，陈公稿乃脱，予固知陈公注指之渊且远也。夫日官日御，古者递有
所设，自天子以及诸侯，皆以日为程，程于往焉，故也，程于来焉，新也。人无日
不往来于日中，一切任其轮转，滔者滔，遐者遐，无所强于干行之健。凡国家治乱
人事兴堕，故愈逝而新愈生。究至公卿士庶，各不司其位，登没钩绳，皆冥焉消耗
其生，生生者既耗，其于生何，此亦古今之大凡之大痛矣。陈公按期之日，征以嫩
慝，讽以咏歌，使夫观者视为前师，跃然其有兴，功岂微也。然先君与陈公俱善易，
每谓日者，八卦之变也，星纪为气，交错为令，二六消长为月，四象为时，其动
静休息，常隐与人相应；是为立天以定人，天人之心俱见于复，互根代明，复为常
体，君躁潜昭，复为密用，自一日而七日，七日而三百六十日，皆复也。诚得于复
而合之，直反太极混沌之初，则天地之位以立，其何有于生。固知陈公注之渊且远
也。千秋之志愜矣。不肖奉先君遗命，因为纂枣，且亦并以报陈公。

赐进士第督学南畿浙江道监察御史周师旦序

案周师旦原序自称「通家子」，故作伪者遂从此着眼，而结以「不肖奉先君遗命，因为纂枣」之语，于是「编日新书」为周氏新刻之书矣。原其用心所在，欲欺世牟利耳。然则作伪者，殆出于明末书坊之手，彰彰明甚。既知周氏之序非原序，则新增贺逢圣之序，亦必出于伪撰。序曰：

蒲阳陈吉藪先生集有编日新书，督学直指周公梓诸南畿。论其世以托不朽，谓先生笃行醇儒，博物君子也，微独书之新美可喜已也。公且梓走一邮于余，谓余宜有言。记余在蒲阳时，吉藪以序委者三；因与余发明编日之指：老夫陈人，不能读父书，耗数十年精力成为此书，其大指在以事系日，有一日属以一日事，书重记日，不重记事，即事无可纪述，亦必采之不废，废是日事，是废是日日也。先生与余言若此；余寡昧，胡能赞一辞，则有感于季札之事焉。吴季札初使时，北过友人，友人好季札剑，口弗敢言，季札心知之，为使上国，未献，还则其人已死；于是乃解其宝剑，系之冢树而去。从者曰：剑尚谁予乎？季子曰：不然，始吾心已许之，岂以死倍吾心哉。古之君子，心知其所好，即弗言也，尚将不忍倍焉；矧吉藪嘱余者三，今日其忍欠先生一言？先生为养吾公令子，养吾先生有归云诸书，盛行海内，先生再以编日续之，千载而上，谈迂向歆之业，不复专美前闻也。先生于是不朽矣。噫，先生所重者日，日始于师尹，积为卿士之月，又积为王之岁，盖上下共此不息之健焉。南国故高皇帝丰芑地，高皇帝厉精图治，日书未行事务，缀集御衣，若鹑结然，行则去之。当时学校之设，先务是急，颁赐经书子史，不难购与所未备，其欲士皆知学用，以兴道而美俗也，往恐弗及如此。主上寿考作人，俾公誉髦斯士，公日有孜孜，所为广厉之路甚具，至服膺宗指，特揭罗文公竭才一言，才既竭而无不惜之阴，无不爱之日，可知也。公司命犹未匝岁，其八郡三州士，遂已化时雨而倬云汉。读此新书者，考俊民之用章，溯成人于无斁。其称名也小，其取类也大。谓公趾美思兼可矣，不仅仅蒲阳陈氏书矣。

赐进士及第翰林院编修江夏贺逢圣序

案贺逢圣明史卷二百六十四有传，万历十五年丁亥(一五八七)生，四十四年殿试第二人，授翰林院编修，时年三十。徐养量刻日涉编在万历三十九年辛亥，据周师旦序称「今吉藪年七十余，而此编以传」。是日涉编刻成之日，陈阶尚健在，其时贺氏约为二十五岁。今此序首称「先生集有编日新书，督学直指周公，梓诸南畿。」此为呼应周序之「纂枣」而言。又曰：「余在蒲阳时，吉藪以序委者三。」「有感于季札之事」，「吉藪嘱余者三，今日其忍欠先生一言」，则明言作序之时陈氏已死。贺氏于万历四十四年以前，本传称其「举于乡，家贫就应城教谕」，其在应城之日，或与陈氏为忘年交，亦未可知；然以二十许之少年，直呼七十许老翁为吉藪，实不相称也。且既出仕应城，岂有不知徐养量刻陈氏日涉编之行于世，而尚待陈氏死后之「忍欠一言」乎？贺氏本传尝记「湖广建魏忠贤生祠，忠贤闻上梁文出逢

圣手，大喜，即日诣逢圣；逢圣曰：误借衔，陋习耳。」编日新书之作伪者，当亦以贺氏名高，又与陈氏同乡里，乃借衔以重之，固明人之陋习耳。

综上所述，知白辉补辑，名不符实。而编日新书，乃坊间伪作。繇是原刻之流传，益见其珍贵矣。因述所见为之序。

中华民国五十九年十一月秀水严一萍序

日涉编卷一

楚应城陈阶升也甫编辑

邑人徐养量叔弘甫校刻

周化惟南甫

张崇烈抑之甫

弟陈坤顺也甫全阅

正月〔一〕

正月建寅寅津也谓生物之津途也【合璧事类】

大簇寅之气也正月建焉【周礼】

日在营室昏参中旦尾中【礼记】

孟春行夏令则风雨不时草木旱稿国乃有恐行秋令则民大疫疾风暴雨数至藜莠蓬蒿并兴行冬令则水潦为败霜雪大挚首种不入【吕氏春秋】

为陬【尔雅】

为孟春孟阳孟陬上春初春开春发春献春首春亦曰初岁开岁献岁肇岁芳岁华岁首岁【梁元帝纂要】

端月【宝典】

唐朝新格以正月五月九月为三忌房玄龄等损益隋律亦存之以不行刑谓之断屠月【载山堂肆考】

每月皆有弦望晦朔以正月初年时俗重之以为节故曰节日【荆楚岁时记】

内庭妃嫔每至春时于禁中结伴掷金钱为戏盖孤闷无所遣也

都人士女月半后乘车跨马设供帐于园囿或郊野中为探春之宴【以上天宝遗事】

上元收灯后都人争先出城探春 【梦华录】

山东风俗取五姓女十余岁卧一榻覆之以衾以箕扇之良久如梦或欲刺文绣事笔砚理管弦俄顷乃寤谓之扇天卜以乞巧 【续博物志】

天水池邑人游赏于此竞于池中摸石祈嗣得石者生男得瓦者生女
【重庆府志天水池在江津县】

孟春公方风至浚井取新泉四时皆服之 【淮南子】

愍帝建兴二年日隕于地又有三日相承出于西方东行至五年是月又有三日并照虹蜺弥天日有重晕左右两珥 【占曰白虹兵气也三日并出不过三旬诸侯争为帝五行志】

日出有物着天白广如一疋布长四丈余西南行声如雷一刻止名曰天狗
【哀帝建平元年汉书天文志】

内杵三星是月对臼口则吉若偏与臼不相当则军粮绝
【内杵三星在人星旁主军粮大象列星图】

祠太乙于甘泉夜祠到明忽有星至祠坛上使童男七十人俱歌 【汉武帝天官书】

流星出牵牛入紫微光烛地化为肉长三十步广二十七步 【愍帝建兴二年晋书】

黑雾着人如墨五日乃止 【建兴二年后愍帝降刘曜晋书】

天气昏暝狂风迅发竟日夜西北阴云中如有火光长二丈余阔数尺民时时见之
【靖康二年宋史】

空中有物斗而坠如羝羊 【开皇十二年通考】

绛州夜闻天鼓将旦复鸣其声如空中战斗者 【顺帝二十七年元史】

雨赤雪于京师 【贞元十一年五行志】

雨血忽闻燔柴烟气既而黑雾四塞咫尺不辨腥秽逼人 【元史】

雨土于京师 【淳化三年占曰小人叛后李顺盗据益州】

雨尘土 【元佑七年占曰主民劳苦以上宋史】

雨草而叶相繆结大如弹丸 【汉平帝元始元年与汉元帝永光年草同五行志】

雨草于宫中 【宋明帝泰始四年南史】

雨豆于泸中 【绍兴十六年宋史】

黄河是月水名凌解水 【水衡记】

润州江水赤数日 【光启元年通考】

混元庙中井涌气成五色云相映 【混元庙在亳州玄宗开元二年唐书】

泰山莱芜山南匈匈有数千人声民视之有大石自立高丈五尺大四十八围入地深八尺为足立后有鸟数千集其旁 【元凤三年是时昌邑有枯社木卧复生又上林苑中大柳树断枯卧地亦自立生有虫食树叶成文字史纂左编】

夜多鬼鸟度人家 【荆楚岁时记】

长安获女魃长尺有二寸其状怪异 【永隆元年五行志】

简州普通院毗庐佛像自动 【干德六年】

宝应县民析薪中有天泰下赵四字 【德佑二年】

解木五片皆有天下泰平字 【泰平兴国六年以上宋史五行志】

魏武帝在洛阳起建始殿伐濯龙树血出又掘徙梨根伤亦血出帝是月崩 【五行志】

凤凰集京师赦天下 【宣帝神爵二年】

凤凰见京师 【章帝元和二年自是年以至章和元年凡三年凤凰百三十九见郡国】

凤凰集西苑 【吴孙权宝鼎四年以上沈约符瑞志】

雌鸡化为雄 【则天永昌元年六帖】

晋武帝有二青龙见武库井中帝观之有喜色刘毅曰昔龙降夏庭卒为周祸寻按旧典无贺龙之礼帝从之 【泰康五年晋书】

魏少帝有二青龙见轺县井中又二黄龙见宁陵县井中 【甘露元年宋书符瑞志】

诗

江南孟春天苕叶大如钱白雪装梅树青袍自葑田

【鲍防作字子慎襄阳人天宝进士终工部尚书封东海公状江南正月】

一二三四五六七万物生芽是今日远天归鴈拂云飞近水游鱼迸水出

【罗隐字昭谏钱塘新城人号江东先生】

青门柳枝软无力东风吹作黄金色街头酒荡醉易醒翁眼春愁消不得 【白居易长安作】

一树寒梅白玉条迥林村野傍溪桥应缘近水花先发疑是经春雪未消 【戎昱】

闻道春还未相识走傍寒梅探消息昨夜东风入武阳陌头杨柳黄金色 【李白】

上楼迎春新春归暗黄着柳宫漏迟薄薄淡霭弄野姿寒渌幽风生短丝 【李贺】

一步寒郊一惨眉望春春色苦来迟东君未必私桃李只恐梅花谢有时

无赖年年逐酒徒今年不饮兴何如醉乡若有人名籍但愿春风点检疏

【李觏闰正月偶书觏字泰伯】

力疾坐青晓时来悲早春转添愁伴客更觉老随人红入桃花嫩青归柳叶新望乡应未已四海尚风尘 【杜甫】

侵袭雪色还萱草漏泄春光有柳条 【杜甫】

先遣阳和报消息续教啼鸟说来由 【白居易】

水连芳草江南地烟隔寒梅岭上春 【林逋】

初阳弄色明高柳残雪留寒伴落梅 【刘原父】

立春

立春火斨金囚水休木相大寒后十五日斗指艮为立春

【立始建也春气始至故谓之立玉衡】

斗柄东指而天下皆春 【鹞冠子】

元魏黎季明曰招摇东指天下识其春 【北史】

立春之日东风解冻 【月令】

立春条风至 【条达万物之风】

青阳云出房如积冰 【以上易通卦验】

农祥晨正 【农祥房星也晨正谓晨见南方立春之日也出国语】

分至启闭必书云物 【立春为启立冬为闭出传】

立春太史以先三日请于天子曰某日立春盛德在木天子乃斋立春之日亲率公卿诸侯大夫以

迎春于东郊还乃赏公卿大夫于朝布德和令行庆施惠下及兆民 【月令】

春官以青圭礼东方 【立春为苍帝之精故青圭以象春物之初生周礼】

立春之日迎春于东郊祭青帝勾芒车旗服饰皆青歌青阳舞云翘 【东汉郊祀志】

立春之日立青幡 【后汉礼仪志】

立春日夜漏未尽五刻京师百官皆衣青郡国县官下至令史皆服青帻 【续汉书礼仪志】

太史立春日读五时令服各随其方色 【晋书】

剡子对孔子曰少皞摯为鸟师而鸟名青鸟氏师启者也
【青鸟鸛鷟也以立春鸣立夏止出传】

出土牛以示农耕之早晚

【立春早则策牛人近前立春晚则人在后所以示人之早晚出六帖】

取宜阳金门竹为管河内葭草为灰以候阳气 【玉泉记】

先立春七日敕狱吏决词讼有罪当入无罪当出立春敕门无关键以迎春之精下弓载楯鼓示时声动昆虫也 【孝经钩命诀】

令侍臣迎春内出彩花树人赐一枝令学士赋诗宋之问云今年春色好应为剪刀催
【唐景龙四年正月八日立春景龙文馆记】

立春日郎官御史寺监长贰以上皆赐春幡胜以罗为之宰臣亲王近臣皆赐金银幡胜入贺
乞带归私第 【梦华录】

唐制立春赐三省官彩胜各有差 【文昌杂录】

宋孝宗以太上皇来年圣寿七十预于立春日诣德寿宫行庆寿礼
【淳熙二年出合璧事类】

宋钦宗立春先一日京师太史局勾芒神流泪滴襟袖是年徽钦被虏 【靖康元年窃愤录】

太平兴国二年立春日县司以春牛呈知府就牛门外荐以香灯酒果其芒儿塑之颇精同判
王洗马晦伯虑有损阙移寘厅上知府程给事见之谓同判曰某虽不才忝为刺史且芒儿者
耕垦之人不应上厅将来恐村夫辈或有不揆耳至甲午果有顺贼之变 【成都记】

立春前一日开封府进春牛又禁中鞭春开封祥符两县置春牛于府前至日绝早府僚打春
府前百姓皆卖小春牛 【梦华录】

立土牛六头于国都郡县外丑地以送寒气 【丑为牛后礼仪志】

立春前并造土牛耕夫犁具于大门之外是日黎明有司为坛以祭先农官吏各具彩仗环击
牛者三所以示劝耕之意 【梦华录】

士大夫家剪彩为小幡谓之春幡或悬于家人之头或缀于花枝之下或剪为春蝶春钱春胜
以为戏东坡立春日亦簪幡胜诸子侄笑指云伯伯老人亦簪花胜耶 【山堂肆考】

立春帖宜春字于门故王沂公皇帝阁立春帖子北陆凝阴尽千门淑气新年年金殿里宝字
帖宜春 【荆楚岁时记】

立春日剪彩为燕以戴之故王沂公诗曰彩燕迎春入鬓飞轻寒未放缕金衣欧阳诗曰共喜
钗头燕已来郑毅夫诗曰汉殿斗簪双彩燕并知春色上钗头 【合璧事类】

东晋李鄂立春日命以芦菔芹芽为菜盘相馈遗 【摭言】

立春日荐春饼生菜号春盘 【四时宝鉴】

立春日食生菜取迎新之意 【杜诗春日春盘细生菜东坡诗青蒿黄韭簇春盘梦华录】

立春日作五辛盘以黄柑酿酒谓之洞庭春色【苏诗曰辛盘得青韭腊酒是黄柑荆楚记】

北朝妇人立春日进春书以青绉为帙刻龙像衔之或为虾蟆【酉阳杂俎】

立春日北望有紫绿白云者为三素飞云三元君以是日诣天帝
【东坡妃子阁门帖曰万年枝上看春色三素云中望玉宸岁时广记】

太极真人常以立春日日中会真人于太极宫刻玉简记仙名【登真隐诀】

诗

昔闻海上有仙山烟锁楼台日月闲花下玉容常不老只应春色胜人间【温成皇后初薨会立春进帖子是时欧阳修王珣同在翰苑以其虚阁故不进俄有旨令进王珣遽口占一首欧公叹其美丽】

鸾辂青旗殿阁宽祠官奠璧下春坛晓开鱼钥朝衣集彩胜飘扬百辟冠
【立春日百僚皆赐幡胜周美成秦帖子】

仙家日月本长闲送腊迎春亦偶然翠管银钩传故事金花彩胜作新年【东坡】

久狎渔樵作往还晚风宫殿梦催班邻娃似与春争道酥滴花枝彩剪幡【山谷】

东君珂佩响珊珊青驭多时下九关方信玉霄千万里春风犹未到人间【王初立春作】

幸闻年欲至剪彩学芳辰缀绮能似景裁红巧逼真花从篋里发叶向手中春不与韶光竞何名天上人【李峤侍宴内出剪彩花应制】

犹残一夜腊并见两年春物以终为始人从故得新迎阳朝剪彩守岁夜倾银恩赐随嘉节无功祗自尘【王安石除夕立春】

新春与新岁时候不相先未肯欺残腊何曾占旧年缀条花剪彩插户柳生烟独坐空山里惟惊节物迁【梅尧臣元旦立春】

春日一杯酒便吟春日诗木梢寒未觉地脉暖先知鸟转星沉后山分雪薄时宁无剪花手赠与最芳枝

玉烛传嘉节阳和应此辰土牛呈岁稔彩燕表年新腊尽星回次寒余月建寅梅花将柳色偏思越乡人【曹松】

灰律向时应江春昨夜来细风光动柳残雪不藏梅余冷迷清管微和发冻醅闭门无客到樽酒为谁开 【吕夷简江南立春日】

春日春盘细生菜忽忆两京梅发时盘出高门行白玉菜传纤手送青丝巫峡寒江那对眼杜陵远客不胜悲此身未知归定处呼儿觅纸一题诗 【工部大历元年立春日云安作】

青帝东来日驭迟暖烟轻逐晓风吹罽袍公子樽前觉锦帐佳人梦里知雪圃乍开红叶甲彩幡新剪绿杨丝殷勤宜作为春曲题向花残贴绣楣 【韦庄】

闰历先春破腊寒彩花金胜宠千官冰从太液池边动柳向灵和殿里看瑞气因风飘禁仗暖晖依日上仙盘须知圣运随生殖万国年年共此欢 【宋郊闰十二月望日立春禁中作】

饼如茧纸不可风菜如缥茸劣可缝韭芽卷黄苣舒紫芦蓴判冰寒脱齿卧沙压玉割红香部署五珍访诗肠野人未见新历日忽得春盘还太息新年五十柰老何霜鬓看镜几许多曲生嗔人不解事且为春盘作春醉 【杨廷秀】

雨水

立春后十五日斗指寅为雨水雨水中气也言雪散为水也 【玉衡】

雨水正月中天一生水春始属木然生木者必水也立春后继之雨水且东风既解冻则散而为雨水 【七修类稿】

汉初雨水为二月节前汉之末以雨水为正月中 【历书沿革】

雨水日黄阳云出亢 【易通卦验】

雨水日獭祭鱼 【雨水后五日候鴈北又后五日草木萌动月令】

雨水日獭不祭鱼国多寇贼 【周书时训】

正月〔二〕

一日

夏建寅以正月朔为岁首

三朝 【正月一日为岁之朝月之朝日之朝故云三朝汉孔光传注】

三元【岁之元日之元时之元六帖】

三朔

【正月上日注朔日也夏以平明为朔殿以鸡鸣为朔周以夜半为朔故云三朔合璧事类】

三微【阳气始施黄泉万物始动微而未着纂记渊海】

履端于始举正于中【春秋】

汉魏占候元旦决八风风从东南来大旱西南小旱西方有兵西北豆成北方中岁东北为上岁东方大水东南疾疫【天文志】

群臣庆贺始于汉高祖【杜氏通典】

朝贺三公奉璧上殿向御坐北面太常使赞曰皇帝为君兴三公伏皇帝坐乃前进璧【汉杂事】

高宗以太后八十诣慈宁宫行庆寿礼百官称贺【绍兴二十九年】

仁宗率百官上皇太后寿于会庆殿秘阁校理范仲淹奏与百官同列损主威【天圣七年以上宋史】

元会设白兽尊于阙庭【上设白兽若有能献直言者则发此尊饮酒按礼白兽尊乃杜举遗也示无忌惮也晋礼志】

百官朝贺毕虎贲当陛下呵置于地曰此天子弓谁敢干越朱穆乃呵之曰天子弓当载之盾首之上乃敢置地大不敬即收虎贲付狱治罪莫不肃然【朱穆拜尚书张璠汉记】

正旦雪江夏至义公以衣承雪作六出花以为瑞孝武帝大悦【大明五年沈约宋书】

卢钧帝飧含元殿钧年八十升降如仪【六帖】

岑文本除秘书郎元日奏籍田三元颂文致华贍【事文类聚】

戴凭朝会百僚毕集帝令群臣能说经史更相难诘义有不通辄夺其席以益通者凭遂重坐五十余席京师语曰解经不穷戴侍中【凭字次仲为侍中东观汉记】

陈翔朝贺大将军梁冀威仪不整翔奏冀恃贵不敬请收治罪时人奇之【翔拜侍御史后汉书】

宰相礼绝班行百官已集而宰相方至珂伞列烛多至数百炬谓之火城 【国史】

西南夷献乐及幻人能吐火自支解易马牛头时元会作之于庭安帝与群臣观大奇之惟陈禅独离席曰王之庭不宜作夷狄伎 【永宁元年】

成武丁大会以酒沃庭中有司问其故对曰临武县失火以酒救之遣验果然
【以上桂阳列仙传】

陶公镇荆州时以锯木屑悉藏之人咸不解其意后正会值积雪会日如晴厅事前雪地甚湿于是悉用木屑覆之无所妨 【世说】

庾亮正旦大会州府人士河南褚裒问亮江州有孟嘉其人何在亮曰在坐卿但自觅之裒历观遂指嘉谓亮曰将无是邪亮笑曰不喜裒之得嘉喜嘉为裒之所得 【晋书】

张华为兖州刺史狱有系囚元旦给假五日展谒亲墓日期尽当还囚果应期而至
【北齐书】

李膺坐党事与杜密荀翊同系狱时元旦翊引杯曰正朝从小起膺谓翊曰死者人情所恶今子无惧色者何翊曰求仁得仁又谁恨膺乃叹曰汉其亡矣善人天地之纪而多害之何以存国 【李膺家录】

诏除是日杀鸡与雀 【汉成帝万岁历】

尧时有祗支国来献重明之鸟状如鸡能捕猛兽是日或刻木铸金为此鸟状置于门户鬼退今日画鸡是其遗像 【拾遗记】

邯郸之民以是日献鸱于简子简子大悦客问其故简子曰正旦放生示有恩也客曰民知君欲放之竞而捕之死者众矣君而欲生之不若禁民弗捕简子曰善 【列子】

荥阳有胥井沛公避项羽于井中时双鸱集其上羽曰井有人鸱不集遂免难故汉元旦放鸱
【胥音鴛三齐略】

治中卢耽少学仙术解飞腾尝赴元会至晚不及朝列化为白鹄至阁前徘徊欲下威仪以帚掷之得双履耽惊还就列左右莫不骇异刺史步骘以状列闻诛之 【南康记】

黄帝时有神荼郁垒兄弟二人能执鬼于度朔山桃树下简阅百鬼之无道者縛以苇索执以饲虎帝乃立桃板于门画二人像以御鬼谓之仙木 【风俗通】

梁武帝赐群臣却鬼丸 【海录碎事】

刘谓者以元日至市见一书生入市众鬼悉避刘谓谓书生曰子有何术以至于此书生曰我本无术出之日家师以一丸药绛囊裹之令以系臂防恶气耳于是刘就书生借此药至所见鬼处诸鬼悉走所以世俗行之 【天中记】

鍾离真人降庐山度吕洞宾成仙 【事文类聚】

有胡僧正旦行乞王绩觉僧神彩邀入其家胡僧谓绩曰君有宝镜可得见耶绩曰何以知之僧曰檀越宅上每日有碧光此宝镜气也绩以镜出之僧跪捧谓绩曰此镜有数种灵相若以金烟熏之玉水洗之复以金膏珠粉拭之照见脏肺行之果验而胡僧不见
【大业九年异闻集】

过腊一日谓之小岁进椒柏酒服之身轻 【崔寔月令】

饮酒茹葱以通五脏 【庄子】

嗽鸡子五辛菜人各吞生鸡子一枚谓之练形五辛菜以助发五脏之气 【风土记】

食胶牙饴取胶固之义 【岁时记】

取五木煮汤以浴令人至老须发不白道家谓青木香为五香亦云五木 【山堂肆考】

洛阳人家造丝鹅蜡燕粉荔枝 【金门岁节记】

新罗国俗以是日拜日月神 【唐书】

诗

器乏雕梁器材非构厦材但将千载叶常奉万年杯 【赵彦昭是日因赐柏叶应制】

劲节凌冬劲芳心待岁芳偏令人益寿非止麝含香 【李又同前题】

绿叶迎春绿寒枝历岁寒愿持柏叶寿永奉万年欢 【武平一同前题】

正朝辟恶酒新年长命杯柏叶随铭至椒花逐颂来 【庾信】

欲曙九衢人更多千条香烛照星河今朝始见金吾贵车马纵横避玉珂 【释灵彻】

爆竹声中一岁除春风送暖入屠苏千门万户曈曈日总把新桃换旧符 【王介甫】

元日年年见天涯意故长诗章示宗武春色酌瞿塘白发又新岁黄柑非故乡弟兄团拜处归去愿成行 【王十朋字龟龄永嘉人】

惭愧云台客飘零雪满毡不图朱鸟影犹见白蛇年宫殿荒烟隔门庭宿草连乾坤自春色回首一潸然 【文天祥字宋瑞号文山】

五年元日只流离楚客今年事事非后饮屠苏惊已老长乘舴艋竟安归携家作客真无策学道刳心却自违汀草岸花知节序一身千恨独沾衣 【陈与义字去非】

与君同甲子寿酒让先杯 【刘梦得】 与君同甲子岁酒合谁先 【白乐天】
岁酒先拈辞不得被君推作少年人 【又白乐天】 还丹寂寞羞明镜手把屠苏让少年
【顾况】 自知年几偏应少先把屠苏不让春 【裴夷直】
好是灯前偷失笑屠苏应不得先尝 【成文干】 但把穷愁博长健不辞最后饮屠苏
【东坡以上其义同盖月令正旦进酒次第当从小起以年少者出容斋直笔】

二日

晋高祖夜初北方有赤气西至戊亥地东北至丑地南北阔三丈状如火光赤气内见紫微宫及北斗诸星 【天福二年文献通考】

唐文宗暴卒宰相李珣知枢密刘弘逸奉密旨以皇太子监国两军中尉仇士良鱼弘志矫诏迎颖王

【开成五年正月二日文宗暴卒是夜迎颖王即武宗陈王成美为皇太子出旧唐书】

高阳王雍是日以灵太后临朝太上秦公丧制未毕欲罢百戏丝竹之乐清河王怿以为万国庆集天子临享宜应备设太后问侍中崔光光从雍所执 【熙平二年魏书】

秦阿房宫赐群臣橘 【太平御览】

泸南献嘉禾九穗 【宋高宗绍兴十五年正月二日出会要】

唐长安风俗从是日起饮酒相邀号为传坐 【秦中岁时记】

刘备生 【桃园记】

宝胜佛生 【佛书】

新平民以大牢祀苻坚 【苻坚为姚萇杀于新平佛寺中后寺主摩诃兰常梦坚曰可为吾作宫既而寺左右民家死疫相继巫者常见坚怒曰不吾宫将尽杀新平民因共改寺为庙遂无

灾疾每年正月二日民竞祀以大牢汉魏丛书】

诗

春来饶梦慵朝起不看千官拥画楼却看闲行是忙事数人同傍曲江头

【上御丹凤楼赦天下元祜与李公垂庾顺之闲行曲江不及盛观永贞二年正月二日】

三日

天书降真宗以为天庆节 【祥符元年正月三日降出合璧事类】

宋英宗天圣十年生于宣平坊赤光满室或见黄龙游光中后宰臣请以生日为寿圣节诏曰赤制告图肇承题序青炜动陆俯协诞期卿等缘华封之素祝建寿圣之嘉名至治平元年是日亲王枢密以下诣垂拱殿宰臣百官以下及契丹使诣紫宸殿上寿 【英宗濮王允让子也初濮王梦两龙与日并堕以衣承之复戏于空中其一龙视王曰吾非王所能有后仁宗立为皇子天中记】

宋仁宗宴群臣及契丹使并于锡庆院 【治平三年正月三日出会要】

郝大通真人生 【大通字太古号广陵宁海人世为宦族郝朝列之从弟少孤事母甚孝尝梦神人示以周易秘义于是深契阴阳律历卜筮之术世宗七年祖师至宁海见资禀高古所习不凡遂以背坐之机感动之大通领悟从祖师来法祖师乃以敝衲去其袖畀之曰勿患无袖汝当自成盖传法之意也后仙蜕于先天观史纂左编】

万神皆会 【三元延寿书】

太白降现 【道经】

买箕四枚悬堂上四壁令人治生大得治田蚕万倍钱财自入 【杂五行书】

诗

阳春已三日会友闻昨夜可爱剡溪僧独寻陶景舍

【戴叔伦是日荅处上人宿玉芝观见寄】

三日春风已有情拂人头面稍怜轻殷勤为报长安柳莫惜枝条动软声

【元祜是日咏春风凭杨员外寄长安柳】

野外堂依竹篱边水向城蚁浮仍腊味鸥泛已春声药许邻人斲书从稚子擎白头趋幕府深

觉负平生 【杜工部是日归浣花溪简院内诸公】

黄鹂巷口莺欲语 乌鹊桥头冰欲销 绿浪东西南北水 红栏三百九十桥 鸳鸯荡漾双双翅 杨柳交加万万条 借问春风来早晚 只从前日到今朝
【白乐天是日闲行黄鹂坊也 乌鹊桥也】

四日

宋太祖即位是日差官告天地社稷祝文曰维大宋建隆元年岁次庚申正月辛丑朔四日遣官敢昭告于旻天上帝天命不常维德是辅神器大宝猥集眇躬钦眷命而不遑励小心而昭事云云 【文献通考】

胡骑将至京城是日李纲以边事求见宰执奏事未退纲语知合门事朱孝庄曰有急切公事欲与宰臣廷辩孝庄曰旧例未有宰执未退而从官求对者纲曰此何时而用例耶孝庄即具奏诏引纲立于执政之末时宰执议欲奉銮舆出狩襄邓纲请固守上曰谁可将者纲曰愿以死报第人微官卑恐难镇服士卒 【宋钦宗靖康元年容斋四笔】

东坡离泗州考骡驮驿试笔云正月四日离泗州
【宋神宗元丰七年先十二月至泗州时东坡年五十长公外纪】

王（上一吉下二吉）号重阳子奄然而逝弟子马钰乞遗言重阳子口占曰地肺重阳子呼为王害风来时长日月去后任西东作伴云和水为邻虚与空一瓢真性在不与众心同言讫而蜕 【重阳子少捡来时人目曰害风盖关中谓狂者为害风其仙蜕大定十年正月四日史纂左编】

开基节玉晨大道君登玉霄宫四盼天下 【翰墨大全】

五日

宋理宗诞辰为天基节 【宋史】

天气澄和风物闲美陶渊明与二三邻曲同游斜川 【辛丑年渊明集】

邓正真人飞升 【翰墨大全】

仙女何许陈三姓相约入山修真大中元年是日雷雨作仙乐隐隐云雾中遥见三女忽莫知所在马蹄鞋迹留山上人异之 【楚通志】

仙姑孙氏生 【孙氏名不二号清静散人宁海豪族孙忠翊之幼女母梦七鹤毵毵舞于家庭

一鹤入怀觉而有娠史纂左编】

大慈佛生【佛书】

诗

大明御宇临万方【中宗】顾惭内政翊陶唐【韦皇后】鸾鸣凤舞向平阳
【长宁公主】秦楼楚馆沐恩光【安乐公主】无心为子辄求郎【太平公主】
雄才七步谢陈王【温王重茂】当熊让辇愧前芳【上官昭容】再司铨管恩何忘
【崔湜】文江学海思济航【郑愔】万邦考绩臣所详【武平一】著作不休出中肠
【阎朝隐】权豪屏迹肃雪霜【窦从一】铸鼎开岳造明堂【宗普卿】
玉醴由来献寿觞【唐景龙四年正月五日中宗移仗蓬莱宫御大明殿会吐蕃骑马之战因
重为柏梁体联句一首柏梁之作君与臣下而已未闻后与公主可与呜呼此中宗所以点筹
于后七修类考】

六日

宋太宗幸景龙门外水碓帝临水而坐召从臣观之因谓曰此水出于山源清澄甘洁近河之
地水味皆甘岂河润所及乎宋琪等曰亦犹人性善恶染习致然帝曰卿言是也【宋史】

元人张孟兼生于戊寅正月六日以历推之是月九日始入春则中气犹居丁丑年之冬大父
因以丁命名字曰孟兼兼者何谓临二岁之中【宋学士集】

石国以王父母烧余之骨金瓮盛置床上巡遶而行散以花香杂果王率臣下设祭焉礼终王
与夫人出就别帐臣下以次列坐享宴而罢
【石国居于药杀水都城方十余里其王姓石名涅北史夷传】

断岸禅师诣法塔西指空地曰更好立个无缝塔其晚与一禅者谈笑至夜分乃曰老僧明日
天台去禅者曰某随师去师曰你走马也赶我不及跣趺而化【断岸禅师俗姓杨氏生于宋
理宗景定癸亥年化之日白昼晦暝雷砰雨射葬之日雪花缤纷林木缟素史纂左编】

江州武平南安白花岩定光佛生【佛书】

诗

雪消山水见精神满眼东风送早春明日杏园应烂熳便须期约看花人
【曾巩字子固是日雪霁作】

踏磧逢危马临江想卧龙江山供指顾樽俎奉从容峡水浅还涨巫云淡复浓天教我辈合莫

惜罄金鍾【王十朋是日踏碛作】

七日

为灵晨【山堂肆考】

唐中宗景隆三年御清辉阁令学士赋诗四年又是日宴大明殿赐王公以下彩胜【文馆记】

唐高宗幸洛阳【咸亨二年正月七日出会要】

宋王登望仙楼会群臣父老集于城下令皆饮一爵文武千人拜贺上寿【山堂肆考】

晋安王子勋是日即位于寻阳城其日有鸕集殿中鸕集幃上【邓琬字符琬为晋安王子勋长史宋废帝无道遣使赍药赐子勋死琬曰身南土寒士蒙先帝殊恩以爱子见托欲废昏立明后子勋以是日即位宋书】

郑公请见太宗劳之曰今日卿至可谓人日【唐刘餗传记】

宋太宗亲试吕蒙正以下并赐及第【太平兴国二年事物纪原】

魏孝静帝以人日登云龙门崔瞻与其父（惶去皇改夔）俱侍宴为诗诏问邢邵等曰今瞻此诗何如其父咸曰（惶去皇改夔）博雅弘丽瞻气调清新并诗人之冠冕宴罢咸嗟赏之云今日之宴并为崔瞻父子【北史】

魏东平王登寿张县安仁山铭曰正月七日厥日惟人策我良驷陟彼安仁【郭缘生述征记】

晋李充登剡西寺赋诗曰命驾升西山寓目眺原畴【合璧事类】

薛道衡字玄卿尝聘陈人日思归诗曰入春纔七日离家已二年南人嗤之曰谁谓此虏解作诗及云人归落鴈后思发在花前乃喜曰名下固无虚士【山堂肆考】

采七种菜作羹戴叔伦诗独献菜羹怜应节遍传金胜喜逢人又东坡诗小雨暗人日春愁连上元水生挑菜渚烟湿落梅村【岁时记】

寿阳公主卧含章阁檐下梅花落额后人效为梅花妆【宋书】

蜀嘉定金灯山有渊郡守于此修油卜故事以油洒水上观其纹以验丰歉【图经】

蜀万州风俗士女渡江南娥眉碛上作鸡子卜唱竹枝歌 【寰宇记】

蜀夔州风俗重诸葛武侯以是日倾城出游八阵碛上谓之踏碛妇人恰小石之可穿者贯以彩索系于钗上以为一岁之祥帅府亦宴于碛上 【夔州府志】

蜀有乐山在渠县北每岁邑人将鼓笛酒食登此娱乐以祈蚕事 【顺庆府志】

唐末杨大虚先生得道于蟆颐山龙洞眉州士女人日出东郊渡玻璃江游蟆顺山 【山堂肆考】

龟兹国元日斗羊马驼至是日观胜负以占休咎 【酉阳杂俎】

多鬼车鸟家家槌门打户灭灯烛禳之 【荆楚岁时记】

煎饼谓之熏天食于庭中 【述征记】

男吞赤豆七颗女吞二七颗竟年无病 【杂五行书】

三会日宜修延神斋吉 【灵宝】

张道陵字辅汉老君驾龙舆命乘白鹤同往成都 【桓帝永寿元年列仙传】

诗

元日到人日未有不阴时冰雪莺难至春寒花较迟 【杜甫】

人日伤心极天时触目新残梅诗兴晚细草梦魂春 【唐庚】

春度春归无限春今朝方始觉成人从今克已应犹及愿与梅花俱自新 【人日立春卢仝】

驿骑归时驄马蹄莲花府映若邪溪帝城人日风光早不惜离堂醉似泥
【权德舆是日送房侍御归越】

胜日登临云叶起芳风摇动雪花飞呈辉幸得承金镜扬影还持奉玉衣 【刘宪】

自怪扶持七十身归来又见故乡春今朝人日逢人喜不料偷生作老人 【司空图】

三阳遍胜节七日最灵辰行庆传芳蚁升高缀彩人阶前冀候月楼上雪惊春今日衔天造还疑上汉津 【李峤遇雪应制】

窈窕神仙阁参差云汉间九重中禁启七日早春寒太液天为水蓬莱雪作山今朝上林树无处不堪攀【宗楚客同前题】

凤城景色已含韶人日风光倍觉饶桂吐半轮迎此夜蓂开七叶应今朝鱼猜水冻行犹涩莺喜春熙弄欲娇愧奉登高摇彩翰欣承御气上丹霄【大明宫恩赐彩缕应制李峤】

缕金作胜传荆俗剪彩为人起晋风【李商隐即事】

八日

月八日成光【月三日成魄后汉天文志】

吴下田家以是日夜立一竿于平地月初出有影即量之据其长短移于水面就桥柱画痕记之梅雨水涨必到所记之处【此古之遗法礼立圭以测日景立表以量月采日圭之法具于周礼月表世罕知汉书李寻传月者众阴之表消息见百里为器千里立表王僧虔诗所谓月表望青丘是也丹铅续录】

陈王府参军田同秀是日上言玄元黄帝降见于丹凤门之通衢告赐灵符在尹喜之故宅【上遣使就函谷故关尹喜台西发得之乃置玄元庙天宝元年玄宗本纪】

皇太后诞辰宋真宗以为长宁节【干兴元年玉海】

唐景龙四年立春内出彩花赐近臣令学士赋诗武平一应制有诗中宗即日手敕批云平一年虽最少文甚警新更赐花一枝以彰其美所赐学士花并令插在头上后所赐者平一左右交插因舞蹈拜谢时崔日用乘酣饮欲夺平一所赐花上于帘下见之谓平一日日用何为夺卿花上及侍臣大笑因更赐酒一杯当时叹美【景龙文馆记】

新进士吕蒙正等宴于开宝寺赐御制诗以宠之敕下之日醵钱于曲江为闻喜之饮【宋太宗兴国二年后赐宴赐诗皆自蒙正始事物纪原】

宋戚舜臣葬【舜臣卒于官自主簿凡十一迁官至尚书虞部郎中皇佑六年正月八日葬曾巩作墓铭出文鉴】

诗

銮辂青旗下帝台东郊上苑望春来黄莺未解林间啖红蕊先从殿里开画阁条风初变柳银塘曲水半含苔欣逢睿藻光韶律更促霞觞畏景催【景龙四年是日立春武平一应制唐中宗批云红蕊先开黄莺未啖循环吟咀赏叹兼怀更赐花一枝景龙文馆记】

今年春色好应为剪刀催 【宋之问是日立春应制亦景龙四年山堂肆考】

九日

玄宗遣左右相已下祖别贺知章于长乐坡上赋诗赠之 【开元二十九年玉海】

黄山谷赋诗赠别祖元师诗中有孤臣蒙恩已三命之句 【师和义人能用五行书察人休祥性尤嗜琴山谷自三荣追至泸州钱之则师非一浮屠氏而已建中靖国辛巳年正月九日赠别宋濂集】

灵佑禅师盥漱怡然而寂寿八十三谥大圆禅师 【灵佑潭州沕山僧年十五出家游江西参百丈丈一见许之丈曰汝拨炉中有火否师拨之曰无火丈躬起拨得少火举以示之曰汝道无这个（上渐下耳）师由是发悟居湖南为山敷扬宗教四十余年唐宣帝大中七年正月九日告寂楚禅宗志】

南斗下降

五通仙诞 【以上翰墨大全】

诗

武夷深处有台仙岳降元霄六日前早挟雄文偕汉吏晚将奇策对尧天 【事文类聚】

众人事纷扰志士独悄悄何异琵琶弦常遭腰鼓闹三杯忘万虑醒后还皎皎有如辘轳索已脱重萦绕家人自约饬始慕陈妇孝可怜原巨先放荡今谁吊平生嗜羊炙识味肯轻饱烹蛇啖蛙蛤颇讶能稍稍忧来自不寐起视天汉渺阑干玉绳低耿耿太白晓
【东坡是日有美堂饮醉归五鼓方醒起阅文书得鲜于子骏所寄】

十日

浹日 【从甲至甲为浹日几十日周礼】

唐玄宗制献岁之吉迎气方始敬顺天时无违月令所由长吏可举旧章
【开元十一年通考】

唐高宗是日以太子初立欲大会群臣命妇合宴宣政殿太常博士袁利正上疏曰前殿正寝非命妇宴会倡优进御之所帝从之改向麟德殿 【永隆二年玉海】

宋真宗赐新及第进士胡旦已下绿袍靴笏自是以为定制

【太平兴国二年正月十日出会要】

杨国忠选监牧小儿于苑中教习请剑南旧将李福德刘光庭为教练使
【天宝十五载蜀记】

诗

今朝郡斋冷忽念山中客涧底束荆薪归来煮白石遥持一尊酒远慰风雨夕落叶满空山何处寻行迹 【绍圣二年是日韦苏州寄全椒山中道士道士常于庵前见足迹长二尺许】

一杯罗浮春远饷采薇客遥知独酌罢醉卧松下石幽人不可见清啸闻月夕聊戏庵中人空非本无迹 【东坡是日读韦苏州寄道士诗乃以酒一壶依韵作诗寄道士】

十一日

唐德宗诏曰四序嘉辰历代增置汉宗上巳晋纪重阳或说禳除虽因旧俗与众宴乐诚洽当时朕以春方发生候维仲月勾萌毕达天地同和俾其昭苏宜均畅茂自今以后二月一日为中和节 【贞元五年正月十二日诏事物纪原】

宋孝宗赐左相虞允文养生论右相梁克家长笛赋又赐克家御草古柏行一轴
【干道七年玉海】

西川孟昶以是日降 【昶每岁除日命翰林为词题桃符正旦置寝门左右末年学士辛寅逊撰词昶以其非工自命笔题新年纳余庆嘉节贺长春以其年正月十一日降王师即命吕余庆知成都府而长春乃宋太祖诞辰节也信数盖前定通考】

粘罕遣使入城请钦宗车驾诣军前议事 【宋靖康二年正月十一出七修类稿】

金真祖师谓马钰曰从我归去 【马钰字玄宝号丹阳子金真祖师命马钰锁其庵时隆冬风雪四入而庵之所有惟笔砚枕席布衾草履而已然神形冲畅如在春风和气中谓至人有寒谷回春之妙正月十一日锁启师谓马钰曰从我归去居昆仑烟霞洞史纂左编】

诗

偏得朝阳借力催千金一跨过溪来曾坑贡后春犹早海上先尝第一杯
【曾巩闰正月是日吕殿丞寄新茶】

锦袍周卫一番新警蹕朝严下紫宸俗眼望来犹眩日天颜回处自生春行齐鹓鹭当随仗步稳骅骝不起尘归路青云喧鼓吹乐游从此属都人 【曾巩是日迎驾呈诸同舍】

十二日

浹辰之间【左传】

封四渎之号河为灵源公济为清源公江为广源公淮为长源公
【天宝六载唐会要亦出事物纪原】

唐睿宗崩【葬桥陵奉先县界出通考】

宋哲宗崩【元符三年徽宗即位宋史礼志】

赐新及第进士吕蒙正以下绿袍靴笏御前释褐【太平兴国二年宋朝会要】

宋理宗淳佑三年赵京兆请预放元宵自是日起诸巷陌桥道皆编竹为张灯之计【先徽宗宣和六年元宵有谶词未句云柰吾皇不待元宵景色来到恐后月阴晴未保及理宗淳佑三年张灯臣僚札子引此词未二句为次年五月五日金人寇之讖清夜录】

岳州自元献岁邻里以饮食相庆至是日罢谓其日为云开节【岳阳风土记】

诗

自拨床头一瓮云幽人先已醉奇芬天门冬熟新年喜曲米春香并舍闻菜圃渐疏云漠漠竹扉斜掩雨纷纷拥裘睡觉知何处吹面东风散缬纹

载酒无人过子云年来家酝有奇芬醉乡杳杳谁同梦睡息齁齁得自闻【齁齁鼻息也】
口业向时犹小小眼花因酒尚纷纷点灯更试淮南语泛溢东风有縠纹【是日天门冬酒熟东坡自漉之且漉且尝遂以大醉作诗二首淮南子云东风至而酒泛溢许慎注云酒泛清酒也】

十三日

唐太宗大搜于昆明池
【贞观五年正月十三日大搜于昆明池夷落君长从官群臣出会要】

唐敬宗即位【长庆四年正月十三按穆宗圣子三人敬宗文宗武宗皆有天下详求正史光有比伦卓异记】

后唐潞王生为千春节【晋纪】

宋神宗钦圣宪肃皇后向氏崩 【建中靖国元年】

宋太祖是夜燃灯罢内前排场戏乐因昭宪皇太后丧制 【建隆二年以上宋史】

张乖崖帅蜀是夜灯谓之挂搭灯 【翰墨大全】

慕容晃征郭远海结冰凌 【慕容晃上言曰正月十三日臣躬征郭远假陛下天地之威将士竭命精诚感格海为结冰凌行海中三百余里臣及诸老言自立国以来无海水冰冻之岁风俗通曰积冰曰凌冰杜曰冻王隐晋书亦出山堂肆考】

孟昶遣使奉表来降 【王全斌并州太原人全斌克剑州杀蜀军万余人正月十三日师次魏城孟昶遣使奉表来降出左编】

苏东坡录卢仝杜子美诗遣懣

【元符二年是时久旱无雨阴翳未快时东坡在儋州年六十四长公外纪】

莫月鼎化于弟子王继华家瞑目而坐继华问身后事月鼎摇手曰候五事备可也夜将半风云雷雨交作月鼎索笔书偈曰七十四年明月也曾阴晴圆缺今日大地光明三界虚空透彻书毕泊然而逝颜面如丹 【莫月鼎湖州月河溪人宋理宗宝佑戊午年大旱月鼎按剑呼雷神役之天地晦冥大雨后见元世祖于滦京内殿时爽霁世祖曰可闻雷否月鼎取胡桃掷地雷应声而发雷撼殿庭史纂左编】

三元集圣之晨 【翰墨大全】

诗

南山春雪未全消路并浮梁步石桥深绿渐归高柳叶浅红初上小梅梢峭寒寺院钟声起昏暮人家烛影摇一夜东风吹酒醒梦回花月是元宵 【韩仲正嘉定十四年是日作】

去年今日遁崖山望见龙舟咫尺间海上楼台俄已变河阳车马不须还可怜羝乳烟横塞空想鹃啼月掩关世上流光忽如此东风吹雪鬓毛斑 【文天祥字宋瑞号文山是日作】

十四日

明皇是夜幸上阳宫新番一曲有李暮于天津桥上翫月闻宫中奏曲爱其声以爪画谱记之 【翌夕明皇潜游忽闻酒楼上有笛奏前夕所番曲捕笛者诘之李暮长安少年也合璧事类】

玄宗取十四日至十六日开坊市门燃灯永以为式 【旧唐书】

宋仁宗御楼遣中使传宣从官曰朕非好游观与民同乐耳 【翌日蔡君谟献诗云高列千峰宝炬森端门方喜翠华临宸游不为三元夜乐事还同万众心天上清光留此夕人开和气阁春阴要知尽庆华封祝四十余年惠爱深东斋录】

道士王郎升仙陶隐居为志铭云绂冕岂荣随璜非宝万里求真緘兹内抱
【王郎字法明太原人入茅山师陶隐居梁武帝大通二年正月十四日升仙出太霄经】

径山大慧宗杲禅师谓众僧曰上堂正月十四十五双径推锣打鼓要识祖意西来看取村歌社舞 【史纂左编】

李旦暴病卒 【旦元嘉三年正月十四卒七日而苏云有一人持幡至床头称府君呼唤即随去见一宫阙闲深上有三十人单衣列坐又有一人披袍隐凡左右百余视旦而语坐人曰当示以诸狱旦闻言举头四视乃地狱中见群罪人呻吟号呼久之有一人称府君放旦归内有一罪人寄语家人云生前犯罪作福可免旦初不知罪人姓名旦苏后以姓名通于家姓名不爽后旦悟报应之说作八关斋旦字世则广陵人出冥报记】

十五日

文帝尝与近臣登高元胄为右卫大将军是日召之谓曰公与外人登高未若就朕极欢
【隋书】

韦安石京兆万年人中宗是夜幸其第赐赆不可胜数
【安石应明经举为户部尚书复为侍中监修国史周大司空郕国公孝宽曾孙也旧唐书】

祢衡被魏武帝谪为鼓吏是日试鼓援桴作渔阳桴渊渊有金石声四坐为之改容孔融曰祢衡罪同胥靡不能发明王之梦 【世说】

韦坚字子全是夜皇甫惟明与坚宴集李林甫奏坚外戚与边将私且谋立太子 【林甫使杨谨矜杨国忠等文致其狱帝惑之贬坚缙云太守惟明播州太守藉其家坚诸弟诉杜六帖】

天宝十载杨氏五宅夜游与广宁公主骑从争西市门杨氏奴挥鞭误及公主衣公主堕马驸马程昌裔扶公主入奏上令决杀杨家奴一人昌裔停官不许朝谒 【杨家从此转横京师长吏侧目故当时谣曰男不封侯女作妃君音女却是门楣太真外传】

宋太宗御楼观灯时李文正公昉以司空致仕于家上以安輿召至赐坐敷对明爽精力康劲上亲酌御樽饮之选穀核之精者赐焉谓近侍曰昉可谓善人君子事朕两入中书未尝有伤人害物事宜有今日所享因赐诗焉 【至道元年山堂肆考】

太宗御千元门楼观灯赐宴见京师繁盛叹美之吕蒙正避席曰乘輿所在士庶走集故繁盛

如此臣尝见都城外不数里饥寒死者甚众愿陛下亲近以及远帝变色不言蒙正侃然后位同列多其伉直 【至道二年纲目】

隋柳彧见都邑百姓每至是日作角抵戏上奏曰京邑及外州每以正月望夜充街塞陌鸣鼓聒天燎炬照地人带兽面男为女服竭资破产竞此一时请并禁断上可其奏 【北史】

汉家祀太乙昏时祀到明 【史记】

吴县张成见美妇立宅东南角举手召成曰此地是君蚕室我地神也宜作白粥泛膏祀我令蚕百倍 【颢异录】

萧余之日于宣阳里酒盘下得一物如人眼睛其体类美石光影射人置掌中游间处辄光明三尺许后因雨飞去 【六帖】

都城上元造面玺以官位高下帖之玺中探之 【开元遗事】

洛阳人家是夜以影灯多者为胜其相胜之辞曰千影万影又各家造芋郎君食之宜男女又各送鸡肉酒用大木饼贮之干亲知门前留地而去 【影灯记】

祭门先以杨柳枝插门随杨柳枝所指仍以酒脯饮食及豆粥祭之 【荆楚岁时记】

作膏以祠门户 【玉烛宝典】

韩国夫人置百枝灯树高八十尺上元夜燃之百里皆见光夺月色

杨国忠子弟各有千炬红烛围于左右时人曰千炬烛围 【以上开元遗事】

上元夜登楼贵戚例有黄柑相遗谓之传柑 【明皇杂录】

唐中宗夜与后微服过市纵宫女出游皆淫奔不还 【六帖】

玄宗于长春殿张临光宴金鳧灯又于殿中撒出闽中红锦荔枝令宫人拾之 【影灯记】

浙人赵嘏有美妾是夜浙帅见之掩为已有 【嘏明年登第遗以诗浙帅不自安归之嘏方出关次横水驿相遇抱嘏痛哭卒遂葬横水青琐集】

有苍头鬻半照徐德言出半照合之 【陈徐德言之妻后主叔宝之妹乐昌公主也才色冠绝时陈政方乱德言知不相保乃破一照镜人执其半约曰鬻此必以正月望日及陈亡其妻入杨越公家德言流落至京遂以正月望日访于都市果有苍头鬻半照者德言引至其居出半

照合之具言其故越公知之还其妻青琐集】

唐玄宗观灯于上阳宫结彩楼三十余间高百尺珠玉翠宝列其间以灯为龙凤麒麟状玄宗召叶法善观于楼下善曰灯固盛矣西凉府今夕之灯亦不亚此上曰可得一往乎令上闭目勿开如其言闭目距跃已在云霄俄而至善曰可以观矣果灯影辉煌士女车马骈集上称其盛以铁如意质酒共饮毕复令闭目腾空顷在彩楼下歌舞未竟翌日命中使如凉州求铁如意果得还为验 【开元初集异记】

玄宗谓叶天师曰今夕何处最丽对曰广陵帝曰何术以观之师曰可俄而虹桥起殿前板阁架虚栏楯若画帝步而上太真高力士及乐官数人从行步步渐高顷到广陵寺观陈设之盛灯火之光照灼基殿士女鲜丽皆仰面曰仙人现于五色云中帝大悦敕伶官奏霓裳羽衣一曲后数日广陵果奏云 【开元十八年幽怪录】

张天师名道陵字辅汉生于天目山

【建武十年正月十五日生至桓帝永寿元年于灵峰白日上升出集仙录】

王玄甫学道于赤城霍山晋穆帝永和元年是日玉帝遣羽车迎之玄甫乘云驾龙白日升天为中岳真人 【徐州志】

仙人尹思字小龙晋元康五年是夜坐屋中遣儿视月中有异物否儿曰今年当大水有一人披蓑思自视之曰将有乱卒至儿曰何以知之曰月中人带甲仗矛当大乱后如其言 【神仙传】

摩竭陀国僧徒俗众云集观佛舍利放光雨花 【西域记】

上元九气大官诣天阙进呈世人罪福之籍 【山堂】

诗

玉漏铜壶且莫催铁关金锁彻明开谁家见月能闲坐何处闻灯不看来 【崔液】

喧喧车骑帝王州羈病无心逐胜游明月春风三五夜万人行乐一人愁 【白居易长安】

花萼楼前雨露新长安城里太平人龙衔火树千灯焰鸡上莲花万树春

帝宫三五戏春台行雨流风莫妒来西域灯轮千影合东华金阙万重开
【以上张说御前踏歌】

端门魏阙郁峥嵘灯火城中辇路平不待上林莺百啭教坊先已进新声 【少游】

星回河汉月将微露酒烟飘灯渐稀犹惜路傍歌舞处踟蹰相顾不能归 【崔颢】

洛城三五夜天子万年春彩仗移双阙琼筵会九宾舞成苍颉字灯作法王轮不觉东方白筵随御柳新 【孙逖应制】

火树银花合星桥铁锁开暗尘随马去明月逐人来游妓皆秾李行歌尽落梅金吾不禁夜玉漏莫相催 【苏味道】

新年三五东林夕星汉迢迢钟梵迟花县当君行乐夜松房是我坐禅时忽看月满还相忆始叹春来自不知不觉定中微念起明朝更问鴈门师
【白居易是夜东林寺学禅偶怀蓝田杨六主簿因呈智禅师】

鱼龙曼衍六街呈金锁通宵启玉京冉冉游尘生辇道迟迟春箭入歌声宝坊月皎龙灯淡紫馆风微鹤焰平宴罢南端天欲晓回瞻河汉尚盈盈 【夏英公应制】

十六日

唐睿宗十五至是日两夜长安福门外灯高二十丈衣以锦绮饰以金银燃五万盏灯竖之如花树宫女千数衣罗绮曳锦绣长安年少女妇千余人亦于灯轮下踏歌欢乐之极未始有之
【玉海】

文宗力疾御紫宸见百寮宰臣问安否上叹无名医
【太和八年先七年文宗暴风恙不能言者月余旧唐书】

御座临轩宣万姓先到者得瞻见天表 【梦华录】

王世充与李密战于石窟寺夜疾风寒雨军士涉水沾湿道路冻死者以万数充脱身宵遁直向河阳 【唐高祖武德元年河洛记】

韩康公子华私第会从官九人皆门生故吏一时名德如传钦之胡宽夫钱穆父东坡刘贡父顾子敦皆在坐钱穆父至晚子华不悦东坡云今日为本殿烧香多留住九子母丈夫也
【钱形有类故云】 坐客大笑方坐出家妓十余人燕后新宠鲁生舞罢为游蜂所螫子华意不甚悦久之呼出以白团扇从东坡乞诗诗曰窗摇细浪鱼吹日舞罢花枝蜂绕衣不觉南风吹酒醒空教明月伴人归上句记姓下句记事康公大喜 【事文类聚】

宋赵师旦葬 【师旦字潜叔以嘉佑五年正月十六日葬君山阳上卿仁和之原王安石作墓铭铭曰可以无祸有功于时玩君安荣相顾莫为谁其视死高蹈不疑呜呼康州名以昭之出文鉴】

谓之耗磨日必饮酒官司不令开库 【野记】

妇女相率宵行以消疾厄谓之走百病 【楚志】

士女是夜倾城交错往来如蚁谓之过桥达旦不休 【宣府镇志】

金与元俗是日严备放偷至则笑而遣之虽妻女车马宝货为人所窃皆不加罪
【七修类稿】

诗

耗磨传兹日纵横道未宜俾令不忌醉翻是乐无为

上月今朝减流传耗磨辰但令不事事同醉俗中人 【以上张说诗出丹铅摘录】

春来半月度俗忌一朝闲不酌他乡酒无堪对楚山 【赵冬曦】

十七日

郎顗诣阙曰今正月十七日丑寅申皆征也必当为旱 【郎顗字雅光学京氏易善风角星筭
阳嘉二年正月公交车征顗诣阙曰臣闻天垂妖象地见灾符今正月十七日戊午征日也日
加申日在申时也风从寅来丑时而止丑寅申皆征也不有火灾必当为旱愿陛下责躬修德
庶景云降眚沴息矣顺帝后汉书】

宋太祖诏曰朝廷无事年谷屡登宜士民纵乐上元可增十七十八两夜
【干德五年翰墨大全】

宋太宗藉田改元端拱 【雍熙五年正月十七日藉田改元出宋史】

元佑间蔡太师以待制守永兴上元连日阴雨是日雨止太师出游欲再张灯 【太师是夜欲
张灯吏谓长安大府常岁张灯所用膏油至多皆预为备今已尽临时营之决不能办出却归
编】

后周太祖崩 【葬嵩陵在郑州新郑县通考】

海临生宴宗室百官武德殿母大氏欢饮尽醉海临奏曰太后春秋高常日饮酒不过数杯今
饮酒沈醉儿为天子固可乐若圣体不和则子心不安至乐在心不在酒 【金史】

金主熙宗本七月七日生以同皇考忌日改用正月十七日 【金史】

十八日

宋顺帝是日辰星孟效西方占曰天下更王【升二年南齐书天文志】

玄宗诏开重门以达阳气【天宝六载翰墨大全】

徽宗宴辅臣观灯【宣和七年宋史礼志】

文天祥午时拜相【字宋瑞号文山丙子年正月十八日拜相出七修类稿】

是夜烧灯以草为舡实以纸马送至江浒焚之谓之禳灾【楚通志】

诗

新春三六庆生申曾立螭头作近臣【事文类聚】

兰菊有生意微阳回寸根方忧集暮雪复喜迎朝曦忆我故居室浮光动南轩松竹半倾泻未数葵与萱三径瑶草合一饼井花温至今行吟处尚余履舄痕一朝出从仕永愧李仲元晚岁益可羞犯雪方南奔山城买废圃槁叶手自掀长使齐安人指说故侯园

鉛膏染髭须旋露霜雪根不如闭目坐丹府夜自嗽【丹府即道家所谓丹田也】谁知忧患中方寸寓羲轩大雪从压屋我非儿女萱平生学踵息坐觉两镫温下马作雪诗满地鞭捶痕伫立望原野悲歌为黎元道逢射猎子遥指狐兔奔踪迹尚可寻窟穴何足掀寄谢李丞相吾将反丘园【东坡是日蔡州道上遇雪庄子真人之息以踵】

十九日

唐顺宗崩于兴庆宫【年六十四出通考】

丘处机生【处机生于金熙宗皇统八年正月十九日字通密号长春子登州栖霞人师重阳祖师重阳以诗赠之云细密金鳞戏碧流能寻香饵会吞钩被予缓缓收纶线拽入蓬莱永自由其器重可见后处机居磻溪得道升华史纂左编】

北阴圣母降威济公生【以上翰墨大全】

二十日

唐顺宗生号圣寿节【齐杭寺碑】

禄山生 【贵妃以锦绣縛禄山令内人以彩舆舁之宫中欢呼动地玄宗使人问之报云贵妃与禄儿作三日洗儿玄宗就观之大悦因赐贵妃洗儿钱自是宫中呼禄山为禄儿不禁出入考异】 文与可卒 【元丰二年卒于陈州与可与东坡相善闻之哭失声宋文鉴】

婆斯国各祭其先死者

【出北史据魏书洛那国正月二十日各祭先死洛那国故大宛国也】

江东俗是日为天穿以红缕系煎饼置屋上谓之补天穿 【拾遗记】

南斗星降 【道经】

诗

鳌岛烧灯后五叶舞阶莫东郊和气洽南极寿星明 【事文类聚】

娲皇没后几多年夏伏冬愆任自然只有人间闲妇女一枚煎饼补天穿

【李觏字泰伯是日作】

客睡何辗转青灯暗又明春云藏泽国夜雨啸山城许国有寸铁耕田无一成朦胧五更梦俄顷踏如京 【张宛丘是日梦在京师】

东风未肯入东门走马还寻去岁村人似秋鸿来有信事如春梦了无痕江城白酒三杯酹野老苍颜一笑温已约年年为此会故人不用赋招魂

【东坡是日与潘郭二生出郊寻春忽记去年是日同至女王城作诗乃和前韵】

十日春寒不出门不知江柳已摇村稍闻泱泱流冰谷尽放青青没烧痕数亩荒园留我住半瓶浊酒待君温去年今日关山路细雨梅花正断魂

【东坡元丰二年是日往岐亭郡人潘古郭送于女王城东禅院】

乱山环合水侵门身在淮南尽处村五亩渐成终老计九重新扫旧巢痕岂惟见惯沙鸥熟已觉来多钓石温长与东风约今日暗香先返玉梅魂

【东坡元丰六年是日复出东门仍用前韵】

二十一日

唐太宗亲祭先农藉于千亩之甸秘书郎岑文本献藉田颂以美之颂曰回輿南亩驻蹕东廛

【此礼自晋南迁久废太宗贞观三年正月二十一日始行之观者骇然玉海】

天宝二载取士六人玄宗御花萼楼覆试 【通典据会要勤政楼覆试】

武则天御洛城南楼赐宴太常奏六合还淳之舞 【调露二年音乐志】

宋真宗祥符六年帝服通天冠绛纱袍奉上太上老君混元上德皇帝加号册宝夜漏上五刻侍使奉天书赴太清宫二鼓帝乘玉辂驻大次三鼓奉天书升殿改服袞冕行朝谒之礼相王元偓为亚献荣王元俨为终献礼毕奉册宝于玉匱缠以金绳封以金泥 【宋史礼志】

唐僖宗除高骈剑南西川节度副大使是日骈到剑州 【骈先遣使走马开成都门令放出百姓或曰蛮寇逼近成都相公尚远万一獠突奈何相公骈曰吾在交趾破蛮三十万众蛮闻我来逃窜不暇何敢辄犯成都使者至成都开城纵民出乘城者皆下城解甲民大悦蛮方攻雅州闻之引兵去锦里耆旧传】

诗

自蒙蜀州人日作不意清诗久零落今晨散帙眼忽开迸泪幽吟事如昨呜呼壮士多慷慨合沓高名动寥廓叹我凄凄求友篇感时郁郁匡君略锦里春光空烂漫瑶墀侍臣已冥寞潇湘水国旁鼃鼃鄂杜秋天失鸛鹗东西南北更堪论白首扁舟病独存遥拱北辰缠寇盗欲倾东海洗乾坤边塞西蕃最充斥衣冠南渡多崩奔鼓瑟至今悲帝子曳裾何处觅王门文章曹植波澜阔服食刘安德业尊长笛谁能乱愁思昭州词翰与招魂 【杜工部开文书帙中因得故高刺史人日相忆见寄诗大历五年正月二十一日追酬高公因寄汉中王瑀及昭州敬使君】

二十二日

唐穆宗疾是日命太子监国宦官欲请郭太后临朝称制太后曰昔武后称制几危社稷我家世守忠义非武后比太子虽少但得贤宰相辅之何患国家不安自古岂有女子为天下主而能唐虞之理乎是夕上崩 【长庆四年玉海】

宋高宗修太后殿 【绍兴九年正月二十二日修十一月亲书慈宁之殿颂曰东朝置卫远存长乐之鸿名中禁承颜近着宝慈之茂实出会要】

东坡将往岐亭宿于团风梦一僧破面流血若有所诉是日至岐亭过一庙中有阿罗汉像左龙右虎仪制甚古而面为人所坏顾之惘然宛如梦中所见遂载以归完新而龕之设于安国寺 【元丰四年楚通志】

诗

过了元宵七日间琴堂歌舞献慈颜 【翰墨大全】

二十三日

玄宗封东镇沂山为东安公南镇会稽山为永兴公西镇吴山为成德公中镇霍山为应圣公北镇医巫闾山为广宁公封东海为广德公南海广利公西海广润公北海广泽公
【天宝十载唐会要亦出事物纪原】

唐德宗崩于会宁殿 【贞元二十一年崩年六十四先德宗会群臣于宣政殿宣遗诏皇太子即位太子即顺宗通考】

后唐潞王小字二十三盖正月二十三日生也人臣奏对但云两旬三日或数物则云二十二更过二十四不敢斥尊也清泰元年宰臣李愚等表曰以献岁元正之月是猗兰降圣之辰梅花映雪于上林椒酒迎春于秘殿谓于是月特举嘉名请以降诞日为千春节从之
【天中记】

范传正以李太白迁葬于谢家青山 【李公名白字太白其先陇西成纪人天宝初玄宗召见于金銮殿降辇步迎赐食御手调羹其恩遇前无比俦遂直翰林专掌密命公每见长江远山一泉一石无不自得晚岁渡牛渚矶至姑熟悦谢家青山有终焉之志盘桓利居竟卒于此公孙女二人一为陈云之室一为刘劝之室皆编户氓也唐范传正召至郡庭相见问其父则曰父伯禽以贞元八年不禄而卒有兄一人出游不知所在吾二人俚于农夫救死而已久不闻于县官恐辱祖考言讫泪下传正亦泫然又言先祖志在青山遗言宅兆顷属多故殡于龙山传正于是卜新宅青山之阳以元和十二年正月二十三日迁葬遂公之志西去旧坟六里北倚谢公山即青山也传正告二女改适于士族皆曰夫妻之道命也在孤穷既失身于下俚仗威德乃求援于他门生纵偷安死何见大父于地下传正深嘉之李太白墓碑亦载蜀志】

张衡与妻卢氏飞升阳平山 【衡有女名玉兰十七岁感梦赤光自天而下光中金字篆文遂有孕人疑之玉兰谓侍婢曰吾死当剖腹以明其心中有一物如莲花开中有金书玉简死旬日有异香后数日大风雷雨棺自开飞在巨木之上空棺而已今墓在温江县张衡字平子于汉灵帝光和二年正月二十三日飞升出集仙录】

二十四日

唐中宗即位于通天宫端宸殿 【嗣圣元年】

土蕃是日请五经玄宗赐以毛诗礼记左传文选于休烈上疏曰不可裴光庭曰西戎请诗书庶使潜陶声教上曰善乃与之 【开元十九年以上玉海】

唐高祖诏曰自今以后每年正月五月九月及每月十斋日并断屠
【武德二年断屠之制始于高祖出会要亦出事物纪原】

王仲宣卒 【建安二十二年卒曹子建为之谏曰魏故侍中关内侯主君文若春华思若涌泉发言可咏下笔成篇云云出文选】

安定嵩真晡时死 【嵩真明筭术汉成帝时人自筭其年寿七十三绥和元年正月二十五日晡时死书于壁以记之至二十四日晡时死其妻曰见筭时多下一筭今果差一日西京杂记】

二十五日

宪宗元和十六年夜星尽见而雨 【考异】

司马义武帝第八子以是日废 【又封长沙王身长七尺五寸开朗果断才力绝人虚心下士甚有名誉张方遣部将郅辅就金墉收义至营炙而杀之三军垂涕将殡城东官属莫敢往故掾刘佑独送之步持丧车悲号初义执权之始洛下谣曰草木萌芽杀长沙人以正月二十五日废后二日死于谣言史纂左编】

唐张允伸以风恙卒 【允伸字逢昌咸通九年加光禄大夫检校司徒兼太傅同中书门下平章事十二年以风恙请就医药诏许之正月二十五日卒年八十八赠太尉谥忠烈允伸领镇二十三年克勤克俭边鄙无虞谈者美之旧唐书】

北斗出游 【道经】

二十六日

德宗贞元四年陈留雨木如大指长寸余有孔通中下而植于地凡十里许 【唐五行志】

唐敬宗即位 【长庆四年是时年十六出玉海】

东坡偶与数客过僧舍东南野人家杂花盛开扣门求观主人林氏媪出应白发青裙少寡独居三十年坡感叹之作诗以记 【长公外纪】

诗

拜表归来抵寺居解鞍纵马罢传呼紫花金带尽脱去便是林间一野夫

草软波晴沙路微手携筇竹着深衣白鸥不信忘机久见我犹穿岸柳飞
【伊川正月二十六日独步至洛滨偶成二诗呈尧夫先生出击壤集】

四叶蓂留孟月春东君来现宰官身高年自许同龟鹤瑞世谁知有凤麟
【寿老人事文类聚】

缥带细枝出绛房绿阴青子送春忙涓涓泣露紫含笑焰焰烧空红佛桑落日孤烟知客恨短

篱破屋为谁香主人白发青裙袂子美诗中黄四娘 【东坡见林氏媪作含笑佛桑皆花名】

二十七日

是日旦两月并见 【炀帝大业九年隋书】

后汉高祖崩 【葬睿陵在洛京都城县通考】

神宗即位 【英宗是月崩宋史礼志】

程正叔进讲 【元佑二年正月二十七日进讲资善吏报冯宗道云上前日微伤食物恐未能久坐令讲读少进说出明道集】

宋商瑶卒 【商瑶登宋仁宗景佑元年进士第为莱芜单父县尉临沂县令后以尚书屯田员外郎卒于至和二年正月二十七日张耒作志铭铭曰天下平治士无功名才否一区之死无声或宏其声而中乃枵窾实靡订孰昧孰昭有淄商侯甚蓄不施时叶其直则已光辉彼下人逢位下固宜嗇不使年造物则奚出宋文鉴】

叶法善有云鹤翔集五色云覆其居 【吐蕃以宝函进唐玄宗曰请陛下自开勿令他人知此机密上问叶法善宝函可开否法善以为凶计请上勿开令蕃使自开上从之蕃使果中函弩而死因授法善银青光禄大夫法善请松阳宅为观赐号淳和御制碑额以荣乡里正月二十七日有云鹤数百行翔集瑞云五色覆其居仙传拾遗】

释道安见有异僧从窗出入 【安姓魏氏常山人形甚陋早失覆荫外兄孔氏抚之七岁读书再览能诵十二出家启师所求经典旦诵暮还一一尽识一字不差寓襄阳宣法寺注经乃誓曰若所注不甚远理愿见瑞相是夕梦一道人头白眉长语安曰君所注经殊合理道人宾头卢也后至秦建元二十一年正月二十七日有异僧形亦陋甚来寺寄宿讲堂直殿者夜见异僧从窗而出入安起礼之安云自惟罪深可度脱否异僧云可度至某月某日方可度耳至期安无疾而卒如其言高僧传】

北斗下降 【道经】

二十八日

惟戊午王次于河朔群后以师毕会王乃徇师而誓
【以武城考之戊午一月二十八日也书】

唐玄宗以是日筑神都罗城号曰金城 【天宝二年玉海】

景龙四年上幸浚水宗楚客应制诗御辇出明光乘流泛羽觞郑愔诗素浚接宸居青门盛祓除摘兰喧凤野浮藻溢龙渠 【文馆记】

宋真宗御制五言诗赐王旦等属和 【祥符三年玉海】

范仲淹以是日知邠州兼陕西四路沿边安抚使 【官制】

王结字仪伯卒 【结易州定兴人元顺宗至元二年正月二十八日卒年六十有二结生而聪颖读书数行俱下终身不忘尝从太史董朴受经深于性命道德之蕴故措之事见之文章皆有所本王仁见之曰公辅器也结立言制行皆法古入故张珪曰王结非圣贤之书不读非仁义之言不谈识者以为名言出元史王结传】

雅俗以是日祠保寿侯及唐杜丞相于崇真堂故宋景文诗曰雅俗传祠日年华重宴辰云云 【瀛奎律髓】

诗

初春只欠两辰全天降蓬莱第一仙 【事文类聚】

一冬无雪润田畴渴井泉源冻不流昨夜忽飞三尺雪今年须兆十分秋占时父老应先喜忍冻饥民莫漫愁晴色已回春气候晚风摇绿看来牟 【尤延之正月二十八日夜大雪作】

二十九日

宋真宗诏升应天府为南京 【祥符七年玉海】

韩愈是日复上韩光范书

【书曰愈闻周公之辅相其急于见贤也方一食三吐其哺一沐三握其发云云】

池阳风俗以是日为穷九扫除屋室尘秽投之水中谓之送穷 【天中记】

诗

节近中和隔两辰相门今复庆生申 【事文类聚】

三十日

提月 【公羊传曰提月六鹺退飞遇宋都提月者何仅逮是月晦日也何休注曰提月边也鲁人语也在是月之几尽出初学记】

沈丘县民骆新田闻震顿之陨石入地七尺许 【真宗天禧三年宋史五行志】

武王伐商是日发镐京始东行 【通考】

晋康帝是日成恭杜皇后周忌有司奏至尊期年应改服诏曰君亲名教之重权制出于近代耳于是素服如旧非汉魏之典 【建元元年礼志】

任文武百僚择胜地追赏为乐 【贞元元年敕时以正月晦为令节故敕贞元五年移令节于二月一日亦敕文武追赏两日俱载前出南部新书后出合璧事类】

东坡元丰二年游桓山 【游桓山有记记有春服既成从二三子游于泗之上登桓山入石室云云桓山宋司马桓魋之墓也故记中有歌曰桓山之上维石嵯峨兮司马之恶与石不磨兮桓山之下维水弥弥兮司马之藏与水皆逝兮】

元日至是日人并为酺食度水土女悉湔裳十水湄以为度危今人以其日临河解除妇人或湔裙 【玉烛宝典】

主人使奴结柳作车縛草为舡载糗与粮一二揖穷鬼而送之 【文公云】

高阳氏之子死巷世作糜粥破衣祝于巷曰除贫盖高阳氏之子好衣敝食糜时号贫子故姚合是日有送穷诗诗曰年年到此日沥酒拜街中万户千门看无人不送穷又曰送穷穷不去相泥欲何为今日官家宅淹留又几时又曰古人皆恨别此别恨销魂只是空相送年年不出门 【事出四时宝鉴诗出文苑英华】

诗

轻灰飞上管落萸飘下蒂迟迟春色华晚晚年光丽 【卢元明是日泛舟应诏】

晦口新晴春色娇万家攀折渡长桥年年老向江城寺不觉东风换柳条 【韩滉呈诸判官】

殿前来日中和节连夜琼林散舞衣传报所司分蜡烛监开金锁放人归 【王建作】

风暖柴荆处处开雪干沙净水洄洄意行却得前年路看尽梅花看竹来
【王荆公是日与仲元自淮上复至齐安】

晦魄移中律凝暄起丽城罩云朝盖日穿露晓珠呈笑树花分色啼枝鸟合声披襟勤眺望极目畅春晴 【唐太宗】

月晦逢休澣年光逐宴移早莺留客醉春日为人迟萸草全无叶梅花遍压枝政闲风景好莫

比岷山时 【刘长卿是日陪辛大夫宴南亭】

裊裊春枝弱 关关新鸟呼 棹唱忽逶迤 菱歌时顾慕 睿赏芳月色 宴言忘日暮 游豫慰人心 照临康国步 【魏收是日泛舟应诏】

朝光入瓮牖 尸寝惊弊裘 起行视天宇 春气渐和柔 兴来不暇懒 今晨梳我头 出门无所待 徒步觉自由 杖藜复恣意 免值公与侯 晚定崔李交 会心真罕俦 每过得酒倾 二宅可淹留 喜结仁里欢 况因令节求 李生园欲荒 旧竹破修修 引客看扫除 随时成献酬 崔侯初筵色 已为空樽愁 未知天下士 至性有此不 草萌既青出 蜂声亦暖游 思见农器陈 何当甲兵休 上古葛天民 不贻黄屋忧 至今阮籍等 熟醉为身谋 威凤高其翔 长鲸吞九州 岛地轴为之翻 百川皆乱流 当歌欲一放 泪下恐莫收 浊醪有妙理 庶用慰沈浮 【杜子美是日寻崔戢李封作诗中令节二字唐贞元前以正月晦日为令节详乐游园题注】

日涉编卷二

楚应城陈阶升也甫编辑

邑人徐养量叔弘甫校刻

黄兰芳契之甫

尹东秩元叙甫

豫章李光元甫全阅

二月〔一〕

二月建卯卯茂也谓阳气生而孳茂也【合璧事类】

夹锺卯之气也二月建焉【周礼】

日在奎昏弧中旦建星中【礼记】

日中星鸟以殷仲春【尚书】

仲春日出于卯入于酉【考灵曜】

仲春行夏令则大旱暖气早来虫螟为害行秋令则气寒水大寇戎来征行冬令则阳气不胜麦不熟民多掠【吕氏春秋】

为如【尔雅】

为仲春中春亦曰仲阳【梁元帝纂要】

月为竹秋【山堂肆考】

士女携酒饌鼓乐于郊外饮宴至暮而回谓之迎福【蜀万州风俗寰宇记】

郑国俗以是月桃花下水时会于溱洧之上以自祓除故诗曰溱与洧涣涣兮【韩诗外传】

阴气萌作恐物不茂以朱索连葦以施门户【后汉书】

是月上壬取土泥屋四角蚕吉 【杂五行书】

晋惠帝元康二年天西北大裂

【按刘向说天裂阳不足地动阴有余是时人主拱默妇后专制沈约宋书】

日中见北斗 【天佑元年昭宗帝纪】

日初出两黑气如人形夹日旁 【宋高宗建炎三年此兵象通考】

祥云如狗赤色星二枚夹行 【孝昭元年汉书天文志】

宣太后陵明堂有五色云芳香四满状如车盖 【晋明帝太始四年宋书符瑞志】

夜星陨如雨绎绎未至地灭 【成帝永始二年汉纪】

魏上谷郡黑风起杀人 【文帝元嘉十七年宣府镇志】

巩县黑风从西北暴至吹李密衣冠及左右僚属

皆仆沙尘暗天咫尺不辨 【隋大业十二年唐古今五行志】

雨土 【孝宗淳熙四年宋史】

汴梁雨木冰状如楼阁人物冠带鸟兽花卉百态俱备五日始解 【元史】

雨木于陈留十里许大如指长寸余中空所下者立如植木 【贞元四年五行志】

京师雨药 【仁宗庆历元年宋史】

沧州雨雹如鸡卵 【景龙二年六帖】

黄河是月水名桃花水 【水衡记】

凉州城东池中有火 【晋穆帝升平二年五行志】

河中府宝鼎县潢泉有光如烛焰四五炬其声如雷 【真宗祥符四年宋史五行志】

唐中宗神龙二年洛阳城东七里地色如水树木车马历历见影渐移至都月余乃灭 【宋文帝元嘉二十五年青州城南远望见地中如水有影谓之地镜大历末深州束鹿县中有水影

长七八尺遥望见人马往来如在水中及至前则不见水天中记】

保顺军城壕水陷起文为桃李花杂树人物之状 【景佑元年宋史】

洛阳东北地陷有苍白二色鹅出苍者飞翔冲天白者止焉
【是后刘元海石勒相继乱华晋怀帝永嘉元年五行志】

大业七年造钓台以舟运石将至江东山下取石忽有大石如牛十余自山顶飞下直入舟内
如人安置舟无伤损 【大业拾遗记】

永安三年二月京师民家有二铜像各长丈余一颐下生白毛四一颊下生黑毛一 【魏书】

北魏孝昌三年洛阳平等寺金身两目垂泪遍体俱湿人称为佛汗如此者三日
【明年尔朱荣入洛诛戮百官殆尽洛阳伽蓝记】

太仆寺有泥像左臂上有黑汗滴下以纸承之血也 【大历十三年六帖】

晋惠帝闰二月殿前六钟皆出涕
【元康二年先贾后杀杨太后而贾后为恶不止故钟出涕犹伤之也通考】

唐高祖京师西南有声如崩山近鼓妖
【武德三年说者以为人君不聪为众所惑故有声无形通考】

樗树生枝如人头眉目须皆具亡发耳 【汉成帝永始元年通考】

河南府新安县蟾蜍背生芝草
【徽宗政和二年自是殿宇园苑及妃嫔位皆有玉芝出宋史五行志】

郢州有鱼长尺余坠于市鱼失水而坠于市败灭象也 【元和十四年六帖】

凤凰集于新蔡 【汉宣帝甘露三年新蔡属汝南郡】

凤凰集京师 【宣帝神爵四年是时颍川太守黄霸在郡前后八年凤凰神爵数集郡国颍川
尤多后征霸为太子太傅出汉纪】

凤凰集济南 【延光三年是时汉安帝车驾东巡】

凤凰将九子见郕乡之丰城 【晋穆帝升平四年至十二月又见丰城】

白麟见平原鬲县 【晋武帝咸宁五年以上宋书符瑞志】

诗

江南仲春天细雨色如烟疏为武昌柳布作石门泉 【谢良辅诗状江南二月】

南浦东冈二月时物华撩我有新诗含风鸭绿璘璘起弄日鹅黄袅袅垂 【王安石】

新年都未见芳华二月初惊见草芽白雪却嫌春色晚故穿庭树作飞花 【韩愈】

满城罗绮拖春色几处笙歌揭画楼江上有家归未得眼前花是眼前愁
【杜荀鹤字彦之二月旅中作】

洞房昨夜春风起遥忆美人湘江水枕上片时春梦中行尽江南数千里
【岑参邓州 (?束) 阳人岑文本之后二月春梦作】

碧玉妆成一树高万条垂下绿丝绦不知细叶谁裁出二月春风似剪刀 【贺知章题柳】

二月湖南新草遍横山渡口花如霰相思一日在孤舟空见归云两两片
【僧皎然舟行忆友】

宦情羁思共凄凄春半如秋意转迷山城过雨百花尽榕叶满庭莺乱啼 【柳宗元柳州作】

新林二月孤舟还水满清江花满山借问故园隐君子时时来去在人间
【储光羲寄孙山人】

二月江南花满枝他乡寒食远堪悲贫居往往无烟火不独明朝为子推 【孟云卿寒食作】

二月杨花飞满空飘飘十里雪如风不知何处香醪熟愿醉潘园芳草中 【武元衡寄兴】

春迟不省似今年二月无花雪满天村店闭门何处宿夜深遥唤渡江舫
【窦巩早春送宇文十】

春风过柳绿如缦晴日蒸红出小桃池暖水香鱼没处一环清浪涌亭皋 【王介甫】

白昼绿成芳草梦起来幽兴有新诗风帘不动黄鹂语坐见庭花日影移 【寇平仲】

院落帘垂春日长懒情天气牡丹香细看月面天然白不及姚家宫样黄 【谢元逸】

踏春曲曰踏阳春人间二月两和尘阳春踏尽秋风起愁尽人间白发人
【邢凤之子梦一妇人歌异闻录】

春江不可渡二月已风涛 【杜甫】

新年鸟声千种啭二月杨花满路飞 【庾信】

惊蛰

雨水后十五日斗指甲为惊蛰
【蛰者蛰虫震起而出也后五日仓庚鸣后五日鹰化为鸠出玉衡】

惊蛰二月节夏小正曰正月启蛰言发蛰也万物出乎震震为雷故曰惊蛰是蛰虫惊而出走也 【七修类稿】

汉初惊蛰为正月中前汉之末以惊蛰为二月节 【历书沿革】

惊蛰之日赤阳云出翼 【易通卦验】

惊蛰二月节桃始花桃若不花是谓否塞鸪鹑鸣若不鸣即下不从上鹰化为鸠若不化即寇贼数起 【吕氏春秋作木?兆李花】

蛰虫不震阴气奸阳 【以上周书时训】

春分

春分木旺火胎金死水废

惊蛰后十五日斗指卯为春分 【分者半也当九十日之半也故谓之分孝经纬】

日月之行分同道也 【日夜等故曰春分左传】

春分二月中气昼夜五十刻 【符天纂图】

天地之气莫大于和和者阴阳调日夜分故万物春分而生秋分而成生与成必得和之精故积阴不生积阳不化阴阳交接乃能成和 【文子】

青气正东方也主春春分日青气出震此正气也气出右物半死气出左蛟龙出震气不出则岁中少雷万物不实人民疾热 【易通卦验】

春分二月中玄鸟至不至即妇人不娠雷乃发声不发即诸侯失民始电电不见即国无威振
【玄鸟至后五日雷乃发声又后五日始电周书时训】

日中星鸟 【日中春分之日鸟南方朱雀春分之昏星鸟毕见书尧典】

老人星曰南极以春分之夕没于丁 【晋天文志】

春分正阳云出轸如白鹄 【易通卦验】

保章氏以五云之物辨吉凶
【二分二至观云色青为虫白为丧赤为兵黑为水黄为丰出礼】

春分则风从震位上来 【立春则风从艮位上来客斋四笔】

玄鸟氏司分者也 【左】

鷽鷽春分鸣则众芳生 【鷽鷽鸟名关西曰巧妇关东曰鷽鷽春分鸣则众芳生秋分鸣则众芳歇服虔曰鷽鷽一名鷽即伯劳也唐韵】

龙鳞虫之长春分登天 【秋分潜渊说文】

帝尝少妃有娥氏女简狄以春分玄鸟至之日祀于高禘有玄鸟遗卵简狄吞之孕生契
【史】

天子常以春分朝日于东郊 【出礼】

春分明庶风至正封疆修田畴 【易通卦验】

同度量平权衡 【谓春分昼夜平则正之月令】

钜章昼击土鼓吹豳诗以逆暑 【礼】

鼓者春分之音以助万物发生 【出风俗】

春分不杀生不吊疾君子斋戒衣夹衣不食生冷 【齐人月令】

金主章宗以春分日祀青帝伏羲氏女嫫氏 【出金史】

春分之日日中昆仑瑶台太素真人会诸仙人刊定真经 【登真隐诀】

诗

春分正阳云出轸如白鹄 【谢朓诗鹄一作鹤】

雪入春分省见稀半开桃杏不胜威应惭落地梅花识却作漫天柳絮飞不分东君专节物故将新巧发阴机从今造物尤难料更暖须留御腊衣 【东坡春分雪题】

二月〔二〕

一日

时维太平日乃初吉又诗曰二月初吉 【初吉朔一日也】

作为令节以殷仲春 【令节二月一日以上白孔六帖】

李泌请以为中和节 【邺侯家传并上巳重阳谓之中和节】

百官进农书以示务本 【李泌传】

立中和而视农 【文粹西都赋】

唐贞元间遇中和节赐百官宰臣以下金钱宴于曲江谓之金钱会 【山堂肆考】

唐德宗赋中和节诗遣使宠赐戴叔伦 【时叔伦迁营管经略使出六帖】

唐德宗贞元五年以是日为令节任文武百寮选

胜地追赏为乐 【三月三日九月九日亦然出合璧事类】

唐德宗以中和日赐大臣方镇勋戚尺谓之裁度 【邺侯家传】

唐德宗贞元九年中和节宰相宴于曲江亭诸司随便自是分宴焉 【旧唐书】

都人游翫曲江池盛于中和节 【上巳亦然】 彩幄翠帟匝于堤岸鲜车健马比肩击毂上赐宴臣寮京兆府大陈筵席长安万年两县以雄胜相较锦绣珍玩无所不施百辟会于山亭恩赐太常及教坊声乐池中备彩舟数只惟宰相王使北省官与翰林学士登焉每岁是日倾动皇州以为盛观 【曲江池本秦世隍州玄宗开元中疏凿遂为胜境其南有紫云楼芙蓉苑其西有杏园慈恩寺花卉环周烟水明媚入夏则菰蒲葱翠柳阴四合碧波红渠湛然可爱好事者赏芳辰翫清景联骑携觴迭迭不绝出剧谈录】

王公戚里上春服土庶刀尺相问遗 【广记】

民间以青囊盛百谷瓜果种相问遗号献生 【唐书】

里间酿酒谓宜春酒 【邺侯家传】

村舍作中和酒祭勾芒神以祈年谷 【广记】

大食麻啰拔其俗以是日为岁首 【歌者多以胡琴吹笛鸣小鼓舞唱拍出通考】

苏东坡造一禅榻作干蒸饼百枚自是日后尽绝人事饥则食饼不饮汤水不啖他物细嚼以致津液 【长公外纪】

马道一禅师跏趺入灭谥大寂禅师 【道一容貌奇异牛行虎视引舌过鼻足下有二轮文唐玄宗开元中习禅定于衡岳山中遇让和尚密受心印贞元四年登建昌石门山谓侍者曰吾之朽质当于来日归兹地矣院主问候师曰日面佛月面佛二月一日跏趺入灭出禅宗志】

崔元微立幡而苑中繁花不动 【元微月夜见青衣女伴曰杨氏李氏陶氏又绯衣小女曰石醋报封家十八姨来言辞泠泠有林下风色皆殊绝芳香袭人醋曰女伴在苑中每被恶风相挠可作一幡上图日月五星立苑东则免难矣今岁已过至来年二月一日立之是日元微立幡东风刮地折木飞花而苑中繁花不动元微乃悟女伴即众花之精封家姨乃风神也后杨氏辈来谢各裊桃李花数斗云服之可以延年至元和中元微犹貌若少年出传异记】

天正节 【道经】

王郭真君飞升

翊圣真君下降 【以上翰墨大全】

诗

节应中和天地晴繁弦迭鼓动高城汉家分刺诸侯贵一曲阳春江水清
【陈羽和王中丞中和日】

殿前来日中和节连夜琼林散舞衣传报所司分蜡烛监开金锁放人归 【王建宫词】

万方庆佳节宴喜皇泽均晓开蓂莢初景丽星鸟春藻思贞百度着明并三辰物情舒在阳时
令弘至仁衢酒和乐被熏弦声曲新赓歌舞弁侧永荷玄化淳
【权德舆奉和圣制中和节诗】

皇心不向晦改节向中和淑气同风景佳名别咏歌湔裙移旧俗赐尺下新科历象千年正醺醺四海多花随春令发鸟度岁阳过天地齐休庆欢声欲荡波

【王季友因移晦日为中和节作】

东风变梅柳万宇生春光中和纪月令方与天地长耽乐岂予尚懿兹时景良庶遂亭育恩致同寰海康君臣永终始交泰符阴阳曲沼水新碧华林桃稍芳胜赏信多欢戒之在无荒

【唐德宗以是日为中和节宴百僚赋诗群臣奉和诏写本赐戴叔伦于容州天下荣之】

淑景风光媚皇明宠赐重具寮颁玉尺成器幸良工岂止寻常用将传度量同人何不取则物亦赖其功紫翰宣殊造丹诚励匪躬奉之无失坠恩泽自天中

【裴度因中和节诏赐公卿尺作】

溪谷濺濺嫩水通野田高下绿蒙茸和风满树笙簧杂霁雪兼山粉黛重万里有家归尚隔一塵无地去何从伤春故欲西南望回首荒城已暮钟 【王荆公是日僧舍次弟韵】

二日

泗水神庙每岁以是日致祭

【泗水神庙在泗水县东五十里有司岁以二月二日致祭山东兖州府志】

唐玄宗敕是日幸西京

【会宫中有怪上召宰相即议西还裴耀卿张九龄曰今农收未毕请候仲冬出唐书】

唐昭宗天佑元年是日车驾至华州 【先正月二一六日离长安】 民夹道呼万岁上泣谓曰勿呼万岁朕不复为汝主馆于兴德宫谓侍臣曰鄙语云纥干山头冻杀雀何不飞去生处乐朕今漂泊不知竟落何所因泣下沾襟 【是时朱全忠自河中来朝上延全忠入寝室见何后后泣曰自今大家夫妇委身全忠出实录】

钦宗靖康元年金人围汴城 【至三月三日金人北去七修类稿】

董昌即皇帝位以是日僭号取卯月卯日 【董昌曰讖言兔上金床我生于卯明年岁旅其次二月朔之二日皆卯也我以其时当即位唐昭宗干宁三年昌被袞冕登子城门楼即皇帝位昌自云应兔子之讖欲以二月二日僭号取卯月卯日也先吴越问说言山中有大鸟四目三足声云罗平天册见者有殃民间多画像以祀之及昌僭号曰此吾鸞鸞也乃自称大越罗平国改元顺天会稽录又出吴越备史】

孟子生时母梦神人乘云自泰山来母疑视久之忽片云坠而寤里巷皆见有五色云覆孟氏居 【孟子生于周定王三十七年四月二日即今之二月二日出孟谱】

赐红牙银寸尺各一【白居易状当昼夜平分之时颁度量合同之令天中记】

中尚书令每岁是日进镂牙尺及木昼紫檀尺【六典注】

顺庆府风俗每岁是日郡人从太守出郊谓之迎福【蜀志】

蜀万州风俗一女携酒饌鼓乐于郊外饮宴至暮归谓之迎福
【其万州迎福二字与顺庆府同出寰宇记】

洛阳风俗以为花朝节士庶游玩【翰墨大全】

蜀风俗以为踏青节【出杜氏壶中赘录翰墨大全以为蜀中踏草节或非二事】

为桃菜节【翰墨大全】

曲江拾菜游观甚盛【秦中记】

秦人取子归【秦人得本家婢生一子恶之乞与邻家邻家大富贵本家贫后以二月二日取
归后复富邻家贫出云峽类要】

取枸杞煎汤晚沐令人光泽不病不老【千金月令】

陆天师飞升【陆修静出翰墨大全】

沙门玄奘到长安【玄奘俗姓陈少聪敏有操行修行于天竺至贞观十九年二月二日到长
安采求佛法咸究根源凡得经论六百五十七部佛舍利像等甚多太宗留经像于洪福寺有
瑞气徘徊像上南部新书】

诗

二月二日新雨晴草芽菜甲一时生轻衫细雨春年少十字津头一字行【白居易作】

旧苑新晴草似苔人还香在踏青回今朝此地成惆怅已后逢春更莫来
【韩琬是日游洛源】

二月二日江上行东风日暖闻吹笙花须柳眼各无赖紫蝶黄蜂俱有情万里忆归元亮井三
年从事亚夫营新春莫怪游人意更作风檐夜雨声【李商隐作】

三日

唐高宗夜有流星如雷 【咸亨三年出天文志】

宋高宗宰执百官诸军并扈卫车驾渡杨子江至镇江府
【建炎三年至十三日到杭州出通考】

元太祖是日疾笃医言脉已绝皇后召耶律楚材问之对曰任使非人卖官鬻爵囚系非辜古人一言而善莠惑退舍请赦天下囚徒后即欲行之楚材曰非君命不可俄顷帝少苏入奏请肆赦帝不能言首肯之是夜医者候眼复生适宣读赦书时也翌日而瘳
【耶律楚材通天文地理律历术数及释老医卜之说出元史】

北极降

北斗降 【以上道经】

刘超临水酒酣 【晋富阳县令王范妾桃英殊有姿色遂与丁礼史华期二人奸通孙元弼知之二人惧元弼乃共谤元弼与桃英有私范怒超佐范杀之后超出都诣范行至赤亭山下值雷雨日暮忽有人扶超腋入荒宅中有一鬼面青黑眼无瞳子曰吾孙元弼也诉冤皇天今乃遇汝超叩头流血至天明失鬼所在超乃逃走易姓名为何规后五年二月三日临水酒酣超曰不复畏此鬼矣低头见鬼影在水中以手扞超鼻眼俱血数日而卒出还冤记】

不可昼眠 【千金月令】

蟛（虫越）是日出于海涂极甚
【蟹之最小者名蟛蜞吴人语讥为蟛斗此吴俗所嗜尚出蟹谱】

诗

江上东风浪接天苦寒无奈破春妍试开云梦羔儿酒快泻钱塘药玉缸蚕市光阴非故国马行灯火记当年冷烟湿雪梅花在留得新春作上元 【东坡二月三日点灯会客药玉缸盖以药煮石而似玉者可作酒杯蜀中春月村舍聚为欢乐谓之蚕市马行者东京繁华之处夜市灯火最盛】

四日

陕州黄河清景云见
【唐太宗贞观十四年协律郎张文收采古天马作歌之义作景云河清赋玉海】

武王伐纣至牧野故外传曰王以二月癸亥夜陈
【前汉书以二月癸亥四日书以二月甲子四日】

后汉刘知远生以为圣寿节

【后汉高祖知远更名暉其先沙陀部人唐干宁二年二月四日生出五代会要】

王师擒刘鋹 【宋太祖开宝初广西刘鋹令民家置贮水桶号防火大桶又鋹末年童谣曰羊头二四白天雨至后王师以辛未年二月四日擒鋹识者以为国家以火德王房为宋分羊未神也雨者王师如时雨之义也防与房桶与统同音出通考】

宋孝宗车驾幸玉津园射射讫次命皇太子次庆王次恭王次臣僚等射如是者三每射四发帝前后四中的 【宋史礼志】

宋高宗以刘光世为行在五军制置使 【建炎三年二月四日又建炎四年二月四日吕颐浩兼品镇江陈彦文程千秋为副使出玉海】

石曼卿卒于京师 【曼卿讳延年少以气自豪读书不治章句独慕古人奇节伟行视世俗屑屑无足动其意者自顾不合于时乃一混以酒然好剧饮大醉颓然自放由是益与时不合少举进士不中宋仁宗推恩三举进士皆补奉职曼卿初不肯就张文节公奇之谓曰母老乃择禄耶曼卿矍然起就之康定二年二月四日以太子中允秘阁校理卒出曼卿墓表】

南斗六司真君下降 【道经】

五日

宋光宗即位

【淳熙十六年二月五日即位未改元以皇帝登极奏告天地宗庙社稷报恩出通考】

宋明帝行幸东海获赤鴈 【太始二年行幸作朱鴈之歌出玉海】

俗以产子者杀之 【张奂为武威太守其俗多妖忌每岁二月五日产子及与父母同日者悉杀之奂示以义方严赏罚风俗遂改百姓为立祠后汉书】

郑余庆征还 【薛玄真者唐给事伯高之高祖也少得长生之术尝于五岭间栖憩焉贞元末郑余庆谪柳州长史门吏有自远省余庆者与玄贞相遇神彩俊迈词多稽古言明年二月五日常庆当复归朝门吏语于余庆令人访寻莫获明年是日常庆果征还到长安语及异事薛伯高流泣对曰玄真吾高祖也弃官隐居终南传仙拾遗记】

辟支佛生 【佛书】

北极天蓬都元帅下降 【道经】

诗

二月五日花如雪五十二人头似霜 【白乐天纪年诗】

何知此邂逅谈笑接清扬对雪知春浅回灯惜夜长密云通炫晃残月堕冥茫故有临邛客抽毫兴未忘 【王安石是夜风雪次范景仁韵】

玄景雕暮节青阳变暄风忽寻斜川句感此胜日逢驾言当出游一写浩荡胸云物疑异候凄迷久连空今朝复何朝顿觉芳景融畴曩庶复践邻曲欢来同伊谁一篮舆连翩数枝筇绿野生远思清川照衰容云云 【朱文公正月五日欲用斜川故事结客载酒遇伯林新居风雨不果至二月五日始克践约坐间以陶公卒章二十字分韵文公得中字赋呈诸同游者】

六日

唐高宗永隆二年皇太子行释奠礼毕上表请博延耆硕英髦之士为崇文馆学士许之 【郑祖元邓元挺杨炯崔融等并为崇文馆学士出玉海】

阴阳家以是日利行师 【宋李纲字伯纪无锡人也纲奏上曰金人之兵张大其势然得其实数不过六万人又大半皆奚契丹渤海杂种其精兵不过三万吾勤王之师集城下者二十余万固已数倍之矣当以计取之不可以角一旦之力莫若扼河津绝粮道俟其刍粮乏人马疲然后击之此必胜之计上意深以为然以二月六日遣兵举事盖阴阳家亦以是日利行师出左编】

谅祚生 【谅祚辽景宗长子小字宁令哥国语谓欢嘉为宁令母藏氏从元昊出猎而生谅祚时宋仁宗庆历七年二月六日也方期岁即位宋史亦出辽史】

刘处玄羽化 【处玄字通妙号长生生于金熙宗皇统七年有东京留守事刘昭毅定海军节度使刘师鲁与处玄甚善二公请讲师弟礼处玄曰公等当代名臣予将逝矣不足为公等友辄示颂云正到峥嵘处何如拂袖归我今须继踵回首及希夷二公览之怆然处玄又曰越八日予归矣二月六日羽化乃八日也师鲁哭之以诗曰与君岁晚得相亲相对忘形略主宾日望师来虚正寝忽惊仙去注同人出史纂左编】

玄州上卿苏仙君上升 【道经】

沐浴令人轻健 【云笈七签】

诗

极目千里外川原绣画新始知平地上看不尽青春 【伊川二月六日登石阁出击壤集】

二月六夜春水生门前小滩浑欲平鸂鶒鸂鶒莫漫喜吾与汝曹俱眼明 【杜甫】

当年霜鬓两青青强说重临慰别情衰衰祗今无可白故应相对话前生

出处依稀似乐天敢将衰去较前贤便从洛社休官去犹有闲居二十年

在郡依前六百日山中不记几回来还将天竺一峰去欲把云根到处栽 【东坡去杭十六年复至留二年而去自拟平生出处老少似乐天二月六日别南北山诸道人而下天竺惠净师以丑石赠行作三绝】

红樱零落杏花开春物相催次第来莫作林间独醒客任从花笑玉山颓
【伊川二月六日送京酝二壶上尧夫出击壤集】

七日

宋太祖幸北园习射 【干德四年】

宋孝宗御选德殿以立皇太子御札宣示大臣虞允文等奏元良天下大本陛下独出睿断为天下得人各再拜称贺 【干道七年以上玉海】

丘处机入见元太祖辞去上曰少俟三五日前日道语有未解者朕悟即行 【处机字通密号长春子生于金熙宗皇统八年从重阳祖师得道先元太祖猎东山有一大豕马蹢失驭豕傍立不敢前左右进马遂罢猎师闻之入谏曰天道好生今圣寿已高宜少出猎坠马天戒也豕不敢前天护之也太祖曰朕已深省神仙之言在我衷焉自是乃简出史纂左编】

斗星下降 【南斗北斗道经】

宜春谢真人飞升 【翰墨大全】

诗

年年收稻卖江蟹二月得从何处来满腹红膏肥似髓贮盘青壳大如杯定知有口能嘘沫休信无心便畏雷幸与陆机还往熟每分吴味不嫌猜 【梅圣俞二月七日吴正仲遗活蟹】

八日

太中署是日于署庭中以大牢祀老人星兼祠天皇大帝太一日月五星钩陈北极北斗三台一十八宿凡应预祠享之官太医给除秽气散药 【隋书】

光武以大牢祀大社于雒阳

【建武二年立大社于雒阳无屋有门墙而已二月八日及腊一岁祀皆大牢出后汉书】

唐中宗皇帝降庐陵王 【中宗皇帝弘道元年以皇太子即位嗣圣元年二月八日降庐陵王圣历元年册为皇太子神龙二年重即帝位谨按中宗皇帝即位后复为皇太子又重绍宝位升降两度自古未有出卓异记】

宋真宗始置言事御史 【天禧元年二月八日侍御史六员出会要】

宋仁宗幸洪福院 【明道二年二月八日出会要】

梁陈典曰二月八日绕城歌曰皎镜台阳宫四面起香风楼形似飞凤城势若盘龙
【寿阳记】

杭州倾城士女集于广惠庙 【杭州旧有广惠庙宋康定元年建以祀广德王张渤者递代褒封二月八日倾城士女集焉出游览志】

同州是日为市四远村民毕集其蚕农所用以至车檐椽木果树器用杂物皆至郡守就子城东北隅龙兴寺前立山棚设幄幕声乐以宴劳将吏 【二月二日亦然四川记】

侯无可先生葬 【先生姓侯氏名可字无可平生以劝学新民为已任主华学之教育者几二十年屡官必治学舍兴弦诵成就材德不可胜道自评事四迁为殿中丞阶宣奉郎勋骑都尉服赐五品元丰己未卒年七十三次年二月八日葬于华阴县出程明道集】

焉耆国风俗崇信佛法是日咸依释教斋戒行道 【焉耆国民贫无纪纲法令婚姻略同华夏死亡者皆焚而后葬其服制满七日则除之丈夫并剪发以为首饰文字与婆罗国同二月八日依释行道四月八日亦然出魏书列传】

释迦佛于是日明星出时成佛

【释迦佛号天人师住世四十九年将金缕僧迦黎衣传法与摩诃迦叶出传灯录】

释道安忽告众僧曰吾当去即日斋毕无疾而卒 【晋太元元年先道安问异僧以来生所生之处异僧以手虚拨天之西北即见云开备观兜率妙胜之景出高僧传】

为芳春节五晨大道君登玉霄琳房四盼天下 【道经】 罗汉成道日 【佛书】

诗

土膏初动麦苗青饱食城头信意行便起高亭临北渚欲乘长日劝春耕

【曾巩二月八日北城闲步】

安心守玄牝闭眼觅黄庭问疾来三七浇愁有半铤风松时落蕊病鹤不梳翎樽空我归去山月照君醒 【东坡二月八日与黄涛僧昙颖过逍遥堂何道士宗一问疾】

八叶蓂开对日华仲春和气烂春葩 【事文类聚】

九日

光武到鲁鲁遣宗室诸刘及孔氏上寿上诣孔氏宅赐酒肉
【建武三十年光武欲幸泰山正月车驾发雒阳二月九日到鲁出后汉书】

宋高宗作玉牒所 【高宗南渡有司失职李易请编次玉牒绍兴二十年二月九日以旧车辂院为玉牒所御书玉牒殿及殿门出玉海】

宋徽宗诏以显谟阁为熙明阁置学士直学士待制 【建中靖国元年二月九日出会要】

采音偷车栏夹杖龙牵 【齐故西阳内史刘寅妻范诣台诉列称叔郎整恒欲伤害夺寅息逵责范米六斗哺食米未展送忽至户前隔箔攘拳大骂突进房中屏风上取车帷准米去二月九日夜整婢采音偷车栏夹杖龙牵范问失物之意整便打息逵整及母并奴婢等六人来共至范屋中高声大骂婢采音举手查范臂任昉奏弹曰理绝通问而妄肆丑辞终夕不寐而谬加大杖出天中记】

东斗降 【道经】

十日

唐高宗是日以天下无虞百司务简每至旬假许不视事以宽百寮休沐
【永徽三年事物纪原】

赵珣上五阵?兵事十余篇宰辅奏用兵以来策士之言以万数无如珣
【宋仁宗康定二年玉海】

张文刚葬于凤凰山 【文刚字常胜湖州乌程人好学能文孝友祥顺再举进士不第卒于宋神宗熙宁五年至六年二月十日葬王荆公为之志铭曰才足以贵而莫之知善足以寿而止于斯呜呼逝矣铭以哀之出事文类聚】

无量寿佛姓周氏端坐而逝 【母熊氏产师有摩尼入怀之兆生而颡面大耳骨瘠如柴标姿异人天性好定自幼即出家尝从一高僧观于海上高僧谓师曰苦海如是师蹙然曰是众生

之所谓苦海而菩提之所谓性海也僧惊异之后结庵湘山之覆釜山自称无量寿主永州刺史韦宙遣使礼请即至四门各见其人其灵变如此不可具述于咸通八年二月十日端坐而逝年一百三十二出彬阳佛传】

女冠乘风飞至玉真观 【唐玄宗驾在东京以李适之为河南尹开元二十四年二月十日有女冠乘风飞至玉真观观者如堵尹怒其聚众答之数十而乘风者不衰祈亦无伤损颜色不变尹大骇奏闻召入内殿问其故乃蒲州紫云观女道士也辟谷轻身因风飞至此赐金帛还蒲州数年又因风飞去不返出纪闻录】

长生护身天尊下降 【道经】

诗

僊跸九成台香筵万寿杯一旬初降雨二月早闻雷叶向朝霁密花含宿润开幸承天泽豫无使日光催 【李义奉和游苑喜雨应诏】

山居少四邻楮叶半为薪野色生遥念空江滞此身风涛春忆越亲旧晚游秦独拟寻鸡犬云萝挂葛巾 【谢皞字皋羽宋粤人】

沧浪一夜起鸣雷雨阵因之续续来所病农家成久旱未论花事有新开书生狂妄常忧国圣代飘零岂弃才儒馆尉曹俱国士好为诗赋咏康哉
【赵章泉二月十日喜雨呈李纯教授去非尉曹】

厄运虽云极群公莫自疑民心空有望天道本无知野帐留华屋青城插皂旗燕云旧耆老宁识汉官仪主辱臣当死时危命亦轻谁吞豫让炭肯结仲由纓泣血瞻行殿伤心望虏营尚存仪卫否早晚复神京 【吕居仁二月十日作此靖康二年二月事五月改建炎】

十一日

宋仁宗崇政殿观教（马凌）军击球 【嘉佑七年】

宋神宗御阁召王珪范镇等讲礼记 【熙宁元年以上玉海】

宋钦宗车驾出城幸虏营 【先靖康元年金人围汴城至二年粘罕遣使入城请帝车驾诣军前议事二月十一日车驾幸虏营后数日还宫七修类稿】

苏东坡饮醉食饱默坐思无邪斋兀然如睡觉写渊明诗一首示子过诗曰东方有一士被服常不完三旬九遇食十年着一冠东坡书毕云东方一士渊明也不知从之游者谁乎若了得此一段我即渊明渊明即我也 【绍圣二年长公外纪】

尹虔子张石生李方回三真人飞升 【翰墨大全】

十二日

汉光武宿奉高遣虎贲郎将先上泰山

【光武车驾正月发雒阳宫二月初到鲁十二日宿奉高出封禅仪记】

唐高祖以总管府改曰都督府

【苏氏演义曰府聚也聚所在图籍簿书之处汉制三公开府故称三府魏晋以后诸王又称府唐高祖武德初边镇襟带之地置总管府武德七年二月十二日改曰都督府出事物纪原】

唐高宗诏造明堂

【干封三年二月十二日诏于是改元总章出礼志】

宋理宗淳佑五年进孝宗光宗两朝御集宁宗实录及理宗玉牒日历上御垂拱殿礼仪使宗室使宰执以下赴实录院右文殿玉牒所经武阁并行烧香礼毕奉迎诸书至和宁门步导至垂拱殿以俟班齐各随腰舆入殿下东西向立 【宋史礼志】

宋朝科制以是日会试锁院 【二月十二日会试锁院十八十九二十则试诗赋论策为三场二十二二十三二十四又试经义论策为二场出七修类稿】

宋高宗以赵鼎与张浚并相 【绍兴五年二月十二日出会要】

包廷藻卒时危坐赋诗有脱胎换骨之句俄顷而逝 【廷藻字文叔号南涧生于宋咸淳乙丑年年五岁见伯父记饮中仙及大历才子名随记随失南涧牵衣问曰翁何健忘耶儿虽耳闻已熟于心矣因历数以对翁大惊及长锐然尚友古人夜则悬灯挟册琅琅声不绝性嗜酒虽百觴不乱当酣适时岸中独坐高歌八咏又无机心抚世酬物洞达出肺腑相示四方来从至正丙子年二月十二日卒寿七十二出宋濂集】

景自芳以是日作寒食至今里人号景村寒食 【自芳蜀雅州人破贼有功出雅州志】

玄宗追赠庄子南华真人 【天宝元年二月十二日追赠唐会要亦出事物纪原】

诗

二月莺花二六辰今年已得十分春非关此地春光早特为公家诞节新 【事文类聚】

十三日

人君正位宜用二月十三日甲子 【庾季才字叔奕幼颖悟诵尚书十二通易好占玄象隋文帝为丞相尝夜召问天时人事季才曰天道精微难可悉察今月平旦青气如楼阙见国城上俄而变紫逆风西行气经云天不能无云而雨皇王不能无气而立今王气已见须即应之二月日出卯入酉居天之正位谓之二八之门日者人君之象人君正位宜用二月十三日甲子甲为六甲之始子为十二辰之初甲数九子数又九九为天数昔周武王以二月甲子定天下享年八百汉高帝以二月甲午即帝位享年四百故知甲子甲午为得天数今月甲子宜应天受命上从之出北史】

翰林李国凤游相国寺见群僧仰面聚观国凤亦从之仰视见日旁有一月一星月如初弦共骇异焉 【元朝于岁首例遣使祭岳渎元顺至正己巳年国凤代祀时因兵乱不出城而望祭嵩兵二月十三日祭毕游相国寺出辍耕录】

唐玄宗移贡举于礼部以侍郎主之礼部选士自此始 【开元二十四年】

宋太宗诏近臣后苑宴射赋诗上亦赋一章赐宰相吕蒙正等 【淳化元年以上玉海】

宋高宗车驾至杭 【建炎三年二月十三日车驾至杭以州治为行宫出会要】

宋徽宗诏以徽猷阁置学士直学士待制 【大观二年二月十三日诏出会要】

中元葛真君生 【翰墨大全】

十四日

宋高宗是日丙子月体如食太史言月未当阙而阙 【绍兴二年通考】

唐文宗以左丞王播兼判太常卿事 【玉海】

唐武后策问举人于洛城殿殿前试人自此始 【载初元年出事物纪原】

高丽入贡有日本国车一乘使者柳洪曰诸侯不贡欲中朝略见工拙耳神宗特诏许进 【元丰二年玉海】

玄同无疾而卒 【薛氏者冯微妻也自号玄同尝独处焚香诵黄庭经有青衣玉女二人降其室光如月照香风四集云紫虚元君闻玄同修行欲亲降于此玄同焚香以候元君降于庭玄

同迎拜元君示以黄庭存修之旨又赐丹一粒曰后八年吞之当遣玉女迎汝于嵩岳至八年二月十四日二女相迓玄同沐浴饲所赐之丹无疾而卒有仙鹤三十六飞集于庭其状若生额中有白光化为紫气沐浴时玄发重生长数寸明日云彩满空忽尔雷电其棺飞在庭中开之惟有空衣异香群鹤浹旬不去出集仙录】

閻丘方远真人飞升 【翰墨大全】

诗

我卜我居居非一朝龟不吾欺届此江郊废井已塞乔木干霄昔人伊何谁其裔苗下有碧潭可饮可濯江山千里供我遐瞩木固无胫瓦岂有足陶匠自至啸歌相乐我视此邦如沫如沂邦人劝我老矣安归自我幽独倚门或挥岂无亲友云散莫追旦朝丁丁谁款我庐子孙远至笑语纷如剪发垂髻覆此瓠壶三年一梦乃复见余 【白鹤新居成苏轼咏陶渊明时运诗似为已发乃次其韵且长子迈相别三年携诸孙万里远至二月十四日欣然有作】

十五日

汉光武车驾上泰山晡时到天门郭使者得铜物其状如锤又方柄有孔莫能识疑封禅具也又东上一里余得木甲木甲者武帝时神也东北百余步得封所西北有石室坛南有玉盘中有玉龟 【马第伯封禅仪记】

玄宗先正月御勤政楼燕群臣连夜烧灯会大雪而罢因命今后以二月望日为之
【开元二十八年旧唐书】

郭（上麻下香） 【奴敦反】 曰若郡内二月十五日失囚者东军当至 【（上麻下香）西平人也少明于易仕郡主簿张天锡末年符氏每有西伐之问太守赵凝使（上麻下香）筮之（上麻下香）曰若郡内二月十五日失囚者东军当至凉祚必终凝乃申约属县至期鲜卑折掘送马与凝凝怒其非骏幽之厩内鲜卑惧而夜遁凝以告（上麻下香）（上麻下香）曰是也国家将亡不可复振出晋书】

齐武帝东昌县山每发异响忽是日有一岩褫落县民方元泰往视岩下得古锤一枚
【永明四年南齐书】

降圣节 【唐武宗会昌元年二月十五日诏我圣祖降诞昌辰改为降圣节则降圣之号唐武宗先以名节不独宋祥符五年以圣祖降延恩殿为降圣节出事物纪原】

贞元节 【重和元年徽宗以太上混元上德皇帝二月十五日生为贞元节出宋史】

上元节 【高丽国二月十五日僧俗燃灯如中国上元节出宋史外国传】

以是日为花朝【提要录】风土记云浙风俗言春序正中百花竞放乃游赏之时花朝月夕世所常言宋制守土官于花朝日出郊劝农

宣府花朝节村民以五谷瓜果种相遗谓之献生城中妇女剪彩为花插之鬓髻以为应节【宣府镇志】

东京以为扑蝶会【天中记】

成都以是日鬻花木蚕器于市因作乐纵观号曰蚕市【成都古蚕丛国民重蚕事成都府志亦出天中记】

限是日私养沙门者送官过期身死【司徒崔浩博学多闻不信佛谓帝曰佛氏虚诞帝以辩博信之会盖吴反杏城关中搔动帝乃西伐至于长安先是长安沙门种麦寺内御驹牧马于麦中帝入观马沙门饮从官酒从官入其便室见大有弓矢矛楯出以奏闻帝怒曰此非沙门所用当与盖吴通谋害人耳诏曰有私养沙门者皆送官曹不得隐藏限今年二月十五日过期不出沙门身死容止者诛一門出魏书释老志】

周穆王是日暴风忽起林木伤折天地震动西方有白虹十二道南北通过不灭穆王问太史扈多曰是何征也对曰西方有圣人现耳是时涅槃【周昭王二十四年江河泉池忽然汎涨大地震动有五色光入贯太微太史苏由奏曰有大圣人生于西方一千年外声教及此昭王即敕镌石记之埋于南郊天祠前至穆王五十二年二月十五日果应出周书异记】

老子生生而皓首【老子者老君也于亳州乘白鹿升天至商纣二十一年再降于岐山之阳周文王为西伯召为守藏史周武王时为柱下史成王时仍为柱下史出史纂左编据南史老子四月八日生】

紫琼真人闻道【饶德兴张模字君范慕道改名道心求太虚真人金丹之法太虚茆与适市见张施丐钱三十文乃曰可授已遂以丹法授复会真州始全火候后紫琼以道授赵缘督子始仙去出道书】

薛洞玄女仙升仙

孙思貌升仙【以上翰墨大全】

诗

长短一年相似夜中秋未必胜中春不寒不暖看明月况是从来少睡人【徐凝二月望日作】

倏忽韶光一半过寒威犹自压暄和故摧春色欢终减屡失花期日旋那病骨不禁风料峭衰
惊难遏醉吟哦凭阑更为芳菲惜重取轻苦拥旧科 【梅圣俞二月十五作】

十六日

宋太祖生于洛阳夹马营以为长春节 【唐明帝登极每夕于宫中焚香祝天曰某胡人因乱
为众所推愿天早生圣人为生民主明年丁亥二月十六日宋太祖生于洛阳夹马营初太祖
母杜氏梦日入怀而孕生之夕神光照室胞如菡萏异香馥郁人因号其地为香孩儿营建隆
元年群臣上表曰轩帝生于寿丘发绕枢之异夏禹诞于石纽流贯昴之祥莫不炳耀灵符延
长宝历谅惟圣德允协昌符请以二月十六日为长春节出长编】

宋太祖幸 【玉津园阅士卒】 骑射张乐赐从官饮 【干德四年二月十六日出会要】

宋太宗幸西陵锦院命近臣纵观织室机杼 【兴国三年二月十六日出会要】

宋仁宗赐百官福酒又作藉田礼毕诗赐宰臣吕夷简等次韵和进 【明道二年玉海】

齐竟陵王子良见佛从东来 【子良幼舍胜慧结志隆云诚感恳征亟发灵应以永明七年二
月十六日于西第在内堂法会见佛从东来威容显曜俛而微笑既而咳唾白如凝雪以手承
捧变为玉稻子良尝招致名僧讲论佛法数于祇园斋戒大集朝臣世以为失宰相体武帝不
豫子良后造沙门于殿户前诵经武帝为感梦见优昙钵花子良案佛经宣旨使御府以铜为
花插御林四角出法苑亦出天中记】

胡惠起命弟子于伏龙冈造坟解蜕 【惠起字警俗唐则天以蒲轮召之引见武成殿问仙术
惟陈道德帝王治化之原遣使送归复赐书有曰轩历之广成汉朝之河上唐畏庆三年二
月十六日命弟子于伏龙冈造坟解蜕年数百岁谥嗣真先生出列仙传】

观音成道日 【藏经】

诗

昨日花朝正艳阳今朝昴宿为储祥 【事文类聚】

十七日

唐太宗召三品以上赐宴于元武门太宗操笔作飞白书群臣就太宗手中竞取散骑常侍刘
洎登床引手然后得之其不得者咸称洎登床罪当死请付法太宗笑曰昔闻婕妤辞辇今见
常侍登床 【贞观十八年玉海】

宋真宗幸开封府射堂命宗室牧伯射帝中的者七 【祥符二年闰二月十七日出通典】

宋高宗赐陈梦协束帛 【绍兴十八年陈梦协进十七史蒙求给事中韦寿成看详高宗二月十七日加赐束帛出会要】

唐张说除荆州大都督府长史是日到任上谢表云拜命荒服浮舟遄沂臣以二月十七日到州山列楚望水横南纪德非羊祜迹谢朱均何以镇静流亡攘除猛虺末云愧乏才能不足宣畅皇风敢竭心力少冀上酬玄造 【楚通志】

陈正懿严通远升仙 【翰墨大全】

诗

一年好事一番新才过花朝两日辰 【事文类聚】

十八日

秦州地震先秦州百姓闻州西北地下殷殷有声俄而地震庐舍尽坏地坼而复合经时不定 【玄宗令左丞相萧嵩致祭山川五行志】

孔子卒 【孔子卒于哀公十六年四月乙丑即今之二月十八日此孔氏子孙相传者若谓卒于己丑或误亦载于四月十八日出山堂肆考】

十九日

泰山云气成宫阙 【汉光武封禅二月十九日泰山云气成宫阙百官皆见之至二十一日东南极望有白气广数丈出封禅仪】

真宗崩 【干兴二年二月十九日崩仁宗即位群臣见帝帝敕曰先皇帝奄弃万园凡中外将校并加存抚群臣拜舞称万岁出宋史】

宋哲宗诏曰汉家致孝有朝夕供御之庭唐室取颜严岁时庆贺之礼逮于列圣咸有旧章建以太皇高太子宫曰崇庆宫尚太子宫曰隆佑宫 【哲宗元佑元年二月十九日诏出玉海】

宋孝宗诏建石经阁于国子监上亲题额 【淳熙四年二月十九日诏出会要】

观音生辰 【佛书】

诗

君念世上川嗟子老瘴天那堪十日内又长白头年 【元祜二月十九日酬王十八全素】

二十日

唐昭宗葬于和陵 【天佑元年通考】

玄宗开元八年敕都督刺史品卑者借绯及鱼袋 【旧制凡授都督刺史阶未及五品并听着
绯佩鱼杂任则停则借绯之制自唐明皇始宋朝赐绯者亦借紫而相承不佩鱼出事物纪原
】

宋太祖干德四年知贡举王佑上进士诸科十五人时陶谷子邴中第命中书覆试 【玉海】

宋仁宗御殿试进士得王尧臣已下三百七十七人 【天圣五年二月二十日出通典】

苏辙生 【辙字子由号颍滨谥文定轼之弟出苏氏谱】

元成宗戊戌年是日张尚书汉臣赵松雪学士费北山漕侯同在杭州泛舟过西湖登岸将游
水乐洞行里余逢一尼寺赵公偕二公入寺俄而从人来报张公老仆戎显卒死矣亟回至其
所呼救不苏忽有二道士一老一幼云不妨老者于死人面上吹呵幼者就篱落摘一青叶度
于老者若作法书符状死人再生顷之失道士所在
【道士貌宛似世所画鍾吕二仙像出纯阳传】

北斗出游

保德真君降 【以上翰墨大全】

诗

平生拙人事出走临东藩纷此狱讼地欣承刀笔闲漾舟明湖上清镜照衰颜春风随我来扫
尽冰雪顽花开满北渚水绿到南山鱼鸟自翔泳白云时往还吾亦乐吾乐放怀天地间顾视
彼夸者锱铢何足言 【曾巩字子固二月二十日西湖作】

五十日春逢诞节八年岁寿属凝香 【事文类聚】

二十一日

宋真宗诏曰緬惟烈祖常幸旧都其明堂殿前三门改为太极门
【景德四年二月二十一日诏其明堂殿即太极殿也出会要】

宋真宗宴宗室于永芳园近臣于会节园又命帅臣内职饮射 【景德四年出玉海】

怀光拔其军居咸阳 【唐右武锋兵马使石演芬本西域胡人怀光养以为子怀光潜与朱泚通谋演芬遣郃成义诣行在告之请罢都统之权成义告怀光子璿璿密白其父怀光召演芬责之曰我以尔为子奈何欲破我家今日负我死甘心乎演芬曰天子以太尉为股肱太尉以演芬为心腹太尉既负天子演芬安得不负太尉乎演芬胡人不能异心惟知事天子苟免贼心而死死甘心矣怀光使左右齎食之皆曰义士也可令快死以刀断其喉而去怀光二月二十一日拔其军居咸阳出考异】

黄山谷过洞庭 【山谷作承天院记朝廷谓其幸灾谤国自鄂谪宜州时崇宁二年也次年二月二十一日过洞庭经潭衡至永州游太平寺登阁赋诗宋学士集】

顾欢题柱云三十年二月二十一日终 【欢字景怡吴郡盐官人年六岁知六甲家贫父使驱田中雀欢作黄雀赋而归雀食过半父怒欲撻之见赋乃止后又母亡浆水不入口六十日庐于墓开馆聚徒数百人欢早孤每读至哀哀父母辄执书痛泣征为杨州主簿不就上赐麈尾素琴元明元年又征为太学博士不就欢晚节服食不与人通每旦出户山鸟集其掌取食事黄老道解阴阳书为数术多效验初元嘉末出都寄住东府忽题柱云三十年二月二十一日终赋诗曰精气因天行游魂随物化克死日卒于剡山身轻柔软时年六十四出南齐书文学传】

女络与父俱浮江上 【符县长赵祉遣吏先尼和以永建元年十一月诣巴邵没死成濡滩子贤求丧不得女络年二十五岁求之亦不得乃乘小船至父没处哀哭自沈见梦告贤曰至二月二十一日与父俱出至期父子俱浮江上郡县上言为之立碑以旌孝诚后汉作叔先雄水经】

二十二日

客星在舆鬼东北 【建武三十一年有客星焰二尺许至明年二月二十二日在舆鬼东北舆鬼尸星主死亡客星居之为死丧后光武崩出通考】

唐玄宗祠后土太史奏荣光出河休气四塞祥风绕坛日扬其光 【开元十二年初有司奏修坛掘出铜鼎二又掘出古砖有篆书千秋万岁长乐未央字又赤兔见坛侧出玉海】

唐昭宗生于东内以为嘉会节 【昭宗懿宗第七子咸通八年生出旧唐书】

丹阳真君上升 【真君宁海州人马姓钺名字玄宝因重阳真君语悟而请师于家后属家政于三子庭珍庭瑞庭珪遂弃家修道真君以所得纯阳金丹秘诀授之遂顶三髻而成道仙升于是日焉有金玉渐悟行化成道圆成精微六集及语录一帙行于世出道书据左编事在十二月二十二日并录】

诗

莫褪尧阶八叶桃翻禹浪三层 【事文类聚】

二十三日

宋太祖内出御札曰渴听说言庶臻治道令朝臣以次转对御书大宋一统赐王溥
【建隆二年玉海】

宋仁宗御崇政殿西阁四壁各张画图前代帝王美恶可为劝戒者命两府观之既而宣天章阁侍讲曾公亮讲毛诗王洙读祖宗圣政录丁度读前汉书数刻而退 【庆历四年宋史】

包拯论宋庠 【拯于二月二十三日具札子论庠曰庠秉衡轴首尾七年殊无建明少效补报但阴拱持禄窃位素餐无耻之甚也出文鉴】

保德真君生 【道经】

诗

二月二十三木兰开折初初当新病酒复似久离居悲绝更倾国惊心闻远书紫丝何日障油壁几时车弄粉如伤重调红或有余波痕空映袜烟态不胜裾桂岭含芳远莲塘属意疏瑶姬与神女长短定何如 【李义山是日作】

二十四日

流星大如桃出天津入紫宫须臾有细流星或五或三相续又有一大流星从紫宫出入北斗须臾又一大流星出贯索中经天市垣诸流星并向北行至晓不可称数 【宋文帝元嘉二十年二月二十四日流星占曰天子之使又曰庶民惟星星流民散之象至二十七年索虏残破青冀徐兖等州民死大半出天文志】

宋真宗是日幸开封府射堂谓从臣曰朕昔尹京兆先帝为创此堂俾之习射周览久之多所感慕又至堂阅太宗御书图画数十轴制曰昔东汉之隆过宛陵之故第正观之盛临庆善之旧宫所以申恺乐之私宣优游之泽朕顷在储邸获尹神京用修相圃之仪遐拟宣猷之地知枢密院事王钦若上驾幸旧邸七言诗上作歌以荅仍诏褒之 【玉海】

夏竦上新集古文四声韵

【宋仁宗庆历四年二月二十四日知亳州夏竦上四声韵五卷出会要】

勃泥国入贡 【宋神宗元丰五年二月二十四日入贡勃泥在西南海中前代未尝朝贡太宗兴国二年其王尚打遣使奉表贡龙脑玳瑁馆于礼宾院赐鞍马出会要】

长山张舒宋文帝元嘉九年是日忽见一人衣朱衣执青柄马鞭云可随我去顷之以丝绳系长梯令舒上梯仍造大城绮洞其地如黄金又有一人不冠独坐绛纱中语舒曰主者误取汝从此神于占卜舒不觉受其术 【出异苑】

诗

花朝清晓雨初收瑞气祥风满玉楼蓬矢重逢三八日椿龄再祝八千秋 【事文类聚】

二十五日

唐玄宗省弘文馆校书两员 【开元七年置弘文馆校书四员崇文馆校书两员至二十二年二月二十五日省弘文馆两员出会要】

宋徽宗封孔鲤泗水侯偃沂水侯 【崇宁元年二月二十五日出王海】

李全以是日事为吾之罪 【李全潍州北海望家子宋人也锐头蜂目弓马趫捷能运铁枪时号李铁枪元兵至山东母与兄俱死焉全与张国明等曰我乃不忠不孝之人众曰节使何为有是言也全曰糜费朝廷钱粮至多乃杀许制置不忠我兄被人杀不能复报不孝二月二十五日事吾之罪也十一月十三日事谁之罪耶盖指（王卓）与夏全也出左编】

金可记上表言臣奉玉皇诏为英文台侍郎明年二月二十五日当上升时宣宗以为异至期春研花慢果有五云攒簇鸾翔鹤集笙鸣箫奏羽盖琼轮彩幢云幡仙仗蔽空升天而去士庶观者莫不瞻礼叹异 【金可记海外新罗人也宾贡进士性沈静好道服气炼形博学强记属文清丽于终南山子午谷葺居焚香静坐若有所思又诵道德及诸仙经不倦后三年航海归本国而后来宣宗征入内不就又求见玉皇诏以为别仙所掌不留人间遂赐宫女四人又遣中使二人侍左右可记独居静室宫女中使多不接近每夜空内常有客谈笑声中使窃窥但见仙官仙女付列至二月二十五日升天而去出续仙传】

诗

老景已邻周尚父庆门方似汉堂贤一杯仰祝椿松寿岁岁流觞八日前 【事文类聚】

二十六日

文宗是夜四更至五更四方中央流星大小二百余并西流有尾迹长二丈 【开成四年出天文志】

宋真宗诏加中岳中天王为崇圣中天王
【祥符四年后又加中岳为中天崇圣帝出事物纪原】

唐文宗因是日寒食节宴群臣于麟德殿杂戏人弄孔子上曰孔子古今之师安得侮渎亟命驱出【开成三年出玉海】

宋太祖幸迎春苑习射中的者三从官称贺【建隆二年二月二十日出会要】

宋真宗宸妃李氏薨

【仁宗明道元年薨后追册为庄懿皇太后葬永定陵西北晏殊撰墓铭出宋史礼志】

李昼为许州吏永春二年是夜归伯梁河见路傍有冢去路约二十步冢上有穴大如盘有火光昼异之下马至冢观焉见五女子衣华服相坐穿针俱低头就烛昼呼之五烛皆灭五女亦失所在昼恐上马而走五炬火从冢出逐昼昼走不能脱以鞭挥拂为火所焚行十里方达伯梁河火始灭【明日看马尾烧尽后遂目为五女冢今存焉出传异记】

虚静冲和徐真人生【翰墨大全】

诗

仲月蔼芳景内庭宴群臣森森列干戚济济趋钧陈大乐本天地中和序人伦正声迈咸濩易象合羲文玉俎映朝服金钿明舞袪韶光雪初霁圣藻风自熏时泰恩泽溥功成行缀新赓歌仰昭回窃比华封人【二月二十六日春和圣制麟德殿会百寮观新乐权德与作】

夜入磻溪如入峡照山炬火落惊猿山头孤月耿犹在石上寒波晓更喧至人旧隐白云合神物已化遗踪存安得梦随霹雳驾马上倾倒天瓢翻【东坡二十六日至磻溪未明作】

不到峰前寺空来渭上村此亭聊可喜修径岂辞扃谷映朱栏秀山舍古木尊路穷惊石断林缺见河奔马困嘶青草僧留荐晚餐我来秋日午旱久石床温安得云如盖能令雨泻盆共看山下稻凉叶晚翻翻【东坡二十六日自磻溪往阳平憩于麻田青峰寺之下院翠雨亭】

卯酒困三杯午餐便一肉雨声来不断睡味清且熟昏昏觉还卧展转无由足强起出门行孤梦犹可续泥深竹鸡语村暗鸠妇哭明朝看此诗睡语应难读

【东坡二十六日雨中熟睡至晚强起出门作】

二十七日

宋真宗御水心亭垂钓遂宴金华殿小苑花皆太宗命中黄门所植滋茂异常帝作赏景观花诗以赐从官【祥符三年】

宋真宗召近臣于后苑翔鸾阁移幸流杯殿登象瀛山翠芳亭命从臣赋诗遂宴玉宸殿

【祥符九年以上玉海】 蒋大士生【大士既长孝父母睦兄弟日诵金刚经至徽宗崇宁癸

未豁然顿悟遂别父母妻子就浪石寺立坛演法尽蠲火食升妊岩趺坐而化其徒遂于寺立塔至今真身不坏大士江华人于神宗熙宁甲寅年二月二十七日生禅宗志】

斗星降 【道经】

诗

横槎晚渡碧涧口骑马夜入南山谷谷中暗水响泂泂岭上疏星明煜煜寺藏岩底千万仞路转山腰三百曲风生饥虎啸空林月黑惊麋窜修竹入门突兀见深殿照佛青荧有残烛媿无酒食待游人旋研杉松煮溪蕨板阁独眠惊旅枕木鱼晓动随僧粥起观万瓦郁参差日乱千岩散红绿门前商贾负椒蕘上后咫尺连巴蜀何时归耕江上田一夜心逐南飞鹄
【东坡二月二十七日自阳平至斜谷宿于南山中蟠龙寺作】

二十八日

晋高祖生以为天和节 【冯导等表曰斗柄正卯律吹仲春当帝一出震之方是天地同和之日请以二月二十八日为天和节庶夫称觴万寿稍申将顺之心节配四时永洽好生之德从之天中记】

唐太宗诏曰自古皇王褒崇勋德既勒名于钟鼎又图形于丹青是以甘露良佐麟阁着其美建武功臣云台纪其绩长孙无忌等二十四人宜酌故实并图画凌烟阁庶念功之怀无谢于前载旌贲之义永贻于后昆 【太极宫中有凌烟阁在凝阴殿内功臣阁在凌烟阁南颉利既平太宗置酒于此贞观十七年二月二十八日诏出韦述而京记】

程颐母侯氏卒 【侯氏好文平生诗不过二三篇皆不存独存夜闻鸣鴈诗诗曰何处惊飞起
離離过草堂早是愁无寐忽闻意转伤良人沙塞外羈妾守空房欲寄回文信谁能付与将侯氏从夫官岭外偶迎凉露寝遂中瘴疔及北归道中疾单召医视脉曰可治谓二子曰给尔也皇佑四年二月二十八卒于江宁出宋文鉴】

群鹤飞绕苏山 【苏耽真人汉文帝桂阳郡人也群鹤随之升天至宋宁宗嘉定五年加封静惠真人是岁二月二十八日忽有群鹤飞绕苏山诒至郴乃于是日其灵应如此耽事母潘氏极孝母百岁无疾而卒乡人殯于城东人望之若有白马系林间遥闻真人有哭声郡守张邈率僚属往吊之求见真人仙颜出半面光彩照人人垂一大手有绿毛长尺余因谓手曰山谷幽远日暮难归遂手掷仙经成桥令众闭目而渡少焉即抵城五月十五七月十五亦载出郴阳仙传】

诗

君臣相悦同鱼藻兄弟连荣比棣华岁岁重三前六日寿觴何惜泛流霞 【事文类聚】

二十九日

宋真宗赏花宴于后苑作仲春赏花钓鱼诗群臣皆赋遂射于水殿尽欢而罢
【咸平三年出玉海】

龙见于兴庆池 【宋高宗绍兴二十年出玉海】

清静元君上升 【宁海孙忠显女名不二号清静散人适马宜甫生子三重阳真君以分梨十化说授之与其夫共弃家学道后元君居洛阳风仙洞夫妇日相激励道成有诗词行于世出道书】

圣母元降日 【道经】

三十日

中人驰召宰相马奔乏死于道 【宋申铎字庆臣少而孤擢进士敬宗时拜待读学士文宗即位再转中书舍人为翰林学士帝恶宦官权宠震主再致宫禁之变而王守澄典禁兵偃蹇放肆欲剷除木根思可与决人事者察申铎忠厚因召对与朝臣谋去守澄等且倚以执政申铎顿首谢未几拜尚书左丞踰月进同中书门下平章事乃除王播京兆尹密谕帝旨播漏言而守澄党郑注得其谋太和五年遣军候豆卢革诬告申铎与漳王谋反守澄持奏浴堂将遣骑二百屠申铎家宦官马存亮争曰谋反者独申铎耳守澄不能对时二月三十日群司皆休中人驰召宰相马奔乏死于道易所乘以复命至中书中人唱曰所召无宋申铎申铎始知得罪望延英门以笏叩额还第出白孔六帖】

庾翼题纸背曰二月三十日 【刘连州寄柳子厚诗云书成欲寄庾安西纸背应劳手自题闻道近来诸子弟临池寻已厌家鸡注云家有右军书每纸背庾翼题云王会稽六纸二月三十日出白孔六帖】

每岁祭袁双庙 【丹阳县有袁双庙先为桓宣武诛求立庙庙未成大有虎灾被害之家梦双催功甚急百姓速成之每以二月三十日祭庙至元嘉五年村人于庙后见一物人面鼉身自言曰某袁双也出异苑】

祖师授王处一正法 【处一宁海东牟人号王阳一日偶至山中遇一老人坐大石谓之曰子异日为道教宗主又尝闻空中人间曰汝识我否我乃玄庭宫主是后狂歌谩舞居牛仙山庵祖师知其为玄门大器二月三十日授以正法其处一诞辰载于三月十八其上升载于四月二十三出史纂左编】

大慧真人下降 【翰墨大全】

诗

八年二月晦山梨花满枝龙门水西寺夜与远公期宴坐自相对密语谁能知前后际断处一念不生时 【白居易神照禅师二月三十日同宿】

立马柳花里别君当酒酣春风渐向北雪鴈不飞南明晓日初一今年月已三鞭羸去暮色远岳起烟岚 【贾岛二月三十日别鄂中友人】

寒食今年二月晦树林深翠已生烟遶城骏马谁能借到处名园意尽便但挂酒壶那计盞偶题诗句不须编忽闻啼鵙惊羈旅江上何人治废田 【东坡二月三十日和子由寒食】

日涉编卷三

楚应城陈阶升也甫编辑

邑人徐养量叔弘甫校刻

周师旦几几甫

张正初万福甫

赵问馭叔甫全阅

三月〔一〕

三月建辰辰震也谓时物尽震动而长也【合璧事类】

姑洗辰之气也三月建焉【周礼】

日在胃昏七星中旦牵牛中【礼记】

春日载阳【注三月东京赋】

青阳告谢朱明肇受【文选沛安仁赋】

季春行夏令则民疫时雨不降山陵不收行秋令则天多沈阴淫雨兵革起行冬令则寒气发草木肃国有大恐【吕氏春秋】

为病【尔雅】

曰暮春亦曰季春晚春大春余春末春【梁元帝纂要】

晋武帝恣其所之是月宫人竞以竹叶插户盐汁洒地以引帝车【泰康二年晋纪】

唐中宗宴于桃花园以学士李峤等桃花诗令宫女歌之辞既清婉歌仍妙绝【景龙文馆记】

曲江贵家游赏则剪百花装成狮子互相送遗狮有小连环欲送则以蜀锦流苏牵之唱曰春光且莫去留与醉人看【曲江春宴录】

北齐卢士深妻有才学是月以桃花沫儿面咒曰取红花取白雪与儿洗面作光悦取白雪取红花与儿洗面作光华取雪白取花红与儿洗面作花容【虞世南交略】

洛阳人家寒食装万花舆煮桃花粥【金门岁节记】

寒食煮麦粥研杏仁为酪以饧沃之【酪乳浆也饧飴也或云即米糖也出玉烛宝典】

寒食俗皆画鸭子以相饷【邺中记】

寒食以面为蒸饼样团枣附之名曰枣糕【合璧】

北方戎狄为秋千戏以习轻趺【唐天宝宫中至寒食竞筑秋千戎狄遗俗令宫女辈嬉笑以为乐帝呼为半仙之戏涅盘经谓之胃索胃音绢出山堂肆考】

古麻刺国王服红黄衣以金线织丝布缠头诣佛寺中坐红床使人舁之贵臣如王之服或青绿绯白粉红褐并缠头跨马【外夷传亦出一统志】

浙西天鸣若转磨无云而雨【僖宗中和三年出通考】

日散光如血下流所照皆赤日中若有飞燕【惠帝光熙六年天文志】

有二星斗于中天一星陨

【德佑元年占二星乃宋元之问斗于中天乃争衡之象一星陨乃宋亡之兆也出宋史】

五星交互经天纵横无常【晋惠帝永宁元年闰三月凡昼而星见于上者为经天占为不臣为更主五星经天古所未有后怀愍为刘氏所执五胡争起分据中国亦古所未有出晋书】

雨谓之迎梅【风土记】

雨曰榆莢雨【初学记】

大雨有物坠于地如猪【唐德宗贞元四年通考】

大雪平地三尺余其气如烟其味苦【浙西天复三年五行志】

天雨土【治平元年】

雨黄土【熙宁七年以上宋史】

雨火 【宋文帝元嘉二十九年通考】

雨毛 【潭州熙宁元年五行志】

雨白毛

【武帝天汉元年京房易传曰前乐后忧厥妖天雨羽又曰邪人进贤人逃天雨毛出汉书】

雨毛如线而绿

【彰德元顺帝至元三年俗呼云菩萨线民谣云天雨网民起怨中原地事必变元史】

雨血 【惠帝永康元年后赵王伦篡位迁帝于金墉城其后天下大兵祸流王室晋书】

雨物若果核五色间错光莹坚固破其实食之似松子仁人皆曰娑婆树子至闰三月复雨如初 【元至正壬辰年后红巾犯省治雨核之地悉被兵火湖州遂陷仪凤桥四向焚戮特甚追思雨核时桥四向为最多出辍耕录】

雨桂子于台州经十余日乃止 【垂拱四年占曰天雨草木人多死出唐书】

黄河是月水名桃花水 【水衡记与二月同】

大行山圣人崖有声 【武德二年俗谓圣声有寇至出唐书】

石竹山大石自移声如雷 【干道二年石竹山在福清县出五行志】

登州地震岨嵎山摧每震海底有声如雷 【庆历五年出宋史】

云阳石燃方丈昼则如灰夜则有光投草木则焚 【唐贞观十三年出通考】

京都夜有火光转行民家相惊噪 【延熹九年后汉桓帝】

长安宣平城门外屋无故自坏

【献帝初平二年后司徒王允使中郎将吕布杀太师董卓夷三族通考】

顺天门楼东柱已倾毁而自起 【唐高祖武德九年占曰木仆自起国灾通考】

大同路黑气蔽西方有声如雷顷之东北方如火交射中天遍地俱见火光空中有兵戈声
【元顺帝至正十八年元史】

有声若牛出许昌城 【晋惠帝元康九年后废愍怀太子幽于许宫贾后遣黄门孙虑杀太子

击以药杵声闻于外是其应也通考】

扬州桑生瓜

樱桃生茄 【以上俱孝宗淳熙十六年此草木之妖宋史】

高平获赤雀太原获赤乌 【高祖禅授之年隋书】

神雀五采以万数集长乐未央 【汉宣帝四年改元神爵】

凤凰集太山陈留 【汉宣帝元康元年】

吴孙权海盐县二黄龙见井中 【赤乌五年以上宋书符瑞志】

两龙江中腾跃升天五色遥映江水

【初承圣二年父老聚而悲相谓曰地龙已去国其亡乎帝踰年而遭祸出王僧辩传】

峨眉山是月必有一兽开路或虎或鹿或猿人方敢行不然堕深崖中 【野记】

滑州刺史李邕献马一匹肉鬃麟臆嘶不类马声 【唐玄宗开元二十九年邕任淄青遇一老翁云圣主将得龙马以应太平遂于青州民家获而献之出六帖】

肆州阳曲县羊生羔一头二身一牝一牡三耳八足

【太和二十三年后高祖崩六辅专事出魏书】

诗

江南季春天莼菜细如弦池边草作径湖上叶如船 【严维字正文山阴人状江南三月】

三月雪连夜未应伤物华只缘春欲尽留着伴梨花 【杜甫】

蜀国曾闻子规鸟宣城还见杜鹃花一叫一回肠一断三春三月忆三巴

【李白宣城见杜鹃花】

寻得桃源好避秦桃红又见一年春花飞莫遣随流水怕有渔郎来问津

【谢枋得字君直号迭山见庆全庵桃花】

肠断春江欲尽头杖藜徐步立芳洲颠狂柳絮随风舞轻薄桃花逐水流 【杜甫漫兴】

百亩庭中半是苔桃花净尽菜花开种桃道士归何处前度刘郎今又来
【刘禹锡字梦得游玄都观】

林下居常睡起迟那堪车马近来稀春深昼永帘垂地庭院无风花自飞
【邵雍字尧夫暮春吟】

蒲芽荇带绕清池锦缆牵舡水拍堤好是寒烟疏雨里远峰青处子规啼
曲阑干外雨垂垂罗幕风轻燕子飞独倚危楼思往事落红撩乱点春衣
岂蔻枝头春事休风吹万点只供愁杜鹃啼破三更月梦遶云间百尺楼

门前杨柳暗沙汀雨湿东风未放晴点点落花春事晚青青芳草暮愁生 【以上谢无逸】

二月已破三月来渐老逢春能几回莫思身外无穷事且尽樽前有限杯 【元稹】

病香无力被风吹多在青苔少在枝马上行人莫回首断君肠是欲残时 【崔櫓暮春对花】

三月江南花满枝风轻帘幙燕争飞游人休惜夜秉烛杨柳阴浓春欲归 【无名氏】

千林欲暗稻秧雨三月尚寒花信风九节老筇应不惜步随流水看残红 【俞师郝】

侵阶草色连朝雨满地梨花昨夜风蜀魄不来春寂寞楚魂吟夜月朦胧 【寇莱公】

几家台榭凤城东野水平分处处通眼见落花留不得此时多少恨东风 【元稹】

一年春事又成空拥鼻微吟半醉中夹道桃花三月暮马蹄无处避残红 【张公举】

春光过限只须臾榆荚杨花扫地无却忆菩提湖上寺绿荷擎雨看疏珠 【僧梵崇】

江树青山日欲斜长郊草色绿无涯游人不管春将尽空遣庭花踏落花 【欧阳公】

古今春过知多少人不留春头白早君欲留春心可知为君更赋留春诗留春莫只留花住花
老春风亦随去孰若芝兰香不歇亭下长如二三月 【杨次公】

清明

春分后十五日斗指乙为清明万物至此皆洁齐而清明 【孝经纬】

清明三月节日在娄

白阳云出奎 【易卦通验】

清明雨为泼火雨 【河朔人谓泼火雨退斋雅闻】

清明雨为杏花雨 【杏花开时正值清明后必有雨也谓之杏花雨古诗沾衣欲湿杏花雨吹面不寒杨柳风提要录】

夏官司燿季春出火 【周礼】

节过藏烟时当改火 【白居易云】

清明之日桐始华田鼠化为鴽 【后五日虹始见天子居青阳右介月令】

清明之日桐不华岁有大寒田鼠不化国多贪残虹不见妇人乱色戴胜不降桑政教不平
【周书时训】

明庶风后四十五日清明风至则出币帛使诸侯 【立夏长养布恩惠故聘问诸侯淮南子】

唐朝清明取榆柳之火以赐近臣顺阳气也 【辇下岁时记】

禁火乃周之旧制唐宋清明日赐新火亦周人出火之义 【会要】

长安每岁清明小儿于殿前钻火先得者进上赐绢三疋碗一口 【唐辇下岁时记】

清明湖州进紫笋茶 【岁时记】

清明进新彩鸡子 【唐书】

清明淘井 【黄州俗出志林】

竹山县有地二顷不生树木惟有茅茨每岁清明日祭而燎之以卜岁之丰歉草尽而丰

清明折柳插门通贵贱男女皆祭扫莹墓自节日始至盈月乃止 【以上楚通志】

明皇乐民间清明节斗鸡戏及即位置鸡坊索长安雄鸡金尾铁距高冠昂尾千数养之选六军小儿五百使之教饲时贾昌为五百小儿长天子甚爱幸金帛之赐日至其家
【明皇以乙酉生而喜斗鸡是兆乱之象也东城父老传】

唐中宗景龙四年清明日幸梨园命侍臣为拔河之戏以大麻繩两头系十余小索每索数人执之以挽力弱为输时七宰相二驸马为东朋三相五将为西朋仆射韦巨源少师唐休璟以年老随繩而踣久不能起帝以为乐笑 【文馆记】

清明新进士开宴集于曲江亭既彻饌则移乐泛舟又有月灯阁打球之会 【东城父老传】

清明前后十日城中士女艳妆浓饰金翠琛璃接踵联肩翩翩游赏画舫箫鼓终日不绝
【武林旧事】

京师清明日四野如市芳树之下园圃之内罗列杯盘互相酬劝都城之歌儿舞女遍满庭台抵暮而归 【东京梦华录】

诗

紫禁宿初回清明花乱开相邀直城外远远上春台 【权德与】

今日清明节园林胜事偏暗风吹柳絮新火起厨烟 【贾岛】

清明寒食好春园百卉开彩绳拂花去轻球度阁来 【韦应物】

好风胧月清明夜碧砌红轩刺史家独歇回廊行复歇暗听弦歌暗看花 【白居易】

当年寒食好风轻触处相随取次行今日清明汉江上一身骑马县官迎 【元稹】

自叹清明在远行桐花覆水葛溪长家人定是持新火点作孤灯照洞房
【权德舆清明日次弋阳】

山头兰若石楠春山下清明烟火新此日何穷礼禅客归心谁是恋禅人
【李郢清明日题一公禅室】

无花无酒过清明兴味萧然似野僧昨日邻家乞新火晓窗分与读书灯 【王禹（□尔）】

梨花淡白柳深青柳絮飞时花满城惆怅东栏一株雪人生看得几清明 【东坡】

东城酒散夕阳迟南陌秋千寂莫垂人与长铍卧芳草风将急管度青枝 【王介甫】

春阴垂野草青青时有幽花一树明晓泊孤舟古祠下满窗风雨看潮生 【苏子美】

洛阳城外清明节百花零落梨花发今日相逢瘴海头共惊烂漫开正月 【韩退之】

林卧愁春尽开轩览物华忽逢青鸟使邀我赤松家丹灶初开火仙桃正落花童颜若可驻何惜醉流霞【孟浩然清明日宴梅道文房】

村落清明近秋千稚女夸春阴妨柳絮月黑见梨花白鸟窥鱼网青帘认酒家幽栖虽自适交友在京华【郑谷】

钟鼓喧离日车徒促夜装晓厨新变火轻柳暗翻霜转镜看华发持杯话故乡每嫌儿女泪今日自沾裳【戴叔伦清明送友还乡】

清明千万家处处是年华榆柳芳辰火梧桐今日花祭祠结云骑游陌拥香车惆怅田郎去原回烟树斜【杨巨源】

斜日去不驻好风来有情江城过风雨花木近清明水树闲照影山禽时引声吾年行老矣淹泊蹇何城【张耒】

早是伤春暮雨天可堪芳草更芊芊内官初赐清明火上相闲分白打钱紫陌乱嘶红叱拨绿杨高影画秋千游人记得承平事暗喜风光似昔年【韦庄】

吴山楚驿四年中一见清明一改容旅恨共风连夜起韶光随酒着人浓延兴门外攀花别采石江头带雨逢无计归心何日是路边曳甲正重重【郑准清明日江南作】

几宿春山逐陆郎清明时节好风光归穿绿苧舡头滑醉踏残花屐齿香风急岭云飘迥野雨余田水落方塘不堪吟罢东回首满耳蛙声正夕阳【陈上美清明日与友人游玉塘庄】

上苑连侯第清明及暮春九天初改火万井属良辰颁赐恩逾洽承时庆自均翠烟和柳嫩红焰出花新宠命尊三老祥光烛万人太平当此日空复贺陶甄【史延因清明日赐百寮新火赋诗】

御火传香殿华光及侍臣星流中使马烛耀九衢人转影连金屋分辉丽锦茵焰迎红蕊发烟染绿条春助律和风早添炉暖气新谁家一寒玉犹望照东邻【王濯同前题】

朝来新火起新烟湖色春光净客舡绣羽冲花他自得红颜骑竹我无缘胡童结束还难有楚女腰肢亦可怜不见定王城旧处长怀贾傅井依然虚沾焦举为寒食实藉君平卖卜钱钟鼎山林各天性浊醪粗饭任吾年

此身飘泊苦西东右臂偏枯半耳聋寂寂系舡双下泪悠悠伏枕左书空十年蹴踘将雏远万里秋千习俗同旅鴈上云归紫塞家人钻火用青枫秦城楼阁烟花里汉主山河锦绣中风水春来洞庭阔白苹愁杀白头翁【以上工部清明诗】

谷雨

清明后十五日斗指辰为谷雨言雨生百谷也【孝经纬】

自雨水后土膏脉动乃雨其谷于水【七修类稿雨去声】

历家以谷雨为三月中气【容斋续笔】

谷雨太阳云出张如车盖【易通卦验】

谷雨日萍始生【后五日鸣鸠拂其羽后五日戴胜降于桑命有司无伐桑柘乃修蚕器择吉日大合乐大合乐者吉行射礼出月令】

宋神宗驰射野战至谷雨日止

【元丰二年诏河东陕西诸路旧制马军自十月一日驰射野战至谷雨日止宋史兵志】

西湖之泉以虎跑为最两山之茶以龙井为佳谷雨前采茶旋焙时汲虎跑泉烹香清味冽凉沁诗脾每春当高卧山中沈酣新茗一月【遵生八笺】

谷雨日采茶炒藏能治痰嗽及疗百病【养生仁术】

三月〔二〕

一日

东北方有声如雷【孝武太元十五年三月一日按刘向说苑以为雷当托于云犹君托于臣无云而雷此君不恤于下下人将叛之象及帝崩而天下将乱孙恩桓玄交陵京邑出晋书】

万春节【金史】

开金明池御史出榜晓示许人游赏【岁时记】

晋成帝幸司徒第见王导夫人曹氏如子弟之礼

【咸和六年以人君而敬人臣之妻有亏君德出通考】

唐高宗召李绩等宴于城门观屯营新教之舞名一戎大定乐

【龙朔元年其乐象亲征辽东而用武之势出山堂肆考】

宋哲宗御迓英阁吕大防奏曰仁宗所书三十六事禁中有否请誊写置坐隅以备亲览上从

之【元佑六年玉海】

张天祺卒

【以熙宁九年卒天祺讳戡即载之弟仕历中外二十四年立朝天下耸闻出墓铭】

平定州民魏全母失明卜者王子贞曰明年三月一日有青衣从东南来疗必愈至期见一人着青衣者遂邀入内重设饮食以相待其人曰仆不解医但解作犁耳为主人作之持斧绕舍求犁辕见桑曲枝临井上遂斫下其母两眼焕然见物此曲枝盖井所致

【唐贞观年出朝野僉载】

灌口有太山府君庙每岁是日蜀人往祭之甚众时有一贫士鹑衣百结容貌憔悴众人轻之行次江际众人憩于树阴贫士亦坐石上逡巡谓人曰此水中有一睡龙有一叟曰得见乎贫士解衣入水抱睡龙出腥秽不可近云雾四合风起水涌众惊走贫士沉龙于水底自挂鹑衣而行众惭谢忽不见【野人开话】

谭处端生【处端以金太宗天会元年三月一日生初名玉字伯玉号长真子世为宁海人生而骨相不凡从祖师得道及仙蜕书句以示众曰长真真妙理无为涌出阳神独自归书毕出肱而逝□□纂左□】

房长须云中跨鹤【房长须不知其名宋南渡后隐居武当日以栽杉为事忽遇玄帝化形谕之曰子神清矣惜也无须以手颌之经宿觉有物如丝萦于胸臆视之须已长尺余甲午三月一日清旦云中隐隐见跨鹤之形视故居惟杖履在焉出楚通志】

张治真人飞升【翰墨大全】

诗

春阳以中百昌俱作彼阴冷而忽兴何飞霰之骤落始蒙蔽于阳乌遂潜藏于天幕冰霰杂下温寒相搏纔滚滚而纷揉更霏霏而交错因方就圆填溪满壑迷匹练于素鵬混高云于皓鹤云云【钱惟演因二月晦至三月一日霰雪杂下赋之】

二日

日食在胃二度主廩仓

【东汉安帝永初元年三月二日是时邓太后专政大水伤稼仓廩为虚出通考】

桓玄篡位义旗以是日诛之【隆安三年诛之先晋安帝时百姓忽作懊（怯去去改农）之歌其曲曰草生可揽结女儿可揽撷寻而桓玄篡位义旗以三月二日妇定京都诛之玄之宫女及逆党之家子女妓妾悉为军赏东及欧越北流淮泗皆为人所获故言时则草可结事则

女可擷也出五行志】

宋宰臣以下请理宗御正殿 【端平二年三月二日出通典】

桑道茂署于纸曰李泌三月二日危 【道茂善太一遁甲术德宗素验其数李泌病道茂署于纸曰泌三月二日危泌入见德宗不能步诏归第是日卒出道茂传】

文彦博入覲是日宴彦博于琼林苑赐御制诗 【宋神宗元丰七年玉海】

马谖有功以是日致祭 【顺应庙在叙州府庆符县南广洞祀汉参军马谖有阴佑神木之功有司每岁三月二日致祭出蜀志】

采药者求归 【唐高宗显庆中有蜀郡青城民采药于青城山下斲药深数丈其根渐大如瓮斲之不已渐深十余丈不觉堕中以为必死忽见一穴寻之而出见村落桑柘花卉繁茂遇一叟以胡麻饭与之三月二日求归叟笑曰此仙境非人间明日上巳可谒玉皇采药者驾龙鹤谒玉皇后归世已百余年出太平广记】

僧伽大师端坐而终 【大师西域人也俗姓何氏尝独处一室顶有一穴恒以絮塞之夜则去絮香从顶中出芬馥异常及烧香顶中又以絮塞之师尝濯足人取其水饮之痼疾顿愈唐中宗语师曰京师无雨师取饼水洒之俄顷甘雨大降至景龙四年三月二日于长安荐福寺端坐而终中宗即令荐福寺起塔漆身供养俄而臭气满长安近臣奏曰师欲在临淮故长安臭中宗心许之其臭顿息奇香遍长安即送临淮出纪闻录】

玉皇诞圣日 【玉皇上帝出道经】

陆天师生 【陆修靓翰墨大全】

诗

罗袜凌波洛浦仙谪来潭府话寅缘因嫌曲水香尘浣诞降兰亭禊事前

江边踏青罢回首见旌旗风起春城暮高楼鼓角悲
【工部诗题曰三月二日出郊踏青或云成都事也】

三日

惟三月丙午朏 【孟康曰朏月出也古文月采篇三日曰朏师古曰月采篇书亡出前汉书】

按周礼女巫掌岁时以祓除疾病禊者洁也故于水上盥洁之已者祉也邪疾已去祈介祉也

【应劭】

禊者洁也言自洗濯也或云汉世有郭虞者有三女二以三月上辰一以上巳二日而产三女并不育今时俗以为太忌是日女忌讳不复止家皆适东流水上为祈禳自洗濯谓之禊祠分流行觴遂成曲水案高后祓霸上马融梁冀西第赋曰西北戌亥玄石承输虾蟆吐写庚辛之域即曲水之象今据禊为曲水事应在永寿之前已有祓除则不在高后之后祈农之说于事为当 【南齐志】

晋武帝问尚书郎挚虞曰三日曲水其义何指合曰汉章帝时平原徐肇以三月初生三女至三日俱亡一村以为怪乃相携之水滨盥洗因水以泛觴曲水义起于此帝曰如所谈便非嘉事尚书郎束皙曰挚虞小生不足以知之请说其始昔周公城洛邑因流水以泛酒故逸诗曰羽觴随波又秦昭王三日置酒河曲有金人出捧水心剑曰令君制有西夏及秦霸诸侯乃因此处立为曲水祠二汉相缘皆为盛集帝曰善赐金五十斤左迁挚虞为阳城令

【续齐谐记】

唐太宗贞观三年赐群臣大射于立德门五年赐文武五品以上射武德殿十年赐百僚太射于观德殿唐高宗永徽三年幸观德殿赐群臣大射唐玄宗开元七年赐百官射

【俱三月三日出通典】

禊逸礼也郑风有之盖取诸勾萌发达阳景敷煦握芳兰临清川乘和蠲洁用徼介祉晋氏中朝始多燕胥之乐江右宋齐间以文咏风流遂为盛集 【萧颖士杂录】

魏已后祓禊止用三日不复已 【沈约宋书】

武帝即位数年无子平阳公主求良家女十余人饰置于家帝祓灋而还过平阳公主见所饰美人帝大悦既饮讴者进帝独悦卫子夫 【汉书】

吕后祓还过轺道见物如苍犬据吕后掖忽弗见卜之云赵王如意为祟吕后遂病掖伤 【史记】

武帝登八公山出刘安故台叹望城郭如匹帛之绕丛花 【宋书】

唐中宗祓禊于渭阳赐群臣细柳圈各一云带之免蚤毒 【酉阳杂俎】

晋中宗出禊乘肩輿王导王敦并骑从中宗从容谓导曰卿吾之萧何 【晋中兴书】

张建封入覲值上巳德宗赐宴曲江特命与宰相同座而食 【唐书】

海西泰和六年三月庚午朔诏曰三日临流杯池依东堂小会 【晋书】

华林园中千金堤上作两铜龙相向吐水以注天泉池通御沟石季龙及皇后百官临池会饮
【邺中记】

天泉之南有东西沟承御沟水水北有积石坛是日御坐流杯之处 【戴延之西征记】

歌舞冈越王佗是日登高处 【歌舞冈在广州府出广东志】

白马山是日刺史禊饮于此 【白马山在汉阳府出雍州记】

包令岩以宋县令包拯尝于此修禊故名 【金华府志】

池阳妇女以荠花点油祝而洒之水中若成龙凤花卉之状则吉谓之油花卜 【图经】

取荠菜花铺灶上及坐卧处可无虫蚁 【琐碎录】

长安妓者结钱为龙为帘作钱龙宴 【西京杂记】

四民踏百草时有斗百草之戏祖此 【荆楚记】

都人于曲江头禊饮践踏青草曰踏青 【李绰岁时记】 是日上踏青鞋履
【卢公范馈饰仪】

欲卜蚕善恶以三月三日天阴而无日不见雨蚕大善 【杂五行书】

远近士民祈福于龙桥命曰蚕市 【成都记】

王济诸名士当解禊洛水还乐广问于夷甫曰今日戏乐乎王曰裴仆射善谈名理混混有雅致张茂先论史汉靡靡可听我与王安丰说延陵子房亦超超玄着 【七贤论世说】

开成二年河南尹李待价以上巳日人和气稔将禊于洛滨启留守裴公公召白居易刘禹锡等一十五人合宴于舟中由斗亭历魏堤抵津桥登临泝沿自晨及暮簪组交映歌笑间发美景良辰赏心乐事晋公首赋一章居易为十二韵以献末句云夜归何用烛新月凤楼西
【长庆集】

元佑中秘阁上巳日集西池王仲玉有诗张文潜和最工云翠浪有声黄伞动春风无力彩旌垂秦少游云帘幙千家锦绣垂仲玉笑曰又待入小石调也 【王直方诗话】

郝隆为南蛮参军是日作诗曰娵隅濯清池桓温问何物荅曰名鱼为娵隅桓温曰何为作蛮语隆曰千里投公始得一蛮府参军那得不蛮语也 【世说】

梁商会宾客于洛水周举称疾不往商与亲昵酣饮及酒阑继以薤露歌坐中闻者掩涕举闻而叹曰此哀乐失时至秋果薨 【后汉书】

袁绍大会宾从于薄洛津闻魏郡兵及黑山贼数万人共覆邺城杀守坐中客家在邺者皆忧怖失色绍容貌自若不改常度 【魏志】

夏统诣洛是日王公以下并至南浮桥边襁男则朱服耀路女则锦绮灿烂统在舡中曝所市药虽见此辈稳坐不摇贾充望见奇其节问舡中安坐者为谁统荅曰会稽北海民夏仲御 【统字仲御】 充更就舡与语其应如响充又使女伎服桂襦炫金翠绕其舡三匝统危坐如故若无所闻充等各散曰此吴儿是木人石心也 【夏统别传】

以木雕为兔分朋走马射之先中者胜其负者下马奉胜者酒胜者于马上接盏饮之番呼此节为陶裒花陶裒是兔花是射 【燕比杂记】

河南人齐关妻关应募为千夫长战死妻守节有来强议婚妻给曰吾三月三日有心愿偿是日径往彰德天宁寺登浮图绝顶祝天曰妾本河南名家夫死不敢失节投地而死 【河南府志】

卢充猎见獐便射之随逐不觉失路忽见一黑门如府舍问铃下对曰崔少府宅也进见少府语充曰尊府君为索小女婚故相迎耳成婚毕送充至家母问之具以状对后四年三月三日临水戏遥见水傍有犊车充往开车户见崔女与三岁男其情意如初抱儿还充又与金钿乃别 【续搜神记】

师尼抱孩入醺坛 【景定甲子衡州衡岳观以三月三日玄帝生辰设醺先一日有怀孕师尼至观求宿众恶其厌秽拒之不可令宿门外中夜闻孩声乃尼产焉主者大怒次早尼抱孩欲入醺坛观看众拒之门外拖曳逾时以孩掷地鲜血溅地尼飞入空中拍掌大笑而去视孩则葫芦血则朱砂葫芦内有回仙两字众乃大惊回仙即吕洞宾也出道书】

诗

卜洛成周地浮杯上已筵斗鸡寒食下走马射堂前 【孟浩然】

青郊上巳艳阳年紫禁皇游祓渭川幸得欢娱承湛露心同草树乐春天 【张说奉和三日祓禊渭滨】

乘春祓禊逐风光扈跸陪銮渭渚傍还笑当时水滨老衰年八十待文王 【韦嗣玄奉和渭滨祓禊】

宝马香车清渭滨红荷碧柳禊堂春皇情尚忆垂竿佐天祚先承捧剑人 【沈佺期同前题】

未敢分明赏物华十年如见梦中花游人过尽衡门掩独自凭栏到日斜 【崔涂上巳】

清风丽日满芳洲云幕春筵祓锦流皆言曲侍璜溪宴暂似承槎天汉游 【徐彦伯上巳】

三日欢游辞曲水三年愁卧在长沙每登高处长相忆何况兹楼属庾家
【白居易上巳日登庾楼寄庾三十二】

良时光景长虚掷壮岁风情已闇销忽忆同为校书日每年共醉是今朝
【白居易上巳怀微之】

暮春风景初三日流世光阴半百年欲作闲游无好伴半江惆怅却回舡 【白居易上巳】

当年此日花前醉今日花前病里销独倚破帘闲怅望可怜虚度好春朝
【元稹酬乐天三日见寄】

千红万紫竞繁华莺语多依富贵家上巳兰亭修禊事一年春色又杨花 【宋白玉蟾】

鬓毛垂领白花蕊亚枝红欹倒衰年废招寻令节同薄衣临积水吹面受和风有喜留攀桂无
劳问转蓬 【徐同录林园三月三日宴集杜工部】

东出千金堰西临鴈陂游丝映空转高杨拂地垂绿帟文照耀紫燕光陆离清晨戏伊水薄
暮宿兰池 【沈约上巳】

山前好风日城市厌嚣尘聊持一樽酒共寻千里春余光下幽桂夕饮舞青苹何时出门后重
有入林人 【卢思道上巳】

仁风道和气勾芒御暮春姑洗应时月元巳启良辰密云荫朝日零雨洒微尘飞轩游九野置
酒会众宾 【张华】

四日

唐高宗改蓬莱宫为含元殿 【咸亨元年】

唐玄宗以平原太守颜真卿为河北采访使 【天宝十五载以上玉海】

宋仁宗诏知亳州宋祁授集贤殿修撰就任刊定新编唐书 【皇佑三年三月四日出会要】

晋国公裴度薨上闻之震悼先一日上巳曲江赐宴不能赴文宗遣中使赐度诗诗曰注令待
元老识君恨不早我家柱石衰忧来学丘祷 【开成四年薨裴度字中立贞元五年擢进士当

元和长庆间乱臣贼子憚度之威棱虽江左王导谢安坐镇雅俗而吁谋方略度又过之诏加金紫光禄大夫文馆大学士赐勋上柱国出旧唐书】

叶衡奏谢宣示太上宸翰令臣阅毕可饮卮酒以庆荣遇臣欲置酒都省与执政而下侈非常之赐参政茂良等奏此藏在御府群臣无繇见者上曰太上于宸翰间盖是天纵非学力所到鍾王辈不足道 【宋孝宗淳熙二年玉海】

詹使君邀东坡游白水山佛迹寺浴于汤泉风于悬瀑之下登中岭望瀑所从出晚休于荔浦之上曳杖竹阴之下时荔子累累如芡实父老指以告曰是可食君能携酒复来乎欣然许之 【绍圣二年卧游录】

程明道谏新法 【熙宁二年三月四日谏新法疏中有陛下固已烛见事体究知是非在圣心非吝改张由柄臣尚持固必是致輿情大郁众论益讙云云出明道集】

窈娘赴井而死 【唐武后载初元年乔知之有婢名窈娘艺色为当时第一知之宠待殊隆武延嗣闻之求一见势不可抑既见即留无复还知之痛愤成疾因为诗写以口素厚贿阍守以达窈娘得诗悲惋结于裙带三月四日赴井而死延嗣见诗因遣酷吏诬陷知之破其家出本传】

诗

三年摩手抚疮痍恩与庐山五老齐合侍玉皇香案侧却持华节大江西鼎新白鹿诸生学筑就长虹万丈堤待哺饥民偏恋德老翁犹作小儿啼
【淳熙八年二月初四日尤遂初送朱文公南归时文公南康除江西提刑】

五日

宋真宗赏花宴于后苑帝作赏花钓鱼诗从臣皆赋又召从臣令观连理槐并连理柏遂射于太清楼下帝作连理槐柏诗近臣属和 【祥符六年】

宋仁宗延和殿观教（马彘）军击球 【嘉佑三年以上玉海】

宋神宗崩 【元丰八年宋史礼志】

文公哀介子推令是日不得举火 【晋文公与介子绥俱亡子绥即子推子绥割腓股以啖文公文公复国子绥独无所得作龙蛇之歌而隐文公求之不肯出乃燔左右木子绥抱木而死文公哀之令人三月五日不得举火后人谓之禁烟又谓之冷节又曰熟食或云五月五日为火所焚又或云三月五日左传史记并无子推被焚之事大抵流俗所传言人人殊莫可穷诘详山堂肆考】

张角起兵【角东汉时人奉事黄老畜养弟子以符水咒说疗病百姓信之角遣弟子八人使于四方以道教化天下转相诳惑聚徒数十万连结郡国自青徐幽冀荆扬兖豫莫不毕应各立渠帅讹言苍天已死黄天当立岁在甲子天下大吉以白土书京城寺门及州郡官府皆作甲子字以三月五日起兵皆着黄巾为识时人谓之黄巾亦名蛾贼角称天公将军角弟宝称地公将军宝弟梁称人公将军旬日之间天下向应京师震动出史纂左编】

南斗天蓬下降【道经】

诗

长安富贵惜春残争赏先开紫牡丹别有玉杯承露冷无人肯向月中看【裴璘三月五日因长安慈恩寺奔走车马赏玩牡丹题诗佛殿后文宗自夹城出芙蓉园幸此寺见诗吟玩南部新书】

上巳余风景芳辰集远响湖光迷翡翠草色醉蜻蜓鸟弄桐花日鱼翻谷雨萍从今留胜会谁看画兰亭【张又新三月五日泛长沙东湖】

五日酺初毕千年乐未央复承天所赐终宴国之阳地胜春逾好恩深乐更张落花飞广座垂柳拂瑶觞庶尹陪三史诸侯具万方酒酣同忭跃歌舞咏时康【张说三月五日奉和恩赐乐游园宴应制】

六日

唐僖宗宣遗诏立昭宗为皇太弟【文德元年后二日昭宗即位出玉海】

宋太宗召近臣赏花宴后苑上临池钓鱼命群臣赋诗时应制三十九人上亦赋诗以赐宰相吕蒙正等因习射上中的者六张乐饮酒群臣尽醉【淳化五年玉海】

桑道茂曰三月六日西师必散【禄山父子僭逆三年而灭初王师之围相州也意朝夕屠陷惟术士桑道茂曰三月六日西师必散此城无忧卒如其言也出旧唐书】

苏林语弟子周季通曰我昨被玄洲召为真人上领太极中侯大夫今别汝矣果有云车雨盖骖龙驾虎侍从数百人迎林林即日登天冉冉西北而去【苏林字子玄濮阳人少稟异操尝负担至赵师琴高先生时年二十一受炼气益命之道林奉法精修周游天下分形散影寝息丘陵卖履市巷以试世人莫能识以汉元帝神爵二年三月六日飞升列仙传】

七日

镇州契丹犯塞【蜀主宴近臣于怡神亭酒酣君臣及宫人皆脱冠露髻喧哗自恣知制诰京

兆李龟祜谏曰君臣沈湎不忧国臣恐启北敌之谋不听至三月七日镇州契丹犯塞时唐庄宗同光二年也出后唐书】

曲宴后苑真宗初临水阁垂钓又登太清楼观太宗御书及新写四部群书又至景德殿放生池东至玉宸殿历翔鸾仪凤二阁命座置酒帝作五言诗从官皆赋遂宴太清楼下
【景德四年】

曲宴后苑赏花钓鱼仁宗赋诗群臣席上和进移宴太清楼 【景佑三年以上玉海】

举人入院搜检 【元时选举之制三月初五各官入院初六譔策问进呈俟上采取初七执事者望阙设案于堂前置策题于上举人入院搜检出元史】

丘处机辞元太祖归 【处机字通密号长春子生于金熙宗皇统八年从重阳祖师得道元太祖召入见三月七日辞归上所赐备极丰腆皆辞之授尊重安慰之旨以宠其归命阿里鲜护师东行送之者皆泣别处机事六月三十日亦载出史纂左编】

诗

晴旭辉辉花蘂开氤氲花气好风来游丝飞絮紫行仗堕蕊飘香入酒杯鱼跃文波时泼刺莺留深树久徘徊青春朝野方无事故许游观近侍陪 【宋仁宗三月七日赏花钓鱼作】

輶路鲜云五色开一声清蹕下天来水光翠绕九重殿花气浓熏万寿杯绣幕烟深红会合文竿风引绿徘徊蓬山绝顶无人到诏许群仙尽日陪 【郑毅夫三月七日和仁宗韵】

禁御平明帐殿开华芝初下未央来人间彩凤仪韶曲天下流霞满御杯花近赭袍偏照烂鱼窥仙仗亦徘徊蓬莱绝景何曾到自媿尘踪此一陪 【三月七日和仁宗】

积雨欣始霁清和在兹时林叶既敷荣禽声亦融怡鸣泉来不穷湖风起沦漪西山卷余云逾觉秀色滋层层丛绿间爱彼松柏姿青青初不改似与幽人期坐久还起步堤边足逶迤游鱼傍我行野鹤向我飞敢云昔贤志亦复咏而归寄言山中友和我和平诗
【张栻字敬夫号南轩三月七日城南书院】

八日

宋神宗御集英殿试进士 【熙宁三年三月八日出会要】

李嵩初度 【东孝里庄园有牡丹一本无种而生掘土尺许见一石如剑长二尺题曰此花琼岛飞来种只许人间老眼看乡里有生旦值花开时花下饮酒为寿若花一夕凋谢者不吉惟一人李嵩者三月初八日初度自八十看花至一百九岁终出如皋志】

僧慧安偃身而寂【慧安荆州枝江人姓卫氏遁于山谷为僧隋炀帝征师不赴麟德元年游终南山石壁因止焉唐高宗亦征师不奉诏武后征至辇下待以师礼后问甲子多少师曰不记后曰何不记耶师曰生死之身其若循环环无起尽焉用记为况此心流注中间无间见沤起灭者乃妄想耳从初识至动相灭时亦只如此何年月而可记乎后闻稽顙信受神龙五年三月八日闭户偃身而寂春秋一百二十八出楚通志】

梵僧法贤卒【宋真宗咸平三年卒谥慧辨出事物纪原】

李脱仙居山升天【脱居蜀金堂山修道蜀人历代见之大约八百余年因号李八百焉有妹名贞多随兄修道居绵竹中兄授以长生之术至数百年状如二十岁风骨英伟人或见之不敢正视其后太上老君降而度之先兄白日升天兄于什邡仙居山三月八日升天出集仙录】

元始天尊降元阳上宫会天罗大梵天帝演说灵宝要法

王母为黄帝赐念珠【以上道经】

九日

灵山祠以是日祭

【祠在琼州府灵山其所赐之神有六有司城以三月九日祭焉出广东志】

后汉隐帝生百寮上表曰色变长澜启皇灵之宝构光流华渚开圣绪于瑶图当九龙浴圣之辰是五纬联光之夕凡蒙地载共祝天长请以三月九日为嘉庆节从之【天中记】

宋仁宗试进士

【嘉佑八年三月九日试进士帝不御殿次日御延和殿赐许将等一百九十人第出会要】

宋孝宗请太上皇太上皇后同幸聚景园【淳熙六年三月九日出会要】

唐顺宗以是日召节度使李师道欲乱不赴阙张子良领兵擒师道【先彩虹入润州大将张子良宅初入浆瓮水尽入井饮之后子良以擒师道拜金吾将军寻拜方镇彩虹其兆也祥异集亦出南部新书】

王羲之称病去郡是日于父母墓前自誓曰维永和十一年三月癸卯朔九日辛亥小子羲之敢告二尊之灵进无忠孝之节退违推贤之义自今之后敢渝此心贪冒苟进是有无尊之心而不子天地所不覆载名教所不得容信誓之诚有如皎日【羲之字逸少起家秘书郎庾亮临薨上疏称羲之清贵有鉴裁骠骑将军王述与羲之齐名而羲之甚轻之述每闻有角声谓羲之当候已辄洒埽待之羲之竟不顾述深以为恨羲之称病去故誓于父母墓云云羲之去

官与东土人士尽山水之游弋钓为娱出晋书羲之传】

高昌国俗以为寒食 【高昌国即西州也以三月九日为寒食节俗又好骑射妇人戴油帽谓之苏幕乐多琵琶箜篌无雨雪极热每盛暑居人穿地为穴以处飞鸟群萃河滨或起飞即为日气所烁坠而伤翼火州亦以三月九日为寒食并出外国传】

叶法善乘白鹿自海上来 【法善南阳人四代修道功行济人景龙四年三月九日乘白鹿自海上来远近敬礼之施舍丰多尽修观宇岁余入洪州西山有三神人降云太上命汝辅睿宗及开元圣帝未可隐迹山岩以负委任言讫去时二帝未立而庙号年号皆已先知出集异记】

张玉兰飞升 【玉兰天师之孙灵真女也梦赤光自天而下光中金字篆文缭绕数丈随光入口中觉不自安遂孕母氏责之终不言所梦惟侍婢知之一日谓侍婢曰吾忍耻而生死当割腹明心其夕无疾而终侍婢白其事母亦欲雪其疑忽有一物如莲花自腹出中有金字篆文十卷文彩甚妙玉兰死旬月异香后风雨晦暝坟墓自开惟有空棺而已温江县女郎观是其墓地至今乡里三月九日祀之乃飞升之日也出集仙录】

蓬莱都水使者升仙 【陶隐士出翰墨大全】

牛鬼神降犯者百日中恶 【三元延寿书】

十日

宋真宗召辅臣对于苑中水阁临池垂钓及登太清楼命内臣启扇钥观太宗圣制御书及新写四部群书 【景德四年玉海】

宋文人张晦之以天禧二年是日卒于官宋祁作墓铭铭曰皦才章兮懿淳孝至膺仕兮难老嗇弗予兮孰天道蹇皇皇兮晚获伸发吾怀兮露（王□）甫半道兮摧华轮倚庐空兮无冢嗣从槁殒兮二纪梦茕茕兮何所止彼戚友兮义弗违奉輅枢兮未归冗虚祔兮人所悲兄弟鲜兮立后神茫茫兮安究尚立言兮参不朽 【宋文鉴】

凤高六尺栖集于清远县合欢木众禽从之 【宋太宗端拱元年三月十日出祥瑞录】

郑钦说悟铭曰葬以三月十日任升之服其智 【梁太常任昉大同四年于钟山圻中得铭曰龟言土蓍言水旬服黄钟启灵比□在三上庚堕过七中已六千三百浹辰交二九重三四百圻当时莫能辩者因戒诸子曰世世以铭访有知之者昉五世孙升之隐居商洛写以授郑钦说钦说出使得之于长乐驿至敷水三十里忽悟曰卜宅者瘦葬之岁月而先识墓圻日辰旬服五百也黄钟十一也由大同四年郗数汉建武四年凡五百一十一年葬以三月十日庚寅三上庚也圻以七月十二日己巳七中已也浹辰十二也建武四年三月至大同四年七月六

千三百一十二月月一交故曰六千三百浹辰交二九十八也重三六也建武四年三月十日距大同四年七月十二日十八万六千四百日故曰二九重三四百圯升之大惊服其智】

司徒府主簿柳莛葬于九江梁承圣三年是日因大雨冢坏其子褒移葬开棺心有暖气良久乃谓褒曰我已生一年无因汝知九江神知我横死遣地神以乳饲我故不死今雨坏我冢亦江神所为扶出更生三十年 【穷神秘记】

重阳真君授道 【全阳子宁海东牟王处一也字玉阳于金皇统壬戌年是月之日受道于真君居云光洞志行确苦后道成出道书】

诗

身属中军少得归木兰花尽失春期偷随柳絮到城外行过水西闻子规
【李商隐三月十日流杯亭】

十一日

高丽贡方物唐高祖欲逊而不臣温彦博曰辽东本周箕子国汉玄菟郡不使北面则四夷何所瞻仰上纳之 【武德八年玉海】

唐太宗诏以远夷各贡方物其草木杂物有异常者所司其详录焉 【贞观二十一年二月十一日诏按会要如叶护之蒲萄康国之金桃伽国之郁金香伽罗之钵罗花建国之佛上莱皆奇物也至于环王之大珠于阗之宝带吐蕃之金鹅高昌之错刀又会要所不载者出方物录】

元英宗即皇帝位于大明殿 【英宗讳硕德成宗大德七年二月生仁宗欲立为皇子帝入谒太后固辞曰臣幼无能且有兄宜立兄以臣辅之太后不许立为皇太子后以二月十一日即皇帝位尊太后为皇太后出元史】

洪迈请开院修纂 【宋孝宗淳熙十五年三月十一日至庆元三年上二百八十卷出会要】

题卷末曰上元二年三月十一日 【刘遵古太和四年节度东川借人千余编书忽一旦涪水大泛书尽濡湿刘命曝之得周易正义一轴其卷末有题云上元二年三月十一日因读周易着此正义从兹易号十之三至一人八千口当有大水飘溺因得舒展晒曝衡阳道士李德初刘阅题叹异召宾掾示之有掌书记思而得之曰自上元至太和凡十三改号一人八千口者盖太和字也然则万物之不能逃于至数也久矣出宣室志】

诗

三分春月一分过天产真仙积庆多 【事文类聚】

十二日

唐高宗幸万年宫 【永徽五年出长历】

唐玄宗改混元庙为太清宫 【天宝元年九月敕两京混元庙改为太上混元皇帝宫二年三月十二日改为太清宫出会要】

宋太祖幸金凤园召符彦卿等习射帝七发皆中的彦卿等进马称贺赐从臣名马银器 【建隆四年】

宋孝宗谕辅臣曰祖宗敕召近臣赏花钓鱼朕暇日欲命卿等射饮则君臣相亲而情通 【干道七年以上玉海】 御史大夫程行湛奏来俊臣等二十三人残害宗枝毒陷良善情状尤重子孙不许与官陈嘉言鱼承晔皇甫文备傅游艺四人情状稍轻子孙不许近任 【开元十三年二月十二日奏出旧唐书】

韦检梦姬曰某限于修短不尽箕帚恩缘未断当有后期乃作诗曰春雨蒙蒙不见天家家门外柳如烟如今肠断空垂泪欢笑重追别有年 【韦检举进士不第尝有美姬捧心而卒检追思痛悼举酒吟诗曰宝剑化龙归碧落帝娥随日下黄泉一杯酒向春风暮寂寞书窗恨独眠时三月也十二日夜梦姬作诗云云后又梦姬曰白浪漫漫去不回浮云飞尽日西来始皇陵上千年树银鸭金凫也变灰后数日卒出抒情记】

诗

重三节后踰八辰太华峰前岳降申 【事文类聚】

十三日

唐文宗以为上巳日 【开成元年归融为京兆尹时两公主出降府事供帐事繁又逼近上巳曲江赐宴奏取改日上曰去年重阳取九月十九日未失重阳之意今以上巳改取十三日可也出天中记】

唐昭宗皇帝自寿王即位 【龙纪元年昭宗三月十三即位至光化三年迁为太上皇又天复元年返政即帝位自古未有出卓异记】

金主宣宗生 【昭圣皇后刘氏辽阳人大定元年选入东宫至大定三年三月十三日生金主宣宗是日大雨震电后惊悸得疾寻卒后宣宗即位追尊为皇太后谥昭圣出金史】

元顺帝试进士七十二人赐赫德溥化张栋进士及第余出身有差 【出元史】

颜恶头善卜有人诣恶头求卜恶头占曰君卜父父已亡闻哭声忽复苏而有言其人曰父卧疾三年矣昨日鸡鸣时气尽父闻举家哭声惊寤云我死有三人欲迎上天闻哭声遂坠池恶头曰更三日当永去果如言

【恶头章武郡人也妙于易筮三月十三日诣恶头求卜出北史】

刘子卿见双蝶五彩游花上大如燕至暮忽闻扣门子卿异之乃出户见二女恣态艳丽谓子卿曰君讶花间双蝶感君爱故来子卿延之坐谓二女曰僻处无酒为欢一女曰岂为酒来耶况山月已斜夜已过半君无意乎 【出穷怪录】

诗

燕集兰亭又一句寿筵开处集簪缨 【事文类聚】

十四日

唐宪宗以永州司马柳宗元为柳州刺史朗州司马刘禹锡为播州刺史

【元和十年三月十四日御史中丞裴度以禹锡母老请移近处改授连州刺史出玉海】

东坡在惠州谪居无事阅旧书画追思一时之事而叹三马之神骏乃为之赞曰吁鬼章世悍骄奔贰师走嫖姚今在廷服虎貂效天骥立内朝八尺龙神迢遥若将西燕昆瑶帝念民乃下招尔归云逝房妖 【时绍圣四年三马图赞】

陶弘景葬 【弘景字通明丹阳人也母初娠梦青龙出怀见天上二人降手执香炉觉与左右曰当孕男子非凡人及生标异幼而聪颖长而博达尝读神仙传有乘云驭龙之志入蒋山造三层楼栖止身居其上弟子居中接宾客于下潜光隐耀着老子等书二百余卷时人谓之山中宰相先生以梁武帝大同二年三月告化年八十一身長七尺八寸化时颜色如生屈伸如常室中香气积日不散以十四日葬谥贞白先生出神仙拾遗传】

诗

天地祥开贤间生桃花浪暖柳风轻争先一日月既望向后千年河更清 【事文类聚】

十五日

宋太宗诏宰相近臣赏花于后苑帝曰春气暄和万物畅茂四方无事朕以天下之乐为乐宜令侍从司臣各赋诗帝习射于水心殿 【兴国九年出宋史礼志】

宋仁宗飞白天性字赐端明殿学士李淑淑方侍养遣使就第赐之 【皇佑元年出实录】

宋钦宗二年自三月四日至是日皇族后妃诸王陆续出降金人 【七修类稿】

文节祠有司致祭 【文节祠在贵池县宋通判赵昂发元兵攻城昂发与妻雍氏死节元将伯颜见而叹惜以礼合葬焉事闻赠侍制谥文节雍赠顺义夫人有司岁以三月十五日致祭池州府志】

佛出世 【佛以二月十五夜出世二十九出家三十五得道出续博物志】

王钊仙人羽化 【钊生唐宣帝朝标姿魁梧不类凡人游心方外得神术每取药山壑则毒蛇猛兽随之若为卫护后遇异人迎至其家传以秘书曰计咸通十二年之秋有甘露降于子宅服之可以上升至期甘露果降王宅竹林中钊日服之夜饮露不复火食天复三年三月十五日白日羽化登天长沙人以其饮露成仙遂号为露仙于升仙处立台名露仙台此事八月一日亦载出彬阳仙传】

张伯端趺坐而化有尸解颂云四大欲散浮云已空一灵妙有法界圆通 【伯端天台人浪迹云水晚得混元之道而未备遍历四方询访遇刘海蟾授金液还丹火候之诀乃改名用成字平叔号紫阳有一僧自以为得禅上乘能出神数百里外顷刻辄到一日遇紫阳契合焉紫阳曰禅师今日能同游远方乎愿同往扬州观琼花紫阳于是与僧处一静室趺坐出神紫阳纔至其地僧已先至遶化三匝紫阳曰各折一花为记遂各折一枝归紫阳于元丰五年三月十五日趺坐而化住世九十九岁出史纂左编】

元始天尊游玉京元阳观会三界神仙真圣说法玉晨道君登玉霄琳房四（耳兮）天下 【以上道经】

诗

茫茫月色如溪沙万里不有纤云遮今年寒食争春来雪大如掌随惊雷临川城中三月雨城东大丘汨为渚天地惨惨无开时常恐蛰死和与羲此时谓月水中没溺入蛙肠那复出岂知今夜月光圆照彻万物无遗偏人间有人司重轻安得知汝有时明 【曾巩字子固三月十五日作】

十六日

汉成帝有司奏是日立夏宜读夏令奏可 【咸和六年出晋志】

宋太宗后苑赏花特召司空李昉坐于尚书之上帝临池钓鱼赋诗赐宰相吕蒙正等群臣应制者五十有五人上又作钓鱼诗意属吕端后数日为相 【至道元年出玉海】

宋太宗御崇政殿试进士梁顥帝嘉其敏速以首科处焉至是日帝按名一一呼之面赐及第【雍熙二年三月十六日赐及第唱名赐第盖自是始宋朝会要】

宋钦宗靖康二年皇族后妃诸王出降金人是日粘罕令以青袍易帝服以常人女服易二后服侍卫番奴以男女呼帝【□愤录】

元祜奉使东川至褒城望驿有大池楼榭甚盛黄明府见迎瞻其形容髣髴似识问其前衔即往日逃席黄丞也说向前事黄丞惘然而悟因馈酒一樽买舟请祜同载祜与之尽欢【元祜为御史曾饮酒于窰少府有一人后至频犯语令连飞十数觥不胜其困逃席而去问其人虞乡黄丞也后不闻问至元和四年三月十六日祜奉使东川至褒城望驿黄明府见迎即逃席黄丞元祜作诗相赠出小说】

忌远行水陆不吉【风土记】

诗

令尹帘垂白昼长东风随意上琴堂蟾开昨夜桂初满莺唤晚春花更香【事文类聚】

昔年曾痛饮黄令困飞觥席上当时走马前今日迎依稀迷姓字积渐识平生故友身皆远他乡眼暂明便邀连榻坐兼共刺舡行酒思凉风乱霜棱拂地平不看深浅酌贪怵古今情迢迢七盘路坡陀数大城花疑褒女笑栈息武侯征一种埋幽石空闻千载名【元和四年三月十六日元祜赠黄明府】

十七日

天宝十载分命卿监诣岳渎取三月十七日一时备礼兼册祭【以东海为广德王南海为广利王北海为广泽王西海为广润王出通典】

宰臣富弼母秦国太夫人薨仁宗是日春宴礼院上言君臣父子家国均同元首股肱相济成体贵贱虽异哀乐则同一人向隅满堂嗟戚今宰臣新在苦块欲乞罢春宴声乐以表忧恤大臣之意诏下并春宴请罢【嘉佑六年出宋史礼志】

宋徽宗幸懿亲宅【崇宁元年出七修类稿】

金以张邦昌为帝【宋钦宗靖康二年三月十七日为帝国号大楚出七修类稿】

吕思诚卒【思诚字仲实平定州人母冯氏梦一丈夫乌巾白襦衫红（革呈）束带趋而揖曰我文星也及寤思诚生目有神光见者异之思诚气宇凝定素以劲拔闻不为势力所屈三为祭酒诸生从化尝病古注疏太繁魏了翁删之大简将约其中以成书不果元顺宗至正十

七年三月十七日卒年六十五谥忠肃出思诚传】

诗

莫飞两叶正深春是日人间岳降申 【事文类聚】

十八日

龙湫山是日与吴之阳山多云雾雷雨俗传为白龙生日 【龙湫山在平湖县一名陈山有大石盘陀建以祠宋时祷雨屡应累封龙神为广惠渊灵侯名其庙曰显济出嘉兴府志】

并州刺史刘琨遣温峤上表劝琅邪王睿即位江左言宣皇之胤惟有陛下亿兆攸归曾无与二天祚晋祀必将有主主晋祀者非陛下而谁 【晋建兴五年三月十八日遣温峤上表曰闵帝为刘曜所杀琅邪王睿在江南时刘琨在并州段匹磾在冀州连名劝进中宗嘉之琨作此表无所点窜封印毕对使者流涕而遣之琨功虽未竟卒使温太真克定江左其功大矣出文选】

程瑜卒 【瑜字叔宝程顥之叔父卒于嘉佑七年三月十八日姿仪伟秀风度平雅端庄谨厚不妄言笑进退动止皆有法度未究所施年四十三葬于河南伊阳县出墓志】

方秋崖卒 【秋崖字巨山宋绍定五年省试第一仕至吏部尚书郎卒于宋理宗景定三年三月十八日年六十四出墓志】

黄石公祠有司致祭 【黄石公祠在谷城山之阳按张良于下邳桥逢老父授良书一编曰后十三年济北谷城山下黄石即我也后良果于此得黄石宝而祀之令有司致祭以三月十八日出兖州志】

王处一诞辰母周氏梦红霞绕身惊悟遂生 【处一宁海东牟人师能悟生死之理一日偶至山中遇一老人坐大石谓之曰子异日扬名帝阙为道教宗主生于金熙宗皇统二年三月十八日出史纂左编】

茅君驾五色云八景舆伫于五云峰逾时西去

【五云峰在应天府因茅君三月十八日伫于此山故名茅山出一统志】

茅君同总真王君太极真人东海青童君会游勾曲山看洞室 【道经亦出翰墨大全】

太上老君同光天元后降太清宫 【道经】

卢茂斂真人同从人执乐上升

诗

三月雪连夜未应伤物华只缘春欲尽留看伴梨花【温庭筠嘲三月十八日雪】

芍药蔷薇与早梅不知谁是艳阳才今朝领得东风意不复饶君雪里开
【温庭筠三月十八日雪中】

十九日

宋仁宗后苑赏花钓鱼观唐明皇山水字石于清辉殿因命从臣皆赋遂宴太清楼令中书第所赋优劣【天圣八年出玉海】

宋孝宗于东宫荣观堂召官僚燕集酒半从至玉渊堂欣然索一大研命磨潘衡墨染屠觉竹丝笔挥诚斋二大字赠侍读杨检详六小字识以清赏堂印心画超诣云章昭回龙跳虎卧鸾飘凤泊盖天纵之能圣学之余也【淳熙十三年三月十九日出事文类聚】

侯景以是日败【侯景字万景魏之怀朔镇人也少而不羁梁武帝天监中沙门释宝志曰掘尾狗子自发狂当死未死啮人伤须臾之间自灭亡起自汝阴死三湘又曰山家小儿果攘臂太极殿前作虎视狗子侯景小字山家小儿猴状景遂覆陷都邑毒害皇家起自悬瓠即昔之汝南巴陵有地名三湘景奔败处其言皆验景尝谓人曰侯字人边作主下作人此明是人主也台城既陷武帝尝语人曰侯景必得为帝但不久耳按景以辛未年冬篡位至三月十九日败仅一百余日果不久出南史】

东坡自杭州还朝宿吴松江梦长老仲殊挟琴弹之有异声琴有破损而有十三弦东坡梦中叹息不已殊曰虽损尚可修东坡曰柰十三弦何殊不荅诵诗曰度数形名本偶然破琴今有十三弦此生若遇邢和璞方信秦箏是响泉东坡梦觉而忘之夜复梦殊来理前语再诵其诗方惊觉而殊适至意其非梦也问之殊盖不知【唐开元房管与道士邢和璞出游遇夏口村入佛寺坐古松下和璞使人凿地得瓮中所藏娄师德与永禅师画笑谓管曰颇忆此耶管怅然因悟前生之为永师也其诗中用邢和璞祖此东坡梦在元佑六年三月十九日出长公外纪】

李林甫奏文子号通玄真人列子号冲灵真人庾桑子号洞灵真人其书各从其号为真经【天宝元年三月十九日出事物纪原】

南斗星降【道经】

诗

枇杷已熟粲金珠桑落初尝滟玉蛆暂借垂莲十分盏一浇空腹五车书青浮卵碗槐芽饼红

点冰盘藿叶鱼醉饱高眠真事业此生有味在三余

【东坡三月十九日携白酒鲈鱼过詹使君食槐叶冷淘子美有槐叶冷淘诗】

二十日

宋真宗召近臣赏花后苑以雨移御崇政殿命赋诗有顷御北殿赐宴作乐帝作赏花及喜雨诗群臣即席和进 【祥符五年玉海】

宋高宗崩是日以神主祔庙孝宗诏曰朕欲衰经三年群臣屡请御殿易服朕以布素视事内殿 【淳熙十四年孝宗号恟擗踊踰二日不进膳出宋史】

天仓开日宜入山修道 【八笺】

诗

雪髯霜鬓语伶仃澹荡园林取次行要识将军不凡意从来祇啜小人羹

西园牡蛎夜沉沉尚有游人卧柳阴鹤睡觉来风露下落花飞絮满衣襟

郁郁苍髯真道友丝丝红萼是乡人何时翠竹江村路送我柴门月色新

【以上开园三首东坡三月二十日作】

乐游形胜绝表里望郊宫北阙连云顶南山对掌中皇恩贷芳月旬宴美成功鱼戏芙蓉水莺啼杨柳风春华看欲暮天泽恋无穷长袖召斜日留光待曲终

【张说三月二十日承恩燕乐游园作】

二十一日

宰相张九龄奏请纵民铸钱议下百官裴耀卿等皆以为许私铸则下皆弃农而竞利

【唐玄宗开元二十二年出玉海】

宋仁宗御紫宸殿 【三月二十一日仁宗御紫宸殿朝百官石介上庆历圣德颂颂有晨坐太极昼开闾阖躬览英贤手锄奸（木卉）大声沨沨震摇六合云云出文鉴】

宋高宗见内库所藏弓箭曰此太宗真宗所制经历百年记识如新 【出刘骑传】

洞宾游岱岳王母池题五言诗 【天圣戊寅年洞宾又于政和丙申年复至此题诗未云回公再书今会真宫石刻见存出岱岳志】

诗

昔日曾游此如今九十春红尘多少客谁是识予人 【洞宾诗】

二十二日

唐昭宗生日以为嘉会节群臣龙纪元年贺表曰陛下德迈方圆道融三五因社鸣而正位逢井聚以乐推值清明馭气之时当仁寿悦随之始固可同年鹤筭岁比山呼永符垂拱之风长保后天之庆 【天中记】

宋太宗幸金明池宴从臣琼林苑作游琼林苑诗赐近臣 【淳化元年出玉海】

宋真宗亲试进士于崇政殿内出三题摹印以赐印题自此始
【大中祥符五年宋朝会要亦出事物纪原】

宋仁宗召辅臣两制馆阁官观后苑瑞竹其竹一本两茎各有诗赋献 【皇佑三年三月二十一日宋祈献赋曰彼神苑之嘉竹挺双干而呈美交繁枝之萧森等密叶焉葱翠遂并节以自高乃联茎而告瑞云云胡宿献诗曰瑞植昭天产祥枝感帝临均承元化力同抱岁寒心蒙润非烟近含滋御水深云云出艺文志】

刘成李晖遇群僧 【刘成李晖宣城郡当涂民尝有巨舫载鱼于吴越间唐天宝十三年三月自新安江载往丹阳郡行至查浦会天暮泊舟李晖往浦岸村舍中独刘成在江畔忽闻舫中连呼阿弥陀佛者声甚厉成惊视之见一大鱼自舫中振须摇首如人声呼阿弥陀佛成惧即匿身芦中以伺之俄顷舫中万鱼自跃亦呼佛成益惧登舫尽投群鱼于江中顷之李晖至成以其事告于晖晖怒曰小子安得妖妄乎成无以自白即用衣资酬其值明日舫中忽重不可举视之得缗十五千题于舫曰归汝鱼值二人奇之三月二十二日瓜州遇群僧以缗施焉出宣室志】

二十三日

湖州黑气亘天雷电异常雨物若果核与雨杂下五色间错光莹坚固破其实食之似松子仁人皆曰娑婆树子 【元至正壬辰年三月二十三日至闰三月亦然后红巾犯省治两核之地悉被兵火未经雨核处屋宇如故出辍耕录】

宋仁宗命契丹使观金明池水嬉赐宴琼林苑 【嘉佑二年宋史】

苏轼杭州从太守沈公观花于吉祥寺僧守（土？）之圃圃中花千本酒醉乐作州人大集金盘彩篮以献于坐者五十有三人素不饮者皆醉自舆台皂隶皆插花以从观者数万人
【宋神宗熙宁五年三月二十三日出牡丹记】

英烈妃生【翰墨大全】

诗

已逢妩媚散花峡不怕艰危道士矶啼鸟似逢人劝酒好山如为我开眉风漂公子鹭得意跋扈将军风敛威到舍将何作归计江山收得一囊诗【张宛丘三月二十三日即事】

二十四日

康帝将登祚戴洋择日以为宜用三月二十四日【洋字国流十二岁时病死五日复生及长好道术妙解占候小数吴末为台吏知吴将亡托病不仕出晋书】

宋孝宗是日德寿宫康寿殿生金芝十有二茎宰臣皆贺御制七言诗有永将四海奉双亲之句【隆兴二年玉海】

吕东莱感疾给假是日归婺州不复再起【东莱为著作兼权礼郎国史编修出东莱传】

香山胡吉刘郑卢张六贤皆多年寿白居易会昌五年是日合尚齿之会七老相顾既醉且欢此会稀有各赋诗以记之【白居易三月二十四日于东都履道坊合尚齿之会胡杲年八十九吉旼年八十六刘贡年八十二郑据年八十四卢贞年八十二张浑年七十四居易年七十四以上七人共五百七十岁其年夏又有二老年貌绝伦同归故乡亦来斯会续命书姓名年齿写其形貌附于图右仍以一绝赠之云雪作须眉云作衣辽东华表暮双归当时一鹤尤稀有何况今逢两令威出合璧事类】

诗

七人五百七十岁拖紫纁朱垂白发囊里无金莫嗟叹樽中有酒且欢娱诗吟两句神还壮酒饮三杯气且粗嵬峨狂歌教婢拍婆娑醉舞遣孙扶天年高迈二疏传人数多于四皓图除却三山五天竺人间此会更应无【白居易三月二十四日宴罢赋此】

二十五日

玄宗敕春秋祈报郡县常礼比不用牲岂云血祭阴祀贵臭神何以歆自今已后州县祭祀特以牲牢宜依例程【开元二十二年三月二十五日敕通考】

宋太宗赐新进士陈尧叟等御制箴一首【端拱二年玉海】邓名世见于殿上【宋绍兴四年抚州邓名世以所著春秋四谱六卷辨论谱说十篇古今姓氏书辨证四十卷来上吏部尚书胡松年看详学有渊源辞亦简古考订明切多所按据诏三月二十五日引见殿上赐进士出身出会要】

宋郊请自今外夷朝贡并询问国邑风俗道途远近图画衣冠人物两本一进内一送史馆从之【宋仁宗景佑四年四夷述职图】

吴越钱俶来朝宋太宗是日宴于长春殿亲王宰相节度使刘鋹李煜皆预【兴国三年宋史礼志】

韩昌黎潮州到任【元和十四年以佛骨事谪潮州三月二十五日到任其年十月宪宗加号大赦移袁州刺史出昌黎考】

二十六日

宋孝宗车驾幸玉津园命下大雨有旨许从驾官带雨具将晚有晴意已而天宇豁然洪迈进一诗歌咏其实【淳熙十二年出容斋直笔】

宋太宗召新罗二人于便殿皆手持大螺吹之【至道元年三月二十六日新罗西南夷吹螺乃夷曲出通典】

王师大破其军于泮州【宋太祖干德元年保权杀张文表复谋拒命王师鼓行而前三月二十六日大破其军于澧州乘胜入其城保权遁尽湖湘捷书至群臣称贺石介颂曰圣机神谋天秘地藏旦秣我马夕取其疆出玉海】

韩愈与处士卢仝至少室谒李征君渤【元和十四年三月二十六日谒李征君渤自少室而东上太室中峰宿封禅台明日观启母石入天封观出集古录】杜真人升仙【杜曷出翰墨大全】

诗

五更犹自雨如麻无限都人仰翠华翻手作云方怅望举头见日共惊嗟天公的有施生妙帝力堪同造物夸上苑春光无尽藏可须羯鼓更催花【洪迈三月二十六日因孝宗幸玉津园雨霁歌咏其实】

二十七日

唐高宗幸合璧宫【龙朔元年玉海】

唐昭宣帝降御札禅位于梁【梁王初碭山一民也从黄巢为恣天子用为四镇节度使富贵极矣一旦灭唐家三百年社稷旧唐书云御札降三月甲辰甲辰三月二十七日也唐年谱录亦云二十七日独五代通略云四月一日】

宋真宗章献明肃皇后刘氏崩于宝慈殿 【明道二年葬于永定陵之西北出宋史】

东坡作张氏园亭记有余自彭城移守吴兴由宋登舟三宿而至云云
【宋神宗元丰二年三月二十七日作是时自徐州移知湖州出长公外纪】

宋刘龄设斋 【刘龄颇奉佛法三月二十七日设斋其父暴死是时有人言奉不明之神致丧祸不已必焚经像灾乃除耳龄信之遂焚经像炎炽移日佛像俨然如故龄忽如人欧打仆地痿蹙不能行出太平广记】

二十八日

翁彦约言万国梯航辐凑史不绝书其货币服饰之瑰奇名称状貌之诡异多所未载命有司编集成书如周家王会之篇 【宋徽宗政和六年出四夷述职图】

程正叔讲读延和殿
【元佑二年三月二十六日正叔奏就宽凉处讲读至二十八日讲读延和出明道集】

东岳圣帝生又府君生都人游冶之盛百戏竞集士女观者如堵

【出武林旧事宣抚镇志亦云俗传为东岳帝诞辰倾城士女踵诣行宫酬愿拈香奠觞献果或焚诵祈祥或锁柩谢罪竟日乃罢】

诗

一春惆怅残三日醉问周郎忆得无柳絮送人莺劝酒去年今日到东都
【白居易三月二十八日赠周判官】

二十九日

李靖俘颉利献捷太庙 【唐太宗贞观四年三月二十九日出会要】

宋太祖诏契丹使于讲武殿观骑士习射 【开宝八年玉海】

宋太宗崩于万岁殿真宗散发号哭奉遗诏即位于殿之东
【至道三年三月二十九日崩出宋史礼志】

宋仁宗崩于福宁殿 【嘉佑八年谥神文圣武明孝皇帝出宋文鉴】

杨祥阮鉴元顺宗遣谕琉求是日二人东望见有山长而低者约五十里不晓人语遂还 【元

世祖至顺宗海外诸蕃罔不臣属惟琉求未曾归附遣杨祥阮鉴□谕来则安堵如故否则必致征讨至元二十九年三月二十九日因不晓人语二人遂还出元史】

诗

南岭过云开紫翠北江飞雨送凄凉酒醒梦回春尽日闭门隐几坐烧香

门外橘花犹的皪墙头荔子已斓斑树暗草深人静处卷帘欹枕卧看山
【以上二首东坡三月二十九日作】

三十日

东汉光武是日日食帝避正殿不听事诏曰吾德薄致灾谪见日月夫何言哉今方念愆庶消厥咎其令有司各修职任奉遵法度惠兹元元百僚各上封事无有所讳其上书者不得言圣
【建武七年出山堂肆考】

宋太祖宴契丹于长春殿 【开宝五年玉海】

有白虎七变法取是日杀虎血等合和之忽生草似胡麻一生取其实合之可以移形易貌
【出抱朴子】

诗

野酌乱无巡送君兼送春明年春色至莫作未归人 【三月晦日送客雍裕之】

三月正当三十日风光别我苦吟身共君今夜不须睡未到晓钟犹是春
【贾岛字浪仙范阳人初为僧三月晦日赠刘评事】

可怜三月三旬足怅望江边望驿台料得孟光今日语不曾春尽不归来
【望驿台元稹三月三十日作】

三月唯残一日春玉山倾倒白鸥驯不辞便学山人醉交下无人作主人
【令狐楚三月晦日会李员外】

今朝相送自同游酒与诗情替别愁忽到澧西总回去一身骑马向通州
【元稹澧西别乐天转载樊宗宪李景信两秀才侄谷三月三十日相饯送】

随风逐浪剧蓬萍圆首何曾解最灵笔砚近来多自弃不关妖气暗文星
【戊午三月晦司空图】

江头从此管弦稀
散尽游人独未归
落日已将春色去
残花应逐夜风吹
【三月晦日李昌符】

堂邑山林美朝恩
晦日游园林含淑
气竹树绕春流舞
席千花妓歌舫五
彩楼群欢与王泽
岁满皇州 【张说三月三十日承恩燕永陵公主亭子】

朝沐敞南闱盘跚待日晞
持梳发更落览镜意多违
吾友见尝少春风去不归
登临至一醉犹可及芳菲
【戴叔伦三月三十日沐发书怀寄诸友】

一日不作诗心源如废井
笔砚为辘轳吟咏作縻绁
朝来重汲引依旧得清冷
书赠同怀人词中多苦辛
【贾岛三月晦日赠刘评事】

玉辂寻春赏金堤重晦游
川通黑水漫池涵紫泉流
晃朗扶桑出丝联树杞周
鸟疑烟海隔人似玉河秋
劫尽灰犹识年移石故溜
汀洲归棹晚箫鼓杂行讴
【三月晦日李又奉和幸昆明池】

日涉编卷四

楚应城陈阶升也甫编辑

邑人徐养量叔弘甫校刻

张之厚铭卿甫

张凌云韩孺甫

陈光寅亮可甫全阅

四月〔一〕

四月建巳巳起也物至此时而毕起也【合璧事类】

中吕巳之气也四月建焉【周礼】

日在毕昏翼中旦婺女中【礼记】

孟夏纯干用事阴气未作【未作气未挺出郑兴传】

正阳之月匿未作【匿隐也未作气未挺出六帖】

夏气赤而光明【尔雅】

收恢台之孟夏【恢大也台即胎也言夏气大而育物也楚词】

百谷各以初生为春熟为秋麦熟在孟夏故以孟夏为麦秋【蔡邕月令】

孟夏行春令则虫蝗暴风秀草不实行秋令则苦雨五谷下滋四竟有警行冬令则草木早枯
后有大水败其城郭【吕氏春秋】

为余【尔雅】

或服玄冰丸或服飞雪散及六壬六癸之符则不热【抱朴子】

孟夏之月南宫御女赤色衣赤采吹笙竽

【出淮南子注云火生南方故处南宫笙竽空中象阳故吹之】

东武旧俗每岁大会于南禅资福两寺以芍药供佛 【东坡集】

长沙市肆之人无子者是月供寺阁下羊肉薄饼乞儿往往有验 【时镜新书】

焉耆国俗尚娱乐每岁是月游林 【酉阳杂俎】

天有声如泻水自南而北后秦王俊薨 【文帝开皇三十年隋书】

宋真宗西南方两月并见 【天禧四年占曰大臣废黜又曰有大水是年秋寇淮贬滑州河决京师大雨坏庐舍出宋史】

汉成帝楚国雨雹大如斧飞鸟皆死 【河平二年】

汉武帝陨霜杀草自是征伐四夷师出三十余年 【元光四年以上出山堂肆考】

唐宪宗淄青陨霜杀恶草及荆?束而不害嘉谷 【元和十四年旧唐书】

无云而雷有流星从日下东南行四面耀耀如雨自晡及昏而止 【成帝元延元年出通考】

彰德有赤风自西北起昼晦如夜

【顺帝至正元年海舟吹上平陆高坡二三十里死者万计世人谓之海笑出元史】

天雨土 【唐昭宗天佑元年通考】

天雨土 【元豐二年淳熙四年皆是月雨土宋史】

昇宁榆次县天雨白毛如马鬃 【顺帝至正十三年元史】

福州福清县廨天雨黄黑豆又长乐太平二乡雨黑豆皆坚实异常 【太宗至道二年宋史】

冰瓦有文楼阁车马人物芙蓉牡丹萱草藤萝之属经日不释

【淳熙年秀州吕氏家出宋史】

晋孝武帝京都地生毛 【太元十四年又十七年地生毛是时符坚灭】

晋安帝地生毛或白或黑 【元兴三年以上五行志】

黄河是月水名麦黄水 【水衡记】

岱山之东有圆渊孟夏月水常腾沸人掘地得焦石如炭往往有火 【拾遗记】

南方有炎山在扶南国之东加营国之北诸薄国之西从此月火生行人过山取木为薪燃无尽时 【火至十二月灭草木始生枝条玄中记】

鼎州桃源洞大水巨石随流而下有文曰无为大道天知人情无为窈冥神见人形心言意语鬼闻人声犯禁满盈地收人魂金石同类类金为变怪者也 【宋高宗建炎三年五行志】

京师醴泉涌出饮之者痼疾皆愈惟（耳少）蹇者不瘳 【后汉光武中元元年】

京师拱圣第泉涌疾疔者饮之皆愈 【天禧二年闰四月】

哀帝建平四年山阳方与女子田无啬生子

【师古曰方与者山阳之县也女子姓田名无啬方与音房豫
先未生儿啼腹中及生不举葬之陌上三日人过闻啼声母掘收养

宋宁宗嘉定元年镇江后军妻生子一身二首四臂占谓中原分裂后数年金人失中原
【以上通考】

宰臣李适之鼎跃出相斗鼎耳及足皆折 【天宝三年白孔六帖】

月桂子江东诸处每至四五月于路衢得之大如狸荳破之辛香古老相传是月中下也
【山堂肆考】

千顷山西有莎萝花一株是月花开香闻数里 【千顷山在杭州府昌化县出一统志】

永州民刘思析薪有天下太平字 【徽宗宣和三年】

虔州民毁欹屋析柱木里有文曰天下太平

【高宗绍兴十四年守臣薛弼上此木妖以上宋史】

秀州海盐县海洋有巨鰕群虾从之声若讴歌抵岸县民胔肉转鬻压死十数人颌骨长二丈五尺 【绍兴二十年京房易传曰海见巨鱼邪人进贤人疏出通考】

凤凰集东鲁群鸟从之 【汉宣帝地节二年】

夏口武昌凤凰见 【孙权黄龙元年】

凤凰集河北百姓聚观之 【晋穆帝升平五年以上俱宋书符瑞志】

饶安县白雉见 【延康元年魏志】

白麟见顿丘 【晋武帝太康元年宋书符瑞志】

余干县民家豕生八豚其二为鹿 【宋宁宗庆元三年五行志】

桂州有马生驹三足能随群马 【唐武宗会昌元年通考】

群鼠吐五色气成云 【庆历八年神宗生于朴王宫祥光照室群鼠吐气成云出宋史】

诗

江南孟夏天慈竹笋如编蜃气为楼阁蛙声作管弦 【贾弇登大历中进士状江南四月】

四月上泰山石平御道开六龙过万壑涧谷随萦回 【李白】

漱井消午醉扫花坐晚香众绿结夏幄老红驻春妆 【文潜】

南京西浦道四月熟黄梅湛湛长江去冥冥细雨来 【杜甫】

麦随风里熟梅逐雨中黄衫含蕉叶气扇动竹花凉 【庾子山】

人间四月芳菲尽山寺桃花始盛开长忆春归无觅处不知转入此中来
【白居易见木林寺桃花】

长养熏风拂晓吹渐开荷芰落蔷薇青虫也学庄周梦化作南园蛱蝶飞 【徐寅初夏戏题】

花开红树乱莺啼草长平湖白鹭飞风日晴和人意好夕阳箫鼓几舡归
【徐元杰字仁伯信州上饶人题湖景】

乳鸭池塘水浅深熟梅天气半阴晴东园载酒西园醉摘尽枇杷一树金
【戴复古字式之初夏作】

陂麦连云惨淡黄绿阴门巷不多凉更无一片桃花在借问春归有底忙 【王安石见陂麦】

四月清和雨乍晴南山当户转分明更无柳絮因风起惟有葵花向日倾
【司马光字君实居洛初夏】

四月田间麦穗稠桑枝生葚鸟啁啾凤城绿树知多少何处飞来黄栗留 【欧阳永叔】

嚙嚙新蝉绿叶遮一声临晚到山家未应春色全归去犹有芳丛刺史花 【僧惠洪】

石梁茅屋有弯碕流水煎煎度两岐晴日暖风生麦气绿阴幽草胜花时 【王介甫】

绿树阴浓夏日长楼台倒影入池塘水精帘动微风起满架蔷薇一院香 【高骈】

麦陇风来翠浪浮霏微小雨似深秋野亭终日卷帘坐清樾对啼黄栗留 【谭知柔】

生物移边日夜流园林纔夏麦先秋绿阴黄鸟北窗簟付与来禽安石榴 【山谷】

首夏木阴薄清和自一时笋抽八九尺荷生三四枝新服裁蝉翼旧扇拂蛛丝莎径热未剧晨昏来往宜 【温公】

今年通闰月入夏展春辉楼上风花媚城隅赏宴归九歌扬政要六舞散朝衣天喜时相合人和事不违礼中推意厚乐处感心微别赏阳台乐前旬暮雨飞
【唐玄宗首夏闰月花蕊楼观群臣宴宁王山亭】

垂柳阴阴日初永蔗浆酪粉金盘冷帘幙低垂紫燕忙蜜脾已满黄蜂静高楼起睡翠眉颦披破斜红未肯匀玉腕半揎云袖碧楼前知有断肠人 【魏彦深】

立夏

立夏金殒水囚木休火相

谷雨后十五日斗指巽为立夏物至此时皆假大也 【孝经纬】

四月立夏为节夏大也至此之时物已长大故以为名 【三礼义宗】

立夏夏至行南方赤道曰南陆 【汉书】

斗柄南指而天下皆夏 【鹞冠子】

立夏晷长四尺三寸八分 【后律历志】

炎帝秉离执衡司夏

林鍾纪度祝融司节 【赋】

立夏阳云出觜赤如朱 【易通卦验】

春分加四十六日而立夏大风济音中夹锺 【济止也出淮南子】

立夏清明风至而署鹤鸣溽谷飞电见龙升天 【易说】

立夏雀子飞 【易通卦验】

立夏之日蝼蝈不鸣水潦淫漫蚯蚓不出臣夺后命王瓜不生害于百姓 【周书时训】

立夏日得金五谷不成夏旱多风得木夏寒草生得火多妖言兵戈起得土远臣朝国无政令得水上下相和顺天下安宁 【刘玄之行军月令】

立夏命有司祀雨师

立夏先三日太史谒于天子曰某日立夏盛德在火天子乃斋立夏之日天子亲率三公九卿迎夏于南郊还乃赏公卿诸侯大夫于朝庆赐遂行无不欣悦命相赞杰俊遂贤良举长大行爵出禄必当其位 【以上礼记月令】

春官大宗伯以赤璋礼南方

【礼南方以立夏谓赤精之帝而炎帝祝融食焉半珪曰璋象夏物半死礼记】

立夏日夜漏未尽五刻京都百官皆衣赤衣迎夏于南郊 【续汉书礼仪志】

夏则乘赤辂驾赤巷（马□）载赤旗以迎夏于南郊其祭先黍与鸡居明堂正庙启南户 【逸礼】

立夏日或服玄冰丸或服飞霜散及六壬六癸之符则不热幼伯子王仲都此二人衣之以重裘暴之于夏日周以十炉之火口不称热身不流汗盖用此方 【抱朴子】

立夏日忌北风主疫 【（月翟）仙月占】

立夏日日中上清五帝会诸仙人于紫微宫论求道之功罪 【登真隐诀】

诗

东君休布令赤帝已司权

风光初变换天气尚清和

律转熏风始杓回火德新

长风始飘阁迭云纔吐岭

不觉东风旋地轴俄惊南陆斡天机

蝴蝶不随春色去又来庭院舞熏风

小满

立夏后十五日斗指巳为小满小满者言物长于此小得盈满也 【孝经纬】

立夏加十五日指巳则小满音中太簇 【雅南子】

上阳云出七星 【易通卦验】

小满日苦菜秀后五日靡草死 【以荼为苦菜毛诗曰谁谓荼苦□□】

小满日苦菜不秀仁人潜伏靡草未死国从盗贼 【周书时训】

小满后无起土功无发大众无伐大树妨蚕农也

小满后无大田猎 【驱兽类也恐伤生类】

小满后农乃登麦天子乃以彘尝麦先荐寝庙 【以上月令】

四月〔二〕

一日

炀帝是日太阳亏王度时在台司昼卧厅阁觉日渐昏诸吏告以日蚀甚度整衣引宝镜出照镜亦昏无光色 【大业八年四月一日日蚀王度以宝镜照无光先是汾阴侯生天下奇士也度素卿事之侯终以镜赠度镜径八寸鼻作麒麟蹲伏状鼻外列龟龙凤虎又外设八卦又外置十二辰又外置二十四字似隶而非字书所有此黄帝所铸第八镜也邪魅入镜尽照希世之宝后失镜所在出异闻集】

武后尊嵩岳为皇帝 【武后垂拱四年封嵩岳为神岳大中王至通天元年四月一日尊为皇帝中宗神龙元年复为王出事物纪原】

德宗左右请御暑服上曰将士未易冬服独御春衫可乎【兴元元年将士未给春衣上犹夹服汉中旱热四月一日左右请御暑服上曰独御春衫可乎俄而贡物继至先给诸军上始御之出旧唐书】

后唐闵帝即位受册明宗枢前【有瞽者张蒙自言事太白山神神崔浩也其言吉凶无不中房曷素信之尝引蒙见帝闻其语声惊曰此非人臣也曷使蒙问于神神传语曰三珠并一珠骡马没人驱岁月甲庚午中兴戊巳土曷不晓其义蒙曰神言如此不能解也四月一日闵帝即位受册明宗枢前册曰惟应顺元年岁次甲午四月庚午朔帝回顾曷曰张蒙神言岂不验哉上白孔六帖】

武明太后崩果如童谣【徐之才少解天文兼图讖之学弟之范晋明帝太宁二年春武明太后病内史皆呼太后为石婆盖有俗忌之范告之才曰童谣云周里跂求伽豹祠嫁石婆斩豕作媒人惟得一量紫紕靴今太后忽改名私所致怪之才曰跂求伽胡言去已豹祠嫁石婆岂有好事斩豕作媒人勿令合葬自斩豕惟得紫紕靴者得至四月何者紫之为字此下系紕者熟当在四月之中之范问靴是何义之才曰靴者革旁化字是久物至四月一日后果崩之才隋文帝开皇中卒出北史】

众执韩秀升屈行从二人诣高仁厚仁厚诘之曰何故反秀升曰自大中皇帝晏驾天下无复公道纽解纲绝今日反者岂惟秀升机上之肉惟所烹醢耳仁厚愀然命善食而械之【唐僖宗中和三年贼昼夜御备遣兵挑战高仁厚不与交兵潜发勇士千人执兵负槁夜由问道攻其寨且焚之贼惶惑不能相救仁厚遣兵于要路击之贼众皆降韩秀升屈行从见众溃挥剑乱所欲止之众愈怒四月一日共执二人诣仁厚仁厚诘之云云出耆旧传】

天祺节【真宗祥符元年四月一日天书再降内中功德阁以为天祺节出宋史】

衡山方广寺每至四月是日在东壁则照见维杨官府楼堞居民舍宇物物可数【虎谷间抄】

谭处端仙蜕【金太宗天会元年生生而骨相不凡后西游至同州有门人求亲笔书龟蛇二字笔力遒劲有龙蛇盘屈之状盖预指归期人不悟至乙巳四月一日仙蜕始应焉处端号长真子出史纂左编】

南方七宿下降【道经】

诗

春色沅湘尽三年客始回夏云随北去同日过江来水漫荆门出山平郢路开比肩羊叔子千载岂无才【张说四月一日赴荆州作】

二日

汉成帝雨雪燕雀死 【阳朔四年四月二日后许皇后废出汉书】

皇太子初立是日有雄雉飞集东宫明德殿前上问褚遂良是何祥对曰昔秦文公时童子化为雉雌者鸣陈仓雄者鸣南阳童子言曰得雄者王得雌者伯文公遂以为宝鸡祠汉光武得雄遂起南阳有四海陛下旧封秦故雄雉见于秦地 【太守贞观十六年】

宋太宗诏辅臣三司使翰林枢密直学士尚书省四品两省五品以上三馆学士宴于后苑赏花钓鱼张乐赐饮命群臣赋诗习射 【雍熙二年以上玉海】

倾城士女俱诣北郊北岳帝行宫焚香或步或骑或舆轿联翩而出至则奠献拜祷钟鼓喧阗绮罗交错既毕各寻隙地享所携酒食醉笑而归 【四月初二出宣抚镇志】

明清潭州云盖寺僧示疾而逝 【有师传僧口诀曰云盖锁口诀拟议皆脑裂拍手趁虚空云露西山月僧遂悟至道二年四月二日示疾】

招贤湖南长沙景岑僧示疾而逝 【僧初住鹿苑其后居无定所但徇缘接物随宜说法时谓之长沙和尚太宗至道三年四月二日示疾以上楚通志】

太虚元君生日 【道经】

三日

武城曰厥四月载生明 【载始也月三日生明】

宋太祖南郊 【开宝九年通考】

上幸司农少卿王光辅庄驾还中书侍郎南阳岑义设茗饮葡萄浆与学士等讨论经史 【景龙文馆记】

宋仁宗幸琼林苑赐从官射于苑亭射毕遂宴日旁有五色云见 【天圣八年玉海】

宋仁宗舍人院试宾贡进士 【先礼部贡院言近年进士惟钞略古今文赋怀挟入试昨者以正经命题多懵所出则知题目不示以出处也至景佑元年四月三日始诏进士题目具经史所出摹印给之出容斋随笔】

茅盈升仙门前数顷地忽自平治无寸草皆施青缣幄屋下尽铺白毡可容数百人众宾并集大作宴会见金盘玉杯自至筵前后有妓乐丝竹金石之音兰麝香达数里少顷迎官毕至朱

衣玉带者数百人旌旗甲仗光彩耀日盈乃与家人亲友辞别登车乘云冉冉而去【茅盈字叔中蒙玄孙弟固字季伟次弟衷字思和生于汉景帝中元五年年十八弃家入恒山修道后二弟俱贵衷为西河太守固为武威太守乡里送者数百人时盈亦在坐笑谓宾曰吾虽不作二千石来年四月三日送仆登仙当不减于今日也至期如其言出列仙传】

北斗北极翊圣下降【道经】

诗

今日逢初夏欢游续旧旬气和先作雨恩厚别成春风吹临清洛龙舆下紫宸此中歌在藻还见跃潜鳞【孙逖四月三日上阳殿奉和应制】

四日

比干庙有司致祭

【比干庙在卫辉府城北此庙魏文帝建又淇县亦有庙有司四月四日致祭出一统志】

黄龙见帝王受命符瑞【曹操字孟德汉帝以众望在魏乃召群公卿士告祠高庙奉玺绶禅位册曰咨尔魏王先有言讖纬于魏王曰易传曰圣人受命而王黄龙以戊巳日见四月四日戊寅黄龙见此帝王受命之符瑞出魏书】

宋真宗召辅臣玉宸殿王钦若陈尧叟冯拯赵安仁预焉始观太宗御书移御别殿观皇王帝伯四论良臣正臣忠臣奸臣权臣五论幸水轩垂钓侍臣赋诗【祥符八年】

宋仁宗幸琼林苑宴射上中的者十四已而阅骑士射柳枝【至和二年以上玉海】

晋?遁终【晋?遁字道林姓闵陈留人幼有神理聪明秀彻家世事佛晋初至京师□蒙陈群殷浩谢安王羲之等见遁逍遥篇注雅重其风力生平历余杭山白马寺?山寺爱□溪山水晚欲移入蔬食终身后以疾还余姚坞山中太和元年四月四日终年五十三窆于坞山中冢存焉出高僧传】

马钰居华阳亭墙外有来禽一株枯已久矣师是日汲水沃之曰纯阳来年四月十四日生于此树之下【马钰初名从义字宜甫钰字玄宝更之也号丹阳子宁海人以水沃来禽四月四日也史纂左编】

竹下围棋【翰墨大全】

万神善化犯之失音【三元延寿书】

天帝游东井 【道经】

文殊生 【佛书】

善财童子出参 【华严经】

诗

春郊柔绿遍桑麻小驻芳园览物华应信吾心非暇逸顿回晴意绝咨嗟每思富庶将同乐敢务游畋漫自夸不似华清当日事五家车骑烂如花 【先三月二十六日宋孝宗幸玉津园因雨霁洪迈进诗四月四日孝宗和韵孝宗又曰迈侍制用如麻字偶思得桑麻可押迈末句用羯鼓催花事故以华清车骑荅之举朝称赞】

五日

庄公七年夏四月辛卯恒星不见夜中星陨如雨 【杜预曰辛卯夏四月五日月光尚微盖时无云日光不以昏没日光不匿恒星不见出丹铅续录】

唐玄宗因奏封禅仪注敕中书门下礼官学士等宴集贤殿玄宗曰今日与卿等贤才同宴于此宜改集仙殿为集贤殿丽正书院为集贤书院 【开元十三年玉海】

唐玄宗崩 【葬泰陵在京兆府奉先县界通考】

北齐有起居省宋张泌奏复左右史之职记录以为起居注太宗从之置院于禁中 【起居注始于张泌浮化五年四月五日之奏复也出事物纪原】

宋谢枋得卒 【枋得至燕初行时士友饯诗盈凡张子惠诗云此去好凭三寸舌再来不直一文钱枋得会其意遂以眠簪中而去度采石自是不食只茹菜果数月困殆四月初一至燕京初五日死于驿于定之护骸骨归葬信州枋得天资严厉雅负奇气推宋必亡于二十年之后枋得不动于富贵贫贱学者师尊之出全编】

独孤君卒 【独孤君讳申叔字子重年二十二举进士文二年用博学宏词为校书郎又三年居父丧而卒盖贞元十八年四月五日也是年七月十日而葬柳子志墓曰独孤君之道内之为孝外之为仁默而智言而信其穷也不忧其乐也不淫读书推孔子之道必求诸其中其为文深而厚尤慕古雅善赋颂其要咸归于道呜呼君短命行道之日未久故其道信于其友而未信于天下今记其知君者于墓出合璧事类】

六日

宋太祖幸庙阅土木之功历观两廊下图画名将指白起曰此人杀已降不武之甚何受享于此以杖画去之【建隆四年出宋史】

宋真宗亲谒太庙光宗亲享太庙【祥符四年淳熙十六年出通考】

虔州言木柱内有天下太平年五字是日诏送史馆作瑞木成文曲有厚坤效珍嘉木纪瑞云【宋高宗绍兴十四年出玉海】

程正叔讲读迹英阁【元佑二年四月六日讲读顾子敦以为执政得一赐坐啜茶已为至荣岂可使讲读小臣坐殿上出明道集】

东坡别黄州【元豐七年东坡在黄州命移汝州至四月六日别黄州送东坡者皆至慈湖独陈季常至九江相别在九江和李太白浔阳宫诗其序云今子亦四十九感之次其韵盖元豐七年正东坡四十九之年也出长公外纪】

元人刘因卒【刘因字梦吉保定容城人因生之夕父述梦神人马载一儿至其家曰善养之既觉而生乃名曰骈字梦骥后改今名及字因天资绝人三岁识书日记千百言过目即成诵六岁能诗七岁能属文落笔惊人甫弱冠才气迢迈日阅方册思得如古人者友之得周程张邵朱吕之书能发其微至元十九年征因擢承德郎右赞善大夫未几以母疾辞归后又征为集贤学士嘉议大夫上书宰相以疾固辞四月六日卒闻者嗟悼出史纂左编】

郝女君与邻女十人于沔水边坐忽有青衣童子至女君前云东海公娶女君为妇言讫见茵褥于水上女君行坐往来有若陆地其青衣童子侍侧沿流而下邻女走告于家人家人莫能得女君遥语曰幸得水仙愿勿忧怖又言每至四月送刀鱼为信【郝姑祠在莫州莫县西北四十五里俗传云郝姑者字女君本太原人后居莫县魏青龙年四月六日与邻女相约水边见青衣童子云云至今四月多有刀鱼祠前忽生青白石高二丈题云姑夫上马石至今存焉出莫州图经】

太素三元君朝真日【道经】

诗

病疮老马不任鞿犹向君王得敝帷桑下岂无三宿恋樽前聊与一身归长腰尚载撑肠米阔领先裁盖褰衣投老江湖终不失来时莫遣故人非【东坡四月六日别黄州作载楚通志】

七日

宋太祖幸节度使赵彦徽第视疾【开宝元年宋史】

东阳七佛寺有一物出头如鹿有道人追而观之气若云雾寻觅集处亦无孔穴有声若雷
【元嘉十四年四月七日出异苑】

杨师操喜闻人过是夜忽见青衣人骑白马来云东阳太监追汝须臾不见师操身仆似到东阳都过一曹见有几案囚人着枷不可筭数又师操向东行见一处有孔甚小孔中小星流出臭气袭人有一人曰是大地狱中闻师操喜论人过以汝置此 【师操雍州醴泉县人也唐太宗贞观中任蓝田尉后以身老还家喜闻人过永徽元年四月七日死于东阳都其家为师操身死施斋数日放归前追使者云汝归其修善乎后师操礼十方佛动心悔过出太平广记】

南斗北斗西斗帝君下降 【道经】

诗

好在清和月祥开纷郁烟一句岳降后隔宿佛生前 【事文类聚】

八日

卫源庙每岁有司致祭 【卫源庙在卫辉府北门泉上泉乃卫河之源隋唐以来已封威惠王元加封洪济威惠王以水之本名称之每岁四月八日致祭元张恒诗上国风帆快转输石林香霭护神居龙吟别浦泉声细鸟拂空潭树影虚出天下一统志】

洞庭庙每岁致祭 【祭以四月八日庙在磊石山封洞庭湖龙神出长沙府志】

天禧中王钦若请以西湖为放生池郡人每岁是日用释氏法称家有无随愿深浅买禽鱼放之 【出合璧事类据西湖记以放生为人主祈福四月八日数万人于湖上放羽毛鳞介皆西北向稽首仰祝千万岁寿】

魏时京师士女多至河间寺观其廊庑绮丽无不叹息以为即蓬莱仙室入其后园见沟渌蹇产石磴礁峣朱荷出池绿萍浮水飞梁跨阁虽梁王兔苑亦不如也 【洛阳伽蓝记】

俗传为释迦佛生辰僧尼各建道场宣扬经偈其男妇争以财物献之虽衣食匱竭亦不暇顾
【宣抚镇志】

王高丽在鼓城佛寺中谢混见而以槟榔赠之王执手谓曰王郎谢叔源可与周旋否
【风土记】

孙皓是日溺金像曰浴佛后因病忏悔乃差 【世说】

刘敬宣八岁丧母是日敬宣见众人灌佛乃披头上金镜以为母灌悲泣不胜 【沈约宋书】

沈道虔累世事佛以父祖旧宅为寺是日请像举家感动焉【道虔吴兴武康人少仁爱好老易县北石山下为精庐与孤兄子共釜庾之资困不改节太祖闻之遣使存问赐钱道处年老果食恒无经日之资而琴书为乐孜孜不倦出沈约宋书】

上崇奉释氏是日新罗国献万佛山上以九光扇置于岩巘间召僧入内礼万佛山睹九色佛光于殿中【杜阳编】

荆楚人于诸寺设斋以五色香水浴佛共作龙华会【岁时记】

长沙市肆之人无子者供寺阁下羊肉薄饼乞儿往往有验【时镜新书】

浴佛以都梁香为青色水郁金香为赤色水丘隆香为白色水附子香为黄色水安息香为黑色水以灌佛顶【高僧传】

大慧禅师浴佛上堂语云今朝正是四月八净饭王宫生悉达吐水九龙天外来捧足七莲从地发【佛运绕纪】

药山是日见遵布衲洗佛云汝只洗得这个还洗得那个遵云请将那人来山遂默然归方丈密印禅师曰药山无风起浪被遵布衲一靠直得锋铓结舌罗么一场【印语录】

周昭王二十四年是日天竺国净梵王妃摩耶氏生太子悉达【二十五岁于菩提场中成无上道号佛氏尊后五十二年二月十五日于拘尸罗国婆罗双祠间入涅槃出佛运绕纪】

寺中无风而塔上一铃独鸣佛图澄谓众曰国有大丧不出今年是年石勒死太子弘袭位【佛图澄西域人也本姓白氏少出家以晋怀帝永嘉四年适洛阳能使鬼神千里外事皆彻见石勒诸幼子多在佛寺养之每至四月八日勒诣诸寺观佛至建平四年四月八日铃鸣澄曰国丧如其言出高僧传】

文帝时魏州立舍利塔有一黑狗耽耳白胸于舍利塔前舒左股屈右脚见人行道即起行道见人持斋亦即持斋【四月八日立舍利塔寺内先有数猛狗但见一狼狗无不竞来吠啮若见此狗入寺悉皆低头掉尾出隋书】

老子夜半剖右腋而生坠地即行七步于是佛道兴焉
【出南史据史纂左编老子二月十五生】

尹真人生

葛孝先真人生

尹虚鉴真人升仙 【以上翰墨大全】

濮阳郡有异人续生者每岁是日市场戏处皆有续生郡人张孝恭往所在对一续生遣诸奴往诸所在俱见续生以此异之 【濮阳郡异人续生者莫知其来身長七尺许肥而黑发余二三寸不着褌裤破衫齐膝而已人遗财帛转施贫者每四月八日市场皆有续生出广古今五行纪】

湘阴县东六十里相传晋时里人刘倩赘陶淡家四月是日脰鱼于桥上方斫鱼尾或报曰汝家举宅上升倩弃之今每岁八日见无尾鱼逆水上至桥而退 【楚通志】

善恶童子降犯者血死 【三元延寿书】

不远行宜安心静念沐浴斋戒必得福履 【摄生月令】

不宜杀草木宜进温酒服温药 【齐人月令】

九日

唐太宗是日公卿上言请修太和宫厥池清凉可以避暑诏从之 【贞观二十一年】

宋真宗幸琼林苑宴射帝作七言诗赐从臣 【祥符九年四月九日出通典】

宋孝宗书明良庆会之阁赐史浩 【淳熙十一年以上玉海】

度宗生于绍兴府荣邸以为干会节 【度宗讳（衽去壬改基）嘉熙四年四月九日生先母梦日光照东室又梦神人采衣拥一龙纳怀中已而有娠及生室有赤光资识内慧七岁言言必合度理宗奇之出宋史】

韦津死 【王世充与李密战充败密又拥兵三十万陈于北邙南逼上春门段达韦津拒之达望见密兵盛惧而先还四月九日韦津死出蒲山公传】

大儒吴渊颖卒 【讳莱字立夫元至元六年疾作先忽梦作童汪跼赞觉谓人曰汪跼殇者也予疾若此殆不起耶夏四月九日卒于家遗命治丧不用浮屠先生以精深玄懿之学发沈潜奇绝之文阖阴辟阳出神入鬼著述甚多及门之士私谥曰渊颖先生出宋学士集】

十日

宋神宗庆历八年生于濮王宫群鼠吐五色气成云治平四年即位宰臣等表曰诞圣题期表灵源之浚发揆时纪节昭皇德之开光当正阳统月之辰乃甲观袭祥之日庆由运会道与天

同请以生之日为同天节 【武夷志云神宗之未生也武夷山道士吴怀玉有道术指武夷君像曰岁在戊子降为人主又指魏王像曰三十有八载当继世御极抚平四海后其语皆验人方輿胜览云宋建守陈觉民过武夷山诗升真洞口接天门灵草丹桃日月春听说列仙来瑞世三朝德业在斯民盖真宗神宗哲宗皆武夷仙真应世故有三朝德业之句据史事实神宗四月十日生】

黄巢贼散走 【先一日李克用合忠武骑将庞从遇黄巢贼于渭南决战三捷大败贼军四月初十日夜贼巢□走出旧唐书】

苏珠娘到鹄奔亭时日暮行人绝不敢前有婢名致福者暴得腹痛珠娘往亭长舍乞浆取火亭长龚寿操刀问珠娘曰繒从何处得珠娘怖惧寿利其繒以刀刺胁立死又杀致福楼下埋之 【汉时何敞为交州刺史行部苍梧郡高要县暮宿鹄奔亭夜犹未半有女从楼下出自云苏娥字珠娘早失父母兄弟有繒百二十疋与婢致福往县卖乃以前年四月十日到此亭龚寿操刀刺死敢告于明使君敞曰今欲发汝尸骸何以为验女曰白衣青履犹未朽掘之果然敞遣使捕寿问与珠娘语同遂斩之以助阴杀出还冤记】

十一日

唐太宗亲谒太庙谢承干之过 【贞观十七年通考】

文宗敕曰闻京师旧说终南山兴云即雨若晴霁虽密云他至竟不沾濡况兹山北面阙庭日当顾瞩修其望祀宠数宜及闻无祀宇宜令中书门下差官设奠择立庙处
【开成二年四月十一日敕后九月敕终南山为广惠公出通考】

诛益州长史李孝逸 【武承嗣使人诬孝逸自云名中有兔兔月中物当有天分天分谓有分为天子则天垂拱二年四月十一日诛出唐历】

地破日不可开山动土 【登真隐诀】

诗

南村诸杨北村卢白花青叶冬不枯垂黄缀紫烟雨里特与荔枝为先驱海山仙人绛罗襦红纱中单白玉肤不须更待妃子笑风骨自是倾城姝不知天公有意无遣此尤物生海隅云山得伴松桧老霜雪自困楂梨羸先生洗盏酌桂醕冰盘荐此赅虬珠似开红蟠斫玉柱更洗河豚烹腹腴我生涉世本为口一官久已轻莼鲈人间何者非梦幻南来万里真良图
【东坡四月十一日食荔枝】

十二日

唐睿宗幸隆庆池结彩为楼宴侍臣泛舟戏象以厌之
【景云元年厌于叶翻时人以为玄宗受命之祥出景龙文馆记】

汉灵帝宫车晏驾 【中平六年后汉书】

后周太祖葬于嵩陵 【陵在郑州新郑县通考】

宋孝宗诣德寿宫请太上同幸聚景园 【淳熙元年四月十二日出会要】

胡国珍薨明帝举哀于太极东堂 【国珍字世玉安定临泾人也国珍少好学雅尚清俭女以选入掖庭生明帝即灵太后也孝明帝践祚以国珍为光禄大夫太后临朝封安定郡公国珍年虽笃老雅敬佛法四月七日步从所建佛像发第至阊阖门四五里劳热增甚因遂寝疾灵太后亲侍药膳四月十二日薨年八十出北史】

田琢为潞州观察判官偶坐廨舍之含翠堂忽双燕至一飞檐户间一上砚屏田谛观即前燕也腊丸尚在 【金宣抚使田琢字器之从军塞外合虏里山野舍春末有双燕为巢土人不识屡欲捕之田曲为全护此燕昼出夜归田必开户待之忽一日飞止坐隅无所惊畏巧语移时不去田思明日秋社燕当归矣此殆为留别语也因作诗赠云几年塞外历奇危谁谓乌衣亦此飞朝向芦陂知有为暮投第舍重相依君怜我处频迎语我忆君时不掩扉明日西风悲鼓角君应先去我何归遂细书为腊丸系其足上后八年太和甲子田为潞州观察四月十二日坐含翠堂双燕忽至腊丸尚在田谓同年庞铸画为图自作序求赵阅作诗出中州集】

苍龙溪新宫是日建 【蔡少霞者陈留人幼而奉道早岁明经得第一日沿溪独行忽得美荫因就憩焉不觉成寐因为褐衣鹿帻人梦中召去乃至一城郭处碧天虚旷瑞日瞳眈见一玉人当轩独立玉人谓少霞曰愍子虔心今宜领事少霞不知所谓复为鹿帻人引至东廊止于石碑之侧谓少霞曰召君书此少霞素不工书即极辞让鹿帻人曰按文而录胡乃拒违以笔砚即付少霞曰法此而写少霞凝神搦管顷刻而毕因览读之已记于心矣题曰苍龙溪新宫铭紫阳真人山玄卿撰良常西麓源泽东澍新宫宏宏崇轩（车献）（车献）雕玳盘础镂檀竦桀壁瓦鳞差瑶阶昉□阁凝瑞雾楼横祥霓驺虞巡徼昌明捧闾珠树规连玉泉矩泄灵飙遐集圣日俯晰太上游储无极便阙百神守护诸真班列仙翁鹄驾道师冰洁饮玉成浆饌琼为屑桂旗不动兰屋互设妙乐竞臻流铃间发天籁虚徐风箫冷澈凤歌谐律鹤舞会节三变玄云九成绛阙易迁虚语童初浪说如毁乾坤自有日月清宁二百三十一年四月十二日建于是少霞方更周视遂为鹿帻人促之而返醒然遂悟急命纸笔登即纪录出集异记】

元中大法师升仙 【翰墨大全】

诗

前年家水东回首夕阳丽去年家水西湿面春风细东西两无择缘尽我辄逝今年复东徙旧

馆聊一憩已买白鹤峰规作终老计长江在北户雪浪舞吾砌青山满墙头发髻几云髻虽惭抱朴子金鼎陋蟬蛻犹贤柳柳州庙俎荐丹荔吾生本无待俯仰了此世念念自成劫尘尘各有际下观生物息相吹等蛟蚋 【东坡至惠州合江楼迁于嘉佑寺后又复迁于合江楼四月十二日又复归于嘉佑寺作时卜筑白鹤峰之上新居告成】

十三日

唐肃宗亲享庙 【干元元年通考】

宋真宗立夏祀赤帝

【景德三年四月十三日立夏按月令立夏之日天子迎夏于南郊迎夏为祀赤帝通考】

宋太祖崩是日发引太宗衰服奠哭群臣升梓宫于龙輶 【开宝十年出宋史礼志】

宋钦宗生靖康元年太宰徐处仁等请以四月十三为干龙节百官诣龙德宫上寿
【天中记】

三皇帝君降 【道经】

十四日

唐高祖是日幸龙潜旧宅改为通义宫置酒高会诏曰爰择良辰言遵邑里礼同过沛事等归
谯故老咸臻族姻斯会肃恭笃享咸庆兼集 【武德六年玉海】

德宗降诞节 【节度使王虔休献□天诞圣□候嘉作献寿文出玉海】

宋仁宗生宰臣丁谓等上表云玉瑶诞祥式契贯星之兆璇枢纪历爰标出震之期陛下清宁毓粹聪哲凝华候回炎律气应熏风协离德之融辉仰荣河之启瑞请以四月十四日为干元节从之 【仁宗母李氏梦一羽衣之士跣足从空而下云来为汝子时上未有嗣是夕召幸有娠明年四月十四日生仁宗幼年每穿履袜即亟令脱去常徒步禁中皆呼为赤脚仙人盖古之得道李君也一云仁宗以祥符三年生章懿梦二日在天其一忽堕以裙承之干与元年帝即位又真宗未有仁宗尝遣左珰诣茅山求嗣遇王真人言王真人已降生于宋朝珰问王真人本是何人曰古燧人氏章懿亦梦羽衣数百人从一仙官自空而下曰此托生于夫人及生宫中火光烛天始行步尝持槐木简以筋钻之真宗问何用曰试钻火耳帝顾后妃曰异人之言信不虚矣出元符宫石刻】

吕岩字洞宾以是日生母就蓐时异香满室天乐浮空一白鹤自天飞下竟入帐中不见 【曾祖延之终浙东节度使祖渭终礼部侍郎父让海州刺史贞元十四年四月十四日巳时生生而金形木质道骨仙风鹤顶龟背虎体龙腮颈修颧露额阔身圆鼻梁耸直面色黄白左眉角

一黑字左眼下一黑子少聪敏日记万言矢口成文既长身五尺二寸喜顶华阳巾衣黄白襴衫系大皂绦状类张子房二十不娶始在襁褓马祖见之曰此儿骨相不凡出史纂左编】

潭州鹤会 【潭州兵马都监赵不问淳熙九年四月十四日作鹤会一道人不知所从来摄衣升庀不与人楫径入堂房内不见但于几上得一幅纸书绝句云这回相见不无缘满院风光小洞天一剑当空又飞去洞庭惊起老龙眠末题谷客书谷客即洞宾也出道书】

陈楠是日与会主云我来尸解会主不以为事遂留四句曰顶上雷声霹雳混沌落地无踪今朝得路便行骑个无角火龙即日尸解 【楠字南木号翠虚惠州博罗县白水岩人以盘襴箍桶为生人无有知者作盘拢箍桶颂盘拢颂曰终日盘盘圆又圆中间一位土为尊磨来磨去知多少个里全无斧凿痕箍桶颂曰有漏教无漏如何水泄通既能圆密了内外一真空其言超悟如此后得太乙刀圭金丹法诀于毗陵禅师人有求符水者翠虚捻土付之病多辄愈故人呼之为炼泥丸宋宁宗嘉定六年四月十四日在潭州与会主云云翠虚度弟子三人鞠九思沙蛰虚白玉蟾出史纂左编】

金世宗设二帐于御幄之东约处机居之 【丘处机字通密号长春子金世宗设一帐于御幄之东约处机四月十四日居之及期有山贼之报改卜十月望□左编】

十五日

四月庚戌朔十五日甲子哉生霸成王有疾不豫故顾命曰惟四月哉生霸【死霸朔也生霸望也哉始也翌日成王崩出前汉书】

宋真宗章穆皇后郭氏崩 【景德四年宋史礼志】

程正叔进讲文公以下预焉

【元和二年四月十五进讲迺英殿殿朱漆钓窗青幕障日殊宽凉矣出明道集】

苏东坡绍圣元年是日过韦城而吴传正之甥欧阳思仲在焉相与谈传正高风东坡尝作洞庭春色赋传正独爱重之又作中山松醪赋不减前作东坡独恨传正未见乃取李氏澄心堂纸杭州程奕鼠须笔传正所赠易水供堂墨录以授思仲使面授传正且祝深藏之

【东坡与传正为世外之游及将赴中山传正赠东坡易水供堂墨一丸而别出长公外纪】

此日自堂厨至百司厨通谓之樱笋厨诗曰春事无多樱笋来 【岁时记】

焉耆国以是日游林 【焉耆国东高昌西龟兹南尉犁北乌孙俗尚娱乐邀二月肫出野祀四月十五日游林酉阳杂俎】

洞宾纯阳飞升

云房降诞 【祖师姓锺离讳权云房其字也是日降生仕汉为将军因失机入终南山得少阳帝君之术仙去出道书】

张法乐真人成仙 【出翰墨大全】

刘珍广汉什方人曰吾功行已成某月某日吾当升天至期自以火化 【刘开皇中居安乐山忽取道经锺磬封于石室中曰后六十年当有圣君取之吾四月十五日升天隋文帝遣使至山访其事令建三观唐高宗遣使取丹经锺磬以进 □州志】

僧尼是日就禅刹挂搭谓之结夏又谓之结制 【出荆楚岁时记其结夏者盖夏乃长卷之节在外行则恐伤草木虫类故释苑宗规云祝融在候炎帝司方当法王禁足之辰是释子护生之日至七月十五日应禅寺挂搭僧尼尽皆散去谓之解夏又谓之解制禅苑宗规云金风渐渐玉露滚滚当觉皇解制之辰是法岁周圆之日大藏经云四月十五日僧尼坐草为一岁谓之法岁】

诗

望朝斋戒是寻常尽起金根第几章竹叶饮为甘露色莲花鲙作肉芝香松膏北雨凝云磴丹粉经年染石床剩欲与君终此志顽仙惟恐鬓成霜
【皮日休四月十五日和陆龟蒙道室书事】

十六日

陈宣帝是日天雨雹始兴王叔陵刺后主于丧次据东府反
【大建十二年俄而伏诛出隋书】

唐太宗避暑九成宫是日上及中宫历览台观闲步西城王勃颂曰扃牖六合奔走八神梯霄架极考遗基于汶上稽典故于淹中阳灵开避暑之宫景福致追凉之殿洞龙对溜铁凤连甍
【九成宫隋之仁寿宫也冠山抗殿绝壑为池汉之甘泉不能尚也贞观六年四月十六上及中宫历览台观出旧传】

唐玄宗诏享太庙每室加常食一牙盘 【天宝五载四月十六日诏唐享庙每室加常食一牙盘五代遂废享庙之设牙盘自唐始出事物纪原】

先天降圣节听京城燃灯一昼夜 【真宗祥符六年出宋史礼志】

忌嗜欲犯之夭寿 【孙真人集】

天仓开宜入山修道 【遵生八笺】

十七日

玄宗景龙二年是日在厅事假寐白鹤观道士宋大辨等三十人同见赤龙据案【上微时尝至洛阳令崔日知宅崔设饌未熟明皇因寢庭前一架藤花初开日知见巨蛇食藤花逡巡不见上览曰饥甚梦中食藤花甚美日知乃知他日启圣之验也出逸史】

高宗册贵妃吴氏为皇后【绍兴十二年宋史】

帝御集英殿赐状元王佐以下及第出身同出身
【朱晦庵之科共二百三十人出七修类稿】

张韶于紫草车中载兵器犯银台门共三十七人入大内对食于清思殿即日禁兵诛之
【出唐书天文志】

程明道再上疏【熙宁三年四月十七日再上疏谏新法疏中有中外人情交谓不可设令由此侥幸事小有成而兴利之臣日进尚德之风浸衰矧天时未顺地震连年四方人心日益动摇云云出明道集】

杨氏裸坐【吴清妻杨氏号监真君头痛自春及夏静坐忽不见四月十七日夜见杨氏裸坐屋上称先日有同行伴煎茶汤相待汴州姓吕名德贞同州姓张名仙真益州姓马名办真宋州姓王名信真及还有一女冠赋诗相别云道启真心觉渐清天教绝粒应精诚云外歌声笙管合花间风引步虚声唐元和十二年出逸史】

翊圣真君下降【道经】

诗

圆顶双胡碧眼人晓天亲送石麒麟九龙浴佛经旬日名世纔生属此辰【事文类聚】

玄天之龙兮见而在田我后之龙兮飞以御天据圣人之大宝与别祖而同玄高出而潜跃以自试来定天宝居然假寐合而成体散而成章若窥于牖若施于堂且据案而向明负展以当阳日月在身有祇天之嘉梦风雨合气将振翼而雄骧群居愕主圣作物睹赫然龙光真我明王折券表异亦惟前闻旷然振古卓有吾君王人之瑞比之龙首高居而远望以临乎九有天子之威比之龙鳞皇之可畏以肃乎万人徒称其象未睹其真恭惟我后近取诸身于昭巨唐其命惟新永据九五斯焉

万春【景龙二年夏四月十七日玄宗厅事假寐道士宋大辩等见赤龙据案潘炎于是作赤龙据案赋】

十八日

成都府有逍遥山壁上有汉安元年四月十八日会仙友字【逍遥山在简县宋景德间有杨用晦者隐居此山山北有层崖崖有东西二室后有二丹灶又有石窟出蜀志】

唐肃宗崩【葬建陵在京兆府醴泉县界通考】

孔子卒于鲁城北泗上【出鲁史据左氏云鲁哀公十六年夏四月巳于孔丘卒司马迁遵之诸儒又遵之是孔子所卒之年当从左氏然十六年乃壬戌之岁也是岁四月戊申朔有乙丑而无巳丑巳丑乃在五月之十二巳与乙文亦相近故误书也所谓乙丑则四月十八日自壬戌岁上朔巳酉孔子之年乃七十四谓七十三者非也孔子卒亦载于二月十八日】

紫微北极大帝诞日【道经】

诗

天气清和仅两句一句前是佛生辰当年来应徐卿梦此夕遥瞻寿宿明【事文类聚】

十九日

武王祀周庙【武王伐商四月十九日祀于周庙通考】

肃宗以星文变异御明凤楼大赦天下改干元为上元追封周太公望为武成王依文宣王例置庙以历代良将为十哲白起韩信诸葛亮李靖李绩列于左张良田穰苴孙武吴起乐毅列于右【上元元年出会要】

唐德宗生群臣上寿不置节名不纳中外之贡驸马高怡献金铜像德宗曰有何功德非吾所为退还之【天宝元年四月十九生出旧唐书】

真元五年是日顾况作宋州刺史厅记记曰商丘之地辰火之宿孟诸之湄阌伯所迁微子所奉之国也仲尼之伐树子罕之弃车皆此地焉梁孝王时四方游士邹生枚叟相如之徒朝夕宴处更唱迭和天寒水冻酒作诗滴是有文雅之台清冷之地云云【事文类聚】

成都风俗每岁是日士女泛舟浣花溪之百花潭府尹亦至潭上置酒高会设水戏渡尽乐而返相传唐冀国夫人故事也冀国夫人是日生先唐宁节度西川微服行民间见而悦之纳以为妾宁妻死遂为继室每生日置酒浣花溪之百花潭徘徊终日后人因之遂以为常成都谓之浣花遨头宴于杜子美草堂沧浪亭倾城皆出锦绣夹道【成都士女四月十九日泛舟冀国夫人姓任汉上小家女任媪尝祷于神祠梦神人授以大珠觉而有娠明年四月十九日生年稍长释氏教甚谨有僧过其家疮疥满体衣服垢敝见者心恶女独敬事之一日僧持衣从

以求浣女欣然濯之溪边每一漂衣莲花辄应手而出里人惊异求僧不知所在因识其处为百花潭及女为冀国夫人每四月十九诞辰置酒江上泛舟访漂衣故处故后人以是日至此设水戏渡老学庵笔记亦出蜀志】

张重华郑景世升仙 【翰墨大全】

二十日

赵王伦矫制废贾后害张华等

【晋永康元年四月二十日先大风口沙张华舍风飘起出广古今五行记】

李希孝欲模写捕鱼图

【捕鱼图王右丞草也元佑元年四月二十日季希孝欲模写无善工出晁补之捕鱼图序】

司马光应诏 【四月二十日诏言过失与朝廷政事之阙司马光曰臣以弩下之材自仁宗皇帝蒙擢侍从服事三朝恩隆德厚陨身丧元不足为报虽访问所不及犹将被肝沥胆以敕其区区之忠况圣意采纳之动督责之严谆谆如此敢不为陛下别白当今之切务少补万分之一耶云云出文鉴】

前张质推事冤人 【张质猗氏人以明经授亳州临涣尉到任月余日暮见数人于符来约质去质乘马随之至县门县吏列坐略无起者质怒曰吏敢无礼县吏亦不顾出数十里至一柏林下马遂步行百余步见一大府门随使者入上有美须衣绯者据案而坐责曰为官何曲以推事质曰到任月余未尝推事绯衣人召冤人出对冤人自西房出疾视质曰此非推某者乃前临涣尉张质贞元十一年四月二十日推某者若此质是贞元十七年到任尚未久判官曰名姓偶同放归归时已七日矣仍在柏林中伏于马上有樵人见而惊之曰县失官人此非耶就问质质不能对数日后方能言出续玄怪录】

二十一日

唐肃宗妖星见于西方长数丈 【上元元年闰四月二十一日妖星见至五月减通考】

唐高祖造太和宫于终南山 【武德八年后贞观十年废】

唐高宗造蓬莱宫成是日徙居之 【龙朔二年】

宋真宗幸龙图阁阅太宗御书宴于崇政殿帝作五言诗 【景德二年】

宋高宗诏求四方遗书 【绍兴二年以上玉海】

给事中韩忠彦言门下省得旨举驳事依中书舍人封还词头例四月二十一日中书奉旨给事中驳正事赴执政堂稟议 【宋神宗元丰七年出朝野杂记】

碧虚子题化书后序 【谭景升终南山着化书因游三茅经历建康见齐丘有仙风道骨虽弱于机智而异乎黄埃稠人遂引此篇云稚子弄影不知为影所弄狂夫侮像不知为像所侮化家者不知为家所化化国者不知为国所化醉者负醉疥者疗疥其势弥颠其病弥笃而无反者也齐丘终不悟景升乃出化书授齐丘碧虚子至嘉佑五年夏四月二十一日题化书后序出道书】

普贤菩萨生辰 【佛书】

二十二日

唐太宗自为真草书屏风以示群臣笔力遒劲为一时之绝太宗谓魏征曰世南没后无一人可与论书征曰褚遂良 【贞观十四年玉海亦出□实录】

少傅史浩等三十四人进明堂庆成诗忠州文学程宏繇进明堂赋太常丞胡南逢等三人进明堂颂 【宋孝宗淳熙七年四月二十二日先孝宗御书明堂门六字书毕积雨骤霁星月灿然可喜出礼志】

王庶人卒 【唐惠妃武氏有专房之宠将谋夺嫡王皇后上欲废为庶人又废太子上问于张九龄对曰太子天下本也动之则摇人心九龄未闻大恶臣闻父子之道天性也子有遇父怒而掩之不宜废绝恐伤陛下慈父之道上不悦李林甫秉政阴中计于武妃以自固武妃亦结之乃先出九龄而废太子后玄宗乃立肃宗为太子林甫之计不行王庶人以开元二十五年四月二十二日卒武妃至十二月而薨识者谓有神通焉出大唐新语】

董卓见王允等持剑立于殿门卓大惊王允大呼曰反贼至此遂命武士百余人持戈刺之卓里甲不入伤臂坠车吕布怀中取诏大呼曰奉诏讨贼臣董卓李肃斩卓首携之时卓年五十四 【里甲者披甲于内加衣于甲上汉献帝初平二年四月二十二后太史有诗曰郿坞追魂凭李肃宫门取命有温侯出三国志】

二十三日

甘露降于中华殿之桐木沍如冰雪唐高祖以示群臣 【武德九年玉海】

齐高帝登位 【出南史】

宋高宗讲易终篇以犀带象牙简金鞍勒马赐宰相侍读以下 【绍兴二十五年玉海】

吕布将数百骑出武关诣袁术以杀董卓为术报讎【吕布字奉先五原郡九原人也先一日杀卓二十三日诣袁术欲以德之卓死后六旬布亦败出汉杂记】

王处一上升【处一宁海东牟人号玉阳四月二十三日语门人曰群仙已约我矣言讫沐浴冠带焚香朝礼十方乃辞而上升处一冬寒跣足单衣颜色不变传道则有山鸣谷吼之应书符则有鬼怪潜出之灵类此甚多出史纂左编】

诗

巴俗深留客吴侬但忆归真知难共语不是故相违东县闻铜臭江陵换夹衣丁宁巫峡雨慎莫暗朝晖【黄山谷以绍圣二年谪黔州四月二十三日至摩园作】

二十四日

刘先主崩于永安宫亮表后主曰大行皇帝迈人树德昊天不吊今四月二十四日奄忽升遐臣妾号咷如丧考妣云云【先主刘备字玄德涿郡鹿县人谥昭烈皇帝先一日先主忽榻前烛灭复明隐隐见二人侍立起而观之乃云长翼德也二人相向曰因生平不失信义王帝敕为神忽不见先主知不可起乃泣语孔明曰君才胜曹丕十倍必安国而成大事若嗣子可辅则辅之如不可自为成都主孔明泣曰臣以肝脑涂地安能补报知遇之恩又命赵云曰朕与卿今别矣云泣曰臣效犬马之劳以扶社稷言毕驾崩寿六十三时章武三年出蜀志亦出三国志】

荥阳郡人尹千见天雨石坠地开之有玉玺在其中【齐高帝四月二十三日登位二十四日尹千于嵩山东南见天雨石开之乃玉玺其中有文曰戊丁之人与道俱肃然入草应天符扫平河洛清魏都宋禅位于齐此其符验也出南史】

宋高宗谓侍臣曰朕闻祖宗时禁中有打麦殿今于后圃令人引水灌畦种之亦欲知稼穡之艰难【绍兴二年玉海】

唐睿宗敕鱼袋着紫者金装绯者银装【景云二年四月二十四日敕按唐实录高祖给随身鱼三品以上其饰金五品以上其饰银故名鱼袋至宋朝神宗元丰末亲王赐玉鱼以副金带金鱼以副玉带以唐礼也韩文公诗曰不知官高卑玉带悬金鱼是也】

宋高宗置六科举士【绍兴二十六年四月二十四日置六科一曰文章典雅可备制诰二曰节操方正可备台谏三曰才识该通可备刑谏四曰节用爱民可备理财五曰慈祥恺悌可备监司郡守六曰智勇绝伦可备将帅令侍从岁举之如元佑司马光所谕宋史】

宋神宗除户部侍郎谢景温为礼部侍郎【元丰五年四月二十四日出合璧事类】

圆通禅院苏老泉旧游处东坡四月是日宿焉明日老泉忌日也乃手写宝积献盖颂佛一偈以赠长老僊公僊公拊掌笑曰昨夜梦宝盖飞下着处辄出火岂此祥乎东坡于是作诗【长公外纪】

诗

石耳峰头路接天梵音堂下月临泉此生初饮庐山水他日徒参雪窦禅袖里宝书犹未出梦中飞盖已先传何人更识嵇中散野鹤昂藏未是仙【圆通禅院东坡四月二十四日作】

二十五日

晋武帝太后崩有司奏是日安厝【泰始四年礼志】

唐玄宗是日问诸蕃诸国远近鸿胪卿王忠嗣上言曰谨按西域图自陀拔恩单国至史国凡十有二【天宝六年玉海】

宋仁宗御制雅乐曲及乐章凡六十八【景佑二年音乐志】

李德光上五帝功臣绘像图【宋高宗绍兴九年玉海】

苏老泉忌日【老泉东坡父出长公外纪】

二十六日

泽州是日请建庙命礼官考其仪有司言唐制诸郡置风伯坛于社坛东雨师坛于社坛西【宋真宗祥符二年玉海】

宋哲宗复置贤良方正直言极谏科【元佑二年玉海】

状元王佐以下各赐钱一千七百贯【王佐与朱文公同科四月初三日御试策一道十七日皇帝御集英殿赐状元王佐以下及第出身同出身十八日赴宴二十六日各赐钱出七修类稿】

知潭州林栗是日进经传集解三十二卷系辞上下二卷文言说卦序杂本文共为一卷河洛书八卦九畴大衍总绘图六十四卦立成图大衍揲蓍解共为一卷总三十六册诏付秘省敕书奖谕【宋孝宗淳熙十二年玉海】

二十七日

昌邑王贺行淫辟立是日大将军霍光白皇太后废之【先牂云如狗赤色长尾三枚夹汉西行占曰天文以东行为顺西行为逆主人臣运柄牂云为乱君此大臣欲行权以安社稷也四月二十七日霍光废昌邑王出汉书】

宋哲宗观麦于后苑【绍圣元年玉海】

元顺帝崩【元朝至正庚子岁长淮以北尚皆宴然山东则王信陕西则李思齐陇西则思道太原则王保保汴梁则太子开抚军司以总之既而诸将共谗王保保欲叛诏削军权台兵比行处处皆望风崩溃四月二十七日顺帝以疾崩皇太子脱身走去而皇孙就擒出草木子】

东坡到湖州谢表云臣荷先帝之误恩擢置三馆蒙陛下之过听付以两州陛下知其愚不适时难以追陪新进察其老不生事或能牧养小民
【元丰二年四月二十七到湖州出长公外纪】

浩陵郡有岩数里夜忽有双光【齐高帝建元元年浩陵郡蜃民田健所住岩间常流云气有声响若龙今求之积岁莫有见者四月二十七日夜岩数里忽有双光至明往获古锺一枚又有古器名淳于蜃人以为神物奉祠之出南齐书】

二十八日

议礼局请于南郊别立感生帝坛依赤帝高广之制从之【宋徽宗大观四年郊祀实录】

宋太祖皇后宋氏崩太宗素服举哀
【太宗至道元年四月二十八崩祔葬永昌陵之北出宋史礼志】

宋孝宗书荔枝赋赐舍人张延年【隆兴九年玉海】

老君于尹喜宅南山阜上升天喜悲恋请留老君告喜以除垢止念静心守一之旨言讫耸身空中坐云华之上面放五明身见金光洞照十方冉冉升空光烛馆舍五色玄黄良久乃没喜目断云霄涕泣攀恋其日江河泛山川震动有五色光贯太微遍及四方【尹喜拜老君曰幸闻至道欣庆难言愿赐著书阐扬道旨以语后世老君曰善以道德五千言授之喜拜受持诵老君次年四月二十八日于喜宅飞升出史纂左编】

天休节【上元星君下降出道经】

诗

蜀国富且庶风俗矜浮薄奢僭极珠贝狂佚务娱乐虹桥吐飞泉烟柳闭朱阁烛影逐星沉歌

声和月落斗鸡破百万呼卢纵大噱游女白玉珰骄马黄金络酒肆夜不扃花市春慙作禾稼暮云连纨绣淑气错熙熙三十年光景倏如昨天道本害盈侈极祸必作当时市政者罔思救民瘼不能宣淳化移风复俭约 【宋太宗至道元年四月二十八日张咏悼蜀诗】

二十九日

唐玄宗谓侍臣曰每祀黄帝乃就南郊礼亦非便宜于皇城内西南改置黄帝坛朕当亲祀以昭诚敬 【天宝九年玉海】

唐高宗给五品以上随身鱼袋以防召命之诈 【永徽二年四月二十九日给随身鱼袋鱼袋三代以韦为之箠袋魏易之为龟唐高宗给随身鱼三品以上其饰金五品以上其饰银故名鱼袋天后改为龟后复曰鱼神龙初赐紫则给金鱼赐绯则给银鱼不限品也出事物纪原】

宋高宗诏丞相赵雄等赴经筵听讲正说终篇浩等言陛下孳孳典训愈久愈明岁时甫浹篇帙再周请付史馆 【淳熙八年玉海】

状元王佐以下朝谢

【皇帝御集英殿赐状元王佐以下及第出身同出身四月一十九日朝谢七修类稿】

诗

梅雨涨添春酒色麦秋黄起寿炉烟铜壶未下三更水犹是清和四月天 【事文类聚】

三十日

汉成帝河平元年是日日食诏公卿百僚陈过失无有所讳大赦天下光禄大夫刘向对曰四月交于五月月同孝惠日同孝昭其占恐害继嗣 【是时许皇后专宠后宫中外皆忧上无继嗣故杜陵谷永及刘向所对皆及之上于是减省椒房掖庭用度四月己亥晦而日食故曰四月交于五月月同孝惠孝昭元年七月己亥晦日食故曰日同孝昭二帝寻皆晏驾而无嗣出白孔六帖】

汉和帝永元十五年是日日食时帝遵肃宗孝章帝故事兄弟皆留京师有司以日食阴盛奏遣诸王就国诏曰甲子之异责由一人诸王幼稚早离顾复弱冠相育常有蓼莪凯风之哀选儒之恩知非国典且复宿留 【贤曰选儒慈恋不决之意也出汉纪】

道悟禅师示疾命弟子曰四月三十日告终大众问疾师募召典座座近前师曰会么曰不会师拈枕头抛于地上即便告寂 【道悟荆州天皇寺僧神仪挺异幼而生知年十四恳求出家父母不听遂损减饮膳日纔一食形体羸悴父母不得已而许之依明州大德披削二十五诣杭州竹林寺具戒精修梵行推为勇猛或风雨昼夜冥坐丘冢身心安静一日游余杭首谒径

山国师受心法服勤五载后参马祖祖重印前解法无异说以宪宗元和年四月三十日告寂
是年八月五日塔于郡东出楚通志】

日涉编卷五

楚应城陈阶升也甫编辑

邑人徐养量叔弘甫校刻

陈容淳之初甫

慈溪姚宗文甫

男陈凤征懿兆甫全阅

五月〔一〕

五月建午午长也言万物皆长大也【合璧事类】

蕤宾午之气也五月建焉【周礼】

日在东井昏亢中旦危中【礼记】

仲夏日出于寅入于戌【尚书考灵曜】

仲夏行春令则五谷晚熟百螣特起四民有饥行秋令则草木零落果实早成民殃于疫行冬令则雹霰伤谷道路不通暴兵来至【吕氏春秋】

为皋【尔雅五月得戌为厉皋】

俗称恶月【仲夏阴阳交死生分君子斋戒止声色节嗜欲出董勋问礼俗】

是月不可入官【齐文宣令宋景业筮曰宜以仲夏吉辰顺天受禪或曰五月不可入官犯者卒于其位景业曰王为天子无复下期岂得不终其位出北史】

俗忌上屋如上屋即自见其形魂魄不安【酉阳杂俎】

以朱索连紫施门户【仲夏之月阴气萌作恐物不茂故以朱索出后汉书】

古人铸刀以月之丙午日取纯火精以协其数【合璧事类】

月之丙午日以金锡铸为阳燧 【搜神记】

爪哇国以是月游舡

【风俗婚姻无媒妁但纳黄金于女家以娶之五月游舡出外夷传亦出一统志】

单于大会龙城祭其先天地鬼神 【岁正月诸少长会单于庭祠五月会龙城出白孔六帖】

唐玄宗天鸣声若雷 【天宝十四年天鸣有声天子及大臣有忧通考】

晋惠帝日光四散赤如血流照地皆赤 【光熙元年占曰君道失明出天文志】

隋炀帝大流星如瓮坠于江都

【大业十三年占曰其下有大兵战流血破军杀将明年炀帝遇弑】

唐德宗有星坠于西北光烛如昼声如雷 【贞元十四年闰五月以上通考】

山阳济阴雨雹大如鸡子深二尺五寸杀人飞鸟皆死 【宣帝地节四年汉书□出六帖】

雨雹如扇如斗 【献帝初平二年汉书五行志】

临安大雨雹屋瓦皆碎有一村人多为不善夜有行人闻神过云付硬雨施行次日雨雹大损禾稼 【绍兴十七年轩渠录亦出天中记】

有落梅风江淮以为信风

有霖霖号为梅雨沾衣皆败谓之送梅雨 【以上风土记】

濯枝雨 【仲夏有大雨名濯枝风土记】

邹衍仰天而哭下雪 【衍事燕惠王左右谮之五月雪出世说】

汉女诉杀之下雪 【女居东海养姑姑女谗之于姑姑诣太守诉杀之五月雪汉书】

雨黄毛 【熙宁元年又熙宁八年雨黄土兼细毛宋史】

蜀地雨白毛 【晋武帝太始八年京房易传曰贤人逃天雨毛五行志】

元顺帝元统二年天雨毛至二十五年又是月大都雨毛长尺许或曰龙须命拾而祀之
【元史】

大雷雨下冰龟数十里随大小皆龟形具手足卦爻
【高宗绍兴八年汴京太康县宋史五行志】

黄河是月水名爪蔓水 【水衡记】

抚州王羲之墨池水色变黑如云 【宋咸平元年通考】

洞庭湖水夜赤光如火亘天 【建炎四年五行志】

饶州乐平县何冲里田陇数十百顷当霁天无云田水如为物所吸聚为一直西行高平地数尺不假堤防而水自行里南程氏家井水溢亦高数尺夭矫如长虹声如雷穿墙毁楼二水斗于杉墩且前且却约十刻乃解各反故壑
【高宗绍兴十四年与史记鲁谷洛水斗同京房曰天子弱诸侯力政厥异水斗出通考】

宋元嘉七年武陵洪水善德山崩两石高丈余如人雕刻精奇形备古制式占者云武陵出天子其年八月孝武始诞后封武陵王即帝位 【治闻记】

晋阳大旱得死魃长二尺面顶各二目 【北齐后主武平五年五月出北史】

晋怀帝枹罕令严根妓产一龙一女一鹅 【永嘉五年五月京房易传曰人生他物非人所见者皆为天下大兵是时帝承惠皇之后四海沸腾寻而陷于平阳为逆胡所害此其征也出通考】

曲阿有柳树倒地六载忽复起 【晋成帝咸和六年五行志】

大木自拔 【嘉定六年严州淳安遂安桐庐三县占曰木自拔国将乱】

成都太祖庙侧大木仆忽起立生三芽 【景帝四年以上宋史】

成都民郭远因樵获瑞木一茎有文曰天下太平 【太历十二年】

左羽林军有鸛鸽乳鹊 【太历十三年以上五行志】

凤凰集北海安丘淳于 【汉宣帝本始四年安丘淳于二县皆属北海】

凤凰集胶东 【汉宣帝太始元年以上符瑞志】

鲸有大者长千里小者数千步一生数万子常以五月六月就岸边生子
【五六月后鲸引其子入海中鼓浪成雷潰沫成雨水族惊畏之皆逃匿莫敢当出古今注】

丹水出丹鱼是月夏至前夜伺之鱼浮水则赤光上照如火 【山堂肆考】

长山县获神龟一头腹下有巽兑卦 【齐武帝永明九年南齐书符瑞志】

白虎见新昌县 【晋成帝咸和八年宋书符瑞志】

驹虞见壁山有二鹿随之 【王建永平三年五代史】

牛一头二面二口三目三耳

【世宗景明二年冀州长乐郡鸿范论曰君不明失政之所致出魏书】

牛生犊两头六足 【晋成帝咸和二年是冬苏峻作乱通考】

白鼠见于东宫 【晋惠帝元康元年白孔六帖】

滑州灵河县民黄庆家蚕自成被长二丈五尺阔四尺 【景佑四年】

北海县蚕自织绢成领带 【元佑七年以上宋史】

诗

江南仲夏天时雨下如川卢橘垂金弹甘蕉吐白莲 【樊珣状江南五月】

汉宫一百四十五多下珠帘锁闭窗何处营巢夏将半茅檐烟里语双双 【杜牧村舍燕】

挝杖来追柳外凉画桥南畔倚胡床月明舡笛参差起风定池莲自在香 【秦觏纳凉】

秣李四弦风拂席昭华三弄月侵床家无红袖堪娱夜正要青奴一味凉

【黄庭坚字鲁直题青奴秣李昭华二妓名】

茅檐长扫静无苔花木成蹊手自栽一水护田将绿遶两山排闥送青来 【王安石题茅檐】

一为迁客去长沙西望长安不见家黄鹤楼中吹玉笛江城五月落梅花 【李白北榭裊】

寂寂无聊九夏中倚岩依壁待清风北图奇策无人问不及南阳一卧龙 【刘兼仲夏昼卧】

和如春色净如秋五月商山是胜游当昼火云生不得一溪紫作万重愁 【赵嘏商山道中】

春蒲猎猎弄轻柔欲立蜻蜓不自由五月临平山下路藕花无数满汀洲 【参寥】

院僻帘深昼景虚轻风时见动竿乌池中绿满鱼留子庭下阴多燕引雏雨后看儿争坠果天晴因客曝残书幽栖未免牵尘界身在相忘在酒壶 【苏子美】

雕玉押帘上轻谷笼虚门井汲铅花水扇织鸳鸯文回雪舞凉殿甘露洗空绿罗袖从徊翔香汗沾宝粟 【李贺乐辞】

风帘燕引五六子露井榴开三四花 【黄孝先】

风含翠筱娟娟静雨裊红蕖冉冉香 【杜甫】

芒种

小满后十五日斗指丙为芒种 【孝经纬】

五月芒种为节者言时可以种有芒之谷故以芒种为名 【种读去声三礼义宗】

芒种谓谷芽始出故曰芒种 【出历疏】

长阳云出危 【易通卦验】

闽人以芒种后逢壬日为出梅雨 【据碎金集云芒种后逢壬入梅夏至后逢庚出梅又据神枢经云芒种后逢丙入梅小暑后逢未出梅人莫适从此必作书者各自以地方配时候而云然耳观杜少陵诗曰南京西补道四月熟黄梅湛湛长江去冥冥细雨来盖唐人以成都为南京则蜀中梅在四月矣柳子厚诗曰梅实迎时雨苍茫觉晚春此子厚岭外之作则又知南粤之梅在三月矣东坡吴中诗曰三旬久过黄梅雨万里初来舶赶风又埤雅云江湘二浙四五间有梅雨黔败人衣服今人又有诗曰千里殊风百里俗也知天地不相同江南五月黄梅黔人在鱼盐水卤中是知天地时候自有不同如此出合璧事类】

芒种日蟠蜋生 【芒种五月节也后五日鵙始鸣鵙音局百劳也本草作博劳盖梟类也又后五日反舌无声月令】

芒种后百舌有声候人在侧 【周书时训】

芒种后聚畜百药 【草木蕃时出六帖】

诗

久嗟三峡客再与暮春期百舌欲无语繁花能几时谷虚云气薄波乱日华迟战伐何由定哀伤不在兹

【工部题灋西新赁草堂反舌无声在芒种后十日今谓之欲无语乃芒种后作也】

夏至

夏至金胎木废水死火旺 【金胎言金孕于火土之中也】

芒种后十五日斗指午为夏至夏至者言万物于此假大而极至也
【夏假也至极也出韵会】

夏至有三义一明阳气之至极二明阴气始至三见日行之北至 【三礼义宗】

夏至一阴生是阴动用而阳复于静也 【复卦疏】

夏至日昼六十五刻夜三十五刻 【古今历衍】

夏至则斗南中绳阳气极阴气萌故曰夏至为刑 【刑始杀也出淮南子】

夏至日中赤气出直离此正气也 【易通卦验】

夏至则火从之故五月火正而水漏阳气为火阴气为水故夏至热
【火正火王也故水漏出淮南子】

夏至阴阳争死生分
【郑玄云五月阴气起于下盛阳盖其上故曰争品物滋生萁苈之属死故曰分】

伯赵氏司至者也 【伯赵伯劳也以夏至鸣冬至止左传】

阴气为水水胜则夏至湿 【淮南子】

夏至日成地理 【冬至日成天文春秋感精符】

夏至少阴云如水波 【易通卦验】

夏至则八风之序立万物之性成 【前魏相传】

日周天有七衡夏至日在内衡 【孝经纬】

日永星火以正仲夏 【夏至之日火苍龙之中星书尧典】

日行北至东井去北极近夏至至于东井北近极故晷短立八尺之表而晷景长尺五寸八分【前汉书】

夏至日影尺有五寸郑玄云土圭之长也尺有五寸夏至立八尺表其影适与土圭等谓之地中今颖川阳城地为然【周礼地官】

夏至三光盛【周髀云】

日道敛北去极弥近其景弥短近短乃极夏乃至焉【汉律历志】

夏至日鹿角解蝉始鸣半夏生木槿荣可以居高明可以远眺望可以升山陵可以处台榭【月令】

夏至景风至蝉始鸣螳始生【易稽览图】

夏至井水跃【春秋考异】

夏至三日垂土炭于衡两端轻重适均夏至日阴气至则土重【史记】

柞氏夏至令刊阳而火之【春官大司乐】

夏至禁举大火鼓铸销冶皆止【三礼义宗】

夏至阴事起君道衰故不贺【蔡邕独断】

夏至阴始动而未达故寝兵鼓不设致事所以助微气之养也【五经通义】

君以夏至日施命令止四方行者所以助微阴也【鲁公云】

夏至寝兵鼓身欲宁志欲静故不听事【蔡邕独断】

夏至景风用事人君当爵有德封有功【京房易占】

夏至祭昆仑之神于泽之中配于后【三礼义宗】

丝竹之管空桑之琴瑟夏至日于泽中方丘奏之阴竹之管龙门之琴瑟于宗庙奏之【春官大司乐】

夏至着五彩符辟兵题曰游光厉鬼知其名者无瘟疫【五彩辟五兵也永建中京师大疫云

厉鬼字野重游光亦流言无指见之者其后岁岁有病人情愁怖复增题之冀以脱祸出风俗通】

以冬至日致天神人鬼以夏至日致地示物魅以禋国之?荒民之扎丧
【天人阳也地物阴也阳气升而祭鬼神阴气升而祭示物魅禋除禳也魅音味出周礼】

夏至日浚井改水可去温病 【续汉书礼仪志】

夏至忌东风主病行秋令主多疫 【曜仙月占】

夏至取菊为灰止小麦蠹 【按于宝变化论乃云稻成虫麦为蛱蝶其验中出荆楚岁时记】

魏武收左元放桎梏之而自解盖用夏至日霹雳（左木右上天下韭）（左木右上天下韭）也 【左慈字符放（左木右上天下韭）音杉出抱朴子】

北朝妇人夏至日进扇及粉脂囊皆有辞 【酉阳杂俎】

夏至日日中天上三官会于司命河校定万民罪福增减年筭 【登真要诀】

北方荒中有石湖方千里无凹凸深五丈余岁常冰惟夏至左右五十六日解 【神异经】

丹水出丹鱼先夏至前十夜伺之鱼浮水赤色上照如光 【酈道元水经】

夏至前三五日吴郡太湖中白鱼向湖侧浅水菰蒲之上产子民得采之隋时贡于洛
【隋大业记】

猫目睛旦暮圆及午竖敛如綖其鼻端常冷惟夏至一日暖 【酉阳杂俎】

诗

三伏适已过骄阳化为霖欲归酿西宅阻北江浦深 【杜甫】

南越逢初伏东林越一朝曲池煎畏景高阁绝微飏 【王言史】

璇枢无停运四序相错行寄言赫曦景今日一阴生 【权德舆夏至日作】

五月〔二〕

一日

帝为梁冀所鸩崩 【本初元年闰五月一日先太白犯荧惑占曰有逆谋出通考】

唐德宗敕每年五月一日御宣政殿与文武百寮相见京师九品以上外官因朝奏在京者并听就列 【唐书亦载白孔六帖】

朝贺礼多在正月一日未有五月一日故欧阳公曰唐时有五月一日会朝之礼略记其始本出于道家是日君臣集会其仪甚盛不知起自何帝 【欧阳公帖】

宋真宗祥符二年皇太子生即仁宗后宫李氏所生知开封府周起方奏事帝曰朕始生子即入禁中怀金钱出以赐起 【出宋史据元符宫石刻仁宗四月十四日生故两日并载李氏杭州人庄重寡言有娠从帝临砌台玉钗坠帝私卜钗完当生子左右取钗以进殊不毁帝喜已而果生子刘修仪攘为己子李不言中外亦不知】

宋钦宗靖康二年康王即位于应天府 【出宋史先是二帝北狩元佑太后命太常少卿汪藻草手书告中外俾王嗣统其略曰历年二百人不知兵传序九君世无失德虽举族有北辕之衅而敷天同左袒之心乃眷贤王越居近服汉家之厄十世宜光武之中兴献公之子九人惟重耳之尚在兹乃天意夫岂人谋遂以五月庚寅朔一日登坛受命即位是夕元佑皇后在东京撤帘康王名构即高宗】

宋孝宗书唐元祯牡丹诗以赐吴琚 【淳熙元年玉海】

任文公巴郡人时天大旱白刺史曰五月一日当有大水其变卒至不可防救宜令民吏预为之备刺史不听文公独诣大舡百姓或有信文公颇有防者至是日旱烈文公急命从载白刺史刺史不信至日中云起须臾至晡时湔水涌起十余丈突坏庐舍所害数千人 【范晔后汉书】

东方朔母田氏寡梦太白星有娠田氏叹曰无夫而孕人得弃之遂移居东方里是月朔一日生故以所居为姓以朔为名 【出洞冥记据诸类书方朔母先死□后死不知此何考朔生未几而田氏死邻母收养之朔生五岁□失经年乃归母问之朔曰儿至紫泥海紫水污衣乃过虞渊漣浣明发中还何言经年乎】

京师人以是日为端一 【岁时记】

是日可作醯 【崔寔四民月令】

太上老君传三天正法付汉代张天师 【翰墨大全】

诗

跪奉新书笏在腰谈王正欲伴渔樵晋阳岂为一门事宣政聊同五日朝忧患半生联出处归休上策早招要后生可畏吾衰矣刀笔从来错料尧 【苏东坡诗唐高祖谓温大雅兄弟云我起义晋阳止为卿一门耳唐德宗诏曰自今后五月一日御宣政殿与文武百寮相见】

二日

宋太宗出南熏门观稼召从官列坐田中令民刈麦咸赐以钱帛回幸玉津园观渔张乐习射既宴而归 【兴国九年宋史礼志】

郑畋卢携皆罢为太子宾客分司 【僖宗干符五年畋携议蛮事携欲与之和亲畋固争以为不可携怒拂衣起袂带砚堕地破之上闻之曰大臣相诟何以仪刑四海五月二日畋携皆罢为太子宾客分司出唐书】

□参为中书侍郎平章事度支使 【宝应元年五月二日出纂记渊海】

状元王佐等就法慧寺拜黄甲叙同年谒庙
【佐以下共二百三十人朱晦庵与焉七修类稿】

郭子仪斩王元振 【唐肃宗宝应元年初李国贞治军严皆思子仪故元振因之作乱子仪至军元振自以为功子仪曰汝临贼境辄害主将若贼乘其衅无絳州矣吾为宰相岂受一卒之私耶五月二日斩元振等三十人出汾阳传】

承晖字维明好学淹贯经史是日承晖与师安石举白饮满谓之曰承晖于五经皆经师授谨守而力行之不为虚文醉后取笔与安石诀最后倒写二字投笔叹曰遽尔谬误得非神志乱耶谓安石曰子行矣安石出门闻哭声复还问之已薨 【金史】

诗

客中端二日风雨送牢愁昨岁犹潘母今年更楚囚田园荒吉水妻子老幽州莫作长生祝吾心在首丘 【文山天祥】

尧律正仲夏楚节前三日岩岩衡岳开隐隐寿星出 【事文类聚】

三日

晋安帝义熙十一年是夜慧星出天市其芒扫帝坐
【天市在房心之北宋之分野得慧柄者兴此除旧布新之征出宋书符瑞志】

唐高祖赤雀巢于殿门宴五品以上上颂者十余人 【武德八年出玉海】

宋孝宗是日诏执政每日入东华门诣选德殿奏事此盖上欲从容论治 【干道元年玉海】

习凿齿与桓泌以才气相推习罢荥阳郡归与桓书曰吾以五月三日来达襄阳触目悲感略无顾情西望隆中想卧龙之吟东眺白沙思凤雏之声北临樊墟存邓老之高南睠城邑怀羊公之风纵目檀溪念崔徐之友肆睇鱼梁追二陆之远未尝不徘徊移日抚景踌躇若乃魏武之所置酒孙坚之所陨毙裴杜之故居繁王之旧宅遗事犹存星列满目琐琐常流碌碌凡士焉足感其方寸哉 【晋史】

王文宪薨于官舍 【文宪者齐尚书令王俭字仲宝谥文宪琅邪临沂人春秋三十有八五月三日薨于建康官舍皇朝轸恻储铉伤情有识衔悲行路掩泣岂直春者不相工女寝机而已哉出任彦升序】

会稽钱佑为虎所取 【佑以元嘉四年五月初三为虎所取后乃自还说虎初取时至一官府入重门见一人凭几而坐形貌伟壮左右侍者三十余人谓曰吾欲使汝知术数之法故令虎迎汝无惧也留十五昼夜语诸小术佑受法毕令还家大知卜占无幽不验经年乃卒出异苑】

赵元阳启关沐浴更衣趺坐呼弟子于前即书偈曰遁世和光了幻缘缘消幻梦独超然清风遍界无遮障赫日当空照大千书毕雷电交飞风雨晦冥师乃翛然而逝 【赵元阳名宜真吉之安福人也五月三日启关书偈明年五月三日其徒刘渊然设祀方行奠礼白昼雷电云雨如其化时出左编】

端午前二日谓之扇市在东市车马特盛 【岁时记】

北极北斗下降 【道经】

诗

世事纷纷了不知又逢乳燕麦秋时经年谢客常因醉三日无诗自怪衰乘雨旋移西崦药留灯自覆北窗棋但将生死俱拈起造物从来是小儿 【陆放翁五月三日病体觉愈轻偶书】

四日

宋高宗尹焞入见讲卫灵公末章称旨遂给笔札校论语以进赐绯鱼 【绍兴七年玉海】

啞没斯帅其国特勒宰相等二千二百余人来降上降状 【唐武宗时出一品集】

京师人以为端四日 【岁时记】

端午刻菖蒲辟邪是日王沂公帖子明朝知是天中节旋刻菖蒲要辟邪
【按宋王曾字孝先青州人山堂肆考】

有使过南康县令胡侃置酒于县南莲花馆忽有暴风吹沙从南来以手掩目盘中器物有声
若有物过良久开目见食器皆覆时一里外皆闻馆中迅雷而馆中不闻胡亦无恙
【稽神录】

诗

明日又重五采得玉蒲香劝君蒲泛酒听我试平章 【事文类聚】

仙马分明引马头西看一点是关楼五日也应须到舍知君不肯更淹留
【岑参五月四日送人】

五日

高辛氏女土人以是日致祭 【辛女崖在辰州府城西十里左右壁高峻上有石屹立如人相
传高辛氏女于此化为石崖下有庙每岁五□土人□祭】

怀蛟水乡人于此竞渡
【怀蛟水在饶州府城南江中有蛟五日乡人竞渡俗号为怀蛟水以上一统志】

马步庙竞渡 【周礼校人冬祭马步注云马步神之为灾害马者武昌县人以五日竞渡祭享
于庙盖吴之故俗云出武昌府志】

苍梧郡陈临为太守推诚而理导人以孝弟征去本郡以是日祠东门城外令小童洁服舞之
【后汉书】 诸陵荐衣扇 【天宝二年诸陵以五日荐衣扇出礼志】

肃宗召见山人李唐方拥幼女顾唐曰我念之无怪也唐曰太上皇今日亦当念陛下帝泫然
涕下 【内制于张后卒不敢谒西宫出唐书】

陈后主冯淑妃名小怜太穆后从婢也穆后爱衰以是日进之号曰续命 【淑妃能弹琵琶二
歌舞后主惑之坐则同席出则并马愿得生死一处命淑妃处隆基堂出山堂肆考】

唐太宗谓长孙无忌杨师道曰五日旧俗必用服玩相贺今朕各遗卿飞白扇二枚庶动清风
以扬美德 【贞观十八年出唐书要录】

汉令郡国捕梟以是日为羹赐百官因恶鸟故食之又云止妒赐翰林青团扇
【唐翰林初选者试制书批荅三首内库给青绮被紫丝履之类五日赐青团扇】

赐百索为寿索 【以上翰林志】

宴群臣武成殿赐袞衣特以紫服金鱼赐李元纁及萧嵩 【李元纁传】

孙伏伽上表近太常于民间借妇女裙襦充妓衣拟五月五日于玄武门游戏非所以为子孙法 【高祖武德元年出旧唐书】

帝取蜥蜴置之器饲以丹砂至明年端午捣之以金宫人臂有所犯则消没不尔则如赤痣故名守宫 【汉武故事】

群臣各献服玩上谓李泌曰先生何独无献泌曰臣自巾至履皆陛下所赐所余独一身耳上曰朕所求正在此既献其身当惟朕所用不为卿有矣 【唐太宗记亦出山堂肆考】

后主讳纬生于并州 【纬字仁纲武成皇帝之长子母曰胡皇后梦于海上坐玉盘日入裙下遂有娠至天保七年五月五日生帝于并州邸帝少美容仪武成特所爱宠拜世子出北史】

宋徽宗以是日生俗忌因改作十月十日生为天宁节 【癸辛杂记】

纪迈生其母弃之 【纪迈五日生母弃之纪淳妻养之年六岁本父母云汝是我儿迈涕泣佣所得辄上母出孝子传】

胡广生父母恶之藏之葫芦弃之河流 【人收养之长有盛名父母欲取之广以为背所生害义背所养忘恩两无所归托葫芦而生因姓胡名广后登三司出小说】

王镇恶生家人欲弃之其祖猛曰昔孟尝君以是日生相齐此儿必兴因名镇恶 【宋略】

崔信明端午日中生有异雀数头身形甚小五色备集于庭树鸣声清亮太史良占之曰五月为火火为离离为文彩日中文之盛也有雀文彩□此儿必文彩声名播天下崔形既小禄位不高及长博闻强记下笔成章而官果不达 【唐书】

张飞生 【飞字翼德称万人敌为世虎将出木?兆园记】

金转运田特秀生 【田特秀字彦实易县人大定十九年进士所居里名半十行第五以五月五日生小名五儿年二十五应乡府省殿四试俱第五名年五十五以八月十五日卒出困学杂录】

介子绥割腓股以啖重耳重耳复国子绥独无所得绥甚怨恨乃作龙蛇之歌以感之终不肯出文公令燔山求之遂抱木而烧死文公令每年是日不得发火
【出琴操亦载于三月五日】

刑史子臣死【初刑史子臣谓宋景公从今已往五月五日臣死后五年五月丁巳五祀八月辛巳君薨刑臣将至死日朝见景公夕死景公惧思刑史子臣之言将至死日乃逃于瓜圃遂死之出古文巢语】

唐中宗朝安乐公主以是日斗百草欲广其物令驰驿取谢灵运须又恐为他得因剪弃其余【晋谢灵运须美临刑因施为南海祇洹寺维摩诘像须五月五日安乐公主因斗百草取之出青箱杂记】

俗谓屈原投汨罗人伤其死命舟楫拯之极其轻利谓之飞舸一以为水车一以为水马土人悉临水观之至今为竞渡之戏谓之浴兰节【出荆楚岁时记据荆州府志屈原投汨罗在五月望日】

孝女曹娥会稽上虞人父是日于县江泝涛迎波神溺死不得尸骸娥年十四乃沿江号哭投江而死后与父尸俱出【娥父旰能弦歌为巫祝出烈女传】

新野庾寔家是日曝席忽有小儿死席下俄失所在其后寔女子遂亡相传以为忌【异苑】

盖屋令人头秃【风俗通】

晋河内国兵张粗经旷二人相善太元十四年是日共登锺岭坐于山椒酒酣失性拔刀斩旷旷托梦于母曰为粗所杀尸在涧中脱裳覆之觅时视裳飞起处即尸所也【旷母明辰追捕一如其言粗知事露将欲出门旷手执刀刺其面遂不得脱母报官粗伏其罪还冤记】

陈澹然暴卒【陈澹然富而儒者也性慕道延云水土多年竟无所遇洞宾诡为佣者为治圃岁余所作工役力过常人陈爱之然止以佣者待之而已一日陈与一道友麟阴符经至天发杀机天地返复未晓杀机之旨洞宾从旁抗声曰生者不生死者不死已生而杀生未死而学死则长生矣陈大惊曰汝非佣者耶谁教汝为此言既而诘之则复缪悠其辞不可解道友曰田野村夫定于何处窃得此语耳非实通晓也居无何忽辞陈曰吾将远行明年五月五日午时复来也既去寂然陈有乡人客于巴陵遇之曰为我寄语陈公我吕洞宾也始意公可授道徐察之则不然吾不复来矣言讫走入吕仙亭竹林中不见明年端午日午时陈暴卒出道书】

开封府尹光美送刘温叟角黍扇【光美闻温叟为御史中丞清介遣府吏赍钱遗之温叟不敢却贮厅事西舍令府吏封识乃去明年五月五日复送角黍扇所遣吏即前送钱者视西舍封识宛然出全编】

宫中造粉团角黍贮盘中以小角弓射之中者得食都市盛行此戏【开元遗事】

仲夏端午烹鹜角黍【风土记】

端午以菰叶裹粘米谓之角黍盖取阴阳包裹之义或曰亦为屈原恐蛟龙夺之以五彩线缠饭投水中遂相袭云 【荆楚岁时记】

唐岁时节物有百索粽子 【文昌杂录】

端午作水团又名白团或杂五色人兽花果之状其精者名滴粉团或加麝香又有干团不入水者 【岁时记】

洛阳作朮羹艾酒 【金门岁节记】

桃印本汉制以止恶气今端午以彩缯篆符相问遗亦以置屏帐门户 【汉书】

北朝妇人进五时图五时花施之帐上 【开宝遗事】

朱索悬门止恶气 【礼仪志】

以彩丝系臂谓之续命缕俗说能益人寿筭 【风俗通】

刻菖蒲为人或葫芦形带之辟邪 【金门岁节记】

都人采艾结为人悬门上以解毒气又作泥塑张天师以艾为须以蒜为拳置于门上 【岁时记】

以艾为虎形至有如黑豆大者或剪彩为小虎粘艾叶戴之 【金门岁节记】

宗则字文度常以端午未鸡鸣时采艾见似人处揽而取之用炙有验是日竞采杂药 【荆楚岁时记】

天宝中扬州进水心镜背有盘龙先有老人自称为龙护铸镜所三日开户失所在镜匠吕辉移炉以五月五日于杨子江心铸之龙颇异后大旱祀之乃大雨 【异闻集】

正光元年天气清爽闻池中鎗鎗若征鼓声须臾雷电晦冥有五色蛇自池上属于天久乃灭波上水定惟见一鱼变为龙 【酈元注水经】

荆州有参军剪鸕鹚舌教学人语无所不名参军弹琵琶鸕鹚每听移时 【幽明录】

取蝇虎杵碎拌豆置几上自踊跃可击蝇 【淮南王万毕术】
埋蜻蜓头于西向户下至三日则化成珠 【博物志】

蟾蜍头上有角谓万岁蟾蜍是日取之阴干百日以其足画地即为流水能辟五兵若敌人射已者弓矢皆反还自向也【抱朴】

取蟾蜍辟恶疽疮取东行蜈蚣治妇人难产【蜈蚣即□蟆崔寔月令】

重午日午时有雨则急斫一竿竹竹节中必有神水沥取獭肝为丸治心腹积聚【金门岁节记】

五日午时为大中节【提要录】

于阗国玉池每以端午日王亲往取玉自王而下至庶人皆取每取一团玉以一团石投之【西域记】

万回和尚生【高僧传】

端午为地腊五帝校定生人官爵血肉盛衰外滋万类内延年寿记录长生是日可谢罪求福移易官爵祭祀先祖【道经】

诗

节分端午候谁言万古传闻为屈原堪笑楚江空浩浩不能洗得直臣冤【文秀】

佳辰共喜沐兰汤毒冷何须采艾禳但得皋陶调鼎鼐自然灾沴变休祥【欧阳公】

楚国因谗逐屈原终身无复入君门愿因角黍询遗俗可鉴前王□巧言【欧阳】

疾风吹雨满征衫陆走川行两不堪尘事萦人心事远濯缨何必在江潭【朱文公端午海上遇风雨作】

宫衣亦有名端午被恩荣细葛含风软香罗迭雪轻自天题处湿当暑着来清意内称长短终身荷圣情【杜子美端午赐衣作】

竞渡传风俗旁观亦壮哉棹争飞鸟疾标夺彩龙回江影浑翻锦欢声远震雷轻生一饷乐诗序密相催【郭公父】

麦凉殊未毕蜩鸣早欲闻喧林尚黄鸟浮天已白云辟兵书鬼字神印题灵文因想苍梧郡兹日祀陈君【北齐魏收】

孟君此日鍾英气王凤今朝袭庆源五色呈祥文必显丙时先诞位非尊兰汤备浴传荆俗水

马浮天吊屈魂因笑唐家公主駮预令驰驿剪祗洹 【黄朝英】

五月符天数五音调夏钧旧来传五日无事不称神穴枕通灵气长丝命续人四时花竞巧九子粽争新方殿临华节圆冠宴雅臣进对一言重道文六义陈股肱良足咏风化可还淳
【唐玄宗宴群臣作】

小暑夏（言玄）应微阴商管初愿赍长命缕来续大恩余三殿褰珠箔群官上玉除助阳尝黍稷顺节进龟鱼甘露垂天酒芝花捧御书含丹同蚯蚓灰骨慕蟾蜍今日伤蛇意衔珠遂阙如 【张说三殿侍宴应制】

裁缝逗早夏点画守初晨绢紈既妍媚脂粉亦香新长丝表良节命缕应嘉辰结庐同楚客采艾异诗人折花竞鲜彩拭露染芳津含娇起斜（耳兮）敛笑动微嚬献珙依洛浦怀佩以江滨 【王筠】

六日

唐高祖崩 【葬献陵在京兆府三原县界出通考】

宋太祖幸迎春苑 【干德四年】

唐同昌公主是日出降有司进仪注紫宸殿行五礼右补阙施敬本拾遗张烜右拾遗李锐等连名上疏曰紫宸殿者汉之前殿周之□寝陛下所以负黼衣正黄屋飨万国朝诸侯人臣至敬之所犹元极可见不可得而升也上纳其言移于光顺门外设次行礼
【玄宗开元十六年以上玉海】

诗

日转溪山几百遭厌闻虎啸与猿号笙歌忽把二天酒风雨犹惊三峡涛已作齐民寻要术安能痛饮读离骚看君自是青田质清唳当闻彻九皋 【黄知命名叔达山谷弟也先是山谷贬黔州未携家绍圣三年知命自芜湖携已之子耜山谷之子相及两所生母五月六日抵黔州次韵荅清江主簿赵彦成】

新莺傍檐晓更悲孤音清吟啖柔枝口边血出语未尽岂是怨恨人不知不食枯桑椹不衔苦李花偶然弄枢机宛转陵烟霞众雏凤鸣何局促自覩游鳞啄枯木玄猿何事朝夜啼白鹭长在汀洲宿黑鸂黄鹤岂不高金笼玉钩伤羽毛三江七泽去不得风烟日暮生波涛飞去来莫上高城头莫下空园里城头饥乌拾腥膻空园燕雀争泥滓愿为结舌含白云五月六日一声不可闻 【僧莹彻五月初六作】

七日

宋太祖宴近臣于崇德殿 【开宝四年玉海】

宋真宗御崇政殿试陈绛史良夏竦绛竦入等 【景德四年先真宗谓辅臣曰设科欲求才识若但考文艺则积学者方能中选苟有济世之才安得而知朕以为六经之旨圣人用心固与子史□□□□□宜有经义参之时务王旦曰文风丕变由陛下道化因命两制各上策问而择州之至五月七日真宗御崇政殿试独陈绛夏竦入等选举志】

以武德县尉姜宣义充堂后官 【堂吏始于唐至宋开宝六年五月初七日以姜宣义等充堂后官太祖知堂吏擅中书事权多为奸赃故令吏部选授堂吏用士人自此始太平兴国九年以将作监丞李元吉丁佐为堂后官京官任堂吏自此始出事物纪原】

宋孝宗召僧若讷对选德殿 【干道三年五月七日出玉海】

置医学博士 【贞观三年诸州府置医药博士开元十一年五月七日始置医学博士改医药博士为医学事物纪原】

白州是日午时有凤凰三自南入城中至万岁寺前栖木身长九尺高五尺其文五色至申时北向而去画图以献宰相奉表作丹凤曲曲曰伊九苞之神鸟禀阴阳之纯粹负礼蹈信戴仁纓义瞻元扈而来思望黄绅而必至 【宋真宗景德元年玉海】

深井多有毒药不可入是日宜先以鸡毛投井中直下无毒毛回四边不可入也 【葛洪方】

七日为九毒日犯者不过三年 【三元延寿书】

八日

唐僖宗生为应天节 【咸通三年僖宗生于东内懿宗第五子初封普王名俨出唐书本纪】

唐玄宗令进士国子监谒先师 【开元五年五月八日谒先师后懿宗咸通中刘允章为礼部侍郎请诸生及进士第并谒先师则此礼起于唐懿宗之世刘允章请也又选举志曰开元五年是日始令乡贡明经进士国子监谒先师是则开元之礼第施于贡士而咸通时允章所请糾开元之礼而为之制也事物纪原】

唐德宗分日一人执笔 【肃宗至德二年宰相分直政事笔人知十日德宗正元五年五月八日又分日一人执笔迄今为故事曰当笔事物纪原】

宋真宗咸平三年以赞善石熙政为西京左藏库副使 【唐都京兆为西京不得以别都直称左藏五代残缺别都因不言其故事耳左藏库副使前无所见疑宋国初所置官也事物纪原】

凤翔人闻朱全忠来皆惧五月是日城外居民移入城内而四面百姓尽杀【唐昭宗天复二年全忠进军凤翔城下全忠朝服向城而泣曰臣但欲迎车驾还宫耳全忠借正说以行其谲出金銮记】

元人小云石海涯卒【小云石海涯五字姓名也号酸斋母廉氏夜梦神人授以大星使吞之已而有妊及生神彩秀异拜翰林侍读学士辞还江南卖药于钱塘市中诡姓名易服色无有识之者偶过梁山泺见渔父织芦花为被欲易之渔父疑其为人汤曰君欲吾被当更赋诗遂援笔立成竟持被去人间喧传芦花被诗其依隐玩世多类此泰定元年五月八日卒年三十九出元史】

西突厥以是日相聚祭神【西突厥者木杆可汗之子大逻便也与沙钵略有隙因分而为二渐以强盛东拒都斤西越金山龟兹铁勒伊吾及西域诸胡悉附之大逻便其风俗五月八日相聚祭神岁遣重臣向其先世所居之窟致祭焉当炀帝大业初抚御无道其国多叛出隋书】

扶桑之蚕长七尺围七十色如金四时不死五月八日吐黄丝布于枝条四丝足胜一钩【此梁武帝天监中有异人杰公者与诸儒语及方域云云出太平广记】

九日

忻州是日大震说者曰地道贵静今数震摇兵兴民劳之象【庆历二年五月初九宋五行志】

吐大罗遣使献大鸟如驼食铜铁上遣献于昭陵【唐永徽元年】

唐高宗以西域平遣使分往康国吐大罗国等访风俗物产及古今废置图以进【显庆三年以上玉海】

沐浴令人长命【玄枢经】

吴兴人章荀是日田耕以饭置菰里晚于菰中伺马见一大蛇偷食之荀即以铍斫蛇走去荀乘舡逐之至一阪有穴闻号哭云人斫伤其甲或云当如何或云付雷公令霹雳杀之须臾云雨冥合震雷伤荀荀跳梁大骂曰天公我贫展力耕垦蛇来偷食罪在于蛇反霹雳我耶雷若来今当以铍斫汝破其腹须臾云雨辄开乃更霹雳向穴中诸蛇尽死【续搜神记】

十日

史思明败于沙河【天宝十五载五月十日郭子仪李光弼败思明于沙河思明以骑卒奔嘉山光弼击之思明又败走入博陵郡光弼围之思明性躁与安禄山同乡相善俱以骁勇闻出

唐书】

唐丞相李宗闵太和九年是日退朝于靖安里第其榻前有熨斗忽跳踣久之宗闵异且恶是时李训郑注以奸诈得幸数言于帝后旬日有诏贬为明州刺史连贬朝州司户盖其兆也【宣室志】

太虚真人降生 【蜀崇庆州李姓珏名者字双玉后得黄房公金丹之道改名栖真号太虚以是日诞生出道书】

诗

片月生林白沿流涧亦明幽人方独夜山寺有微行野处偏宜夏贫家不厌晴熏风吹老鬓腐草见飞萤 【韩仲正五月十日作】

十一日

太常博士黄积厚请以秋分日享寿星 【高宗绍兴七年】

宋高宗从博士黄积厚之言举岳渎祀典 【绍兴八年以上宋史郊祀志】

仁宗幸玉津园宴射上中的者七从臣奉酒称贺 【天圣八年玉海】

御史中丞裴度是日兼刑部侍郎时度自淮西行营宣慰还所言军机多合上旨故以兼官宠之 【宪宗元和十年旧唐书】

东坡与子由相遇于藤 【宋哲宗绍圣四年东坡谪琼州别驾子由谪雷州五月十一日相遇于藤同行至雷出长公外纪】

东坡神宗元丰三年是日梦游人家开堂西门有小园古井井上皆苍石石上生紫藤如龙蛇枝叶如赤箭主人言此石芝也东坡折食一枝其味如鸡苏而甘寤后作诗纪之【出长公外纪】

祖师召师至范明叔宅 【马钰初名从义字宜甫钰字玄宝更之也五月十一日祖师召师至范明叔宅以词赠之诗云掷下金钩却一年方吞香饵任纶牵玉京山上为鹏化随我扶摇入洞天出史纂左编】

敕天下僧尼隶祠部

【武后延载元年五月十一敕僧尼隶祠部此祠部辖僧之始也出事物纪原】

天仓开宜入山修道 【保生月录】

十二日

宋高宗是日谓辅臣曰有白气起紫微因诵晋天文志占验之状当思应天之实
【建炎四年】

宋徽宗以是日祭方丘为宁觐节 【政和三年】

宋仁宗幸南御庄观刈麦遂幸玉津园燕群臣闻民舍机杼赐织妇茶彩
【天圣三年以上玉海】

女仙杨敬贞于汉章帝元和十二年是日飞升衣服委地床上若蝉蛻然异香满室先夜有天乐西来阖村闻之杨虢州阌乡天仙村曰家女或传为谪仙云 【先敬贞告其夫曰妾神不安恶闻人语当于静室宁之君与儿女暂居别室夫许之杨氏遂沐浴新庄闭户而坐出续玄怪录】

诗

空堂明月清且新幽人睡忽来初匀了然非梦亦非觉有人夜呼祈孔宾披衣相从到何许朱栏碧井开琼户忽惊石上堆龙蛇玉芝紫笋生无数锵然敲折青珊瑚味如蜜藕和鸡苏主人相顾一抚掌满堂坐客皆卢胡亦知洞府嘲轻脱终胜嵇康羨王烈神仙一合五百年风吹石髓坚如铁 【东坡有紫藤龙蛇之梦十二日作诗其梦十一日载之长公外纪】

十三日

宋真宗庄穆皇后崩 【景德四年皇后谥曰庄穆葬于永熙陵之西北宋史礼志】

宋孝宗诏为暑热自五月十三日并后殿坐参假官候秋凉日取旨 【干道七年通考】

北魏李崇是日大水入城屋宇皆没崇泊于城上水增未已乘舡附于女墙州府劝崇弃州保北山崇曰吾受国重恩忝守藩岳淮南万里系于一身一旦动脚百姓瓦解扬州之地恐非国物昔王尊慷慨义感黄河岂爱一躯取愧千载 【崇字继长顿丘人也五月十三忽有泉水涌入八公山顶寿春城中有鱼从地涌出野鸭群飞入城与鹊争巢出史纂左编】

关羽生 【字云长刺颜良于万众之中威振华夏称万人敌为世虎臣出桃园记】

陈嗣是日考终厥命诫曰启予手启予足我闻古人有言珠玉而瘞之是暴骸于中原古者不封不树后世圣人易之以棺槨吾不敢违圣人可具棺槨而已 【陈嗣唐人字弘嗣享年八十

五太岁壬辰五月十三日卒嗣林园遗老玄默忘域合道以制嗜欲达命以顺生死保先君武东山之故居行不由径非公事不至州县陈子昂作墓铭铭曰山川隆郁旗鼎氤氲挺生君子于铄元贞又有抚化随运安排屈伸天年既没长夜何辰圣达不免宇宙同尘桐棺三寸岂我窆贫云云载蜀志】

司命真君降于王捷家之新堂 【宋真宗景德四年汀州黥卒王捷自言于南康遇道人姓赵氏投以小环神剑盖司命真君也宦者刘承珪以其事闻赐捷名中正是年五月十三日真君降于家之新堂是为圣祖而祥瑞之事起矣史纂左编】

长老可遵温泉壁上题诗诗曰禅庭谁作石龙头龙口汤泉沸不休直待众生总无垢我方清冷混常流且记之云元丰十一年五月十三日 【后东坡过温泉见此诗亦作一绝石龙有口口无根自在流泉谁吐吞若信众生本无垢此泉何处觅寒温出诗话】

渤泥国以是日为节国人亦于是日作佛事 【渤泥国地炎热多风雨无城郭树木栅为王之所居若楼覆以贝多叶王绾髻裸跣腰缠花布无舆马出入徒行民多业渔剪发齐额妇人衣短衫仅蔽胸背煮海为盐沥椰浆为酒无稻麦捕生鱼虾蟹食之食无器皿以竹编贝多叶为穴食毕弃之番书无笔札以刀刻贝多叶行之事佛甚严以五月十三日为节作佛事出宋学士集】

市人为父母兄长或已身疾病具香纸牲醴于城隍神祈祷自其家且行且拜至庙而止谓之拜愿又以小儿女多疾者带小枷锁诣庙祈祷谓之现枷其鼓吹管弦彻于衢巷竟夜不止 【宣抚镇志】

是日谓之竹醉又谓竹迷栽竹多盛 【出齐人四民月令】
岳人以是日谓之龙生日可种竹即齐民要术竹醉日也 【出岳阳风土记】
竹有生日即五月十三日 【出文雕龙】

诗

夏栽醉竹余千个春种辰瓜满百区
【黄山谷诗注五月十三日竹醉宜栽竹辰日可种瓜山堂肆考】

重五又八日使君庆生申时光正流觞物态俱精神 【事文类聚】

十四日

宋高宗是日辛巳日食于南斗 【绍兴六年通考】

宋徽宗是日夏至亲祠后土于方泽 【宋宣和五年出通考】

宋太祖复增修宫阙凡规为制度并上指授【干德元年五月十四日复增修宫阙既成坐寝殿中令洞开诸门皆端直通豁上谓左右曰此如我心少有邪曲人皆见之出玉海】

太子少师致仕赵概上所集谏林一百二十卷

【宋神宗元丰二年五月十四日上所集诏奖谕以劝为学出会要】

掘获白玉床【敬宗宝历二年神策军苑内古长安城中修汉未央宫五月十四日掘获白玉床一张长六尺出玉海】

程邵公卒【邵公广平程颢之次子生于八月四日卒于熙宁五月十四日生而有奇质未一岁而温润端重之态完然可爱聪明日发而方厚淳美之气益备群儿狎弄于前泊乎如不闻惜不寿出墓志】

南斗星君降【道经】

十五日

西域历人奏是日月当蚀【耶律楚材字晋卿生三岁而孤及长博极群书旁通天文地理律历术数及释老医卜之说下笔为文若宿构者西域历人奏五月十五日月当蚀楚材曰否卒不蚀明年十月楚材言月当蚀西域人曰不蚀至期蚀入分元史】

宪宗元和十五年崩移殡于大内太极殿之西阶至是日迁座于景陵【出令狐楚宪宗皇帝哀册文曰玉衡南指金波西落皓雪集其麻衣素云褰其绡幕柳宫龙动竹池鱼跃兆庶雨泣于浩穰万灵夙号于寥廓哀子嗣皇帝仰攀雕輶殷奠琼筵哀无容以触地痛不返而终天仙仗徐进宸仪永隔降睿旨于鸾台扬圣功于凤册】

唐侍中浑瑊与蕃相尚结赞盟于平凉【马燧盛言蕃情可保请许其盟上然之是岁闰五月十五日军城与蕃相结赞盟平凉为蕃军所劫由□之谬谋也坐是夺兵权山旧唐书】

宋仁宗召近臣幸后苑宝岐殿观刈麦谓辅臣曰朕新创此殿不欲植花卉为游观之所以粒食为先而岁种麦于此庶知稼穡不易【皇佑元年玉海】

扬州进水心镜青莹耀日背有盘龙势如生动玄宗异之【天宝三载五月十五日进水心镜天宝七载秦中大旱诏中使孙知古引叶法善于内库阅此镜曰镜龙真龙也忽镜龙口鼻有白气须臾满殿遂遍城内甘雨大澍出镜龙记】

包信县令段晖宅内时见光怪掘光所得二菩萨趺上铭曰晋太始二年五月十五日中书监荀勖造【后晖舍宅为光明寺伽蓝记】

苏耽真人文帝三年是日有十鹤集其庭真人谓母潘氏曰耽已成道被命升仙仙仗临门不得终养即刻辞去母曰吾何以卒岁真人乃留一柜緘钥甚固曰凡有缺扣柜呼之必得可助甘旨语毕群鹤随之升天异香天乐弥日不散

【苏耽事亦载于二月二十八七月十五日出彬阳仙传】

老君降现鹤鸣山

药王韦真人成仙 【以上列仙传】

南极老人星下降 【道经】

诗

月色灯光满帝都香车宝辇向通衢身闲不睹中兴盛羞逐乡人赛紫姑

【李商隐五月十五日夜闻京有灯】

十六日

宋绍兴二十二年五月十六日月外有环晕五重附近者紫红色白者次之青者又次之黄者又次之最外深红各相去一丈分寸不差其圆如规是日洪迈五更初以事使过临淮境瞻此月晕天文官荆大声随行乃至旁附耳曰是谓月重晕前史所纪未有如今所见者但太阴极盛恐非太阳之利耳将晓乃没 【文献通考未一月而高宗逊位】

管辂与倪清河刻雨期倪未信辂曰今五月十六日壬子直满毕星中已有水气水气发动于卯辰此必至之应也向暮有山云楼起黄昏之后雷声动天星月皆没风云并兴玄气四合大雨河倾倪调辂言误中耳不为神也辂曰误中与天期不亦工乎 【管辂别传】

后唐袁弘御精筭术节度使张敬达有二玉碗弘御筭之曰此碗明年五月十六日巳时当破敬达闻之曰吾谨藏之能破否即令贮大笼藉以衣絮锁之库中至期库屋梁折正压其笼二碗俱碎 【稽神录】

宋太祖宴近臣及孟昶于大明殿 【干德三年】

理宗以是日为皇太后寿庆节 【以上宋史】

窦凝忽闻扣门甚急凝出候之乃是所杀妾向前曰别久安否凝太怖疾走入内其鬼随踵至庭见妻崔氏崔氏惊问之妾自叙曰某是窦十五郎妾凝欲娶汝杀妾于车道口妾无负凝而凝枉杀妾妾怨气上达于帝庭帝许妾复仇崔氏悲惶请谢愿以功德赎罪妾厉色曰凝以命还命足矣何功德而当命也言毕登阶擒凝啖嚼肢体宛转焚毒 【唐开元中晋州刺史柳涣

外孙女崔氏家于汴州有扶风窦凝者欲聘之凝旧有妾崔氏约遣妾后成礼凝遂与妾俱之宋州车道口以妾沉于水中既而还汴娶崔氏五月十六日妾扣门复仇云云太平广记】

道家以为天地合日夫妇当异寝 【天中记】

刘安中真人飞升 【翰墨大全】

诗

正月十一日书札五月十六日到来柳吟秦望咫尺地鲤鱼何处闲徘徊故人情意未疏索次第序述眉眼开上言二年隔烟水下有数幅真琼瑰行吟坐读口不倦瀑泉激射琅玕摧壁池兰蕙日已老村酒蘸甲时几杯鹤龄鸿筭不复见雨后蓑笠空莓苔云云
【五月十六日丘光庭书到罗隐酬之】

梅收清风来宇净宝鉴揭频年城南游未有今夜月呼舟泛微澜游鱼亦出没危榭倒影浮倚阑凉入骨举酒属西山寒光动林樾诸君兴未已南阜上突兀目极大江流高情更超越
【张栻字敬夫号南轩五月十六日夜城南观月分韵得月字】

十七日

天地二气交造化万物之日 【翰墨大全】

晋恭帝弗星出北斗魁中

【元熙十四年五月十七日占曰星弗北斗中圣人受命后宋受禅出宋书符瑞志】

丰山绝顶有汉高庙土俗以是日为高帝生日远近毕集荐肴觴焉按汉书此高帝葬日也
【丰山在滁之西或云汉诸将追项羽道经此山宋文鉴】

唐文宗敕文官阶至三品许应子孙补两馆生出身 【绍兴十年五月十七敕玉海】

穆宗是日盐铁使王播奏约榷茶额每百钱加税五十右拾遗李珣等上疏以为榷茶近起贞元多事之际今天下无虞所宜宽横敛之目而更增之何时当得息肩上不从
【长庆元新旧唐书】

宋高宗御书中庸赐秦桧 【绍兴十年玉海】

宋徽宗上许真君尊号 【真君许氏名逊字敬之举家四十二口同日飞升鸡犬亦随宋徽宗上尊号其醮告词文有政和二年太岁壬辰五月丁巳十七日癸酉云云又于洪州玉隆观建道场七昼夜出玉隆万寿宫志】

十八日

徽宗夏至日亲祠后土于方泽 【宣和二年通考】

唐德宗是日甘露降元和殿桐木丁香木武元衡表曰元和殿降甘露宣示百寮光凝栖凤之林气浥传香之木 【贞元十八年玉海】

潘安仁作西征赋曰岁次玄枵月旅蕤宾丙丁统日乙未御辰 【张铉注曰岁在了为玄枵旅亦次也蕤宾五月律也丙丁统一夏之日乙未则岳行之辰李善注曰岳阳弱子序曰元康一年五月余之长安以历推之元康二年岁在壬子乙未五月十八日也】

毗陵郡道士杨文广踏白石上升 【载翰墨大全】

正阳帝君升仙 【帝君姓锺离名权字云房号正阳子京兆咸阳人为汉将军因兵负入山过少阳帝君授道终南寻隐晋州羊角山自称天下都散汉道成天帝封号太极左宫真人是日仙去后于澧水授道纯阳出道书】

僧王法昌成佛 【法昌泉州府建阳人生不茹荤幼失父母落发入福仙寺不拔生草不剪生柴着破衲以养虬虱时常翻易使之均饱宋熙宁辛亥忽告人曰吾来年五月十八日当去至期果然人惊异之出泉州府志】

诗

五月进农黍三叶换阶蓂不知今何夕嵩岳降生申 【事文类聚】

十九日

夜有流星大如斗杆尾长十余丈从西北来坠城内占曰天狗所坠下有伏尸流血 【五月十九日星坠城内是年竟陵王诞遣一百人出东门攻刘道产营别遣疑兵一百人出北门沈攸之于东门奋短兵接战大破之诞又遣数百人出东门攻宁朔司马刘勉营攸之又破之诞字休文宋文帝第六子出宋书】

肃宗立代宗为皇太子 【开元元年代宗□豫肃宗长子母曰章敬皇太后吴氏以开元十四年十二月十三日生于东都上阳宫出唐书】

道士陆惟忠卒东坡为之铭铭曰多艺此黄冠诗碁医卜内外丹无求于世宜坚完龟饥鹤瘦终难安哀哉六巧坐一寒祝子复来少宏宽毋复清诗助瘠酸龙虎尤成无或好往驾赤螭骖青鸾 【惟忠字子厚眉山人见东坡于黄州出所作诗论内外丹指略自以为不死东坡曰子神清而骨寒其清可以仙其寒亦足以死后十五年复见东坡于惠州则得瘦疾骨见衣表然

诗益工论内外丹益精曰吾真坐寒而死矣岁绍圣四年五月十九日卒载东坡蜀中考】

二十日

唐代宗崩 【葬元陵在京兆府富平县界通考】

僖宗中和三年御太玄楼献黄巢首级并姬妾上问姬妾汝曹皆勋贵子女世受国恩何为从贼居其首者对曰狂贼凶逆国家以百万之众失守宗祧播迁巴蜀今陛下 【以不】 能拒贼责一女子置公卿将帅于何地乎上不复问皆戮之于市人争与之酒其余皆悲怖昏醉居首者独不饮不泣就刑神色肃然 【张（青？）耆旧传成都有太玄楼】

宋太宗幸城内观麦赐田夫布帛有差上谓近臣曰耕耘之夫最可矜闵 【雍熙二年】

种放告游嵩山宋真宗是日宴群臣资政殿钱之赐放七言诗令属和群臣皆赋复赐宴于秘阁 【景德二年以上玉海】

吕东莱成公亲迎 【成公居母曹夫人忧从吉会妻韩氏物故即龙图阁学士韩无咎南涧公长女南涧复以次女配成公五月二十日亲迎出宋学士集】

纯阳升仙 【先生姓吕讳岩纯阳其道号也祖籍西京河南府满柘县今蒲州蒲阪县生于天宝十四年以进士授江州德化令纵步庐山澧水遇正阳帝君锺离云房授道天帝颁诏为九天采访使有诗云糾司天上神仙籍之句是日上升有浑成集行于世以道授海蟾重阳出道书】

丹阳真君降生 【真君姓马名钰字玄宝号丹阳子先名从义字玄甫宁海州人生于宋徽宗癸卯宣和五年是日家巨富号马半洲娶孙氏生三子曰庭瑞庭珍庭珪大定七年丁卯重阳真君至其宅食瓜从蒂起马怪询之真君曰香从臭里出甜向苦中来马复叩云何名道真君曰五行不到处父母未生前始请归家师之遂以家事属三子出家出道书】

诗

有人夜半持山去顿觉浮岚映翠空试问安排华屋处何如零落乱云中能回赵璧人安在已入南柯梦不通赖有霜锺难席卷系舡来听响玲珑 【宋时湖口人李正臣畜异石九峰东坡因异石作诗至徽宗崇宁元年黄庭坚系舟湖口正臣持此诗来石为好事者所取不可得庭坚五月二十日感叹不已次韵出宋文鉴】

二十一日

徽宗是日夏至亲祠后土于方泽 【宣和七年通考】

高宗建炎元年以是日为天申节诏寝上寿礼群臣拜表称贺吴芾表云华渚呈祥预纪有开之庆熏风从律式逢载夙之辰【出史事实贵耳集云高宗韦后生也徽宗梦吴越王引御衣曰我好来朝使留住我终须还我山河梦觉与郑后言朕夜来被钱王乞取两浙甚急郑后奏云昨二十一夜韦妃生子及建炎渡江都钱塘百有余年岂非应乞两浙之梦乎湖海新闻又云洪皓在此买一妾东平人偕其母来曾侍明节刘后言韦后初生高宗时梦金甲神人自称钱武肃王即钱鏐也年八十一高宗亦八十一卜都钱塘事不偶然】

宋钦宗到燕京见金主

【靖康二年五月二十一日见金主至六月朱后死移居云州出七修类稿】

有道严僧居成都宝历寺唐开元十四年是日道严于佛殿前轩燃长明灯忽见一巨手在殿西轩道严悸且甚久之闻空中云无惧吾善神也道严惧稍解因问曰檀越为何神匿其躯而见其手乎又忽闻空中云天命我护佛寺之地以世人好唾佛祠地也道严曰吾愿睹其形使画工写于寺壁且书其事以表之俾世人无敢唾佛寺地于是西轩见一神巨手大鼻身长数丈道严见之背汗其神隐去于是以神状命画工图于西轩壁【宣室志】

蒲人侯道华唐大中五年以是日仙去遗水一杯履一双于松下衣挂松上留诗云曩昔大还丹多年色不移前宵盗吃却今日碧空飞【道士邓太玄炼丹于永乐县道净院丹成而邓疑未就留贮院内人共掌之邓死徒周悟仙主院事道华佐之供给洒扫无不竭力道众奴畜之五月二十一日众晨起不见道华惟见杯履衣而已又留诗一绝众始知道华□太玄所遗丹药成仙出宣室志】

二十二日

宋神宗以是日封孟子邹国公与颜子并配而荀杨韩子并封伯爵列于从祀

【元丰七年玉海】

马钰道人生【道人字玄宝号丹阳生于金太宗天会元年五月二十二日母孕时梦麻姑赐丹一粒吞之师在儿时尝诵乘云驾鹤之语及长为儒不乐进耶父奇其才俾掌库物好周济而无私李无梦见而奇之曰额有三山手垂过膝真大仙之才后以风雨之夜东首枕股而逝元至顺六年赠丹阳抱一无为真人出史纂左编】

京兆人刘子贡卒【子贡明日乃□言至冥司同过者十九人官召二人出来拍其头命之曰此二人罪重余者且释去又引子贡历观诸狱但空墙垣而已不见其人子贡问曰何处曰此地狱也缘同光王生故体罪人出地狱七日子贡娶难江县令苏元宗女见元宗于途问曰丈人何得在此元宗曰吾生前有过拘留耳又遇邻人季曄曄曰君传语吾儿生前罪大须造观世音一像写抄法华经一部则生天矣又遇其父慎曰吾以同光王生故在狱外不然每日被牛头烧铁弹如火以破其皮出纪闻】

二十三日

唐僖宗干符六年是日崔相国卢相国同日册拜宣麻之际殿庭雾气四塞霍大如鸡卵识者以为钩轴不祥之兆 【明年大寇攻陷京师二相俱死于难出剧谈录】

节度使朱克融帐下军乱而全家破杀 【唐敬宗宝历二年克融猎□鹿胆中得珠如弹丸黑色初软后硬或问麻安石曰是何祥也安石曰此事自古未有请以意推之鹿胆得珠克融以为瑞鹿者禄也鹿死是禄尽也珠初软后硬是珠变也禄尽珠变必有变易之事衰亡之兆也后五月二十三日果帐下军乱而全家破杀出祥验集】

司马文正公是日到京致书于侄曰叔五月二十三日到京蒙圣恩除门下侍郎光禄无才能加以衰老久在沉散绝望显荣一朝升擢出人意表举朝之人悉非旧识逆见忌嫉者何可胜数独以愚直处于其间如一黄叶在烈风中几何不危坠也云云 【事文类聚】

王慤归窦氏曰君选事未成 【建平三年唐德宗时有王慤者自冬调选至次年孟夏寂无音书其妻扶风窦氏忧甚有二女忽闻卖卜女九娘者过其门其九娘每有问卜屡中遂召卜焉九娘设香俄空中有一人下曰久无音书早晚合归只因选事未成今日在西市与四人共行至五月二十三日慤归窦氏喜曰君选事未成又于某日西市四人共行慤自以为不附音书何由得知遂愕然惊后终山阳郡司马出太平广记】

二十四日

破宋金刚献捷太庙 【唐高祖武德二年五月二十四日出会要】

宋太宗驾幸南御庄观稼因幸玉津园习射张乐赐从臣饮 【淳化五年玉海】

贡火浣布三疋置之瑞物阁 【哲宗元佑二年玉海】

文文山赐状元及第 【宋理宗宝佑四年礼部试进士文天祥以法天不息为对其言万余五月二十四日帝亲拔为第一考试官王应麟奏曰是卷古谊若龟鉴忠肝如铁石臣敢为得人贺文山之科六百一人出山堂肆考】

中明王生 【佛书】

二十五日

司天监奏五星闰五月二十五日近太阳 【景德四年甘氏星经曰五星近太阳若伏而不见即臣逊于其□宋真宗五月二十五日御禁台伏而不见大赦天下出湘山野录】

仁宗御成化殿以芝草生于殿楹帝作瑞芝五言诗赐宰臣王随以下各为诗赋颂以献
【景佑四年玉海】

太平真君升仙 【列仙传】

二十六日

仁宗诏宗室通一经者试之 【皇佑五年】

高宗改铸虎符 【建炎三年以上玉海】

神宗皇后祔于庙室 【建中靖国元年崩五月二十六祔神宗庙室出宋史礼志】

元人叶禎卒 【葬于玉坞山桐庐李骧龙与禎交禎年三十从父来桐庐为钓台山长山长君死不能归骧龙以钱予之使卖药市中自给禎风神萧爽不随世浮沉每于月白风清同骧龙买舟泛桐江而下骧龙善洞箫禎歌古词扣舷而和之飘飘然游于物化者垂一十年禎一日病革忧戚莫知所为骧龙顾禎曰君非念后事乎有骧龙在禎力疾起曰此膝未尝下人今为君屈卒于至元五年五月二十六禎字仲贞武陵人出宋学士集】

诗

星火方中月下弦更迟三日诞真贤 【事文类聚】

二十七日

荧惑入太微与岁星相及俱犯右执法至是日乃出占曰人主有大忧
【黄初六年五月二十七日出宋书天文志】

宋仁宗诏西北边有大事自今令中书枢密院召两制以上同议之
【庆历七年五月二十七日诏出玉海】

范仲淹卒 【宋仁宗皇佑四年五月甲子仲淹资政殿大学士礼部侍郎谥文正邠庆二州与属羌皆画像立生祠及卒哀号如父佐宋皆圣贤事业白璧无瑕出山堂肆考】

保德真君降 【道经】

诗

五应蕤宾当夏月三余蓂莢正尧天 【事文类聚】

二十八日

宋真宗召辅臣于崇政殿观茅山郭真人所获龙长二寸许极细鳞腹如玳瑁手中仰覆无惧帝作观龙歌【祥符二年复送于茅山池中宋史】

破朱泚露布五月二十八日寅时华州镇国军节度使骆元光等承命于牙旗之下分麾于辕门之外将士等超乘贾勇免胄启行夹川陆而左旋右抽抵兵陵而浸淫布濩声塞宇宙气雄钲鼓陈兵于光泰门外尽锐于神鹿?加仓东繚垣摧以成尘滋水涸而为地左广未离于旧迭前偏已交于贼锋若降于天如出于地【白孔六帖】

董槐景定三年夜大雨烈风雷电槐起衣冠而坐麾妇人出为诸生说兑谦二卦问夜如何诸生以夜中对遂薨【槐字庭植濠州定远人少喜言兵阴读孙武曹操之书每自云使吾得用将汎扫中土以还天子槐貌甚伟广颡丰颐又美髯论事慷慨自方诸葛亮周瑜宋理宗进封许国公景定三年五月二十八日薨谥文清帝使使致金六十斤帛千匹以赙出宋史列传】

刘因疟疾复作【元刘因字梦吉生之夕父梦神人马载一儿至其家乃名曰驺后改今名三岁读书日记千百言六岁能诗七岁能属文因素有羸病五月二十八日疟疾复作出史纂左编】

诗

汉节荧煌直北驰皇家卜世万年期东京盛德符高祖说与中原父老知
【朱文公五月二十八日闻报喜而成诗】

二十九日

唐开元二年是夜大流星如瓮或如盆大者贯北斗并西北落小者随之无数天星尽摇至晓乃止【是年襄王崩吐蕃入陇右掠羊马杀伤无数又大风发屋长安御中树连根出者十七八次年太上皇崩出太平广记】

郭子仪李光弼与贼战于嘉山【唐肃宗至德元载安禄山使将步骑二万人北就史思明又使牛廷玠发范阳等郡兵万余人助思明合五万余人郭子仪至恒阳思明随至子仪深潜高迭以待贼贼来则守去则追之昼则耀兵夜斫其营贼不得休息数日子仪与李光弼议曰贼倦矣可以出战五月二十九日战于嘉山出长历】

陶谷书于汴上雨中【梁元帝昼职贡图其图每段所写土俗贡献之事皆学士陶谷书陶谷自跋其后初书广顺三年云云又复书夏五月二十九日汴上雨中书北海陶谷谷在周为翰林学士入宋历礼刑户部三尚书年六十八卒山堂肆考】

池州俗以是日为分龙节 【图经】

诗

元气锤成一代英天休节后是公生 【事文类聚】

三十日

延熹元年五月甲戌晦日食徐璜曰臣切见道术家常言汉死在戊亥今太岁在丙戌五月甲戌日食柳宿朱雀汉家之贵国宿分周地今京师是也史官上古去重见轻璜召太史陈瑗诘问乃以实对梁冀怨援不为隐讳使人阴求其短发摘上闻上以亡失候仪不肃有司奏收杀狱中 【梁冀别传】

东汉明帝永平十六年五月戊午晦日食在柳十五度宿在京都宫车晏驾如其占
【文献通考】

刘德愿景和元年是日有白蚓数十出斋前砌上遍身白色非世人所见蚓口吐舌赤色其年德愿诛 【选异记】

商山四皓降现日 【翰墨大全】

日涉编卷六

楚应城陈阶升也甫编辑

邑人徐养量叔弘甫校刻

饶琮玉卿甫

鍾惺伯敬甫

张尧熙 甫

程云翼振羽甫全阅

六月〔一〕

六月建未未味也谓万物向成有滋味也 【合璧事类】

林鍾未之气也六月建焉 【周礼】

日在柳昏心中旦奎中 【礼记】

季月烦暑流金烁石 【梁元帝与武陵王书南史】

隆热 【韩文】

季夏行春令则谷鲜实民多病行秋令则水潦伤禾女灾 【女人产不育故曰女灾】
行冬令则鹰隼早鸷寇扰四鄙 【吕氏春秋】

为且 【尔雅】

秋夏交会之辰金火伏藏之日

【历忌释日立秋以金代□□金畏火故至庚日必伏庚者金也故曰伏日】

大历四年伏日寒 【唐五行志】

伏日周时无至此乃有之师古曰伏者谓阴气将起迫于残阳而未得升故为藏伏
【后汉书】

曰炎夏曰炎节 【梁元帝纂要李德裕传又曰炎月】

楚昭王登握日之台得神鸟所衔洞光珠以消烦暑谓之招凉珠 【洞冥记】

燕昭王盛暑怀黑蚌珠体自轻凉号消暑珠 【拾遗记】

李辅国以迎凉草挂之窗户间凉自生 【迎凉草色碧而干似苦竹叶杜阳编】

元载造芸辉堂芸香草也白如玉入土不朽为屑以涂壁设紫绡帐盛夏自清凉
【苏氏演义】

李德裕为相方盛夏宴宾以金盘贮水浸白龙皮置坐清飏凛冽如涉高秋 【剧谈录】

霍仙鸣别墅在龙门一室之中开七井皆以雕盘镂木盘覆之夏五六月坐其上七井生凉不知暑气 【云林异景志】

房寿召客凭狐文几 【云仙散录】

房寿召客坐竹簟杜甫诗留客夏簟青琅玕 【云仙散录】 杨氏子弟每至伏中取大冰使匠琢成山周围于宴席间座右虽酒酣而各有寒色又以冰作鸟兽之形送遗王公
【天宝遗事】

魏郑公征五六月率宾避暑取大莲叶盛酒以簪刺叶令与柄通如象鼻持翕之名碧簫酒
【鸡跖集】

拂菻国盛暑乃引水潜流上遍于屋宇机制巧密人莫之知观者惟闻屋上泉鸣俄见四檐飞溜生凉 【合璧事类】

大食国武宗会昌元年贡松风石方一丈每是月上令置殿内秋气飏飏
【松风石莹彻如玉中有树影出杂编】

长安举子落第者六月不出多借清凉庙院作文曰夏课时语曰槐花黄举子忙
【南部新书】

伏日并作汤饼名为避恶 【荆楚岁时记】

房州调羊酪造含风鲊 【山堂肆考】

房寿捣莲花制碧芳酒 【纂记渊海】

煮桃以为豆实 【大戴礼】

天裂于西北长十丈广二丈光出如电其声如雷 【梁武帝太清二年】

天有声如风水相薄 【梁武帝中大通元年以上南史】

天鸣有声 【宁宗开禧元年宋史】

天星散落如雪 【中宗景龙四年韦后杀帝于神龙殿六月临淄王起兵讨逆与刘幽求入苑中建夜天星散落如雪幽求曰天意如此时不可失王遂勒兵入玄武门诛韦氏即位以正大统出唐书】

雷震太庙鸱尾彻壁柱若有文字 【义熙二年晋安帝纪】

雷震娼女死于市衢胁下有朱字云李林甫以毒虐弄正权帝命震死
【元和元年六月娼女惠州人出龙城录】

南州有东南长风俗号黄雀风时海鱼变为黄雀因为名 【风土记】

寒风如冬时 【献帝初平四年续五行志】

是月必有三时雨田家以为甘泽邑里相贺曰贺嘉雨 【荆楚岁时记】

西北有黑云属地散如猪者十余 【大建五年陈宣帝六月西北有黑云如猪洪范五行传曰当有兵起西北时后周将王轨军于吕梁明年擒吴明彻军皆覆没出通考】

云中二物如羝羊黄色大如新生犬斗而坠 【文帝开皇十二年繁昌杨悦六月见云中物如羝羊斗而坠悦获其一数旬失所在洪范五行传曰君不明所致也状如新生犬者羔类也云掩蔽者奸邪之象羊与杨同音国姓也羔羊子也太子勇既升储贰晋王广阴毁之而废黜二羔斗一羔坠之应也出隋书】

火自空坠入城北有物如龙 【开宝七年棣州城北出五行志】

天雨尘土 【嘉泰元年宋史】

饶州长山天雨木子数亩状类山芋子味香而辛
【宋神宗元丰三年土人以为木子又曰菩提子明道中尝有之是岁大稔宋史】

彰德雨白毛 【顺帝元统二年俗呼云老君髯民谣云天雨牦事不齐元史】

忠州雨豆【元丰二年】

忠州临江县雨白黍又雨黑黍【元佑二年以上宋史五行志】

黄河是月水名矾山水【水衡记】

芙蓉山寒气逼人【青羊潭在芙蓉山上六月寒气逼人唐天宝六载有樵者登山见青羊出卧潭侧入不见出长沙府志】

台州黄岩县山自徙五十余里其声如雷草木坟墓皆不动【庆元二年宋史】

潭面如碧镜每岁己午忽有泡光出艳异甚过此月则无
【洋县有念佛岩岩下有潭出汉中府志】

宋光宗绍熙三年他工采石闻其声呼相应答【绍兴元年平江府昆山县石工采石而山摧工压焉三年六月他工采石邻山闻其声呼相应答如平生报其家凿石出之见其妻喜曰久闻乍风肌如裂俄顷声微噤不语化为石人貌如生出通考】

灵帝光和元年有黑气堕温德殿庭中如车盖隆起奋迅五色有头体长十余丈形貌如龙【上异之以问蔡邕曰所谓天投蜺者也不见足尾不得称龙占曰天子内惑女色外无忠臣兵革将起后中平元年黄巾贼张角等令三十六方起兵烧郡国山东七州莫不毕应出通考】

梁元帝承圣三年有黑气如龙见于殿内
【黑周色今见于殿内周师入梁之象其年为周所灭帝遇害出通考】

宋淳熙十四年有雷声自太乙宫及和宁门人马辟易相践有失巾履者【山堂肆考】

陆泽县得石佛五十躯皆长尺余
【宋太宗兴国七年六月陆泽县属深州民王绪田中得白兔逐入穴掘之得佛通考】

徐州丈八铜像汗流于地【太和十九年六月魏书】

长安女子有生儿两头异颈面相乡四臂共匈俱前乡尻上有目长二寸
【平帝元始元年师古曰乡读曰向前汉书】

洛阳民生男两头共身【上西门外刘仓妻生也出刘艾纪】

神龙寺前水渠生合欢莲其花一茎两房权德舆等贺表【德宗贞元十八年北梦琐言】

铜乐县枯树断折忽然自立相属 【晋孝武帝太元十四年铜乐县属建宁郡五行志】

凤凰降万岁县 【前蜀王建天佑七年六月出六帖】

乌集徐州滕县噉柴为城中有白乌一碧乌一 【贞元十八年六月出五行志】

群乌集灶朱猗死 【晋安帝义熙三年龙骧将军朱猗戍寿阳婢炊余忽有群乌集堂竞来啄噉婢驱逐不去有猎狗咋杀两乌余乌因共啄杀狗又噉其肉惟余骨存六月猗死此其应也五行志】

江夏张骋是月所乘牛言曰天下乱乘我何之骋惧而还犬又言曰归何早也寻后牛又人立而行骋使善卜者卦之谓曰天下将有兵乱为祸非止一家 【晋惠帝永安二年六月其年张昌反先略江夏骋为将帅于是五州残乱骋亦族□出五行志】

钱塘猓豕产两子皆人面如胡人状其身犹豕 【成帝咸和六年出晋书】

鄱阳县民家一猫带数十鼠行止食息皆同如母子相哺者民杀猫而鼠舐其血
【宋宁宗庆元元年鼠将盗猫职捕而反相与同处司盗废职之象也出通考】

神马二疋一白一黑出于河中 【晋孝武帝太元十四年六月】

二黄龙见东阿井中 【汉武帝建武十二年以上宋书符瑞志】

阳武有鲤鱼乘空而斗

【后周大象元年鲤乘空而斗犹臣下兴起小人从之而斗也明年帝崩斗失政出通考】

平晋县蚕自成绵段长七尺一寸五分阔四尺九寸 【承安元年出金史】

诗

江南季夏天身热汗如泉蚊蚋成雷泽袈裟作水田 【范灯状江南六月】

流火稍西倾夕影逼层城高天澄远色秋气入蝉声 【薛道衡六月作】

懒摇白羽扇裸袒青林中脱巾挂石壁浮瓜洒松风 【李贺六月作】

六月滩声如猛雨香山楼北畅师房夜深起凭阑干立满耳潺湲满面凉
【白居易香山避暑】

人人避暑走如狂独有禅师不出房可是禅房无热到但能心静即身凉
【白居易苦热题禅房】

毕竟西湖六月中风光不与四时同□天莲叶无穷碧映日荷花别样红 【苏轼西湖】

无限荷花染暑衣阮郎何处弄舡归自惭不及鸳鸯鸟犹得双双遶钓矶 【鱼玄机六月闻李郢公垂钓回作玄机长安女字蕙兰与李公居近唱酬贾岛尝赠以诗咸通中为李亿补妾后为女道士】

四顾山光接水光凭阑十里芰荷香清风明月无人管并作南来一味凉
【黄庭坚六月晚楼间望】

定林青木老参天横贯东冈一道泉六月杖藜寻石路午阴多处弄潺湲
【王安石定林六月作】

参差楼阁半天中六月清风百尺松隐约斋坛低晓月五云深处一声钟 【唐诗】

雷霆空霹雳云雨竟虚无炎赫衣流汗低垂气不苏乞为寒冰玉愿作冷秋菰何似儿童岁风凉出舞雩

日下四山阴山亭岚气侵牛羊归径险鸟雀聚枝深正枕当星剑收书动玉琴半扉开烛影欲掩见清砧 【以上杜甫六月作】

祝融南来鞭火龙火旗焰焰晓天红日轮当午凝不去万国如在红炉中五岳翠干云彩灭阳侯海底愁波竭何当一夕金风发为我扫却天下热 【合璧事类】

莲荡落红衣泉泓数白石 【山谷】

凉雨打低残菡萏急风吹散小蜻蜓 【卢延让】

小暑

夏至后十五日斗指午为小暑小暑者初后为小也 【孝经纬】

六月小暑为节者此以相形为名形大暑故谓之

小暑 【暑热也就热之中分为大小月初为小月中为大今则热气犹小出三礼义宗】

小暑音比大吕 【抱朴子】

小暑日温风至六月节也后五日蟋蟀居壁后五日鹰乃学习【温风至至极也温热之风至此而极蟋蟀一名蜚蜚音拱一名蜻蚓即今之促织礼记注日生土中此时羽翼稍成居穴之壁至七月远飞在野盖肃杀之气初生则在穴感之深则在野应氏曰杀气未肃鸷猛之鸟始习于击迎杀气也月令】

小暑之日温风不至国无宽教【周书时训】

小暑至挺重囚【挺宽也月令】

大暑

小暑后十五日斗指未为大暑大暑者望后为大也【孝经纬】

小暑加十五日指未则大暑音比太簇【抱朴子】

大暑日腐草为萤中气也土润溽暑后五日大雨时行【萤一名丹良一名丹鸟一名夜光一名宵烛皆萤之别名离明之极则□阴至微之物亦化而为明毛诗日□耀霄行另亦种也形如米虫尾亦有火不言化者不复原形土润溽暑溽湿也土之气润故蒸郁而为湿暑俗称齄齄热是也大雨时行前候湿暑之气蒸郁今候则大雨时行以退暑也月令】

大暑阴云出南赤北苍【易通卦验】

不可以兴土功不可以合诸侯不可以兴兵动众【土将用事欲静月令】

诗

蛇折鳞于灵窟龙解角于皓苍遂乃温风赫曦草木垂干山拆海沸沙融烁烂飞鱼跃渚潜龟浮岸鸟张翼以远栖兽交逝而云散【曹植大暑赋】

或赫炽以瘴炎或郁术而燠蒸兽狼望以倚喘鸟垂翼而弗翔根生苑而焦炙岂含血而能当仰庭槐而啸风风既生其如汤气呼吸以祛短汗雨下而沾裳就清泉以自沃犹沃浥而不凉体烦如以于浥心情闷而窘惶【魏王粲大暑赋】

体沸灼乎如燎汗流烂兮珠连【卞伯玉大暑赋】

三伏相仍徂暑彤彤上无纤云下无微风扶桑施以增焚大火晔其南升【夏侯湛大暑赋】

六月〔二〕

一日

唐睿宗生于蓬莱宫含凉殿 【龙朔二年六月一日出会要】

宋孝宗皇嫡孙生 【干道元年六月一日皇嫡孙生百僚表贺出会要】

德佑元年是日日食星见鸡鹜皆归明年宋亡 【宋史】

唐高祖始诏国学立孔子庙 【武德二年出事物纪原】

宋哲宗是日改绍圣五年为元符诏曰统承圣绪绍述先猷克享天心屡蒙嘉贶甘露荐降灵光属天申锡无疆神玺自出敕命之几惟圣时宪恩荅神休以协瑞应其易统年之号用昭受命之符 【合璧事类】

宋崔鷟应诏论冯澥 【六月一日诏书诏谏臣直论得失崔鷟应诏曰冯澥近日上章其言曰士无异论太学之盛也此奸言也昔王安石除异己之人当时名臣如韩琦富弼司马光吕公着吕海吕大防范纯仁等咸以异论斥逐布衣之士谁敢为异乎安石着三经之说士用其说者入官不用其说者黜落天下靡然雷同不敢可否出文鉴】

龙广寒江湖异人也事母至孝是日其母寿方启北牖举觞忽梅花一枝入牖香色甚佳人以孝梅称之 【后孝梅百有五岁犹童颜绿发人以为孝感所致出广客谈】

监茶柳应辰蔡余庆是日在黄鹤楼下刻石于十盘亭前题曰东有亭西有庵路十盘而上故亭以十盘名之 【宋仁宗庆历二年出楚通志亭今废】

贵妃是日生上幸华清宫命小部音声小部者梨园法部所置凡三十人皆十五已下于长生殿奏新曲未有名会南海进荔枝因以曲名荔枝香左右欢呼声动山谷
【是年十一月禄山反幽陵杨太真外传】

康居国以是日为岁首王及人庶并服新衣剪发须在国城东林下马射置一金钱于帖上射中者则得一日为王 【俗事天神崇敬甚重廩国人并善贾男年五岁则令与书少解则遣学贾以得利多为善其人好音声康居汉时通焉在大宛西北二千里与大月氏同俗出西蕃记】

北涧禅师是日有偈云六月一日前万象森罗替说禅六月一日后八角磨盘空里走今朝正当六月一无位真人赤骨律金毛狮子鲜翻身无角铁牛眠少室十圣三贤总不如笑倒寒山并拾得 【杨亿因演而为颂曰八角磨盘空里走金毛狮子变作狗拟欲藏身北斗中应须合掌南辰后人谓杨亿通禅学以其有八角磨盘之句耳出丹铅摘录】

号州黄河中有女娲墓唐玄宗天宝十一年是日因大雨晦冥墓失所在至僖宗干符二年又六月是日夜闻有风雷声晓见其墓涌出下有巨石上有双柳各长丈余时号风雷堆
【占冢墓自移天下破出五行志】 忌经营 【月令】

清灵真人降 【道经】

诗

南风吹南枝一白点万绿岁寒谁知心孟宗林下竹 【龙广寒至孝母六月一日寿方举觞匆梅花一枝入牖香色殊常人以为孝感所致遂作此一绝】

二日

太乙宫云气如香烟 【仁宗庆历间京师五月旱谏官王公素乞亲行祷雨帝曰太史言六月二日当雨一日欲出祷公曰臣非太史是日不雨帝问故公曰陛下幸其当雨以祷不诚不诚不可动天臣故知不雨帝曰明日祷雨醴泉观公曰醴泉地近岂惮暑不远出耶帝曰当祷西太乙宫六月二日召王公以从日色甚炽埃雾涨天帝不怡至琼林苑回望太乙宫上有云气如香烟以起少时雷雨至帝却逍遥辇御平辇彻盖还宫明日召对帝曰朕自卿得雨出闻见录】

唐中宗崩 【葬定陵在京兆府富平县界通考】

宋太祖皇太后杜氏崩于滋德殿 【建隆二年宋史礼志】

唐景龙二年是日苏颋为中书舍人剧任文诏动以万计而颋手操口对无毫发差韩礼等转书诏草屡谓颋曰乞公稍迟礼等手腕将废恐书不及李峤叹曰舍人思若涌泉峤所不测也
【谭宾录】

三日

宋太祖平广南祭南海 【开宝三年六月三日出礼志】

唐玄宗开元九年置中都是日诏停 【扬州功曹参军韩覃上疏曰建国都乃长久之大业也若两都旧制分官众多费耗用度尚以为损岂况更建中都乎且陋东都而幸西都自西都而造中都取乐一君之欲以遗万人之忧非所以深根固蒂不拔之长策矣昔汉帝感鍾离之言息事德阳之殿赵主采续咸之谏止造邺都之宫臣愿诏罢中都则福履无疆六月三日诏停出通典】

宋高宗御书儒行篇赐进士王佐等 【绍兴十八年六月三日出实录】

宰臣武元衡元和九年是日为盗所害先是长安谣曰打麦麦打三三三既而旋其袖曰舞了也解者谓打麦者打麦时也麦打者谓闇中击也三三三者谓六月三日也舞了者谓元衡卒也【唐书五行志亦出事词类奇】

郑君雄持杨师立首出降【梓州观察使杨师立反唐僖宗敕蜀将高仁厚等讨平仁厚围梓州久不下乃羽檄入城云仁厚不忍城中玉石俱焚为诸君缓师诸君自成其功若十日不送师立首四面俱进克之必矣郑君雄大呼于众曰天子所诛者元恶耳他人无预也众呼万岁大噪突入府中师立自杀六月三日君雄推师立首出降仁厚收得梓州并师立首至驾前出续宝运录】

贾谊在湖南是日有鹏鸟来【载事文类聚】

有雾则岁大熟【望云经】

四日

唐玄宗诏令祠龙池是日右拾遗蔡孚献龙池篇【开元二年玉海】

皇太子建成齐王元吉谋害太宗是日太宗率长孙无忌尉迟敬德房玄龄杜如晦等于玄武门诛之【太宗谓玄龄曰前世史官所记皆不令人君见之何也对曰史官不虚美不隐恶人君见之必怒不敢献太宗曰朕异前世帝王欲观国史知前日之恶为后来之戒于是玄龄等进实录上见六月四日事语多微隐谓玄龄曰昔周公诛管叔以安周季友鹤叔牙以存鲁朕所为类是史官何讳焉即命削去浮辞直书其事出通鉴】

李（室去至改介）是日反夜军乱节度使李愿与一子踰城奔郑州乱兵杀其妻【出实录据愿传作七月四日唐穆宗长庆二年】

太素三元君朝真日【道经】

诗

夏季蓂开四叶新崧高今日降生申【事文类聚】

五日

梁太祖崩

【先是荧惑犯心大星去心四度顺行心帝王之星开平三年六月五日崩出通考】

蜀主是日以道士杜庭光为金紫光禄大夫进号广成先生

【梁太祖干化三年庭光博学善属文蜀主重之出后梁纪】

李授之上易解除直秘阁 【宋高宗绍兴八年玉海】

广陵太守孟彦晖是日奏西湖有金龟径寸游于荷叶之上画图以献
【武成三年太平广记】

诗

□日始临天赐节今朝先出地行仙 【事文类聚】

六日

大禹生 【禹生于广柔县石纽村直隶凤阳府有禹庙在涂山绝顶昔禹会诸侯于此后人至庙亦相传禹以六月六日生是日奉祭百姓皆至焉出一统志】

黄陵庙以是日致祭 【黄陵庙在湘阴县北汉荆州收刘表建以祀舜二妃之神二妃墓在黄陵庙西昔舜南巡崩葬苍梧娥皇女英寻之不及死沅湘间故立庙祀之五代马氏重修每岁六月六日致祭唐高骈诗曰舜帝南巡去不还二妃幽怨水云间当时珠泪知多少直到如今竹上斑出长沙府志】

真宗以是日天书再降为天赐节 【祥符四年宋史】

同执政对于内殿 【宋李纲字伯纪六月六日同执政对于内殿纲奏上曰今日国势而视靖康其不逮远矣然而有可为者陛下英断于上而群臣辑睦于下庶几革靖康之风而中与可?然而今日之事须有规模所谓规模者外御强寇内销盗贼修军政变士风裕邦财宽民力改弊法□冗官减号令以感人心信赏罚以作士气然后可以议兴举而问罪金人迎还二圣此规模之大略也出左编】

胡瑗卒 【瑗字翼之为人师使诚明者达昏愚者励顽傲者革自景佑明道以来学者有师惟先生暨泰山孙明复石守道三人而先生之徒最盛东南之士莫不以仁义礼乐为学至嘉佑元年迁太子中允充天章阁侍读又以太学博士致仕东归之日太学诸生与朝廷贤士大夫送至东门执弟子礼路人嗟叹以为荣以四年六月六日卒于杭州出胡瑗墓表】

崔珏生 【珏蕲州彭城人称为崔府君以其查理阳间夜断阴府初父让艰于嗣与母祷于衡岳母梦仙童擎一盒曰帝赐盒中物令汝夫妇吞之启盒是美玉二枚夫妇各吞其一觉而有娠大业二年六月六日生儿时神彩焕发日诵千言出列仙传】

崇宁真君生 【翰墨大全】

清暑日 【道经】

是日清晨汲井水贮瓮中封之凡造曲酿酒作酱淹蔬皆取以用日午以所藏衣曝之
【宣府镇志】

兖州是日有黑蚁与赤蚁交斗长六十步广四寸赤蚁断头而死
【后魏显宗天安元年六月六日五行记】

滁州野蚕成茧遍于山阜 【唐太宗贞观十二年六月六日出会要】

诗

六月六日生我公我公生与彭祖同彭祖寿年八百岁我公寿筭还无穷 【事文类聚】

七日

宋戚舜臣卒 【戚舜臣治有惠爱民大悦服徙知南安军未及施为而病作矣皇佑四年六月七日卒于官年五十有七出墓铭】

周茂叔卒 【周敦实字茂叔道州人后避英宗旧名改敦颐卒于熙宁六年六月七日自少以名节自高襟怀飘洒雅有高趣尤乐佳山水遇适意处或徜徉终日庐山之麓有溪焉茂叔濯纓而乐之取营道所居濂溪为号而筑书堂于其上虽仕宦三十年而平生之志终在丘壑朱熹曰清逸处士出史纂左编】

文山状元及第是日谢阙

【文山先五月二十四日赐状元及第六月七日谢阙出七修类稿】

密州卑产山太和二年是日有龙见初赤龙从西来续有青龙黄龙从南来后有白龙黑龙从山北来并形状分明自申至戌方散去 【五行志】

诗

今日江头天色恶炮车云起风欲作 【国史补暴风之候有炮车云】 独望钟山唤宝公林间
白塔如孤鹤宝公骨冷唤不闻却有老泉来唤人电眸虎齿霹雳舌为予吹散千峰雪南行万
里亦何事一酌曹溪知水味他年若画蒋山图为作泉公唤居士
【东坡六月七日泊金陵阻风得钟山泉公书寄诗为谢】

八日

虹蜺竟天【唐景隆元年六月八日天文志】

梁武帝天监三年是日武帝讲于重云殿沙门志公忽然舞歌乐须臾悲泣因赋五言诗乐哉三十余悲哉五十里但看八十三子地祲灾起佞臣作欺妄贼臣灭君子若不信吾言龙时候贼起且至马中间衔悲不见喜【梁自天监至于大同三十余年江表无事至太清二年台城陷帝享国四十八年所言五十里也太清元年八月十三而侯景自县瓠来降在丹阳之北子地帝惑朱异之言以纳景景之作乱始自戊辰之岁至午年帝忧崩出通考】

宋真宗祥符六年天书再见内十功德阁六月八日封祀制置使王钦若言泰山西南垂刀山有红紫云气渐成华盖至地而散其日木工董祚于灵液亭北见黄素书曳林木之上有字不能识言于皇城使王居正居正睹上有御名驰告钦若遂授中使捧诣阙帝御崇政殿趋召辅臣曰朕五月丙子夜复梦向者神人来言来月上旬当赐天书于泰山宜斋戒祇受朕未敢宣露惟密谕钦若等凡有祥异即上闻朕今得其奏果与梦协王旦等曰陛下至德动天感应昭著臣等不胜大庆再拜称贺【宋史礼志】

东京是日百姓相惊以鬼兵皆奔走不知所在初洛水南坊市喧喧渐至其至时空中如数千里甲兵人马嘈嘈有声【出纪闻唐玄宗开元二十三年六月八日时帝在东京恶之北齐书亦有此事天中晋阳有鬼兵百姓竞系铜铁以畏之不来】

九日

唐肃宗是日置太乙神坛于南郊东命侍臣王玙祭之【至德三年玉海】

唐蓬莱殿是日赐群臣橘【翰墨大全】

唐敬宗是日生王智兴请于泗州置戒坛度僧尼以资福许之【自元和以来敕禁此弊智兴欲聚货首请置之于是四方辐凑江淮尤甚观察使李德裕上疏罢之旧唐书】

宋真宗车驾在西京幸会节园召从臣张乐宴饮【开宝九年六月九日出会要】

宋孝宗以国公封皇嫡孙【干道元年六月一日嫡孙生六月九日封国公出会要】

宋孝宗是日崩太皇太后有旨皇帝以疾听在内成服太皇太后代皇帝行礼【皇帝即光宗绍兴五年六月九日出宋史礼志】

西方阿弥陀佛像成奉安于金陵清凉寺供养【东坡妻王氏名□之字季章年四十六元佑八年卒于京师临终之夕遗言舍所受用命其子迈迢过画弥陀佛像绍圣元年六月九日像成奉安清凉寺供养乃为赞曰佛子在时百忧绕临行一念何由了口诵南无阿弥陀如日出地万国晓何况自舍所受命画此圆满天日表见闻随喜悉成佛不择人天与虫鸟但当作

平等观本无忧乐与寿夭丈六长身不为大方寸千佛夫岂小此心平处是西方开眼便到无魔烧出燕石斋补】

倪勤读金刚经水涨勤读经益励水退周视数里民舍尽溺独勤舍不溺人皆礼敬焉
【勤梓州人唐太和五年以武略称每设佛像而读经其年六月九日水涨报应记】

王（王寿）暴死复苏言初死之时行入一大门有一人谓（王寿）曰汝无罪放归（王寿）回顾见米行质立于厅有吏守之 【唐尚书行部郎中米行质博陵人也性不信佛有慢谤之言永徽二年病死至六月九日有王（王寿）暴死苏后谓人曰见行质有吏守之行质悲喜谓予曰吾被官责以生平功德薄苦不可当君归可至我家急语令作功德（王寿）苏以此告行质家人家人作佛事谢过后行质现形谢（王寿）出宜报记】

诗

肯羨熏风书殿壁行看藜杖照文房明年展庆三三日缥缈钧天赐寿觞 【事文类聚】

十日

齐武帝永明八年雷有黄光照地状如金色 【占曰人君有德或谓之荣光出齐书】

高宗绍兴三十二年闽州有五色云见锦屏山之西浮云映日自未及申 【玉海】

高宗是日御札皇太子可即皇帝位朕称太上皇帝退处德寿宫皇后称太上皇后应军国事并听嗣君处分于是行内禅之礼有司设仗紫宸殿宰相文武百寮立班皇帝出宫升御坐左仆射陈康伯等奏曰今陛下超然独断高蹈尧舜之举臣等心实钦仰但自此不获日望清光犬马之情不胜依恋因再拜辞相与泣下帝亦流涕曰朕在位三十六年今老且病欲闲退此事断自朕心非由臣下开陈卿等当悉力以辅嗣君 【嗣君即孝宗出宋史礼志】

于阗王伏阁信来朝赐金带锦袍

【唐太宗贞观二十三年六月十日来朝于阗国名出外夷传】

梅圣俞卒 【康定辛巳年六月十日以其官卒宋翰林侍读学士赐紫金鱼袋墓在宣州宣城县长安乡西山里出神道碑】

金乘如来生 【道经】

诗

恰则炎威到一句当年神岳降生申 【事文类聚】

十一日

唐玄宗改玺书为宝书【天宝五载玉海】

玄宗夜次金城智藏寺僧进（苧去丁改刂）粟【天宝十五载玄宗自延秋门出微雨沾湿扈从惟宰相杨国忠韦见素内侍高力士从之不及渡便桥国忠欲断桥上曰后来者何以能济辰时至咸阳望贤驿官吏口散无复储供上憩于宫门之树下亭午未进食俄有父老献（麦少）于是百姓献食相继六月十一日夜次金城智藏寺僧进（苧去丁改刂）粟行从方给出乱杂记】

唐武宗生于东宫以为庆阳节【天中记据旧唐书以武宗十二日生武宗穆宗第五子】

宋高宗禅位于孝宗【高宗退处德寿宫出通考】

东坡绍圣四年别子由渡海行琼儋间肩舆坐睡梦中得句云千山动鳞甲万谷酣笙钟觉而遇清风急雨【东坡谪海南子由谪雷州先一月相遇于藤至六月十一日别子由渡海有梦中得句云云出长公外纪】

诗

四州环一岛百洞蟠其中我行西北隅如渡月半弓登高望中原但见积水空此生当安归四顾真途穷眇观大瀛海坐咏谈天翁区区魏中梁一米谁雌雄幽怀忽破散永啸来天风千山动鳞甲万谷酣笙钟安知非群仙钧天宴未终喜我归有期举酒属青童急雨岂无意催诗走群龙梦云忽变色笑电亦改容应怪东坡老颜衰语徒工久矣此妙声不闻蓬莱宫【东坡六月十一日琼儋间梦中得句觉而遇清风急雨戏作】

十二日

唐高宗永徽元年是日地震上谓侍臣曰朕政教不明使晋州之地屡有震动【先四月地震】侍中张行成曰天阳也地阴也阳君象地臣象君宜转动臣宜安静今晋州地震恐女谒用事大臣阴谋且晋州陛下本封今地屡动尤彰其应伏愿深思远虑以杜其谋帝深然之【五行志】

唐武宗生于东宫【元和九年六月十二日生母宣懿皇后穆宗第五子出旧唐书】

宋孝宗率百官朝高宗太上皇于德寿殿以雨百僚免入见上就宫中行礼【绍兴三十二年六月十一日高宗禅位于孝宗称太上皇退处德寿宫十二日朝见出通考】

路生为赵自勤卜之曰公之官不出六月十二日【自勤赴选访卜于长安县路生云公之官

不外重口后又卜之云公之官不出六月十二日至期敕为三拾遗拾遗之字各有一口出太平广记】

元顺帝二十七年皇太子寢殿后新甃井中有龙出光焰烁人宫人震慑仆地 【元史】

十三日

隋文帝生于同州般若寺中赤光照室流溢外户紫气满庭状如楼阁色染人衣妳母以时炎热就而扇之寒甚几绝困不能啼 【出王劭舍利记隋文帝以后魏大统七年六月十三日生妳母以时炎热扇之几绝有神尼者名曰智仙河东蒲阪刘氏女也语太祖曰儿天佛所佑勿忧尼遂名帝为卯罗延言如金刚不可坏也又曰此儿俗家秽杂自为养之太祖乃割宅为寺内通小门以儿委尼后皇妣来抱忽见化而为龙惊惶堕地尼曰何因妄触我儿遂令晚得天下及年七岁告帝曰佛法将灭一切神明今已西去儿当大贵从东国来佛法当灭由儿兴之一切神明还来尼沉静寡言时道成败吉凶莫不符验及周灭二教尼隐皇家内着法衣戒行不改帝后果山东入为天子重兴佛法每以神尼为言乃命王劭为尼作传令天下舍利塔内各作神尼之像焉又隋书载文帝诏曰六月十三日是朕生日哀哀父母生我劬劳宜令海内为武元皇帝元明皇后断屠】

唐高宗生于东宫之丽正殿 【贞观二年六月十三日出旧纪】

后晋高祖崩 【葬显陵在洛京寿安县通考】

宋文文山赐状元及第以是日谒庙 【文山科六百一人六月十三日谒庙先五日谢阙至二十九日赐宴又至七月一日赐小录出七修类考】

宰臣秦桧是日以上所赐御书真草孝经刻之金石上曰十八章世以为童蒙之书不知圣人精微之学不出乎此 【宋高宗绍兴九年艺文志】

张正常四十二代天师至元乙亥年是日其父太玄真人坐而假寐忽见神人飞空而至曰余自华盖山来游君家及觉而正常生紫云覆庭红光照室人以为祥征 【正常年七岁双目炯炯如岩下电容止异群儿后三岁太玄出游五岳名山指相传雌雄剑及玉刻阳平治郡功印曰龙星再集于亥吾儿当持此大振玄风太玄渡淮化去正常衍道家玄旨乃启黄书赤界紫素丹刻之文授其徒四方学者川赴云蒸剑失其一流落鄱阳季氏家夜生光怪正常访而合之出史纂左编】

河内野王山上龙死 【襄楷字公矩平原鬲阴人好学博古善天文阴阳之术桓帝时宦官专朝灾异数见延熹九年楷自家诣阙上疏曰臣闻皇天不言以文象设教尧舜虽圣必历象日月星辰察五纬所在故能享百年之寿为万世之法前七年六月十三日河内野王山上有龙死长数十丈夫龙形状不一小大无常故周易况之大人帝王以为符瑞或闻河内龙死讳以

为蛇夫龙能变化蛇亦有神皆不当死昔秦之将衰华山神操璧以授郑客曰今年祖龙死始皇逃之于沙丘后灵帝即位以楷书为然出后汉书】

朝元太一真君下降 【道经】

诗

亭晚人将别池凉酒未酣关门劳夕梦仙掌引归骖荷叶藏鱼艇藤花冒客簪残云收夏暑新雨带秋岚失路情无适离怀思不堪赖兹庭户里别有小江潭
【岑参六月十三日水亭送华阴王少府还县】

去年六月焦原雨入得东州第一朝今日看云旧时节又来农畔听萧萧
【宋时曾巩先一年久旱六月十三日入境得雨次年复旱得雨亦六月十三日也】

十四日

宋孝宗是日即位未改元以皇帝登极奏告天地宗庙社稷景灵宫天庆观报恩
【绍兴三十二年通考】

唐穆宗赐牛僧孺金紫 【长庆元年】

宋高宗诏西安进士陈元助制刻漏一座送尚书省补其子为局生 【绍兴二年以上玉海】

郭子仪薨 【子仪华州郑县人建中二年夏病甚德宗传诏省问及门郭氏子弟迎拜于外子仪卧不能兴以手叩头谢恩六月十四日薨年八十五德宗震悼废朝五日旧唐书】

元祜泛江翫月张季友李景俭二侍御史王文仲司录王众仲判官两昆季为祜载酒炙选声音自府城之南桥乘月泛舟穷一夕以为欢 【元和五年六月十四泛江楚通志】

赐贵妃自尽 【诸将诛杨国忠以贵妃在宫人情恐惧六月十四日命高力士赐贵妃自尽陈玄礼见上请罪命释之】

于长文升仙 【列仙传】

太乙真君降 【道经】

诗

楚色分形势羊公压大邦因依多士子参画尽敦庞岳壁闲相对荀龙自有双共将舡载酒同

泛月临江远树悬金镜深潭倒玉幢委波添净练洞照灭凝缸阒咽沙头市玲珑竹岸窗巴童唱巫峡海客话神沆已困连飞盏犹催未到缸饮荒情烂熳风掉乐琤枰胜事他年忆愁心此夜降知君皆逸韵须为应筵撞 【元祜六月十四池江翫月楚通志】

十五日

宋神宗元丰二年是日命知制造张璪光禄丞陆佃于秘阁考试宗室 【玉海】

程伯淳卒 【伯淳讳顗召为宗正寺丞卒于宋神宗元丰八年六月十五日先伯淳郛县三簿有石佛像岁传佛首放光远近男女昼夜会集伯淳取其首视之不复放光后以特旨召老稚数千追及境上攀号不忍别出宋文鉴】

黄龙见于牛山潘炎赋曰非同上天之五蛇有异渡江之一马秦梦立乎酈時汉时见于成纪彼皆一至此则重光 【唐中宗景龙二年六月十五日黄龙再见于牛山】

李华作御史大夫壁记 【天宝十四载六月十五作记曰君以文明照临百官官糾其邪职有邦宪由京师而端下国王化所系不惟威刑御史大夫其任也周拾决于天心得失震于人听举直错枉而不挠则公卿屏气道路生风云云出事文类聚】

天宝八载以是日加老子号大道玄元皇帝 【高宗纪亦出事物纪原】

王处一从祖师得道莱阳县刘植以无嗣告处一处一曰吾稟之上苍六月十五日处一诣其居而植为置具处一曰特来从嗣岂可以常酒相待耶库之西北所封者妙酝也植往索之得煮酒一器处一曰不惟此酒嗣亦如之索纸书一颂后批四四应真四字 【植明年四月十四日生子乞名处一曰已与之矣植良久曰四四则人所共知应真二字是其名否处一曰是日纯阳降也非应真乎遂名之出史纂左编】

西斗星降

太虚元君真人紫微王夫人同降现 【以上道经】

冲素真人飞升 【列仙传】

东华帝君降诞

【帝君姓王或云名玄甫于是日降生后隐昆仑复居五台得老子之道仙去出道书】

海蟾帝君升仙 【燕山刘操字宗成号海蟾子为辽相遇纯阳遂解印佯狂远避纯阳□以丹道乃作诗云抛离火宅三千口屏去门兵百万家道成于是日飞仙后隐终南太华授道董凝阳张紫阳出道书】

印宗法师为六祖惠能落发日 【佛书】

诗

他寝此时吾不寝近秋三五日逢晴相思惟有霜台旧望尽孤光见却生
【贾岛六月十五日酬朱侍御】

隆暑赫炎曦门弧庆左垂东君来瑞世西斗降临时 【事文类聚】

十六日

苏轼上书曰臣已具积欠六事及旧所论四事上奏臣闻之孟子曰以不忍人之心行不忍人之政若陛下初无此心则臣亦不敢必望此政屡言而屡不听然臣孜孜强聒者知陛下实有此心为臣子所沮格窃观即位之始发政施仁天下耸然望太平于期月今八年而民亦贫愿陛下深思其故 【宋哲宗元佑七年六月十六上书出文编】

顾保宗字世嗣江夏人也每钓鱼江中是日夜坐草堂临月未卧忽有一人须发皓然自称翁至堂下乃揖保宗便箕踞而坐惟哭而已保宗谓曰翁何往翁曰来自江州复归江夏言讫又哭保宗曰翁非异人乎翁曰我实非人以君闲退故相访耳保宗曰野人钓鱼可谓劳生何闲退之有翁曰世方兵乱闲退何妨保宗曰今世清平未尝有乱翁曰君不知桓玄之志乎保宗因问世若有兵可言岁月否翁曰今不是隆安五年耶保宗曰是翁又屈指复哭谓保宗曰后年易号复一岁桓玄盗国盗国未几为卯金所败保宗曰卯金为谁翁曰君当后识耳言讫乃去保宗送于户外及晓保宗临江观之闻水风渐急鱼皆出浪不知其数其中有大鱼百余尺昂首四望后乃没是岁隆安五年六月十六日也保宗大异之 【后二年改隆安为元兴元兴二年桓玄果篡位三年建武将军刘裕起兵灭桓玄复晋安帝位后十七年刘裕受晋禅皆如鱼言出九江记】

潘真人升仙 【潘子真事文类聚】

诗

禁门深钥寂无哗浓墨淋漓两相麻唱彻五更天未晓一池月浸紫薇花
【六月十六日锁学士院洪咨夔】

十七日

宋明帝是日太白岁星填星合于东井占曰改立王公 【秦始七年南齐书】

唐高宗于洛州柏崖置敖仓容二十万石

【咸亨三年六月十七日置敖仓至开元十年废出会典】

唐玄宗是日次扶风郡军士各怀去就会益州贡春彩十万匹上命置于庭召诸将谕之曰卿等国家功臣陈力久矣朕之优奖常亦不轻逆胡背恩事须臾回避甚知卿等不得别父母妻子朕亦不及亲辞九庙言发流涕又曰朕幸蜀今有此彩卿等即宜分取各图去就朕自有子弟中官相随与卿等诀别众咸俯伏涕泣曰死生愿从陛下上曰去就任卿自是悖乱之言稍息【天宝十五载六月十七日出玄宗本纪】

唐睿宗以经籍多缺令京官有学行者分行天下搜检图籍
【景云三年六月十七日出会要】

东坡是日复过琼之双泉处【丁丑岁东坡南迁过琼得双泉之甘于城之东北隅至庚辰岁六月十七日东坡迁于合浦复过之即徽宗皇帝登极之年也太守承议郎陆公求泉上之亭名之曰洞酌出长公外纪】

赵真人上升【赵广信出翰墨大全】

诗

暑雨虽不足凉风还有余
北城阴夜何殊山崦居月明苍桧立露下芭蕉舒
试问澄虚阁今夕复焉如【陈与义字去非六月十七日夜寄邢子友诗】

清水帘门散异香恩深咫尺对龙章
花应洞里时常发日向壶中特地长
坐久忽疑槎犯斗归来兼恐海生桑
如今冷笑东方朔惟用诙谐侍汉皇
【韩致光六月十七日召对自辰及申方归本院】

酌彼两泉挹彼注兹一觥之中有澠有淄以澹以烹众喊莫齐自江徂海浩然无私岂弟君子江海是仪既味我泉亦哿我诗【东坡六月十七日过双泉处作齐饮不尽也哿齿尝之】

十八日

隋文帝移入新邑【文帝欲迁都太史奏当迁都帝曰吾于开皇二年六月十八日移入新邑在汉故城之东南万年县界南直终南山子午谷北枕龙首原今朝堂即旧杨兴村村门大树今犹在出西京记】

吕岩是日岱岳王母池复书七言绝句题云回公再书【吕岩字洞宾唐河中永乐人号纯阳宋天圣戊寅年曾书五言绝句于岱岳王母池后又宋徽宗政和丙申年六月十八日复书七言绝句好事者摹刻于会贞宫出纯阳集】

缘督真人降生 【饶郡赵宗子名友钦字缘督是日生身幼遭劫火早有山林之趣性聪敏天文地理经纬术数莫不精通得紫琼丹道搜群书作三教一家之文及金丹问难等书行于世寓衡阳以道授上阳子出道书】

诗

昔年留字识曾来事满华夷遍九垓无柰蛟龙知我字故留踪迹不尘埃
【洞宾六月十八日题于岱岳王母池】

十九日

后周世宗崩 【后周显德六年有一人敝衣入中书升政事堂据床而坐堂吏叱之曰何人遣尔至此其人曰宋州官家教我来此吏白其事于宰臣宰臣密令遣之寻不知所适其年六月十九日世宗崩明年正月大宋受命出通考】

宋仁宗幸后苑观稻赏瑞竹宴太清楼 【景佑二年玉海】

博陵崔咸是夜雷后忽有一女子年十六七逾垣而入问所从来而终无言咸疑其奔者乃深藏之将旦而毙咸惊惧 【崔咸少习静独在齐中天宝元年六月十九日夜忽有女子逾垣入室将旦而毙乃出于里内私问失女有双婢六七人丧服行语若寻求者相与语曰死而逃况生乎咸从而问之对曰郎君何故用问吾小娘子丧三日昨夜方斂被雷震尸起出不知所向咸问其形容衣服验之果是后归葬而女子又重来咸乃奠酒祝之不复来出通幽记】

二十日

寿昌节 【宣宗六月二十二日出玉海】

晋洗马卫玠薨 【永嘉六年五月一十日薨谢幼兴鲲发哀于武昌感恸不自胜人间子何故而致哀如是荅曰栋梁折矣何得不哀出山堂肆考】

北山黄东与郑子恭表兄弟也黄东约以六月二十日会于天宁之浮图各具酒一壶饭一器春蚝夏荔不拘其数合而饮食之古人骚赋诗咏与夫投壶弓矢之具有则携之以佚娱乐相告语以孝弟忠信相问劳以老少安否家计有无至于农圃桑麻之业皆可抵掌而剧谈晨而往暮而归于是重亲戚厚风教岂不善欤子恭曰善哉 【正月十日亦然载黄直卿序】

弘州人张珪晚憩神溪孤石上有神人自空而下言曰律吕律吕上天敕汝六月二十日行硬雨语毕腾空而去珪至家遍语邻村人使速收麦未及收者至期为雨所伤尽空事闻朝廷遣使祭焉遂立律吕神于孤石上 【汉太初元年出天下一统志】

祈请于葛洪居处 【道士申太芝奏称奉恩旨令臣往名山修功德去载六月二十日于南海葛洪居处至诚祈请中夜恍惚见一老人云是茅山罗浮神人尝于七曜洞来往昔曾于九疑山桂阳石室中藏天乐一部岁月久远变为五野猪彼郡百姓捉获汝可往取献皇帝每祈祭但依方安置奏之即五音自和天仙百神应声降福所求必遂寿命延长臣奉神言即往桂阳寻问百姓云天宝二载村人尝见五野猪逐之便走于石室就里寻觅化为石物五枚今将奉进者王维表曰庞眉皓发遥同入昴之仙真诀玄言来告馭风之客栖身七曜以俟唐尧藏乐九疑不传虞舜按古器物出见其精爽化形诚亦有之龙跃平津蛇飞武库载在晋史王维表贺夫岂云诬出墨卿谈乘】

诗

参横斗转欲三更苦雨终风也解晴云散月明谁点缀天容海色本澄清空余鲁叟乘桴意粗识轩辕奏乐声九死南荒吾不恨兹游奇绝冠平生 【苏轼六月二十日夜渡海作】

二十一日

少帝是日生冯导等表曰大电绕枢哲后继羲农之运五星聚井真人启文景之基昌图永洽于千年嘉庆宜光于载诞当大雨时行之日乃常星不见之辰请以六月二十一日为启圣节使地角天涯望南山而祝寿九州岛四海仰北极以倾心从之 【天中记】

宋高宗谓辅臣曰一二年就绪庶宽民力昨在会稽尝书赵充国传赐诸将但上下不能承奉 【绍兴六年玉海】

宋真宗皇后郭氏葬于永熙陵之西北 【谥曰庄穆景德四年六月二十一日葬宋史礼志】

二十二日

唐宣宗以是日生为寿昌节 【宣宗生于大明宫宪宗第十三子出天中记】

宋林栗上经传集解 【孝宗淳熙十年六月二十二日知潭州林栗上经传集解出会要】

潭州是日上言湘阴县得锤制作精妙上有古篆八十三字人不能识画图以进 【宋太宗端拱二年玉海】

张真人上升 【张元化翰墨大全】

二十三日

宋徽宗殿前池内双生莲 【政和三年玉海】

安祿山不意玄宗西幸是日遣使止崔干佑兵留潼关又遣孙孝哲攻陷长安害诸妃主皇孙
【唐肃宗至德元载六月二十三日出乱杂记】

仪官禅师无疾而终 【长安看龙寺仪官禅师本唐氏之族也父琅邪王与越王起兵伐则天不克而死后诛其族无遗惟禅师方在襁褓乳母抱而逃后数年后闻琅邪有子求之愈急乳母携至峻州鬻女工以自给禅师年已八岁聪慧出类状貌不凡乳母恐事露大忧之乃于桑野中告以本末泣而谓吾养尔已八年亡命无所不至今汝已长而敕访不止事泄之后汝与吾俱死禅师遂流涕而别削发为僧后得道归者甚众六月二十三日无疾终柩将发异香芬馥有白鹤数百鸣舞于宫中彩云覆柩出纪闻】

虞翁生上升 【翰墨大全】

诗

淅淅晓风起孤舟愁思生蓬窗一萤过苇岸数蛩鸣老大畏为客风波难计程家人夜深语应念客犹征 【张耒字文潜六月二十三日夜泊林里港作】

二十四日

崔圆是日奏剑南岁稔民安储供无阙玄宗大悦授圆中书侍郎同中书门下平章事
【天宝十五载玉海】

钱塘人以是日设醮舍费 【宋咸淳间羽士陈崇贞者自闽来卜居于钱塘西湖善雷法因敕建雷院以居之赐号冲素真人六月二十四日郡人云集设醮舍费至今不废出西湖游览志】

南斗降 【道经】

忌远行水陆俱不可往 【云笈七签】

二十五日

唐敬宗幸凝碧池令兵士千余人于池中取大鱼长大者送入新池 【宝历二年玉海】

东坡与秦少游相别于海康 【东坡云岁在庚辰六月二十五日予与秦少游相别于海康意色自若与平日不少异但自作挽词一篇人或怪之予以谓少游齐生死物我戏出此语其言过矣此言惟渊明可以当之少游因迁谪而作此词岂真若是乎其自制挽词曰婴衅徙荒域茹哀与世辞官来录我橐吏来殓我尸藤来木皮冠槁葬路傍陂孤魂不敢归惴惴滞犹兹家乡在万里妻子天一涯弱孤未堪事归骨定何时昔忝柱下史通籍黄金閤一朝奇祸发飘

流至于斯修涂繚山海未免从阨维荼毒复荼毒彼苍焉得知秋晚瘴江急鸟兽鸣声悲殡宫生苍藓纸钱挂枯枝蒙蒙寒雨零惨惨阴风吹无人致薄奠谁与饭黄縗更无挽歌者但有挽歌词出合璧事类】

天元甲子朝元日

九华安妃紫微王夫人降金曲山坛 【以上道经】

二十六日

唐玄宗诏左丞相张说在家修史

【开元二十五年六月二十六日诏在家修史李元紘奏就史馆从之出会要】

宋太祖幸迎春苑习射 【建隆三年玉海】

史宪诚是夜为众军所害 【宪诚其先出于奚虏今为灵武建康人敬宗即位进秩司空太和二年沧景节度使李全略卒其子同捷窃据军城表邀符节举兵伐之先是宪诚与全略婚媾及同捷叛复潜以粮饷为助宪诚尝遣骁将至阙下恣为张大宰相韦处厚以语折挫之宪诚不敢复与同捷为应宪诚亦出师共讨同捷及沧景平加司徒宪诚心不自安上又加侍中移镇河中宪诚素怀向背太和三年六月二十六日夜为众军所害册赠太尉出旧唐书】

六月二十六日发龙涸昼夜肃肃常寒不复得脱襦裤将从七十二人面尽黎黑口唇青淤【沙州记】

清凉真人生 【翰墨大全】

二十七日

宋真宗黄云如飞凤覆昭庆殿 【祥符九年出玉海】

文宗是日欲拜德裕平章事已进麻诏曰命相绝是重事适看历日日辰非佳【太和七年六月二十七日出献替记】

太常寺是日奏孔子高弟子所封侯爵与宣圣名同失弟子尊师之礼今乞以瑕丘侯曾参改封为武城侯宛丘侯颛孙师为颍川侯龚丘侯南宫绌为汶阳侯楚丘侯司马耕为雒阳侯顿丘侯琴张为阳平侯瑕丘伯左丘明为中都伯龚丘伯谷梁赤为雒陵伯楚丘伯戴圣为考城伯从之 【宋徽宗政和元年六月二十七日通考】

启圣节 【少帝六月二十七日出玉海】

天宝十三载是日加老子号大圣祖高上大道金阙玄元天皇大帝
【唐会要亦出事物纪原】

宗明僧泊然而逝 【宗明上饶柳氏子志慕空寂依蕲州广化寺师事文仙薙发受具足戒后游汉东卓庵于灵济故地澹如也属岁大旱民艰食请师为祷师以法力起池龙甘雨沾足屡岁有秋元贞元年六月二十七日泊然而逝出楚通志】

取枸杞煎汤沐浴至老不病 【云笈七签】

诗

黑云翻墨未遮山白雨跳珠乱入舡卷地风来忽吹散望湖楼下水如天

放生鱼鳖逐人来无主荷花到处开水枕能令山俯仰风舡解与月徘徊

乌菱白芡不论钱乱系青菰裹绿盘忽忆尝新会灵观滞留江海得加餐
【韩文公诗曰平地散芡盘】

献花游女木兰桡细雨斜风湿翠翘无限芳洲生杜若吴儿不识楚词招 【桡若山姜也】

未成小隐聊中隐可得长闲胜暂闲我本无家更安往故山无此好湖山
【东坡望湖楼六月二十七日醉书五绝】

二十八日

太白与月相迫 【蔡邕上疏曰六月二十八日太白与月相迫兵事恶之鲜卑犯塞所从来远今出师不利上达天文下逆人事出蔡邕传】

德王裕以是日封干宁
【大顺二年六月二十八日四年册为皇太子唐昭宗长子也出旧唐书】

敬宗御三殿观两军教坊内园分朋驴鞠角抵戏酣有碎首折臂者至二更方罢
【宝历一年六月二十八日玉海】

宋仁宗以飞白文词字赐翰林侍读李淑
【康定一年淑出守许州为飞白宝草记摹石州靡玉海】

神马二匹一白一黑忽出于滇池县河中河水周回二百余里县民董聪见之

【晋孝武帝太和十四年六月二十八日出宋书符瑞志】

滇中风俗每岁是日各家俱束苇为槁高七八尺凡两树置门首遇夜炳燎其光烛天合家俱用生肉切为脍调以醯蒜不加烹饪名曰吃生总称曰火节 【谭丛】

二十九日

武宗是夜一鼓至五鼓小流星五十余交横流散
【会昌元年六月二十九日夜出唐天文志】

宋真宗对辅臣于崇政殿观阵图上曰北戎寇边常遣精悍为前锋若扞御不及即有侵軼之患今盛选锐兵命骁将统领别为一队遏其奔冲彼既挫锐而退余其望风不敢进矣
【咸平四年六月二十九日对辅臣于崇政殿出会要】

李长民上广汴都赋 【宋徽宗宣和四年玉海】

文文山赐宴 【五月二十四日赐状元及第六月二十九日赐宴七修类稿】

回鹘入贡摩尼偕来于中国是日唐宪宗敕赐回鹘摩尼为之置寺赐额为大云光明寺
【元和元年回鹘之摩尼犹中国之僧也出大历】

桐柏真人降

九华真妃降 【以上道经】

诗

此夕熏风息舜弦明朝早振蓐收权 【事文类聚】

三十日

东汉章帝建初六年是日日食在翼六度翼主远客冬东平王苍等来朝 【明年正月苍薨】

汉高后二年是日日有食之既在营室九度为宫室中时高后恶之曰此为我明年应
【师古曰明年应谓高后崩也以上通考】

汉献帝兴平元年是日日食帝避正殿寝兵不听事 【后汉书】

赵清献公扑赐第在京师府司巷长女适史氏以暑月不寐启户纳凉见月满中庭如昼方叹

曰大好月色俄庭下渐暗月痕稍稍缩小斯须光灭仰视星斗灿然而夕乃晦日竟不晓为何物光也 【夷坚志】

丘处机以是日抵丰州饱食如故 【处机字通密号长春子生于金熙宗皇统八年从重阳祖师得道后元太祖时至阿不罕山过栖霞观偶不食但饮汤而已众问之曰师奚疾师曰予疾非尔辈可测圣贤琢磨故耳有尹清和梦人谓之曰师之疾公辈勿忧至汉地当自愈六月三十日抵丰州有奉以汤饼饱食如故众相谓曰清和之梦验矣后师升华至元六年赠长春演道主教真人处机事亦载于七月九日八月二十七日出史纂左编】

日涉编卷七

楚应城陈阶升也甫编辑

邑人徐养量叔弘甫校刻

虞正缙 甫

陈光宸致可甫

李宇粹 甫

陈蕾伯春甫全阅

七月〔一〕

七月建申申身也言万物身体成也 【合璧事类】

夷则申之气也七月建焉 【周礼】

日在翼昏斗中旦毕中 【礼记】

天地始肃 【月令】

流火 【诗】

招摇指申 【淮南子】

序移玉律气应金商 【唐书】

日行白道曰西陆谓之秋 【后汉书】

西方曰辰其时曰秋其气曰阴 【管子】

孟秋行春令则亢旱不实行夏令则多火灾痰热疟症行冬令则败介虫来戎兵
【吕氏春秋】

为相 【尔雅】

景曰明景澄景清景晨景辰曰凄辰节曰素节商节

肇秋亦曰孟秋初秋上秋早秋首秋兰秋 【以上梁元帝纂要】

唐宫中每至秋时妃妾以金笼闭蟋蟀置枕畔夜听其声庶民之家皆效之 【开元遗事】

明皇尝制秋风高曲每至秋空迴彻纤埃不起即奏之则清风远来庭叶交坠 【羯鼓录】

永州风俗少年常击鼓群入民家号行盗皆迎为辨具谓之起盆后为解索喧呼痕斗
【韦宙出为永州刺史一切禁之出白孔六帖】

天曰旻天 【梁元帝纂要】

宋神宗熙宁元年戊子夜西南云间有声鸣如风水相激又七年丙寅夜西北方云间有声如磨物又七年庚子夜西北天鸣占主政虐民劳兵革岁动 【宋史俱系七月】

彩虹出西方蔽月 【义熙二年晋安帝记】

峨眉山顶下雪谓之封山 【野记】

风曰凉风又曰商风素风凄风激风悲风金风 【梁元帝纂要】

江南有大风相传以为孟（上浦下女）发怒按山海经谓帝之女游于江中出入风雨自随以帝女故曰孟浦?女 【野记】

东都大雨人多殍殍先是童谣曰新禾不入箱新麦不入场迨及八九月狗吠空垣墙
【唐高宗永淳九年通考】

天雨雹杀牛羊 【王莽天凤元年汉纪】

广州雨金占曰人君多杀无辜 【垂拱二年五行志】

天雨水银占曰人君多杀无辜
【惠帝永兴二十六年晋书高宗绍兴二十年七月亦雨水银宋史】

天雨钱或从石甃中涌出 【绍兴二年宋史】

天雨血 【端平三年五行志】

泗州下邳天雨汤杀鸟雀 【唐懿宗咸通八年出通考】

北地兼雨肉似羊肋 【桓帝建和一年时梁太后摄政兄弟专权枉杀李固杜□等天下冤之其后梁氏诛灭出汉书】

京师雨毛如发长者三尺余短者六七寸
【文帝开皇六年京房易飞候曰天雨毛其国大饥时关中旱米粟涌贵出隋书】

黄河是月水名荻苗水 【水衡记】

齐东昏侯淮水变赤如血 【永元元年】

陈宣帝江水赤如血自建康西至荆州祯明中江水赤自方州东至海
【太建十四年京房易占曰水化为血兵起其后为隋所灭】

唐穆宗河水赤三日止 【长庆元年以上通考】

王方翼次叶河无舟而冰合时以为祥 【白孔六帖】

晋神山县北谷中有铁随水流出方二丈三尺其重七千斤 【建隆二年五行志】

武帝殿前地陷方五尺深数丈中有破船 【太康八年晋朝杂事】

熙河路地震有裂数十丈者兰州尤甚仓库俱没河东诸郡震裂 【宣和四年宋史】

黄气出壁长五尺余占曰兵出 【景德元年宋史】

京城红叶满空如火照人自旦至辰方息后数日

京城黑气起百步内不见人自寅至巳方消 【顺帝七年元史】

汴州相国寺佛阁见有赤块转门谯藤网中周而火作顷之赤块北飞转佛阁藤网中亦周而火作既而大雨平地水深数尺火亦不灭 【唐昭宗大顺二年】

齐武帝不豫徙御延昌殿始登阶而殿屋鸣叱上恶之未几崩 【永明十一年】

王莽社陵便殿乘舆虎文衣废藏在室匣中者出自树立堂上良久乃委地吏卒见者以闻莽恶之 【地皇元年以上通考】

进贤县妇产子首有角腋有肉趺 【光宗绍熙二年宋史五行志】

河中生草叶自相繆结如旌旗之状时人以为旗子草 【僖宗光启元年五行志】

晋陵县民析薪中有木字曰绍兴五年如是者二是时犹未改元其后果然此木妖 【宋史】

彰德李树结小黄瓜民谣曰李生黄瓜民皆无家 【顺帝至正三年元史】

凤凰集苍梧 【吴孙权黄武五年】

凤凰见会稽山阴 【武帝永初元年以士宋书符瑞志】

有小鸟如雀生大鸟如鸠于万年宫皇帝旧宅 【高宗永徽五年】

乌衔柴为城方十余里高二三尺乌口皆流血 【德宗贞元四年上旧唐书】

武陵县龙斗于复塘村大雷雨二龙奔逃珠堕火如车轮牧童得之自是连岁有水灾
【宋孝宗干道五年五行志】

有蛇从郭外入与邑蛇群斗孝文帝庙 【汉孝武帝太唐二年白孔六帖】

诗

江南孟秋天稻花白如毡素腕慚新藕残妆妒晓莲 【郑概状江南七月】

时秋积雨霁新凉入郊墟灯火稍可亲简编可卷舒 【韩文公】

递啸取遥风微微近秋朔金柔气尚低火老候愈浊 【韩联句】

急雨收残暑西风吹暮蝉烟浮水空阔露洗月华圆 【张芸叟】

打荷看急雨吞月任行云夜半蚊雷起西风为解纷 【山谷】

寂寂官槐雨乍晴高枝斜带夕阳明临风忽起悲秋思独听新蝉第一声 【寇准新蝉】

银独秋光冷画屏轻罗小扇扑流萤天街夜色凉如水卧看牵牛织女星 【杜牧秋夕】

万事悠悠心自知强颜于世转参差移床独卧秋风里静看蜘蛛结网丝 【王安石省中】

洛阳城里见秋风欲作家书意万重复恐匆匆说不尽行人临发又开封 【张籍秋思】

五千里外三年客十二峰前一望秋无限别魂招不得夕阳西下水东流
【崔涂巫山七月于别】

绕树无依月正高邳城新泪溅云袍几年始得逢秋闰两度填河莫告劳
【蒋冽闰七月题乌鹄】

芦花两岸风萧瑟渺渺烟波浸秋日鸥鹭家深不见人小艇忽自花中出 【王十朋莲花】

旦暮已凄凉离人远思忙夏衣临晓薄秋影入檐长前事风随扇归心燕在梁殷勤寄牛女河
汉正相望 【元稹】

残暑已束装好风方来归未能（?束）团扇且复制秋衣高蝉遽如许长吟送落晖相戒趣女
功莎虫能表微 【杜甫】

新裂齐纨素皎洁如霜雪裁成合欢扇团团似秋月出入君怀袖动摇微风发常恐秋节至凉
飙夺炎热弃捐篋笥中恩情中道绝 【颜延年班婕妤扇诗】

星依云渚冷露滴盘中圆好花生木末衰黄愁空园夜天如玉砌池叶极青钱仅厌舞衫薄稍
知花簟寒晓风何拂拂北斗光阑干 【李贺】

立秋

立秋木死水殁火休金相

大暑后十五日斗指坤为立秋秋者擎也物于此而擎敛也 【孝经纬】

律中夷则 【孟秋气至则夷则之律应月令】

斗柄西指而天下皆秋 【鹖冠子】

一叶落天下知秋 【淮南子】

壮志悲秋感阴气也 【韩子】

坤西南也主立秋 【易说】

磬立秋之乐也 【磬者夷则之气象万物之成五经要义】

西方以立秋谓白精之帝而少昊蓐收食焉 【月令】

浊阴云出如赤缙

立秋白露下 【以上易通卦验】

立秋西方闾阖风至 【一名飏风出符瑞图】

列子遇风常以立春归乎八荒立秋游乎风穴是风至草木皆生否则摇落谓之离合风
【陆机要览】

蟋蟀吟于始秋 【后襄楷书】

立秋促织鸣女工急促之 【春秋考异邮】

立秋腐草为萤 【易通卦验】

瑶光星散为鹰立秋之日鹰鸇击 【春秋元命苞】

立秋日午时（上?下立）竿影得四尺五寸二分半五谷熟立秋后四十五日内土气在坤不得修造动土及远行出军土凶 【月令占候图】

立秋凉风至报土功祀四乡 【易通卦验】

立秋日凉风至王者报地德礼西郊 【白虎通】

先立秋祀黄帝迎气西郊乐奏黄锺歌西颢舞云翘 【后汉书】

春官宗伯以白琥礼西方 【立秋为白精之帝故曰琥以象秋气之严肃周礼】

獬以立秋日祭兽王者亦以此日猎兽祭宗庙
【按尔雅獬似狸或曰虎五指为獬柳子曰獬畏虎虎畏黑出汉书】

立秋日习战阵之仪名曰獬刘 【后礼仪志】

天子居总章左个乘戎辂驾白辂载白旗衣白衣服白玉食稻与鱼其器廉以深太史以立秋三日谒于天子曰某日立秋盛德在金天子乃斋立秋之日天子亲率诸侯大夫迎秋于西郊还乃赏军师武人于朝乃命将帅简练俊杰专任有功以正不义诘诛暴慢以明好恶顺彼远方 【礼】

立秋日自郊礼毕始扬威武斩牲于东门荐陵庙其仪乘舆御戎车白马朱鬣躬执弩射牲牲荐鹿麋謁者各一人载以获车驰送陵庙还宫遣赍束帛赐武官武官肄兵习战之仪斩牲之礼名曰獮刘兵官皆肄孙吴之兵法六十四阵 【晋书】

立秋日夜漏未尽五刻京都百官皆衣白迎气于西郊 【续汉书】

汉家授御史多于立秋日盖以风霜已严鹰隼初击 【裴德容本传】

孙宝为京兆尹请侯文为掾进见如宾礼数月以立秋日署文东部郡且曰今日鹰隼始击当顺天地取奸恶以成严霜之诛掾部诎有其人乎文曰无其我不敢受职宝曰谁也文曰霸陵杜稚季宝问其次文曰豺狼横道不宜复问狐狸 【孙宝字子严汉书】

京师立秋满街卖楸叶妇女儿童皆剪成花样戴之形制不一 【梦华录】

立秋日人未起汲井水长幼饮之却病 【常氏日录】

立秋日勿沐令皮肤粗燥 【延寿参赞书亦出摄生论】

嵩山之上玉女捣帛石莹彻光洁人莫能测岳下人云立秋前一日中夜常闻杵声响 【五代秦再思纪异】

立秋日五岳诸真人诸黄老君于黄房雨?丘庭山会仙官于日中定天下祀图灵乐 【登真隐诀】

诗

兹辰戒流火商飊早已惊云天收夏色木叶动秋声 【刘言史】

独行独语曲江头回马迟迟上乐游萧飒凉风与衰鬓谁教计会一时秋 【白居易立秋日登乐游园】

风入泥阳池馆秋片云孤鹤两难留明朝独向青山廓惟有蝉声催白头 【武元衡立秋华原南馆别二客】

日月不相饶节叙昨夜隔玄蟬无停号秋燕已如客平生独往愿惆怅年半百罢官亦由人何事拘形役 【工部弃官去客秦州作是时立秋后一日】

百重堆案掣身闲一叶秋声对榻眠床下雪霜侵户月枕中琴筑落阶泉崎岖世味尝应遍寂寞山栖老渐便惟有悯农心尚在起（日詹）云汉更茫然

【东坡立秋日祷雨宿灵隐寺同周徐二令】

山云行绝塞大火复西流飞雨动华屋萧萧梁栋秋穷途愧知己暮齿借前筹已费清晨谒那成长者谋解衣开北户高枕对南楼树湿风凉进江喧水气浮礼宽心有适节爽病微瘳主将归调鼎吾还访旧丘 【工部立秋日雨成都幕中作】

楼岷倚长霄登攀及霁朝高如石门顶胜拟赤城标天路云虹近人口气象遥山清伯禹庙江落伍胥潮徂暑迎秋薄凉风是日飘果林余苦李萍水覆甘蕉览古嗟夷漫陵空爱寂寥更闻金刹下锤梵晚萧萧 【逊逊立秋日题安昌寺北山亭】

律变新秋至萧条自此初花酣莲报谢叶在柳成疏淡日非云映清风似雨余卷帷凉暗度迎扇暑先除草尽多翻燕波澄乍露鱼今朝散骑省作赋兴何如 【司空曙立秋作】

处暑

立秋后十五日斗指申为处暑言渎暑将退伏而潜处也 【孝经纬】

处暑赤云出 【易通卦验】

处暑日鹰乃祭鸟 【后五日天地始肃后五日禾乃登修宫室坏垣墙】

处暑后筑场圃登谷天子尝新先荐寝庙 【以上月令】

七月〔二〕

一日

宋苍梧王是夜荧惑太白辰星合于翼 【元徽七年占曰改立王公出南齐书】

唐太宗是日黄气竟天大雨谷水溢 【贞观十一年通考】

后晋开运元年是夜大雷雨明德门内井亭有石槽槽有龙首其夕漂行数步而龙首断焉 【识者云石国姓也龙首既断大不吉之象晋祚果终于开运出通考】

武后封嵩岳为神岳大中王 【垂拱四年事物纪原】

宋真宗是日谓辅臣曰朕梦神人降传玉皇之命云先令汝祖赵某授汝天书即日于延恩殿设道场先闻异香顷之黄光满殿蔽灯烛睹仙仪卫天尊至曰吾人皇九人中一人也是赵之始祖皇帝善为抚育苍生无怠前志即离坐乘云而去 【祥符五年出宋史礼志】

高宗以是日东宫诞育满月大赦天下 【龙朔二年出旧唐书】

宋真宗以是日圣祖降为先天节 【宋史亦出事文类聚】

文文山是日赐小录 【五月赐状元及第六月赐钱赐宴七修类稿】

张蕃国王于公衡会诸蕃饮宴动蕃乐 【正月一日亦然通考】

太上老君登太极朝元始 【道经】

诗

高栋层轩已自凉
秋风此日洒衣裳
修然欲下阴山雪
不去非无汉署香
绝壁过云开锦绣
疏枝隔水奏笙簧
看君宜着王乔履
贞赐还疑出尚方

宓子弹琴邑宰日
终军弃繻英妙时
承家节操尚不泯
为政风流今在兹
可怜宾客尽倾盖
何处老翁来赋诗
楚江巫峡半云雨
清簟疏帘看奕碁

【杜子美题终明府水楼二首大历元年七月一日夔州作】

元傲胡床酒半醒
钓筒收尽数舟横
风生细葛无三伏
月上疏林正四更
北斗离离低欲尽
明河脉脉去无声
升仙岂复尘中恋
便拟骑鲸返玉京

【宋人陆游字务观号放翁坐舍北水亭七月一日作】

凉飙呼不来流汗方被体
稀星乍明灭暗水光弥弥
香风过莲芡惊枕裂
鲂鲤欠伸宿酒余起
坐濯清泚火云势方壮
未受月露洗身微
欲安适坐待东方启

【东坡七月一日出城舟中苦热】

初秋尚苦暑归沐乃君恩
地闲少来客日宴犹闭门
家乏念藜藿开颜无一樽
况复辞貌拙敢随车马奔
盥濯何所事读书坐前轩
岂堪当世用空味古人言
颇喜市朝内独无尘土喧
终年但如此贞窃太官餐

【曾巩字子固七月一日休假作】

文书稍去眼日夕进微凉
高楼一徙倚清风为我长
渔父荫深樾归人度浮梁
仰看河汉明俯视群山苍
平生会心处于此故难忘
旧闻水东胜岩岵发天藏
岂无一日暇勇往聊徜徉
民瘼未渠补况敢怀乐康
天边云物佳似复为雨祥
秋成傥可期岁晚或自强
当从农家鼓一历水云乡

【张栻字敬夫号南轩七月一日晚登湘南楼作】

二日

东汉桓帝元嘉二年是日日有食之在翼四度史官不见广陵以闻占曰翼主倡乐时上好乐

过【阮藉乐论曰桓帝闻琴凄怆伤心倚展而悲慷慨长息曰善乎几为琴若此一而足矣出通考】

唐武宗会昌元年夜北方流星光明照地东北流星有声如雷【天文志】

宋徽宗是日诏神霄玉清府改营宫宇以迎神祝更赖辅弼大臣同寅协力以太师鲁国公蔡京少傅太宰郑居中少保少宰余深等并充神霄玉清万寿宫使知枢密院事邓洵中书侍郎白时中宣和殿大学士蔡攸等并兼充副使【政和八年合璧事类】

许攸与陈康是日同死【许攸梦乌衣吏奉添案案上有六封文书拜跪曰府君当为北斗明年七月复梦有一案四封文书云陈康为主簿觉后康至曰今来当谒攸闻而惧曰予梦为北斗梦君为主簿明年七月二日同死出幽明录】

三日

同昌公主生

【唐宣宗大中三年七月三日生至懿宗九年薨谥曰文懿主郭淑妃所生出旧唐书】

东坡是日杭州到任谢表云江山故国所至如归父老遗民与臣相问云云即日谒文宣王庙祝文曰昔自太史通守是邦今由禁林出使浙右【宋哲宗元佑四年七月三日表有父老遗民云云者以东坡去杭州十六年故有此语耳出长公外纪】

唐太子少保薛稷雍州长史李晋等是日家破身斩【薛稷李晋等外饰忠鯁内藏谄媚因附太平公主并迁要路自以为得志可保泰山之安七月三月家破身斩何异鸛鴒栖于葦荻大风忽起而巢折卵破出朝野□载】

有雾岁熟【望气经】

诗

云送关西雨风传渭北秋孤灯然客梦寒杵捣乡愁滩上思严子山中忆许由苍生今有望飞诏下林丘【唐人岑参七月三日宿关西客舍寄东山严许二山人】

今兹商用事余热亦已末衰年旅炎方生意从此活亭午减汗流北邻耐人聒晚风爽乌匿筋力苏摧折闭目踰十旬大江不止渴退藏恨雨师健步闻旱魃园蔬抱金石无以供采掇密云虽聚散徂暑终衰歇前圣脊焚巫武王亲救暍阴阳相主客时序递回斡洒落唯清秋昏霾一空阔萧萧紫塞鹰南向欲行列欵思红颜日霜露冻阶闑胡马挟雕弓鸣弦不虚发长鉞逐狡兔突羽当满月惆怅白头吟萧条游侠窟临轩望山阁缥缈安可越高人炼丹砂未念将朽骨少壮迹颇疏欢乐曾倏忽杖藜风尘际老丑难翦拂吾子得神仙本是池中物贱夫美一睡烦

促婴词笔 【杜子美七月三日亭午已后校热退晚加小凉稳睡作诗因论壮年乐事戏呈元二十一曹长】

四日

宋太宗封神为显圣王 【显圣王庙在宁州真宁县即要册湫也唐干符中封神为应圣王光化二年封普济王宋朝太宗在晋邸有神告之应太平兴国二年七月四日封显圣王出事物纪原】

董陵编宋徽宗御集手诏二册进赐帛 【高宗绍兴十六年七月四日进宋史】

宋文文山以是日拜黄甲叙同年 【七月一日赐小录四日叙同年出七修类稿】

邵雍字尧夫是日大书诗一章曰生于太平世死于太平世客问年几何六十有七岁俯仰天地间浩然独无愧以是夜五更捐馆 【雍河南人举遗逸试将作主簿后又以颖州团练推官辞疾不赴雍始学于百泉坚苦刻厉冬不炉夏不扇夜不就席者数年卫人贤之雍叹曰背人尚友千古而吾未尝及四方遽可已乎于是走吴适楚过齐鲁客梁晋久之而归曰道在是矣盖始有定居之意至熙宁十年有疾张载喜论命来问疾因曰先生论命否当推之雍曰若天命则已知之矣世俗所谓命则不知也载曰先生知天命矣载尚何言程颐曰先生至此他人无以为力愿自主张雍曰平生学道岂不知此然亦无可主张时居正寝诸公议后事于外有欲葬近洛城者先生已知呼子伯温入曰诸公欲以近城地葬我不可当从伊川先茔耳七月四日五更卒出史纂左编据安乐窝集雍七月十四卒】

丘处机谓门人曰吾归无遗恨 【处机号长春子闻太液之南岸崩裂水入东湖曰吾与之俱矣七月四日谓门人曰昔丹阳尝授记与予云吾没之后教门大兴四方化为道乡道院皆敕赐名额又当住持大宫观仍有使者佩符乘传干教门事此乃功成名遂归休之日也丹阳之言一一皆验吾归无恨矣出左编】

五日

宋宁宗即位 【绍圣五年七月五日出通考】

宋神宗崩是日请谥于南郊 【元丰八年宋史礼志】

宋太宗以吴鉉入史馆校定字书

【兴国八年吴鉉献复位切韵七月初五殿试日令入史馆出会要】

李纲自右仆射升左仆射黄潜善从门下侍郎为右仆射

【宋高宗建炎元年是月纲即出提举洞霄宫出宋学士集】

宋朝云卒于惠州【朝云以七月五日卒葬于西禅寺东坡铭其墓朝云始不识字晚忽学书尝从泗堂比丘尼义冲学佛卒之日诵金刚经四句偈而绝东坡又作诗挽之中有驻景恨无千岁药赠行惟有小乘禅之句出东坡集】

三会日宜修迎秋斋【法天生意】

诗

避谤诗寻医畏病酒入务萧条北窗下长日谁与度今年苦炎热草木困熏煮况我早衰人幽居气如缕秋来有佳兴秔稻已含露还复此微吟往和槽床注【酒入务谓绝酒不饮也杜诗赖知禾黍秋已觉槽床注】

何处觅新秋萧然北台上秋来未云几风日已清亮云间耸孤翠林表浮远涨新枣渐堪剥晚瓜犹可饷西风送落日万窍含凄怅念当急行乐白发不汝放【以上二首东坡七月五日作】

六日

是日雨谓之洗车雨【岁时杂记】

唐穆宗诏曰七月六日是朕载诞之辰其日百寮命妇宜于光顺门进名参贺朕于内内与百寮相见先是左丞韦绶奏行之宰臣以为古无降诞受贺之礼奏罢之次年是日复行贺礼【出洪迈随笔】

宋元徽五年是夜少帝微行至领军府帝左右人曰一府皆眠何不缘墙入【出南史】

宋太祖诏皇帝尹宰相枢密使翰林学士中书舍人泛舟后苑新池张乐宴饮极欢而罢【干德三年宋史礼志】

唐高祖诏用象笏竹木笏【唐会要曰笏周制也周礼诸侯笏大夫鱼须士以竹晋宋以来谓之平板西魏以后五品以上通用象牙高祖武德四年七月六日诏五品以上象笏六品以下竹木笏出事物纪原】

宰臣司马光请设十科以取士【哲宗元佑元年七月六日司马光请设十科一曰行义纯固可为师表二曰节操方正可备献纳三曰智勇过人可备将帅四曰公正聪明可备监司五曰经术精通可备读讲六曰学问该博可备顾问七曰文章典丽可备著述八曰善听讼狱尽公得实九曰善治财赋公私俱便十曰练习法令能断请献于十科内举三人宋史】

太平兴国年习俗以是日为嘉辰【宋太宗诏七夕嘉辰着于甲令今习俗多用六日非旧制

也宜复用七日且名为七夕而用六不知自何时以然唐时无此说必出于五代耳出容斋三笔】

京师人家左厢以是日乞巧 【右厢七日出岁时记】

陶弘景仙化门徒欲厚之忽然重起曰道士绝与俗殊胡为哀哭厚葬但建修斋功此乃合太古淳真之法也言讫而化 【陶弘景魏郡平阳人自号华阳隐居平生尝昼眠看书必至夜半喜闻松风之声七月六日仙化出太平经】

诗

缥缈炉烟上帝阁朝来一洗旱如焚垄头无复成龟兆水面初看起（索？）纹免使夏畦炊白玉未妨秋稼刈黄云使君悯雨心犹在化得邦人不茹荤
【曾茶山江南大旱七月六日临川得雨奉呈仲高侍御】

七月六日苦炎热对食暂餐还不能每从夜中自是蝎况乃秋后转多蝇束带发狂欲大叫簿书何急来相仍南望青松架短壑安得赤脚踏层冰 【杜工部】

七日

天河之西有星煌煌与参俱出谓之牵牛天河之东有星微微在氐之下谓之织女世谓双星
【焦林大斗记】

河鼓谓之牵牛 【尔雅】

乌鹊填河而渡织女 【淮南子】

是日雨曰洒泪雨 【岁时记】

汉武帝生于猗兰殿 【景帝坐崇芳阁上有丹霞起赤龙盘栋间使王夫人居之改崇芳阁为猗兰殿得幸有娠梦日入怀景帝亦梦高祖谓已曰王夫人得子可名为彘及生男因名焉是为武帝出冥冥记】

后魏武帝生于参合陂北 【太祖道武皇帝讳珪昭成皇帝之嫡孙献明帝之子也母曰献明贺皇后初因迁徙游于云梦寝梦日出室内寤而见光自牖属天欬然有感以建国三十四年七月七日生帝其夜复有光明昭成大悦群臣称庆出北史】

窦后少小头秃不为家人所齿人皆看织女独不许后出乃有神光照室为后之瑞
【后汉书】

玄宗与贵妃避暑骊山宫夜半凭肩相誓愿世世为夫妇 【天宝遗事】

戚夫人侍儿贾佩兰云在宫时见戚夫人侍高祖至七月七日临百子池作于阗乐毕以五色缕相羈谓为连爱 【西京杂记】

玄宗与妃子每至七夕夜在华清宫宴时宫女各以蜘蛛内之小金盒中至晓开视以为得巧之多少民间效焉 【开元遗事】

天宝宫中七夕玄宗以锦彩结成楼殿高百尺可容数人陈花果酒炙设坐具以祀牛女二星嫔妃各执九孔针五色线向月穿之过者为得巧动清商之曲宴乐达旦士民效之 【唐书】

汉武帝登寻真之台斋戒至七夕夜忽见天西南如白云起直来趣宫须臾闻云中萧鼓之声西王母至乘紫云之辇临发云气勃郁尽为香气

汉武帝扫除宫内张云锦之帷燃九薇之灯至二更西王母驾九色之斑龙上殿
【以上武帝内传】

汉武帝七夕于承华殿有鸟从西方来集殿前问东方朔朔曰此西王母欲来有顷王母至有二青鸟夹侍王母旁 【武帝故事】

西王母七夕降汉武帝阙庭东方朔于朱雀窗中窥王母时王母以桃七枚献帝帝欲留核种之王母笑曰此桃千年生花千年结实指方朔曰此儿三偷桃矣 【汉书内传】

七夕西王母为帝设玉门之枣 【天中记】

武阳城有仙道者谓其弟曰织女当渡河诸仙悉还宫弟问曰何事渡河答曰织女暂诣牵牛世人至今谓织女嫁牵牛 【续齐谐记】

王子乔见桓良曰告我家七月七日待我于缑氏山头至时果乘白鹤于山头望之不得举手谢时人而去

陶安公者六安铸冶师也一朝火散上紫色冲天安公伏冶下求哀须臾朱雀止治下曰安公安公冶与天通七月七日迎汝以赤龙至时安公骑赤龙东南去

吴蔡经去家时已老及还更少壮须发皆黑语家中曰七月七日王方平当来可作数百斛饮待之至日方平果来乘羽车驾五龙闻金鼓萧管人马之声 【以上列仙传】

周灵王太子晋七月七日乘白鹤驻山巅谢时人而去后世称太子之驾曰鹤驾禁曰鹤禁
【山堂肆考】

洞宾书诗于纸【元丰中吕惠卿守单州天庆观七月七日有异人过焉书诗于纸一曰四海孤游一野人两壶霜雪是精神坎离二物君收得龙虎丹行运水银一曰野人本是天台客石桥南畔有旧宅父子生来有两口多好生歌不好拍惠卿婿余中解之曰后篇第一句宾字也第二句石桥者洞也第三句两口者吕也第四句者吟也吟此诗者其洞宾乎出道书】

唐开元中有李氏为尼号曰真如天宝七年七月七日忽见五色云坠地一囊中有五物乃宝玉也至肃宗元年真如为神人召往化城见帝授以八宝俾献于朝真如乃并前五物皆献之【唐宝记】

太原郭翰少有清标乘月卧庭中视空中有人冉冉而下乃一少女明艳绝代曰吾天之织女也上帝命游人间愿乞神契乃升堂同枕至晓辞去后夜复来翰戏之曰牵牛郎何在乃敢独行对曰阴阳变化关渠何事至七夕忽不来数夜方至翰问曰相见乐乎笑曰天上那比人间问曰此来何迟曰人中五日彼一夕耳忽一夜凄怆流涕曰帝命有期便当永诀以七宝枕留别而去【墨庄兄录】

郭子仪至银州七夕见左右皆赤光仰视天上辎车绣幄中有美女自天而下子仪祝曰必是织女降临愿赐长寿富贵后立功贵盛年九十余薨【子仪传】

有女子尚幼七夕见家人出庭望候天门开独在室中不出曰若合当见者虽暗室中亦应见之至夜深忽见天上门开云气赤奕因求富及长嫁而富就寡家累巨万有贾客货其绢百疋去而船覆溺绢皆没其女子偶开后房见绢在其中但湿耳贾客归女子曰绢归矣验之而信【杂异书亦出夷坚录】

僧宗本题邑治之壁曰东烧西烧日月七七后数日江西盗李仁入境焚其邑七月七日也【绍兴二年五行志】

师旷所铸镜皆有二十六字科蚪书曰维晋新公二年七月七日午时于首阳山前白龙潭铸成此镜千年后出于背上环书一字管天文一宿依方列之则左有日右有月龟龙虎雀各依方安焉于鼻下题曰夷则之镜【天宝陈仲躬得之井中后仲躬交战累胜为大官白孔六帖】

李员居长安延寿里忽闻室之西南有歌其音清越志其歌词白色分蓝叶清声比磬中鸣七月七日吾当示汝之形【后雨甚溃其堂之北垣又闻其声果前闻者员惊视之于垣下得一金径尺余制用金咸形状奇古有文视不可见叩之其韵极长即命涤去尘藓历然可读字若小篆乃崔子玉座右铭白孔六帖】

唐德宗斩伪官乔林将临刑书曰林以七月七日生亦以七月七日死岂非命也【国史补】

陆士龙云魏武帝刘婕妤以七月七日折琉璃笔管此其时也【天中记】

太液池西有汉武帝曝衣楼是日宫女出后衣曝之 【汉书内传】

俗以是日曝衣诸阮庭中烂然终锦籍兄子咸时总角乃竖长竿标大布犊鼻褌于庭中曰未能免俗聊尔耳 【竹林七贤传】

郝隆曝腹于庭中人问之曰我曝腹中书 【六帖】

晒曝革裘无虫 【韦氏月录】

卢照邻是日绵州泛舟其诗序曰诸公迹寓市朝心游江海访奇交于千里惜良辰于寸阴常恐辜负琴书荒凉山水于是脱屣人事鸣棹川隅言追挂犊之才用卜牵牛之赏边生经笥送炎气以濯缨郝氏书囊临秋光而曝背似遇缙山之客还疑星汉之游云云 【载蜀志】

晋潘尼字正叔是日侍皇太子宴玄圃园作诗商风初授辰火微流朱明送夏少昊迎秋云云 【潘尼潘岳其从父也东宫之比曰玄圃园山堂肆考】

俗以蜡作婴儿浮水中以为戏为妇人生子之祥谓之化生唐人诗曰水拍银盘弄化生 【岁时纪事】

中尚署进七孔金钿针 【百官志】

汉彩女穿针于开襟楼 【西京杂记】

齐武帝起层城观宫人多登之穿针谓之穿针楼 【舆地志】

织染署祭杼 【唐百官志】

膳部有节日食料 【唐六典注谓七月七日斫饼】

洛阳人家乞巧造明星酒装同心缯 【金门岁节记】

京师旧俗以菉豆小豆小麦贮磁器内以水浸之生芽数寸以红蓝丝缕束之谓之种生于街心彩幙张设货卖 【山堂肆考】

取小赤豆男吞一七女吞二七毕岁无病

取乌鸡血和三月三日桃花末涂面及便身二三日肌白如玉此太平公主法 【以上韦氏月录】

七日为庆生中会地官三宫九府四十二曹同会天水二官六宫十八府七十八曹同考罪福
【道经亦出山堂肆考】

诗

岂意灵仙偶相忘亦弥年夕衣清露湿晨驾秋风前 【韦应物七夕诗】

仙车驻七襄凤驾出天潢月映九微火风吹百和香 【何逊九微灯名】

耿耿晓河微神仙此会稀今年七月闰应得两回归 【王湾闰七月七日】

亭亭新妆立龙驾具层空世人亦为尔祈请走儿童 【牵牛诗】

闻道寻源使从天北路回牵牛去几许宛马至今来

牵牛出河西织女处其东万古一相望七夕谁见同 【以上杜诗】

年年七夕渡瑶轩谁道秋期有泪痕自是人间一周岁何妨天上只黄昏 【崔涂】

今日云骈渡鹊桥应非脉脉与迢迢家人竞喜开妆镜月下穿针拜九霄 【权德舆】

月帐星河次第开两情惟恐曙光催世人不用穿针待没得心情送巧来 【罗隐】

玉殿凭肩共语时风清月坠有谁知梧桐秋雨三山远始信生前有别离

灵疋三秋会仙期七夕过槎来人泛海桥渡鹊填河帝綏升银阁天机罢玉梭谁言七襄咏重
入五弦歌 【李峤奉和七夕两仪殿会宴应制】

白露含明月青云断绛河天街七襄转阁道二神过袿服锵环佩香筵拂绮罗年年今夜尽机
杼别情多 【杜审言】

移家避寇逐行舟厌见南徐江水流吴地征徭非旧日秣陵凋敝不宜秋千家闭户无砧杵七
夕何人望斗牛祗有同时驄马客偏题尺牋问穷愁
【李嘉佑七夕京口孤泊章侍御寄书相问因以赠之】

秋动清风扇火移炎气歇广檐含夜阴高轩通夕月安步巡芳林倾望极云阙组幕萦汉陈龙
驾凌霄发沉情未申写飞光已飘忽相对眇难期今欢自兹没 【刘铄】

素秋二七天汉指隅口暮宴罢车骑就衢盖如飞鹤马如游鱼 【刘禕】

八日

宋真宗曰朕行有三一监前代成败二进善人二斥群小欲史氏不能书吾恶
【景德十六年玉海】

宋度宗崩 【度宗七月八日崩时选举殿试之期竟不毕试嗣君即位出宋史】

吴王李煜太平兴国三年是日薨皇上抚几兴悼赠太师追封吴王
【皇上辍朝三日出李煜墓志铭】

王居安少时刘孝黻是日过其家塾见居安异凡儿使赋七夕诗援笔成之有思致孝黻惊拊其背曰子异日名位过我 【居安少读孝经有从旁指曰晓此乎即荅曰夫子教人孝耳宋孝宗淳熙十四年举进士授徽州推官后居安以书生于兵事不学而能有论居安者曰扫除群邪以匡王国其志壮哉居安字资道黄岩人出宋史列传】

诏再修土雄记 【钱塘沈振蓄一琴名冰清腹有晋陵子铭云卓哉斯器乐惟至正音清韵高月苦风劲巢余神爽泛绝机静雪夜敲冰霜天击磬阴阳潜感石臧前镜人其审之岂独知政大历三年三月三日上底蜀郡奉诏书贞元十一年七月八日再修土雄记或以谓晋陵子杜牧道号篆法类义山不知土雄何人也出国史补】

桂阳城武丁有仙道是日失武所在 【武丁忽谓其弟曰七月七夕织女渡河诸仙悉还宫吾向已被召不得停与尔别矣弟问织女何事兄何日当还□曰织女暂诣牵牛吾去后三千年当还耳初八日失武所在出绩齐谐事】

商人李环戴政俱沉于江 【王植新赣人也与朱寿乘舟过袁江时日暮远眺谓寿曰此是楚昭王获萍实之处仲尼言童谣之应也寿曰识者以童谣为偶然而圣人必知之言讫见岸上青衣执芦荻谓植曰卿从何处来植曰自赣至青衣又谓寿曰仲尼不语怪力乱神何也寿曰夫子圣人也不语怪神者恐以乱教青衣曰善又曰子信怪神乎寿曰吾信之青衣曰我非鬼神又非人类又谓植曰明日有李环戴政俱是商人以利剥民上帝恶之欲沉于江植寿异之乃牵舟上流遇一贾舟问以姓名如其言寿谓植曰上帝恶不善事已定矣时晋恭帝元熙元年七月八日也二商一时俱沉溺谭者谓此处有青蛟往往见于波中所见青衣者恐蛟有灵奉上帝之命也出九江记】

九日

晋祖遣中使谓侯益曰朕思卿前年七月九日大立战功故复以七月九日徙卿镇彭门领相印赐门戟 【侯益汾州平遥人祖父以农为业晋祖召益谓曰宗社危若缀旒卿能为朕死耶益曰愿□锐卒五千人破贼必矣后益率禁兵数千人次虎牢从宾军万余人夹汜水而阵七月九日大败其众击杀殆尽晋祖追念虎牢之功乃遣中使云云出宋史列传】

司业李元瓘是日言礼记文少人皆竞读周礼仪礼公谷四经殆绝请习四经者许其入策选举【唐玄宗开元□年玉海】

宋庠上纪年通谱【宋仁宗庆历六年七月九日庠上通谱取十七代正史并百家杂说凡正伪年号成一书诏送史馆出会要】

金陵杜元卒【杜元苦学有材气能为诗元至元中张文穆公欲以茂才异等荐杜元不就事二亲啧啧有声及兵乱士卒相戒不忍犯焉元至正年卒字一元出宋学士集】

丘处机登宝玄堂留颂曰生死朝昏事一般幻泡出没水长闲微光见处跳乌兔玄量闲时纳海山挥斥八紘如咫尺吹嘘万有似机关狂辞落笔成尘垢寄在时人妄听间书毕而逝【处机字通密号长春子一日雷雨大作人报云太液之南岸崩裂水入东湖声闻数十里鼃鼃鱼鳖尽去池遂枯涸北口山亦摧师初无言良久笑曰山摧地枯吾将与之俱乎九日登宝玄堂留颂而逝出史纂左编】

诗

人间秋光七月九万里新凉到槐柳【事文类聚】

十日

刘玄德是日致书于马超曰令尊翁忠义闻于四海今被操之所害为子之道安忍坐视若能率西凉之兵以敌曹之势备当举荆襄之众则逆曹可擒奸党可灭讎辱可报汉室可兴【建安十六年七月十日出三国志】

宋真宗幸魏咸信第视疾【天禧元年宋史】

独孤君葬【独孤君讳申叔字子重年二十二举进七又二年用博学宏词为校书郎又三年居父丧未练而没盖贞元十八年四月五日也是年七月十日葬此事四月五日亦载合璧事类】

行开元通宝钱【开元通宝钱绌工有文如初月者谭宾录曰武德初行开元通宝钱初进样日文德皇后搯一甲因不复改唐要曰武德四年七月十日行开元通宝钱】

汉武帝是日扫除宫掖设座大殿以紫罗荐地燔百和香燃九微灯以待王母【出山堂肆考据武帝内传事在七日】

十一日

真宗诏近臣及寇准及冯拯观内苑谷遂宴于玉宸殿【景德四年宋史礼志】

郑承规因碧落碑字之难辩楷书之【绛州兴龙宫有碧落石像皆刻其篆文世传为碧落碑洛中纪异乃云有二道士闭户三日不闻人声人怪而破户惟见二白鸽飞去刻篆宛然学占编辩为李阳冰之书盖唐人能篆者无出阳冰之右读其字难识郑承规于咸通十一年七月十一日因其字之难辩复楷书焉出七修类稿】

印肃禅师沐浴书偈于方丈之西壁云乍雨乍晴宝像明东西南北乱云深失珠无限人遭劫幼应权机为汝清书毕跏趺而逝【师末生时邻夜有望其室者祥光烛天远近相愕已而莲生道周或现阡陌众愈异之及师生五相丰润即善世言至干道五年七月十一日跏趺而逝号普庵出楚通志】

玉帝遣使降石坛上以符一道捻如药丸使女仙谢自然服之【贞元十年集仙录】

诗

行看野气来方勇卧听秋声落竟怪淅沥未生罗豆水苍忙空失皖公山火耕又见无遗种肉食何妨有厚颜巫祝万端曾不救只疑天赐雨工闲【王荆公舒州七月十一日雨】

介虫之长寔曰灵龟明阴阳以应化察利害以俟时于穆我皇德无不被春国洋溢神物来萃虽五灵其必臻懿双龟以时瑞陋众水而不处选天池以自寄金甲炫晃带璧日以流光绿毛丰茸度熏风而含吹不喋喋于苹藻恣东西于荷芰云云

【秋七月十一日龟雄雌各一游于内池甲耀金毛帝出示百官周存作赋】

十二日

永元元年大风京师十围树及官府居民屋皆拔倒【南齐书】

唐玄宗是日次普安郡与房管语甚悦即以管拜为吏部尚书同中书门下平章事【天宝十五载玉海】

吴直方薨【字行可生于宋恭宗德佑己亥年以集贤大学士致仕读书不屑屑章句于鲁论言忠信及事君致身语尤有深契生平不信堪輿遗言随地而葬又以无大功业不必乞铭于人乃自序历官世第而系之以辞曰余生虽艰非有所觊漫游京华旅食三纪际时休明偶膺禄仕位跻极品恩封三世儒者之荣于斯为至报上一诚如水东注树碑自铭以诏来裔人以为实录云至正年七月十二卒宋学士集】

老君乘白舆驾青牛至函关关吏入白【尹喜】喜曰今我得见圣人矣即具朝服出迎跪伏叩头邀之曰愿丈人暂留神驾老君谢曰吾贫贱老弱居在关东田在关西今暂往取薪何故

见留喜复稽首曰丈人岂是取薪久知大圣人当来西游愿少憩神驾 【史纂左编】

刘处玄生是夜有紫气二道从大基山横贯其家 【处玄母王氏夜梦白衣翁呼出西南指之有玉树四枝枝各有一金叶令取其一曰他日必生异人意将取之其叶自坠于手视之则金蝉飞起而复投于口中遂有娠明年七月十二日生后得道羽化元至元六年赠长生辅化明德真人出史纂左编】

岳神上天曰 【赵郡李湜以开元中谒华岳庙遇三夫人邀入宝帐中三夫人迭与结欢欢罢而别谓湜曰每年七月十二日岳神上天此后至期相迎勿辞今日相见亦是其时故得□欢耳明年七月十二日湜复遇三夫人叙离异则泪出论新欢则情□又盟以后会之期自是湜形体日瘦见一术者曰君有邪气为书一符邪不得近后三夫人骂曰酷无行何以带符为非独损我亦当损君如其言出广异记】

诗

桂含爽气三秋首
萸吐中旬三叶新
正是澄江如练处
玄晖应喜见诗人
【李商隐七月十二日夜寄池州李使君】

十三日

唐肃宗即皇帝位 【玄宗□蜀有诏以肃宗嗣皇帝位肃宗奉诏歔歔哀不自胜至七月十三日即皇帝位出考异】

唐德宗驾还长安 【德宗兴元元年七月十三日还长安使孔巢父诏赦李怀光怀光素服待罪怀光左右多胡人皆曰太尉怀光无官矣巢父又宣言于众曰军中谁可代太尉领军者于是怀光左右发怒譁噪诏未毕众杀巢父出邠志】

吐蕃不意唐兵猝至大惊 【高仙芝为行营节度使将万骑讨吐蕃以七月十三日会连云堡下吐蕃不意唐兵猝至大惊依山拒战炮檣如雨出左编】

东坡是日疾少间曰今日喜近笔砚 【建中靖国元年东坡是年六月自仪真避疾渡江曰吾与子由不复见而诀甚痛至七月十三日疾少间曰今日喜近笔砚试为钱济明戏书数纸遂书惠州江月五诗是月终年六十六出长公外纪】

晋赵泰为祖父二弟延请僧众大设福会 【赵泰字文和举孝廉不就忽卒泰见城邑崔嵬与男女数千人并进见狱中祖父及二弟号□主者开藤篋检年纪尚有余筭乃遣泰还泰复生乃为祖父二弟设福会时晋太始五年七月十三日也出冥祥记】

王真人升仙 【王灵舆翰墨大全】

诗

夜梦嬉游童子如父师检责惊走书计功当毕春秋余今乃始及柏庄初怛然悸寤心不舒起坐有如挂钩鱼我生纷纷婴百缘气固多习独此偏弃书事君四十年仕不愿留书绕缠自视汝与丘孰贤易韦三绝丘犹然如我当以犀革编 【东坡在儋耳七月十三日夜梦后作东坡以嘉佑二年中第至绍圣四年贬儋耳时年四十走字当如前汉书音奏盖趁之之义也退之诗有如鱼挂钩习气字出佛书】

十四日

广州地震有声 【庆历四年七月十四日宋史】

宋仁宗以是日作镇国神宝先是帝谓大臣曰奉宸库有良玉广尺而厚半之希世之珍也 【皇佑五年】

宋神宗是日诏自安南用兵献议讨贼者以百数其言水陆进师之道往往不同未知孰得宜命检详官王伯虎梁燾编类众说成书各绘图附见以备他日之用 【元丰元年以上玉海】

秋楔 【楔水上祓除也然有春楔秋楔论语浴乎沂注上巳祓除王右军兰亭暮春修楔此春楔也刘祜鲁都赋曰素秋二七天汉指隅人胥祓禳国子水嬉此用七月十四日指秋楔也丹铅摘录】

寇莱公生诗日向时生上相明日是中元 【事文类聚】

元君与侍女群真二十七人降于薛玄同之室玄同迎拜于门元君憩坐良久示以黄庭存修之旨赐丹一粒使八年后吞之当遣玉女飚车迎汝于嵩岳言讫散去 【薛氏者河中少尹冯微妻也自号玄同适冯微乃称疾独处日诵黄庭经二三遍忽有青衣玉女二人降其室光如月照香风四集二人告曰紫虚元君主领南方下校文籍命诸真仙于六合内有志道者拔之唐懿宗咸通十五年七月十四日元君降玄同室与丹一粒许遣玉女飚车相迎及黄巢犯关冯微与玄同同寓晋陵中和元年舟至渚口忽见河滨有朱紫官吏若迎侯状舟人见而惊之玄同曰无惧即移舟就之官吏皆拜后玄同沐浴饲所赐之丹称疾而去开棺惟有空衣而已集仙录】

诗

不复微云滓太清浩然风露欲三更开帘一寄平生快万顷空江着月明
【陆游七月十四夜月】

高阁在清禁长轩凭广虚御帷闕图象依然临幸余翠壁布天路黄帘分直庐一雨清景早稍

凉秋兴初解带就君坐临床窥素书山海所错出飞潜类纷如此语果虚实遗编空卷舒自笑
正豕亥更微注虫鱼君材合远用就此固已疏如我乃斯幸地间容误居竹影散良席花香浮
广裾俯仰自足适归时更当徐

【曾巩字子固号南丰七月十四日韩持国直庐同观山海经作】

十五日

七月中气日在张 【六帖】

日月会于鹑尾而斗建申之辰招摇指申 【出淮南子载纂记渊海】

七月中元乃大庆之月 【修行记】

壬戌之秋七月既望苏子与客泛舟游于赤壁之下 【东坡赋】

孟秋之望 【十五日也六帖】

中元节京城张灯 【开宝四年天中记】

元日非供祠不采鱼 【唐史百官志】

明皇在便殿甚思姚元崇是日苦雨不止泥泞盈尺上令侍制者抬步辇召学士时元崇为翰林
长中外荣之自古急贤待士未有如此 【白孔六帖】

金承辽俗于是日行拜天礼毕则射柳于球场 【华中以端午日走马为躡柳躡音札宋徽宗
政和四年金主拜天射柳此承辽俗五月五日九月九日亦然出山堂肆考】

石国是日以王父母烧余之骨金瓮盛之置于床上巡绕而行散以香花朵果王率臣下设祭
焉礼终王与夫人出就别帐臣下以次列坐而飧宴 【正月六日亦然石国隋时与中国通居
于药杀水都柘折城方千余里本汉大宛北鄙之地出四裔考】

中尚署七月十五日进盂兰盆 【唐六典】

宫中是日造盂兰盆缀饰鏤排设高祖以下七圣位幡节衣冠皆具各以帝号识其幡
【王缙传】

目连以母生饿鬼中佛令作盂兰盆是日以百味五果盆中供养十方大德而母得食后世因
之席为华饰 【白孔六帖】

中元之日地官校勾搜选人间分别善恶诸大圣众普诣宫中简定劫数人鬼传录饿鬼囚徒一时皆集以其日作玄都大醮玉京山采诸花果珍奇异物幢幡宝盖清膳饮食献诸圣众道士于其日夜讲诵是经十方大圣齐咏灵篇囚徒饿鬼俱饱满免于众苦得还人中 【道经】

太上者君同元始天尊会集福世界 【道藏经亦出山堂肆考】

边洞玄女仙上升 【事文类聚】

清虚真人是夜与许玉斧言曰五公石腴急宜服之可以延年 【真诰】

苏耽真人生 【苏耽文帝朝桂阳郡人也母潘氏尝于江边澣水有五色苔浮于水扬而去复来绕足者三乃取吞之既而有孕诞真人时惠帝五年七月十五日人异之母乃致之居后牛脾山石洞中七日往视则有白鹤覆之白鹿乳焉复取归既长欲立姓名母曰适有担禾者至以草贯鱼遂名姓苏名耽事母以孝闻耽每持一竹杖一日忽扫庭除若有所待母问其故曰僊侣当降顷之紫气氤氲有十鹤集其庭与耽语密如故出门群鹤随之迤邐升天而异香天乐弥日不散二月二十八五月十五亦载柳场仙传】

道通禅师无疾而终 【道通禅师唐州紫玉山僧诣建阳谒马祖祖寻僊龚公山师亦随之祖将归寂谓师曰夫王石润山秀丽益汝道业遇可居之师不晓其言是秋游洛回至唐州西见一山四面悬绝峰峦秀异因询乡人曰紫玉山师乃陟山顶见石方正莹然紫色叹曰此其紫玉也先师之言悬记耳遂剪茅□屋而居焉后学徒四集有问如何出得三界去师曰汝在里许得多少时也曰如何出离师口青山不碍白云飞元和八年七月十五日无疾而终出楚通志】

河中凤林关有灵岩寺每是日溪穴流圣柰出大如盏 【洽闻记】

王绩是日匣中宝镜悲鸣其声纤远俄而渐大若龙吟虎吼良久乃定绩开匣视之即失镜矣 【大业十三年绩先梦宝镜语曰我素蒙乡兄厚待今当去人间欲得一别请乡兄早归长安绩梦中许之觉而归秦至七月十五日宝镜匣中悲鸣遂去异闻集】

元和中内侍刘希昂是日忽见一白衣女人独行曰家远暂借后院希昂许之入院不见惟有一火柴头在厕门前举家相谓曰此火灾也 【希昂有家人上厕中忽闻厕中云即来且从□家八惊报希昂希昂自往听之又云即出来即出来何不出来忽有一小人长尺余一家惊走至七月十五日忽有一白衣女人借后院希昂许之顷有火柴头在厕希昂觅术士镇压之当镇压时火从厨发至冬希昂忤宪宗族□出博异志】

诗

偶来人世值中元不献玄都永日闲寂寂焚香在仙观知师遥礼玉京山

【令狐楚中元日赠张尊师】

灯前飞入玉阶虫未卧先闻半夜钟看即中元斋日到白盘金线绣真容 【王建宫词】

宫濠水落两三痕正是秋初雨后天菱苕中间开一路晓来谁过采菱船

【杨廷秀七月十五观菱濠】

野迴云归尽山高月上迟暗萤依露草惊鹊遶风枝素影随波远新凉与酒宜中秋更有味试为卜归期 【宋人曾极字景建七月十五日夜显仁寺东轩对月】

邪气奔屯瑞气移清平过尽到艰危纵饶犬彘迷常理不奈豺狼幸此时九庙有灵思李令三川悲忆恨张仪不怜一曲还京乐重对红蕉教蜀儿

【罗隐中元甲子以辛丑驾幸蜀作载蜀志】

玄都开秘篆白石礼先生上界秋光净中元夜景清星辰朝帝处鸾鹤步虚声玉树花难老珠宫月最明扫坛天地肃投简鬼神惊傥赐刀圭药还留不死名

【殷尧藩中元看诸道士步虚】

妙道本非说殊途或异名圣人得其要俱以化群生凤吹从上苑龙宫连直城花鬘列广殿云盖驻前庭松竹含新韵轩窗有余清缅怀崆峒事须断管弦声离相境都寂忘言理更精域中信称大天下乃为轻屈已由济物尧心岂所荣 【崔元翰七月十五日奉和圣制题章敬寺】

徂暑尚繁郁大火空西流兹辰喜佳节凉雨忽惊秋晚晚兰径滋萧萧庭树幽炎气一吹去恢台逝不留刀笔随事屏尘嚣与心休端居讽道言焚香味真馥子亦玩文史及此同优游

【朱公文七月十五两中呈子晋】

十六日

唐高祖诏五品以上执象笏六品以下执竹木笏 【武德四年王海】

宋哲宗即位诏以太皇太后是日生为坤成节 【宋史】

谢灵运出为永嘉守是日之郡 【高祖永初三年五月崩少帝即位出□运守永嘉少帝犹未改元故云永初灵运七月十六日之郡初发都作诗一首诗曰述职期阑暑理棹变金素秋岸澄夕阴火旻团朝露辛苦谁为情游子值颓暮爱似庄念昔久敬曾存故如何怀土心持此谢远度李牧愧长袖却克惭躑步良将不见遗□状不成恶曰余亦支离依方早有慕生幸休明世亲蒙英达顾空班赵氏壁徒乖魏王瓠从来渐二纪始得傍归路将穷山海迹永绝赏心晤出文选】

张元崇升仙【列仙传】

齐董清建复生【清建父贤明建元初为越骑校尉母宋氏初孕时梦人语曰必生男体上当有青志可名青儿及生遂以名焉稍长有容止美言见者异之年十四为水曹三军忽疾将卒谓母曰不须忧念乃大哭声尽而绝母欲殓斋前七月十六日夜复生云勿安斋前自有道人迎丧者果有道人来名昙顺母以其语语之昙顺曰贫道居南林寺造丈八像垂成贤子有此感应寺有空地可永藏也遂葬于寺后母过墓夜见清建如生曰愿母割爱何必至此每于空中闻清建声出法苑珠林】

诗

洞庭叶下凉飕飕冻天顽白凝不流圆月拟缺不忍缺轻露欲浮终未浮忆吹朱簾凤辇上更采紫芝云峤陬玉楼天畔几千尺珠树玲珑悬上头【宋人狄遵度七月十六日夜书事】

十七日

金楼子曰吾筮十七日当得雨遇坎之比又曰坎者水也其在今夜三更乎地上有水称之为比其夜果有甘雨【金楼子七月至荆州亢阳日久月旦虽雨俄而便晴人皆曰月雨额千里赤盖旱之极也七月十七日得雨如金楼子筮出天中记】

徐文质卒【文质字处中宋人也天圣八年七月十七日卒寿五十非庆吊大事不出门事继母弥尽其力出文质墓志】

张政复生【唐开元三年张政暴卒初见四人来捉行至大江细看之水皆血及念金刚经使者变色忽逢一僧长八尺余曰张政是某本宗弟子命数未尽顷之见前四人皆着大枷亦不见前所渡之大江僧令弟子闭目以一杖击之乃活时七月十七日也出报应记】

十八日

玄宗次巴西郡太守崔涣奉迎即以涣为门下侍郎同中书门下平章事以韦见素为左相【天宝十五载】

宋神宗诏中书门下考察内外官置簿记功过岁终升黜之【熙宁三年以上玉海】

韦处元真人成仙

太真西王母诞日【以上翰墨大全】

诗

中元过后恰三朝因是庭闱喜气飘李谪若非当此夕申生应是在今宵 【事文类聚】

十九日

唐僖宗即位

【僖宗咸通三年五月八日生于东内十四年十九日即位时年十二出续宝运录】

刘黑闥称王改元 【唐高祖武德四年漳南诸将往诣之告以其谋黑闥欣然从之黑闥方种蔬即杀耕牛与之共饮食定计聚众得百人七月十九日称王改元出实录】

宋韩琦祖母卒

【祖母崔氏棣州司马鲁之长女终于天复二年七月十九日年八十有三出五代祖莹记】

警玄禅僧示寂 【警玄年至八十叹无可以继者遂作偈并皮复布直裰寄浮山远禅师使为求法器偈曰杨广山头□凭君待价焞异苗翻茂处深密固灵根偈尾云得法者潜众十年方可阐扬远拜而受之遂赞师像曰黑狗烂银蹄白象昆仑骑于斯二无碍木马火中嘶宋仁宗天圣五年七月十九日师升座辞众示寂塔于大阳山出楚通志】

歧真人升仙日 【歧平定列仙传】

圣母化生日 【出佛书】

二十日

唐高祖武德六年隰州山崩水咽流 【五行志】

唐太宗废明德宫及飞仙宫之圃院以分给遭水之家 【贞观十一年玉海】

宋哲宗灵驾发引 【元符三年正月哲宗崩徽宗即位至七月二十日灵驾发引宋史礼志】

盘盘国王遣竺伽蓝婆奉献金银琉璃诸香药等物 【孝武帝孝建二年宋起居注】

卢汾于后魏庄帝永安二年是日将赴洛友人宴于斋中夜阑月出忽闻庭前槐树有笑语声并丝竹音韵数友人闻而讶之俄见青衣绿衣女子出槐中谓汾曰此地非郎君所诣汾曰吾适宴罢故来请见女子笑曰郎君请入其内汾举目见门户尽开有一女出户谓汾曰娘子命郎君及诸郎相见汾与友人俱入见数十人各年二十余立于大室中其额曰审雨堂汾与友人历阶而上与紫衣妇人相见紫衣命汾等就宴后有白衣青衣自堂东西出艳丽异常忽闻大风所望审雨堂梁倾汾与友人惊走乃醒将明见庭中风折大枝连根而堕以火照所折处穴中有蚁又有一二蚯蚓俱死于槐穴中 【卢汾字士济幼而好学出太平广记】

取鷹法七月二十日为上时内地者多塞外者殊少八月上旬为次时下旬为下时塞外鷹毕至矣【天中记】

二十一日

隋文帝崩以是日发丧【仁寿四年七月二十一日时陈夫人与后宫战栗失色晡后太子遣使者賁小金合帖纸亲署封字以赐夫人夫人见之惶惧以为鸩毒不敢发使者促之乃发合中有同心结数枚宫人咸悦相谓曰得免死矣陈夫人悲而却坐不肯致谢诸宫人共逼之乃拜使者其夜太子蒸焉杜预曰上□曰蒸出隋书】

中书门下表言在汉之隆实居长乐有唐之盛亦阐义安请以皇太后曹所居慈寿宫为慈寿殿【宋英宗治平元年七月二十一日中书门下表出实录】

印肃禅师书偈于方丈西壁书毕跏趺而逝【据楚通志七月十一日书偈示寂据史纂左编二十一日示寂故是日亦载师梦一僧点其□曰汝他日当自省既寤白母黄氏亲点红莹大似世之櫻珠】

上元唐真人生【翰墨大全】

二十二日

唐肃宗延英殿梁上生玉芝一茎三花肃宗作玉灵芝诗
【上元二年七月二十二日梁生芝出玉海】

元祜暴疾卒【元祜字微之河南人八岁丧父其母郑夫人家贫为祜自授书教之九岁能属文二十八应制登第者十八人祜第一后改授越州刺史兼御史大夫浙东观察使会稽山水奇秀祜所辟幕职皆当时文士而讽咏诗什动盈卷帙副使窦巩海内诗名与祜酬唱最多太和五年七月二十二日卒于镇时年五十三赠尚书右仆射出旧唐书】

二十三日

晋成帝有星孛于西北至七月是日乃灭占曰为兵乱【咸和四年郭默杀江州刺史刘胤荆州刺史陶侃讨默明年斩之是时石勒又始僭号出通考】

京兆韦词为宛陵廉使是日微雨词于公署寝忽梦一人投刺视之见题其字曰李故言俄于恍惚间空中有人言明年及第状头【元和六年词讶其事为名中少有故字者焉得有李故言哉后果有举人投刺其名一如梦中但故为固耳词藏梦中事不泄乃曰足下明年必擢第兵部侍郎许孟容知举果擢为榜首初固言尝梦看宋景衣后固言居左拾遗旧例谏官从驾行礼者太常各□礼衣一袭固言所服衣衣下有字曰□补阙宋景信乎数皆前定此出续定

命录又先固言下第游蜀遇一老姥与言郎君明年芙蓉镜下及第明年果状元及第诗赋有人镜芙蓉之目所遇老姥乃金天神也出酉阳杂俎】

诗

淅淅晓风起孤舟愁思生蓬窗一萤过苇岸数蛩鸣老大畏为客风波难计程家人夜深语应念客犹征 【张宛丘十月二十三日立秋夜行泊林里港】

二十四日

宋仁宗御迎阳门召宰执以下观御书妙法正觉殿额次赴天章阁观御书 【嘉佑三年】

南宋高宗出御制郊祀天地宗庙乐章并御札付宰执宣示禁从及馆阁之臣
【绍兴二十八年以上玉海】

西蜀孟昶卒太祖伤之是日正衙备礼册命昶其文曰维干德二年某月某日皇帝若曰咨尔故检校太师兼中书令秦国公孟昶册赠之典所以彰世祚而纪勋伐继绝之义所以旌异域而表来□苟匪全功宁兼二者国家乘干抚运拓地开图既定壶关之乱复剪淮夷之凶兵威震迭寰宇来同以至薄伐两川徂征三峡惟尔昶袭乃堂构据有巴庸于戏尔有及亲之孝特异常伦尔有达上之情所期终养何高穹之不佑与幽壤之同归云云 【昶母李氏随昶至京师太祖数命肩輿入宫谓之曰母善自爱无戚戚怀乡土异日当送母归李氏曰使妾安往太祖曰归蜀李氏曰妾家本太原得归并土妾之愿□时晋阳未平太祖闻其言大喜曰俟平刘钧即如母愿因厚加赐赉及昶卒不哭以酒酬地曰汝不能死社稷贪生以至今日吾所以忍死者以汝在尔今汝既死吾何生焉因不食卒太祖闻而伤之七月二十四日正衙备礼册命昶出宋史世家传】

仁宗谊卒 【宗谊知淄州□紫加勋骑都尉以大观元年七月二十四日终于家刻跋作志铭铭曰服周于身棺周于服剗石豪文以为之椁度三之一得其函深如函之深为之盖博其封可隐其坎可席从先大夫归此真宅宗谊字仲宜出宋文鉴】

龙树王生辰 【藏经】

二十五日

晋安帝五虹见于东方

【义熙七年七月二十五日虹见占曰五虹见天子黜圣人出出宋书符瑞志】

琅邪王俨斩和士开 【和士开字彦通清都□□人也世祖恃恒令士开与太后握槊又出入卧内遂与太后为乱及世祖崩弥自放恣琅邪王俨恶焉七月二十五日斩之时年四十八士

开稟性庸鄙不窥书传发言吐论惟知谄媚河清天统以后威权转盛富商大贾朝夕填门朝士不知廉耻者多相附会甚者为其假子出北齐书恩幸传】

盘瓠石窟每岁是日扶老携幼集于庙祠以牛彘酒酢椎歌欢饮【武溪山高可万仞半有盘瓠石窟可容数万人窟中有石似狗形蛮俗相传曰盘瓠每岁七月二十五日种类四集于庙扶老携幼环宿其旁凡五日祠以牛彘酒酢椎歌欢饮即还又魏略曰高辛氏有老妇居王室得耳疾桃之乃得物大如茧妇人盛瓠中覆之以盘俄顷化为大其文五色因名盘瓠出武陵记】

刘助尸解【助唐人即瞻之弟年十三能诗读书惟精于道德经尝结茅舍山林间以不妻为誓瞻曰以子频秀取青紫如探囊何苦尔尔曰富贵草上霜耳不知养性豕兆累累虽王侯何益忽一日有二道士过访其庐与之谈甚异之二人秘传内养之术兼授餐松服石之法相处近月乡人视其庐有五色云笼之又谓助曰吾二人度汝君勿泄吾王屋真人也二人忽不见助大中元年七月二十五日尸解去此事九月十六日亦载列助字符德郴阳仙传】

通天护国嘉应侯生【翰墨大全】

沐浴令人寿长【云笈七签】

诗

一夕骄阳转作霖梦回凉冷润衣襟不愁屋漏床床湿且喜溪流岸岸深千里稻花应秀色五更桐叶最知音无田似我犹欣舞何况田家望岁心【曾茶山七月二十五日大雨作】

我梦游天台横空石桥小秋风吹茵露翠湿香裊裊应真飞锡过绝涧度云鸟举意欲从之翛然已松杪微言粲珠玉未说意先了觉来如堕空耿耿窗户晓群生陷迷网独达从古少杜叟子何人长啸万物表妻孥空四壁振策念轻矫遂为赤城游飞步凌缥缈问禅不归舍屡为瓠壶绕何人识此志佛眼自照瞭我梦君见之卓尔非魔烧仙葩发茗碗剪刻分葵蓼从今更不出闭户闲騷褭时从佛顶岩驰下双莲沼

【元豐八年杜几先自浙东还东坡七月二十五日相遇于金山话天台之异作诗赠之】

二十六日

千秋节【唐玄宗开元四年上封事者言寿星居列宿之长宜置寿星坛敕七月二十六日为千秋节祭老人星出玉海据会要以八月五日千秋节两日俱载】

宰臣秦桧是日撰景钟铭上之【宋高宗绍兴十六年玉海】

晋平南将军侍中王廙工飞白祖述张法得索靖书七月二十六日一纸每宝翫之【王廙右

军之叔父遭永嘉丧乱乃以一纸四迭缀衣中以渡江令蒲州桑泉令豆卢器得之迭迹犹存出国史异纂】

诗

夜入磻溪如入峡照山炬火落惊猿山头孤月耿犹在石上寒波晓更喧至人旧隐白云合神物已化遗踪蜿安得梦随霹雳驾马上倾倒天瓢翻
【东坡七月二十六日五更起行至磻溪未明作之】

二十七日

唐玄宗是日敕风伯雨师济时育物谓之小祀 【天宝四载玉海】

宋高宗幸秘书省至右文殿降辇颁手诏曰盖闻周建外史掌三皇五帝之书汉选诸儒定九流七略之奏文德之盛后世推焉仰惟祖宗建开册府凡累朝名世之士由是以兴而一代致治之原盖出于此朕与学士大夫共宏斯道 【绍兴十四年高宗新建秘书省七月成秘书少监游操等援宣和故事请车驾临幸诏从之七月二十七日幸秘书省出宋史】

吏部侍郎王播以是日为京兆尹兼御史大夫 【唐穆宗长庆二年】

堰以是日破 【肃宗孝昌二年扬州刺史李宪表云门下督周伏兴以去七月患□还家至十一日梦渡肥水行至草堂寺南遥见七人一人乘马着朱衣笼冠六人从后兴路左而立至便再问兴何人兴对曰李公门下督暂使硖石共人语兴君可回我是孝文皇中书舍人遣语李宪勿忧贼堰此月破矣兴行两步呼兴姓字令兴速白兴寤晓遂还城具言梦状七月二十七日堰破出魏书】

二十八日

永寿节 【周太祖七月二十八日出玉海】

玄宗车驾以是日至蜀郡扈从官吏军士到者一千三百人宫女二十四人而已
【天宝十五载出唐书】

肃宗是日以郭子仪李光弼并加平章事 【至德元载出唐历】

右补阙常浚贬万州司户 【唐禧宗光启元年常浚上疏以为陛下姑息藩镇太甚是非功过骈首并足致天下纷纷若此犹未之寤宜稍稍典刑以威四方田令孜之党言于上曰此疏传于藩镇岂不致其猜忿上览之不悦顾谓侍臣曰藩镇若见此疏深为忿恨自此猜间至七月二十八日贬浚万州寻赐死其是非功过骈首并足言齐是非一功过无所差别也出续宝运

录】

夜军是日乱田弘正并家属参佐将吏等三百余口并遇害【唐穆宗闻之震悼出旧唐书】

宋王深甫卒【深甫以进士补亳州卫真县主簿岁余自兑去有劝之仕者辄辞以养母其墓志铭王安石作焉铭曰呜呼深父维德之仔肩以迪祖武厥艰荒遐力必践取莫吾知庸亦莫吾侮神则尚反归刑此土治平二年七月二十八日卒宋文鉴】

苏东坡卒于常州【子由作东坡墓志铭云先生七月被病二十八日卒于昆陵吴越之民相与哭于市其君子相与哭于家计闻四方无贤愚皆咨嗟出涕徽宗建中靖国元年时年六十六出长公外纪】

西洛刘真人升仙【集仙录】

诗

汉节荧煌直北驰皇家卜世万年期东京盛德符高祖说与中原父老知
【朱文公七月二十八日闻报喜而成诗】

吾年四十九羈旅失幼子幼子真吾儿眉角生已似未期观所好蹁跹逐书史摇头却梨栗似识非分耻吾老常鲜欢赖此一笑喜忽然遭夺去恶业我累尔衣薪那免俗变灭须臾尔归来怀抱空老泪如泻水

我泪犹可拭日远当日忘母哭不可闻欲与汝俱亡故衣尚悬架涨乳已流床感此欲忘生一卧终日僵中年忝闻道梦幻讲已详诸药如丘山临病更求方仍将恩爱刃割此衰老肠知迷欲自返一恸送余伤【东坡子遯七月二十八日亡于金陵作二诗哭之】

二十九日

晋安帝是夜彗星出太微中彗柄起上相星下芒尾渐长至十余丈进埽北斗及紫微中
【义熙十四年占曰彗星出太微社稷亡天下易政出宋书符瑞志】

宋真宗诏辅臣观粟于后苑御山子观御制文阁御书及嘉禾图赐饮是日皇子从游
【景德六年宋史礼志】

陈搏左手支颐升仙【陈搏亳州真源人幼尝有青衣老姬来乳之成道后隐于华山玉泉院后又命弟子贾德升凿石室张超谷既成而大笑左乎支颐而死时元佑二年七月二十九日也出七修类稿据史纂左编十月二十二据翰墨大全七月二十二】

天皇真人受六壬遁甲秘经日 【翰墨大全】

诗

麟阁龙旗日月章中兴再见赭袍光仰观焜耀人文盛深识扶持德意长功利从今卑管晏浮
华自昔陋卢王惭非实学酬天造敢效明河织女襄
【吕东莱恭和御制七月二十九日幸秘书省】

三十日

天凤三年是日日食王莽大赦天下 【通考】

宣城太守殷佑有病韩友善占卜筮之曰七月三十日大鹄鸟来集厅事上宜勤伺取若获者
为善不获将成祸至期果有大鹄垂尾九尺来集厅事上掩捕得之佑乃迁石头督护后为吴
郡太守友善占卜神效甚多而消殃转福无不验
【友字景先庐江舒人也为书生受易于会稽伍振故善占卜出晋书韩友传】

吊鸟山俗传曰凤死其上每至七月三十日望群鸟来集其上鸣呼 【李雕四部】

地藏菩萨生辰 【藏经】

孔子是日太上老君受三乘妙道 【翰墨大全】

诗

端策得幽贞考盘寄兹岭未成长往计抱恨终耿耿秋风吹庭树遥夜枕席冷感彼岁序移慨
此心事永明晨发孤兴趋驾向绝境跻攀力虽倦想象意逾骋云山一以眺俯仰疑倒景检校
石田收眷恋茅屋静淹留复未遂外物媿张邴珍重同来人妙语各清整击节三叹余超然得
深省 【朱文公淳熙戊戌年七月二十九日与子晦纯叟伯林同发屏山西登云谷三十日夜
乃至而李通德功亦自山北来会赋诗纪事】

日涉编卷八

楚应城陈阶升也甫编辑

邑人徐养量叔弘甫校刻

程以良衷一甫

陈藏甫

张于征叔任甫

黄大任成玉甫全阅

八月〔一〕

八月建酉酉线也言万物皆线缩也【合璧事类】

南宫酉之气也八月建焉【周礼】

日在角昏牵牛中旦觜觿中【礼记】

宵中星虚以殷仲秋【月】

仲秋日出于卯入于酉【尚书考灵曜】

招摇指酉【淮南子】

剥枣【诗】

仲秋行春令则雨不降草木荣国有恐行夏令则亢旱虫不蛰五谷复生行冬令则风起雷收草木早枯【吕氏春秋】

为□【尔雅】

中秋月为端正月昌黎诗曰三秋端正月今夜出东溟又有诗曰去年中秋端正月照我衣襟万条血【事文类聚】

秋曰仲秋亦曰仲商 【梁元帝纂要】

冀州北作饮食为臠其俗曰臠腊 【后汉书】

京师是月秋社以社糕社酒相馈送贵戚宫院多以猪羊肉及杂物之属切片调和铺于饭上谓之社饭人家妇女皆归外家既归即外甥姨舅皆以新葫芦儿为遗俗云宜良外甥
【梦华录】

天中裂为二有声如雷者三 【晋惠帝太安二年】

天中裂广三四丈有声如雷野雉皆鸣 【穆宗升平五年以上□书】

天有声如风水相激 【陈宣帝太建十四年陈书】

天鸣西北 【德宗贞元二十一年文献通考】

天有声如雷水响于东南四日乃止 【绍兴二十六年五行志】

两月相承晨见东方 【汉成帝建始元年服虔曰相承在上下也汉纪】

仲秋之月雷乃收声 【月令】

雷震死兴化军民刘政有文在胸中曰大不孝 【宋太宗端拱二年八月通考】

京师大雨雹人畜有冻死者 【长安三年六帖】

里俗以雨为豆花雨 【荆楚岁时记】

风曰盲风曰疾风 【礼记】

天雨草而叶相繆结大如弹丸 【汉元帝永光二年五行志】

天雨白毛占曰邪人进贤人逃天雨毛 【汉武帝天汉元年五行志】

天陨鱼 【元至正丙午年上海县浦东俞店桥南牧羊儿三四闻头上恰恰有声仰视之光中陨鱼其状异常占曰天陨鱼人民失所之象出辍耕录】

天雨狗 【汉武帝二年后吴楚反攻梁梁坚城守遂伏尸流血出天中记】

黄河是月水名荻苗水 【与七月同出水衡记】

古井涌浪 【开元二十二年八月古井在清夷军黄帝祠】

鸿池谷有石青质白文成字 【贞观十七年八月鸿池谷在凉州昌松县太宗遣使祭之曰天有成命表瑞贞石文字昭然历数惟永五行志亦载六帖】

云蔚代三州山谷间石化为面人取食之
【太和四年八月太原节度使柳公绰奏闻出唐会要】

地有美玉 【八月中草木独有枝叶下垂者地有美玉地镜经】

汾州悉达院僧知严头生角长三寸 【宋太宗淳化元年文献通考】

祥符县树木皆有湿泥涂之 【顺帝至正二年元史】

黄州橘木与柿木连枝 【明道元年宋史】

晋明帝有大鸟二苍黑色翼广一丈四尺其一集司徒府射而杀之其一集市民家获焉及闰月戊子帝崩遂有苏峻祖约之乱 【太宁三年通考】

汉中平二年怀陵上有万余雀先极悲鸣后乱斗相杀皆断头悬于树枝枳?束 【中平六年灵帝崩夫陵者高大之象也雀者爵也天戒若曰怀爵禄而尊厚者自还相害至灭亡也搜神记】

松州雌鸡化为雄 【则天永昌元年白孔六帖】

凤凰集石邑县又郡国十三凤凰见 【汉献帝延康元年宋书符瑞志】

有黑龙如狗
【肃宗正光元年有黑龙如狗南走至宣阳门跃而上穿门楼下而出魏衰之象也魏书】

京师猪生子一头四耳两身八足 【世宗正始四年魏书】

诗

江南仲秋天（鱼覃）鼻大如船雷是樟亭浪苔为化石钱
【沈仲昌登天宝九年进士状江南八月】

八月涛声吼地来头高数丈触山回须臾却入海门去卷起沙堆似雪堆 【刘禹锡浪淘沙】

芦花深泽静垂纶月夕烟朝几十春自说孤舟寒水畔不曾逢着独醒人
【杜牧八月赠渔父】

秋草生庭白露时故园诸弟益相思尽日高斋无一事芭蕉叶上独题诗 【韦应物寄诸弟】

暮天新鴈起汀洲红蓼花疏水国秋想得故园秋夜月几人相忆在江楼
【杜荀鹤八月新鴈】

江柳影寒新雨地塞鸿声急欲霜天愁君多自沙头宿岸绕芦花月满船
【白居易八月赠江客】

清溪流过碧山头空水澄鲜一色秋隔断红尘三十里白云红叶两悠悠 【程颢仲秋作】

热去解钳伏飘萧秋半时微雨池塘见好风襟袖知发短疏未足枕凉闲且欹平生分过此何
事不参差 【杜牧】

不独避霜雪其如俦侣稀四时无失序八月自知归春色岂相访众雏还识机故巢尚未□□
□主人飞 【杜甫题归燕】

桂影中秋特地圆况当余闰魄澄鲜因怀胜赏初经月免使诗人叹来年万象敛光增浩荡四
溟收夜助婵娟鲜云清廓心田豫乘兴能无赋咏篇 【赵大成题闰中秋】

秋风淅淅摇密竹乍觉凉生洗炎溽豆田过雨麦毛肥苹渚风轻浪浪促田家社日试新（苧
去丁改刍）相过一饭百无忧却笑儒生真自苦发如衰草不胜秋 【韩子苍】

白露

处暑后十五日斗指庚为白露阴气渐重露凝而白也 【孝经纬】

和气精凝为露 【五经通义】

露者阴之液也 【蔡邕月令】

黄阴云出 【易通卦验】

仲秋白露节育风至秦人谓蓼风为育风 【蔡邕月令章句】

风?贝风之作多在初秋过白露虽作不猛 【岭表录】

八月白露始降万物坚成而强大故曰大梁 【天文录】

鹤性警至八月白露即鸣而相警

白露日鸿鴈来 【后五日玄鸟归后五日群鸟养羞是月也养衰老授几杖行糜粥饮食天子乃雉以达秋气命乐正习吹月令】

白露日鸿鴈不来远人皆叛玄鸟不归室家离散群鸟不羞臣下骄慢 【周书时训】

诗

昊天秋且高秋风发初凉白露下微津明月流素光 【刘铄题白露】

白露团甘子清晨散马蹄圃开连石树船渡入江溪凭几看鱼乐回鞭急鸟栖渐知秋实美幽径恐多蹊 【工部白露诗】

霏霏灵液重云表无声落沾树急玄蝉洒池凄皓鹤流尘清远陌飞月澄高阁宵润玉堂帘曙寒金井索佳人比珠泪坐感红绡薄 【李正封】

悲秋将岁晚繁露已成霜遍渚芦先白沾篱菊自黄应钟鸣远寺拥鴈度三湘气逼襦衣薄寒侵宵梦长满庭添月色拂水敛荷香独念蓬门下穷年在一方 【颜粲题白露】

早寒青女至零露结为霜入夜飞清景凌晨积素光驷星初暂暂葭莩复苍苍色冒沙滩白威加木叶黄鲜辉袭纨扇杀气掩干将葛屨那堪履徒令君子伤 【徐敞题白露】

皇天平分四时兮切独悲此廩秋白露既下降百草兮奄离披此梧楸 【楚词】

秋分

秋分水胎火废金旺 【水胎言水孕于金也】

白露后十五日斗指酉为秋分阴生于午极于亥故酉其中分也 【孝经纬】

招摇指酉 【淮南子】

日月会于寿星而斗建酉之辰 【月令】

斗指酉为秋分又曰秋分日在内衡 【孝经说】

兑西方也主秋分 【易说】

秋分八月之中气也秋分之时日出于卯入于酉分天之中阴阳气等昼五十刻夜五十刻一昼一夜二气中分故谓之秋分 【历日疏】

阴阳调日夜分五万物春分而生秋分而成生与成必得和之精故积阴不生积阳不化阴阳变化乃能成和 【文子】

白阴云出 【易通卦验】

秋分日雷乃收声 【后五日蛰虫坯户后五日水始涸淘瓦之泥曰坯细泥也】

秋分之日雷不收声诸侯淫汰蛰虫不闭户民靡有赖水不涸介虫为害 【周书时训】

龙秋分而入渊 【春分登天说文】

秋分闾阖风至鸷鸟击玄鸟归 【易通卦验】

老人星常以秋分夕见于丙见则治平主寿昌 【晋天文志】

秋分日命有司飨寿星于南郊 【据尔雅寿星角亢也角亢列宿之长故云寿星月令】

秋分昼夜分则同度量平权衡祭马社 【月令】

秋分而人君释锺鼓之悬 【京房易候占】

月宫中有七宝浴池八鸾之林秋分之日月宿东井之地上广灵之堂 【三道顺行经】

秋分之节诸仙听讼定人间功过及死生者故仙忌真记曰子欲升天慎秋分罪无大小皆上闻此朱火丹陵宫仲阳先生之要言也 【太平御览】

秋分勿杀生勿用刑勿处房帷勿吊丧问疾勿大醉君子当斋戒静专以自检 【千金月令】

此节后忌多霜主病 【臞仙月占】

八月〔二〕

一日

大风江海涌溢平地水深八尺拔南陵树二千株石碑撼动吴城两门飞落
【太平元年八月一日是年孙权薨吴志】

宋太宗书大言赋赐苏易简赋曰少年盛世兮为词臣古往今来兮有几人云云
【淳化四年】

兵部郎中杨徽之进雍熙词五言六韵凡十章太宗览而嘉赏依韵和之以赐
【淳熙三年以上玉海】

王荆公是日永昭陵旦表伏以暑往御时宵中应律载班秋朔申荐庙尝伏唯尊谥皇帝体道成干施仁应物率土方涵于圣化冥天遽惨于神游追龙驾于空衢莫知所税瞻鸟耘之新陇但有至怀 【临川集】

苏东坡继室同安郡君王氏卒于京师 【按东坡初娶通义郡君王氏乃同安之堂姊也东坡祭王君锡文人云某始婚姻公之犹子允有令德夭阏莫遂惟公幼女嗣执壘筐即此而通义为同安之堂姊明矣元佑八年八月一日卒时东坡年五十八出长公外纪】

张文定公卒

【大忠祥符八年八月一日真宗闻讣震嗟追赠尚书左仆射讳咏字复之年七十出行状】

缙氏尉郑楚相卧于厅中梦卢叔敏曰吾被贼杀死此贼明年八月一日从河中府与同党牵牛过邑西门最后驱牛者即此贼也郑君惊而寤至期潜布弓矢于西门外捕之果有同党而牵牛者独后即郑君梦中所云遂擒之果杀卢生者 【卢叔敏居缙氏即崔佑甫之表侄也祐甫初拜相有书与卢生令应明经举卢生自缙氏赴京惟一仆相随是时有紫衣人与卢生同行至鄂岭早发十余里紫衣人抽刀刺卢生与仆后缙氏尉郑楚相梦卢生被发血污告以故云云出太平广记】

真君许逊忽有云仗自天而下二僊乘輦降于真君之庭真君降阶迎拜一僊曰予乃玉真上公崔子文一僊曰予元真大卿瑕丘仲言毕揖真君乘云车而去 【许逊字敬之居许昌高节不仕颖阳由之后也父肃末避地于豫章南昌家焉吴赤乌二年母梦金凤衔珠坠于掌中玩而吞之觉而有娠而真君生至孝武宁康二年八月一日举家四十二口拔宅飞升真君年一百三十六史纂左编】

僊人王锡有甘露降于竹林中 【锡郴州人生于唐宣宗朝遇异人于山中迎至其家传以秘书曰咸通十二年之秋甘露降服之可以上升至咸通十二年八月一日甘露果降于竹林中锡日服之不复火食后白日羽化此事亦载于三月十五郴阳仙传】

尹太和真人升仙日 【翰墨大全】

曾弘农邓绍入莱山采药见一童子执五彩囊求柏叶上露露皆如珠满囊绍问之荅曰赤松先生取之明眼言毕失所在 【续齐谐记又述征记曰作五明囊盛取百草头露洗眼眼明】

六神日以露水调朱砂蘸小指宜点灸去百病 【风俗通】

楚俗以朱墨点小儿额为天灸以压疾病 【山堂肆考据翰墨大全事在初十】

作饮食为媵其俗曰媵兽 【汉史】

八月一日后微火暖足勿令下冷 【三元延寿书】

诗

城头旭日照栏杆城下降戎彩仗攒九陌尘埃千骑合万方臣妾一声欢楼台乍仰中天易衣服初回左衽难清水莫教波浪浊从今赤岭属长安
【薛逢八月一日因驾幸延喜楼以冠带降戎】

二日

周宣为郡吏太守杨沛梦人曰八月二日曹公当至必与君杖饮以药酒使宣占之是时黄巾贼起宣对曰夫杖起弱者药治人病八月二日贼必除灭至期贼果败
【宣字孔和乐安人魏书】

僧元安午时告寂 【师卯年出家问道临济济尝对众美之曰临济门下一只箭谁敢当锋□辞济寻澧阳洛浦山卜筑居焉唐昭宗光化元年八月二日午时告寂出楚通志】

三日

京都旱祈岳镇海渎及诸山川能行云雨者是日获感应
【孝宗淳熙十四年京都旱八月三日获感应命报谢出通考】

裴度是日发赴行营宪宗敕神策军三百人卫从上御通化门劳遣之度望门拜泣而辞上赐以犀带 【元和十二年旧唐书】

逆党使颜真卿缢之真卿是日解金带遗使者曰吾修道以形全为先吾死之后但割支节为吾吮血以结之则死无恨矣缢者如其言 【兴元元年真卿年七十七素不附安禄之党李希烈使倡优忤朝政以为戏真卿怒曰相公人臣也奈何使小辈如此希烈使人问仪制真卿

荅曰老夫耄矣曾掌国礼所记者诸侯朝覲礼耳其后希烈使积薪以油沃之令人谓真卿曰不能屈节当须自烧真卿奋身入火其逆党救之真卿乃作遗表墓志祭文以示必死逆党使缢之后真卿迁葬启殡视之棺朽而尸形俨然肌肉如生手足柔软远近惊异之后十余年真卿旧仆见于同德寺遗十金令勿泄忽失所在出玉堂闲话】

欧阳修作胡瑗墓表 【宋胡瑗字翼之卒于杭州庐陵欧阳修八月三日作墓表其墓表有先生之德在乎人不待表而见于后世然非此无以慰学者之思乃揭于其墓之原云云出文鉴】

慧能禅师跏趺而化 【慧能姓卢氏新州人流移南海鬻薪供母年二十四闻人诵金刚经至应无所住而生其心有省乃参五祖忍大师使就舂米之役一日会众传法弟子神秀为偈书壁间曰身似菩提树心如明镜台时时勤拂拭勿使惹尘埃能不识字闻人诵之乃为偈请人书其侧曰菩提本无树明镜亦非台本来无一物何处惹尘埃忍见之遂传法于能先天二年八月初三日能跏趺而化寿七十六唐宪宗谥曰大鉴禅师出禅宗志】

诗

金天玉露浴长庚此际来骑海上鲸劲气全如秋色劲生辰常带月华生 【事文类聚】

沉寥中秋夜坐见如钩月始从西南升又欲西南没全移河上影翳透林间缺纵待三五时终为千里别 【颜况八月三日望初月简于吏部】

四日

天寿节 【后周恭帝八月四日出玉海】

宋孝宗是日东宫讲毕袖出御制新秋雨过书怀诗 【淳熙四年玉海】

唐宰相房管卒于阆州僧舍 【广德元年八月四日卒工部祭管曰纯朴既散圣人又没苟非大贤孰奉天秩唐始受命群公间出君臣和同德教充溢魏杜行之夫何画一屡屡继之不坠故实百余年间见有辅弼及公入相纪纲已失云云出工部文集】

宋文帝时有马处伯少信佛法元嘉十二年夜梦天际有三人长二丈余告曰汝厄在荆楚戊寅年八月四日斋戒可免嗣后当悟道如其言后十五年八月是日病笃其日遥见西方有三人长二丈余前一人垂发后二人姿貌端严去地数仞处伯视之宛然前所梦者顷之香气袭人病小差处伯所居卑陋是时觉在殿上廊壁辉耀斋戒之验也
【处伯巴西阆中人出冥祥记】

程邵公广平程颢之次子坐于治平仲秋四日

【死于熙宁仲夏之十四日葬于伊阳县出明道集】

贾佩兰言宫中是日出雕房北户竹林下围基□者终年有福负者疾病取丝缕就北辰星求长命乃免 【西京杂记】

五日

宋神宗是日天雨黄毛 【熙宁元年通考】

千秋节祭老人星 【唐开元敕有司置寿星坛以八月五日千秋节祭老人星及角亢七宿着之例程寿星南极老人星也尔雅云寿星角亢也注云角亢列宿之长故云寿星出会要】

百姓祭皆就千秋节名为赛白帝 【隋唐嘉话】

唐明皇生张说奉诏置千秋节顾况有八月五日歌八月五日天气新昭成太后生圣人 【又为天长节出山堂肆考】

群臣上万岁寿王公戚里进金鉴绶带土庶结丝承露囊更相问遗 【隋唐嘉话】

蒲州蒋俨年少时袁天纲相之曰子当累年幽禁后大富贵官至刺史年八十三其年八月五日禄绝 【俨后征辽东没贼囚于地阱高丽平定归得官至刺史八十三矣时谓其家人曰袁公言我八月五日禄绝或其死耶设酒与亲故为别至期果卒出太平广记】

诗

仲秋金帝起五日土行标瑞表壬寅露光传甲子霄阴风吹大泽梦日照昌朝不独华封老千里嘉祝尧

兰殿千秋节称名万岁觞风传率土庆日表继天祥玉宇开花萼宫悬动会昌衣冠白露下（上□下巾）幕翠云长献遗成新俗朝仪入旧章月衔花绶镜露缀彩丝囊处处祠田祖年年宴杖乡深思一德事小获万人康 【玄宗八月五日诗】

五德生王者千龄启圣人赤光来照夜黄云上覆辰海县衔恩久朝章献寿新高车帝坐出夹道众官陈槩仗洗晴景磬管凝秋旻珠囊含瑞露金镜抱迁轮何岁无乡饮何田不报神熏歌与名节传代幸群臣 【张说千秋节应制】

自罢千秋节频伤八月来先朝常宴会壮观已尘埃凤纪编生日龙池堑劫灰湘川新涕泪秦树远楼台宝镜群臣得金吾万国回衢樽不重饮白首独余哀

御气云楼敞含风彩仗高仙人张内乐王母献宫桃罗袜红蕖艳金羈白雪毛舞阶衔寿酒走索背秋毫圣主他年贵边心此日劳桂江流向北满眼送波涛

【杜工部八月五日千秋节有感二首】

六日

梁孝元帝载诞之辰设斋 【江南风俗儿生一期为制新衣盥浴装饰男则用弓矢纸笔女则刀尺针缕并加饮食之物及珍宝服玩置之儿前观其发意所取以验贪廉愚智名之为儿试亲表集聚致燕享焉自兹以后二亲若在每至此日常有酒食之事无教之徒虽已孤露其日大作声乐不知感伤梁孝元帝少之时每八月六日诞辰常设斋出颜氏家训】

宋仁宗召辅臣宗室于龙图天章阁观三圣御书元真殿观瑞谷宴蕊珠宫宰臣以下赋诗 【天圣八年】

宋孝宗召吏部侍郎王之奇詹事陈良翰礼部侍郎周必大同对选德殿赐坐从容访以治道久之袖出御笔一通首以魏证荅唐太宗德仁功利之问 【干道七年以上玉海】

诗

日离黄道千年昏敏手重开造化门火帝动炉销剑戟风师吹雨洗乾坤左牵犬马诚难测右祖簪纓最负恩丹笔不知谁是罪莫留遗迹怨神孙

金虎挺灾不复论构成狂獬犯车尘御衣空惜侍中血国玺几危皇后身图霸未能知盗道饰非唯欲害仁人黄旗紫气令仍旧免使老臣攀画轮 【韩政光八月六日作】

七日

宣宗崩于大明宫 【大中十二年寿五十旧唐书】

真宗宴群臣于崇德殿作乐 【咸平元年宋史礼志】

日本人来战尽死 【元世祖至元二年八月一日讨日本风破舟文虎等诸将各自择坚好船乘之众议推张万户者为主帅号之曰张总管听其约束方伐木作舟欲还七日日本人来战尽死出左编】

丘处机得上批荅 【处机字通密师重阳祖师遣阿里鲜奉表诣金世宗稟论道日期至八月七日得上批荅次日即行出左编】

石泰尸解作颂曰雷破泥丸冗真身驾火龙不知谁下手打破太虚空 【泰常州人字得之号

杏林遇张紫阳得金丹之道于高宗绍兴二十八年八月七日尸解后二年易介复见杏林于罗浮山史纂左编】

沐浴令聪明 【纂要】

诗

七千里外二毛人十八滩头一叶身山忆喜欢劳远梦地名惶恐泣孤臣长风送客添帆腹积雨浮舟减石鳞便合与官充水手此生何止略知津 【东坡八月七日初入夔过惶恐难】

八日

春秋致月注云古之致月不在于二立而在于二分不在于二分之望而常在弦者以八月八日与不尽八日者得阴阳之正平故也

【周礼春官冯相氏冬夏致日春秋致月以辨四时之叙出山堂肆考】

宋真宗观书龙图阁观瑞物于崇和殿遂宴资政殿帝作七言诗从臣皆赋

【祥符三年玉海】

宋真宗幸瑞圣苑宴射于水心殿帝作五言诗赐近臣 【祥符七年八月八日出通典】

宋真宗梦真圣降现日 【翰墨大全】

宋哲宗葬永泰陵 【元符三年宋史礼志】

佛以八月八日沸星出时转法轮又以八月八日沸星出时取般涅槃盘 【萨婆多论】

南斗星下降 【道经】

刘伯文冥中托李娥致佗儿书不可晓乃请费长房读之曰佗会府君当以八月八日中时武陵城南沟水畔待之于是举家大小八月八日候于此处须臾果至闻人马隐隐之声诣沟水便闻有呼声曰佗来汝得我所寄李娥书否耶曰即得之故来至此伯文以次呼家中大小问之悲伤断绝曰死生异路不能数得汝消息良久谓佗曰来春大病与此一丸药以涂门户则辟来年妖厉矣言讫不见其形至来春武陵大病白日见鬼惟伯文之家鬼不敢近 【武陵充县女子李娥病死埋于城外已十四日娥北舍有蔡仲闻娥比谓殡当有金宝盗发冢剖棺斧数下娥于棺中言曰蔡仲汝护我头蔡仲惊走为吏所见遂收治依法当弃市武陵太守闻娥死复生召见问事状娥对曰谬为司命所召到即遣出过西门适见外兄刘伯文为相劳问涕泣悲哀娥语曰我今遣归不知路又不能独行为我得一伴否伯文曰当为汝问之即遣门卒与户曹相问司命一日误召武陵李娥今遣还不知路当有伴是吾外妹幸为便安之荅曰今

武陵民李黑亦遣还便可为伴于是娥遂得归与伯文别伯文曰书一封以与儿陀娥与黑归事状如此其伯文致佗儿书不可晓惟费长房知之故佗儿八月初八日于武陵城南沟水畔候之云云后汉书亦出搜神记】

勿买鞋履附足大忌 【云笈七签】

九日

唐太宗即位于东宫明德殿 【武德九年八月九日出会要】

宪宗是日即皇帝位于宣政殿先连月霖雨其日晴霁人情忻悦 【元和元年玉海】

开宝五年是日以潘美尹崇珂兼领岭南转运使以转运使王明为副使许允言为判官【转运之有判自此始出事物纪原】

天宝十五载明皇幸蜀肃宗即位于灵武杜工部自鄜羸奔行在为贼所得则在是年八月九日也 【出工部年谱】

元人朱文寔卒 【文寔九岁能文至文宗至顺壬申年上名南宫对大廷名列第十赐进士出身以嘉议大夫泉州路总管致仕八月九日卒于家文寔字原道出宋学士集】

徽宗以是日青华帝君生辰为元成节 【政和三年宋史】

诗

今夜鄜州月闺中只独看遥怜小儿女未解忆长安香雾云鬟湿清辉玉臂寒何时倚虚幌双照泪痕干 【工部八月九日月夜作幌帷也】

十日

晋安帝是夜镇星入太微
【义熙十四年八月十日占曰镇星守太微亡君之戒出沈约宋书】

晋武帝诏曰八月十日先帝弃天下日也今已周年何时一得叙人子之情
【秦始二年出礼志】

孝宗以是日立皇子邓王（怯去去改耆）为皇太子皇帝御太极殿行册礼皇太子服远游冠朱明衣执桓圭习仪 【干道元年出宋史礼志】

有群仙来传金母令女仙谢自然披发金母当自降群仙中有一使自言姓崔将一板阔二尺长五尺附自然群仙到墙壁间荧煌似镜群仙各有几案呼自然披发自然黄云绕身又有七人黄衣戴冠侍于左右贞元十年八月是日也【集仙记】

戚玄符飞升【符三岁时以疾暴卒父母痛甚有道士过门问之曰此可救耶抱出示之曰此儿后必仙衣带中解墨符救之良久遂活父母致拜道士曰我北岳真君也此女可名玄符及为民妻姑舅严酷事益谨每谓诸女曰得人身生中国尚为女子此亦所阙父母早丧惟舅姑为尊虽捶楚何怨大中十年八月初十日有神仙授灵药飞升集仙录】

吴赤乌二年八月十日武昌王子义之船【乌山下无水魏末有人掘井五丈得一石函函得一龟大如马蹄积炭五枝于函傍复掘三丈遇盘石下有水流汹汹然遂凿石穿水北流甚驶俄有一船触石而上人窥船上得一杉木板刻字曰吴赤乌二年云云出楚通志】

楚俗以朱墨点小儿额为天灸以压疾病
【荆楚岁时记并翰墨大全据山堂肆考事载于初一】

诗

屋东瓜蔓已扶疏小石蓝花破萼初从此到寒能几日风沙还见一年除
【王荆公八月初十题景德寺试院壁】

细把行藏为子评只知尽分敢微名出入有益殷三聘用不能行鲁两生此道古人如饮食后来宠婢或猜惊子云亦号知书者犹把商山作采荣

孔训元无实对名只言为已与求人能知管仲不为谅便识殷贤都是仁义利两途消处长古今一理屈中伸自从圣学寥寥后千百年谁信得真

别来岁月尔滔滔流落天涯忽此遭万木辞荣秋意澹百川归壑岸容高笑看海上两蜗角闲秃山中千兔毫若向颜曾得消息直须奴仆命离骚

夕阳春处是吾家水遶山环路转賒蹙蹙四方浑未定茫茫大化渺无涯归来已恨十年晚老却空嗟双鬓华各愿及时崇令德万锺于我本何加
【以上四首魏鹤仙八月十日别袁尊固监丞】

宛丘先生自不饱更笑老催穷百巧一更相过三更归古柏阴中看参昴去年与君苜蓿盘夜倾闽酒赤如丹今年还看去年月露冷遥知范叔寒典衣自种一顷豆那知积雪生科斗归来四壁草虫鸣不如王江长饮酒
【东坡八月初十夜看月有怀子由并崔度贤良王江陈州道人】

十一日

晋安帝是日新天子气见东南 【义熙七年八月十一日至十二年北定中原宋符瑞志】

真宗是日幸含芳园习射 【宋史】

唐裴佖开元七年为都督广州使是日夜漏未阑忽然天晓星月皆没禽鸟尽飞举郡惊异之裴公于是衣冠而出召参佐及宾客至皆异之因留宾寮于厅良久天色昏暗夜景如初宾寮执烛而归诘旦裴公询问无有能辨者忽有商船远自南至谓郡人曰我八月十一日夜舟行忽遇巨鳌出海举首北向而双日照曜千里毫末皆见久之复没夜色依然征其时则裴公集宾寮之时也 【集异记】

加老子号太上老君混元上德皇帝 【大中祥符六年出事物纪原】

怀让禅师圆寂于衡岳 【怀让姓杜氏金州人也于唐仪凤二年四月八日降诞感白气在安康之分帝问何祥太史对曰国之法器乃敕太守韩偕慰其家家有三子惟师最小性喜惟让父乃命名让年十岁时惟乐佛书时有三藏玄静过舍告其父母曰此子若出家必获上乘广度众生至垂拱二年辞亲往玉泉寺出家通天二年诣曹溪参六祖祖问甚么处来曰嵩山来祖曰甚么物恁么来师无语遂经八载忽然有省天宝三年八月十一日圆寂于行?鱼岳谥大慧禅师出楚志】

诗

半秋初入中旬夜已向阶前守月明从未圆时看却好一分分见傍轮生
【王建八月十一日夜作】

十二日

后汉隐帝葬于颖陵 【陵在许州阳翟县通考】

蒋玄晖弑昭宗于椒殿帝单衣旋柱而走 【天佑元年唐书】

南豊石仙岩中冷真人升仙 【集仙录】

长庆中有王先生者弘农晦之闻其术往谒焉王留之宿乃八月十二日也先生召其女七娘谓之曰汝为吾刻纸状今夕之月置于室东之垣上有顷七娘以纸月施于垣上忽月光洞然一室毫发尽辨晦之惊叹不测此与杨隐之宿唐道家事同 【出宣室志据太平广记有王先生者家于乌江上一日里中有火起延烧庐舍先生往视之呼曰火且止火且止于是尽灭弘农晦之闻其术往谒先生隐几而坐风骨清逸晦之愈健慕于是留宿时八月十二日也及晓

将去先生一杖击之俄而尘起见山谷重迭晦之悸然背汗毛发竖立先生曰陵谷速迁吾子安所归乎晦之益恐泣曰不知一旦有桑田之变岂仙都瞬息而尘世已千载乎先生笑曰子勿惧于是持簪扫其庭门而庭门如旧晦之喜即驰马而去】

诗

桂子风高豆雨牧才经三日是中秋称觴会集欢声沸祝寿推开瑞气浮 【翰墨大全】

乱云遮却台东月不许交依次第看莫为诗家先见境被他龙与作艰难
【王建八月十二夜作】

十三日

唐懿宗即帝位 【大中十三年八月七日诏立为皇太子监国十三日即位年二十七姿貌雄丽宣宗长子出旧唐书】

唐文宗以李仲言为谏官李德裕谏之上曰李逢吉荐之朕不欲食言对曰逢吉身为宰相乃荐奸邪以误国亦罪人也 【文宗太和八年李仲言流象州遇赦还东都会留守李逢吉思复入相仲言自言与郑注善逢吉使仲言厚赂之注引仲言见王守澄守澄荐于上曰仲言善易上召见之时仲言有母服难入禁中乃使农民服仲言仪状秀伟倜傥尚气颇工文辞有口辨多权数上见之大悦以为奇士待遇日隆八月十三日以仲言为谏官出唐书】

西汉张骞乘舟游黄河至暮误泛入天河见一女浣纱骞问曰此何地也女人授一石与骞谓曰汝归问成都卖卜严先生 【张骞八月十三误入天河有女授一石既归持石问严君平先生君平曰此织女支机石也汝何得来骞告其故君平曰我见彼月客星犯斗牛之间骞曰是矣正其时也出山堂肆考】

仙人葛玄语弟子张奉曰吾为上帝所召当八月十三日尸解至期衣冠入室卧而气绝其色不变弟子焚香三日大风折木失玄所在 【葛玄能积薪烈火而坐薪尽而衣冠不灼饮酒一斛入深泉中卧酒解乃出玄游会稽有贾人过神庙庙神语贾人曰欲附一书与葛玄因以一书掷贾人舟中如钉入木中不可取及达会稽贾人报玄玄自取之即得葛玄字孝先出神仙传】

太极左仙公上升日 【冲应真人出翰墨大全】

诗

八月秋欲半后夜月将圆 【事文类聚】

今夜月明胜昨夜新添桂树近东枝立多地湿舁床坐看过墙西寸寸迟
【王建八月十三日夜作】

十四日

月有重轮潘炎作重轮赋赋曰时属高秋瑞彰元后光泛皎洁之斜汉色映阑干之北斗金波耀景非悬阊泽之名壁彩扬辉不入七衡之乎理殊吴梦符炳汉谣净桂花于日道环水镜于丹霄 【唐中宗景龙元年八月十四日夜月重轮出文苑英华】

宋绍兴三十二年是日文武百僚太傅以下行事官并朝服入诣大庆殿下立班皇帝自内服履袍入御幄服通天冠绛纱袍出至大庆殿诣册宝位前拜在位官皆拜 【宋高宗诏皇太子即位左仆射陈康伯等请上太上皇帝尊号太上皇后尊号八月十四日奉上册宝皇帝与文武百僚诣册宝前拜宋史礼志】

宋真宗幸含芳苑宴射帝中的者再 【祥符三年八月十四日出通典】

八月获秃鹫于宫内诏以示崔光本光本曰蒙示十四日所得大鸟此即诗所谓有鹫在梁
【光本名孝伯字长仁秃鹫贪恶之鸟野泽所育不应入殿庭出魏书】

杭有月岩惟中秋之月穿窍而出若八月十四日与十六日则外此窍矣余月尤斜 【杭江于凤凰山有石如片云拔地高数丈亦奇峰也巔有一隙尺余名曰月岩古今名人游赏题咏亦多焉出七修类稿】

诗

犹欠一宵轮未满紫霞红衬碧云端谁能唤得嫦娥下引向堂前仔细看
【元稹八月十四夜玩月】

银汉无声露暗垂玉蟾初上欲圆时清樽素瑟宜先赏明夜阴晴未可知
【孙明复八月十四夜】

月似圆来渐渐凝玉盘盛水欲浸棱夜深尽放家人睡直到天明不炷灯
【王建八月十四夜】

月拟来宵好吾先今夕遭纔升半壁许已复一轮高迁坐明相就群飞影得逃望秋惟有此彻夜敢辞劳 【杨诚斋八月十四翫月】

光华岂不盛赏宴尚迟迟天意将圆夜人心待满时已知千里共犹讶一分亏来夕如澄霁清风不负期 【范仲淹八月十四夜】

去年看月寿边楼云罅微光如玉钩主人不乐客叹息清歌空送黄金舟今年看月三?市纤云不作良宵累素娥命驾扫客愁我亦倾杯邀共醉风露万里万渺然水轮无辙行碧天盈盈耿耿意无尽月不忍落人忘眠一言欲报广寒殿茅檐华屋均相见明年万事不足论但愿月满人长健 【陆游字务观号放翁山阴人八月十四夜三?市观月】

十五日

南阳府有龙泉在汝州西南其水莹洁中秋之夕阴云蔽月俯观泉中魄形自若诗人有我欲龙泉观夜月崆峒烟雨阻行人之句 【天下一统志】

移花日 【通考】

为月夕 【提要录】

中秋月有光则是岁珠多 【海贾云】

天子以八月之望与诸侯并观涛于广陵之曲江 【枚乘七发】

高宗诏郡国同以八月十五日试举人 【绍兴二十四年宋史】

东坡居士以丙辰中秋欢饮达旦大醉作水调歌都下传唱神宗问内侍外面新行小调内侍录此进呈读至又恐琼楼玉宇高处不胜寒上曰苏轼终是爱君乃命量移汝州 【山堂肆考】

宋晏元献公守南郡王琪君玉时已馆阁校勘公特请于朝以为府金判尝遇中秋夜阴晦斋厨已宿为备晏适无命不敢请君玉乃为诗以入曰只在浮云最深处试听弦管一吹开公枕上得诗大喜即索衣起径召客治具大合乐至夜分月果出遂相与乐饮达旦 【石林诗话】

苏颋 【音挺】 与李义封掌文诰是日夜于禁中直宿诸学士翫月备文酒之晏时长天无云月色如昼苏曰清光可爱何用灯烛遂使擲去 【出翰苑名谈颋字廷硕雍州人义字尚真赵州人】

谢尚镇牛渚中秋夕与左右微服泛江会袁宏于别舫讽咏声韵清朗词意藻拔尚即逆宏舟吐华达旦 【晋书】

中秋天色阴晴与夷狄同苏东坡曰故人史生为余言尝见海贾云中秋之月虽相去万里他日会合相问阴晴无不同者公集中有中秋诗尝闻此宵月万里同阴晴天公自着意此会那可轻 【山堂肆考】 新罗国风俗是日设乐令官人射赏以马布 【新罗国在高丽东南其俗亦同出隋书】

杭俗有弄潮之戏【吴王赐子胥死乃取其尸盛以鸱夷之革浮之江中子胥因流扬波依潮来往或有见其乘白马素车在潮头者因为之立庙每岁仲秋既望潮水极大杭人以旗鼓逐之有弄潮之戏出临安志】

长庆中有人是夜玩月见林中光属天如匹布寻视之见一金背虾蟆疑是月中者【酉阳杂俎】

何中正登第后求卜于郭从周从周赠之诗三五来时月正圆一麾从此出秦关中正后以八月十五日改知制造出秦州【翰苑名谈】

金人田特秀卒【特秀母妊时问之卜者卜者曰前中后是五五三一十五生死与成败逍遥在廊庑莫识其故后生时五月五日午时以为合三五之数矣岂知因其生遂名五儿所居里名半十行当第五二十五岁府省御四试皆中第五死于忧午轩寿五十五时八月十五日也出七修类稿】

孔坦字君平孔愉之从子中秋日疾笃与庾亮书不谓疾苦遂至顿弊修短命也将何所悲但以身往名没朝恩不报所怀未叙若死而有灵潜听风烈俄卒时年五十一追赠光禄勋谥曰简【坦方直有雅望常以国事为已忧亮报书曰廷尉孔君神游体离呜呼哀哉得八月十五日书知疾患转笃遂不起济悲恨伤楚不能自胜足下才经于世世常须才况今日倍相痛惜吾以寡乏忝当大任国耻未雪夙夜忧愤常欲足下同在外藩戮力时事此情未果邈然永隔夫复何言谨遣报荅并致薄祭望足下降神飨之出晋书】

唐明皇是夜叶静龙邀上游月宫将行请上衣裘而往及至月宫寒凛特异上不能禁静龙出丹二粒进上服之【山堂肆考】

明皇是夜与太真叶法静游月宫少顷见龙楼雉堞金阙玉扉冷气逼人后西川奏是夕有天乐过【明皇杂录】

玄宗玩月罗公远取杖掷之化为长桥其色如银请帝登之至大成阙公远曰此月宫也见仙女数百素练宽衣舞于庭帝问曰此何曲曰霓裳羽衣曲【异闻集】

周贯有道术附书于李生云明年中秋夕当上谒至时生以事出贯乃以白土书其门曰今年中秋夕求赴去年约不见折足铛弹指空剥剥【周贯号木鴈子先三年至袁州见李生秀韵欲携归林下李嗜酒色难其行贯指煮药铛作偈曰顽钝天教合作铛初从三足岂能行虽然有耳不能听只爱人间恋火坑后有见于京师者附书于李生云云出冷斋话夜】

唐太和中周生善道术中秋客至周日我能梯云取月置怀袖中因取筋数百条绳梯架之命闭目良久忽天黑仰视无云俄呼曰至矣手举其衣出月寸许一室尽明寒入肌骨【宣室志】

九华山道士赵知微玄真之师也中秋夜浓云无月玄真谓同门者曰惜良宵无月耳知微命侍童曰可备酒肴遍召从学者升天柱峰玩月从学者虽唯应而心疑以为浓云暴雨无复有月顷之知微曳杖而出从学者随之登峰之巅皓月如昼至月色尽落各归山舍浓云暴雨如故【三水小牋】

锺陵西山有游帷观每至中秋车马喧阗豪贵游多召名妹善讴者握臂连踏而唱太和末有书生文萧往观睹一妹甚丽且歌曰若能相伴陟仙坛应得文萧驾彩鸾自有绣襦并甲帐琼台不怕雪霜寒生意其神仙植足不去妹亦相盼歌罢独秉烛穿大松径将尽陟山扞石冒险而升生蹑其踪妹曰莫是文萧耶相引至绝顶有仙童持天判曰吴彩鸾以私欲泄天机谪为民妻一纪妹乃与生下山归锺陵【传奇录】

武夷山神号武夷君秦始皇二年一日语村人曰汝等以八月十五日会山顶是日村人毕集见幔亭彩屋设宝座施红云紫霞褥器用甚设令男女分坐闻空中人声不见其形须臾乐响亦但见乐器不见其人酒行命食味皆甘美惟酒差薄诸仙既去众皆欣喜因名其地曰同亭三水【诸山记】

许真君晋元康三年举家四十二口拔宅上天【出山堂肆考翰墨大全据史纂左编八月初一飞升两日俱载真君名逊字敬之汝南人为旌阳令】

太虚真人成道【蜀人李班得黄房公丹道改名栖真号太虚诣武夷山潜修七月归经龙虎山先夕霄坛有梦真人者时早祷弗应次日真人至其处众弗知也梦者指所至贫道人是为众请祷雨应时沾濡后至真州玉虚庵以道授张紫琼嘱曰金丹宜潜修大道当人授入青城山道成出道书】

刘湛真人拔宅上升

轩辕皇帝骑火龙上升【以上翰墨大全】

有梵僧从天竺鹫山飞来云八月十五日夜桂子落【禅林备览】

长安中秋夜有人闻鬼吟曰大街鼓歇行人绝九衢茫茫空有月又闻有和者曰九衢生何劳劳长安土尽槐根高俗云务本西门是鬼市【南部新书】

诗

合望月时长望月分明不得似今年仰头五夜风中立从来团圆直到圆
【王建八月十五夜月】

人道中秋明月好欲邀同赏意如何华阳洞里秋坛上今夜清光此处多

【白居易华阳观中中秋夜招友翫月】

一年明月在中秋数日阴云不奈愁忽喜新晴转书室极知清夜照歌楼 【韩仲止】

长风迅扫太空云银汉无声斗柄横秋到今朝三五半月于此夜十分明 【晁无咎】

一年祗有今宵月尽上江楼独病眠寂寞竹窗闲不闭夜深斜影到床前
【熊孺登中秋夜卧疾】

云卷庭虚月逗空一方秋草尽鸣虫是时兄弟正南北黄叶满阶来去风 【薛能中秋旅舍】

把酒冰壶接胜游今年喜不负中秋故人心似中秋月肯为狂夫照白头
【戴复古字式之号石屏天台人中秋夜李漕冰壶燕集】

桂影中秋特地圆况当余闰魄澄鲜因怀胜赏初经月免使诗人叹来年 【赵大成】

千崖爽气已平分万里青天碾玉轮如向钱塘江上望相逢却是广寒人 【白玉蟾中秋夜】

暮云收尽溢清寒银汉无声转玉盘此生此夜不长好明月明年何处看 【苏轼中秋夜】

满目飞明镜归心折大刀转蓬行地远攀桂仰天高水路疑霜雪林栖见羽毛此时瞻白兔直欲数秋毫

稍下巫山峡犹衔白帝城气沉全浦暗轮侧半楼明刁斗皆催晓蟾蜍且自倾张弓倚残魄不独汉家营 【杜工部】

天将今夜月一遍洗寰瀛暑退九霄净秋澄万景清星辰让光彩风露发晶英能变人间世翛然是玉京 【刘宾客中秋翫月】

凉意今年早蟾光七泽多凭栏共怀古拥袂独高歌风物关山远功名岁月过一樽聊复尔于此兴如何 【张栻字敬夫号南轩与僚佐登江陵郡城观月】

向老逢清节归怀托素辉飞萤元失照重露已沾衣稍稍孤光动沉沉众籁微不应明白发似欲劝人归 【陈后山】

待月东林月正圆广庭无树草无烟中秋云净出沧海半夜露寒当碧天轮影渐移金殿外镜光犹挂画楼前莫辞达曙殷勤望一堕西岩又来年 【许浑夜宿鸡鸣寺翫月】

银台金阙静沉沉此夕相思在禁林三五夜中新月色二千里外故人心渚宫东面烟波冷浴

殿西头钟漏声犹恐清光不同见江陵地湿足秋阴

【白乐天八月十五日夜禁中寓直寄元四积】

月晃长江上下同画桥横截冷光中云头艳艳开金饼水面沉沉卧彩虹佛氏解为银色界仙家多住玉华宫地雄景胜言不尽但欲追随乘晓风 【苏□钦中秋松江新桥对月】

十六日

宋仁宗御大庆殿门观南郊仪仗法物宰臣两制预焉

【景佑五年八月十六日观南郊仪仗法物出礼志】

宋高宗出所书孝经诗书篇章宣示宰执曰朕詹仰古圣王之治以为规戒

【绍兴三年玉海】

杜工部祖母范阳太后卢氏以是日葬于河南之鄆师

【卢氏卒于陈留之私第工部代叔父作志出年谱】

杨廷秀中秋夜宿辟邪市至十六日早起晓星已上日欲出而月未落光景万变天下奇观乃作羲和谣以纪之曰羲和梦破欲启行紫金毕逋啼一声声从天上落人世千村万路鸡争鸣素娥西征未归去（上竹下欺）弄银盘浣风露一丸玉弹东风来打落桂林雪毛兔谁将红锦幕半天赤光绛气贯山川须臾却驾丹砂毂推上寒空辗苍玉诗翁已行十里强羲和早起道无双 【事文类聚】

天曹掠刺真君降 【道经】

诗

旧把金波爽皆传玉露秋关山随地阔河汉近人流谷口樵归唱孤城笛起愁巴童浑不寐半夜有行舟 【工部八月十六夜翫月】

年年岁岁望中秋岁岁年年雾雨愁凉月风光三夜好老夫怀抱一生休明时谅费银河洗缺处应须玉斧修京洛胡尘满人眼不知能似浙江不

【曾茶山癸未八月十四日至十六日夜月色皆佳作茶山年八十】

十七日

骨利干正观二十一年是日遣使贡良马百匹中有十匹尤骏唐太宗各为制名曰喷沫则千里飞红流汗则三条振血尘不及起影不暇生 【玉海】

唐文宗以是日葬于章陵知枢密刘弘逸薛季棱率禁军护灵驾二人素为文宗奖遇仇士良恶之心不自安欲倒戈诛士良即日觉其谋弘逸季棱伏诛【开成五年出考异】

元人唐怀德卒【字思诚幼而颖悟未就师传即能诵诗既长受业于文懿许公六经百家之说无不探讨学以濂洛诸儒为宗故粹然出于正武威余公持节海右深慕思诚之学余公善大篆或请书扬雄九州岛箴者余公不知所出思诚曰此载自古文苑即援笔写之后覆以其书不差一辞余公惊服至正丁酉年八月十七日卒出宋濂集】

元国子博士吴师道卒【先生少勇于学稍长许文懿公以朱子之学淑学者先生持所悟识造门质难许公甚重之于元英宗至治元年举进士授高邮丞后入为国子助教踰年升博士先生声着中朝士子持所疑以问即开以机钥师道字正传婺之兰溪人于至正四年八月十七日卒于家寿六十二出宋濂集】

唐寿州刺史张士平夫妇俱患瞽疾祷醮星辰祈佑岁久精诚不懈至元和七年是日有书生请谒家僮曰主公夫妇瞽不能接宾客书生曰予亦知医家僮入报士平接见书生曰不假药餌开一井眼自愈【书生选一胜地穿井以水洗眼实时明淨如初夫妇感而谢之遗金帛书生曰吾太白星官非尘市中也以子精诚祷醮感五帝星君使我下降荅子修奉之心岂受金帛出神仙感遇传】

长庚星降

南斗星降【以上道经亦出翰墨大全】

诗

眼昏烛暗细行斜
考阅精强外已夸
明日失杯君莫怪
早知安足不成蛇

乱山遮晓拥千层
睡美初凉撼不（?言）
昨夜酒行君屡叹
定知归梦到吴兴

天台桂子为谁香
倦听空阶夜点凉
赖有明朝看潮在
万人空巷斗新妆

秋花不见眼花红
身在孤舟兀兀中
细雨作寒知有意
未教金菊出蒿蓬

楼上烟云怪不来
楼前飞纸落成堆
非关文字须重看
却被江山未放回【熙宁五年东坡杭州监试先有诗催试官考校八月十七日榜出复登望湖楼与试官五人和前篇五首】

秋月仍圆夜江村独老身
卷帘还照客倚杖更随人
光射潜虬动明翻宿鸟频
茅斋依橘柚清切露华新【杜工部八月十七夜对月】

病骨却风露愁怀厌甲兵人居绝域久月向此宵明轮亥初经汉光分半隐城迟迟不肯下应识异乡情【朱弁字少章宋人吉州团练使八月十七日夜对月】

月缺霜浓细蕊干此花元属桂堂仙鹫峰子落惊前夜蟾窟枝空记昔年破裓高僧怜耿介练裙溪女斗清妍愿公采撷纫幽佩莫遣孤芳老涧边

【东坡八月十七日天竺山送桂花分赠杨桧桧字元素皇佑五年及第】

十八日

唐太宗崩于含风殿以是日葬【按正史杂史咸谓太宗以八月庚寅日葬与大诏令等书并同庚寅则贞观二十三年八月十八日也后有云庚子则八月之二十八日不知何以有一句之差岂史误耶先太宗三月丁卯不豫四月己亥幸翠微宫五月己巳崩】

唐敬宗遣中使往湖南江南等道及天台山采药【宝历元年八月十八日遣中使时有道士刘从政者说以长生之道请于天下求访异人冀获灵药乃以从政为光禄少卿号玄升先生出唐书】

钱塘数百里士女聚观舟人渔子迎涛触浪谓之弄潮【出杭州府志据临安志八月十五日有弄潮之戏乃子胥事也若八月十八日弄潮事不同盖钱塘江通海海潮每昼夜在至卯酉之月为阴阳之交气以交而盛故潮独大于余月朔望之后为阴阳之变气以变而盛故潮独大于余日小则水渐涨不过数尺大则涌涛高数丈每年八月十八日郡人观舟人渔子迎涛触浪谓之弄潮至今俗尚有之】

女仙裴玄静跨白鹤西比升天而去日有五云盘旋仙女奏乐【玄静好道父母置一静室以女使侍之逐于外独居别有女伴言笑窥之不复见语之不肯言父母欲归之李言玄静不从父母抑之曰南岳魏夫人亦从人育嗣后为上仙遂适李言一日独居静室李言闻言笑从壁隙窥满室光明馥郁有二仙女凤髻霓裳侍侧有绰约之态李言问之玄静曰昆仑仙女相省勿窥再窥召谴然予与君俗缘甚薄不久在人间念君嗣未立后产一儿与李言曰予当去矣大中八年八月十八日升天而去在温县供道村此事与七月十四日女仙玄同略同出集仙录】

四海龙王神会日【道经】

诗

八月十八睡龙死海龟夜食罗刹水须臾海擘覓赭门地卷银龙薄于纸艮山移来天子宫宫前一箭随西风劫灰欲洗蛇鬼穴婆留折铁犹争雄望海楼头夸景好断鳌已走金银岛天吴一夜海水移马蹠沙田食沙草崖山楼船归不归七岁呱呱啼轺道

【杭州潮有绘其图者杨廉夫题】

八月十八潮壮观天下无鸱鹏水击三千里组练长驱十万夫红旗青盖互明灭黑沙白浪相吞屠人生会合古难必此景此行那两得愿君闻此添蜡烛门外白袍如立鹄 【东坡题潮】

十九日

唐太宗诏三品以上服紫四品五品服绯六品七品以绿八品九品以青 【贞观四年玉海】

唐高宗是日诏此后每五日一度升大极殿视事朔望即为例程盖今五日起居之始也 【永徽二年八月十九日诏循吏传曰汉宣五日一听事则彷彿起居之事其礼虽见于汉要自唐始行之出事物纪原】

洞宾过湖州吴兴东林沈氏沈氏能酿白酒洞宾自称回道人愿求一醉饮之数斗不醉乃用石榴皮题诗于壁诗曰西邻已富忧不足东老虽贫乐有余白酒酿成缘好客黄金散尽为收书 【熙宁元年八月十九日洞宾过湖州题诗云云后东坡和回先生赠吴兴沈东老韵三首诗曰世俗何知穷是病神仙可学道之余但知白酒留佳客不问黄金觅素书符离道士晨兴际华岳先生尸解余忽见黄庭丹篆句犹传青纸小朱书凄凉雨露三千后彷彿尘埃数字余至用榴皮缘底事中书君岂不中书出纯阳集】

田真人升仙 【田仕文】

申天师升仙 【以上翰墨大全】

诗

空庭得秋长漫漫寒露入幕愁衣单喧喧人语已成市白日未到扶桑间永怀所好遯成梦玉色髣佛开心颜逆知后应不复隔谈笑明月相与闲 【王荆公八月十九日试院梦冲卿作】

二十日

封西岳为金天王 【唐先天元年八月二十日封出会要亦出事物纪原】

唐玄宗破契丹告庙 【开元二十八年八月二十日破自后军捷必告庙出会要】

唐高宗是日陨石十八于同州冯翊县光曜有声如雷上问于志宁曰此何祥也由朕政有阙对曰是阴阳之事非吉凶所生自古灾变者不可测但恐物之自尔未必关于人事陛下发书责躬自省未必不为福矣 【永徽四年五行志】

宋高宗赐赵鼎御书尚书一部鼎奏谢上曰尚书所载君臣相戒之言所以赐卿欲共由此道以成治功 【绍兴五年玉海】

吕献可葬于伊阙县 【吕晦字献可宋人也登进士性沉厚不妄交游献可病亟为手书命司马光为理文光往省之至则目且瞑光伏呼曰更有以见属乎张目强视曰无光出门而献可没光铭曰位则不究道则不负年则不寿名则不朽云云八月二十日葬于伊阙县神阴乡中费里出文鉴】

后梁贞明中徐州王商将叛是夜月明如昼居人咸闻通衢队伍之声自门隙窥之皆青衣兵士而无甲俄闻大笑相呼刀楯盈巷怪状奇形甚可畏惧乃知非人也是冬?叛刘寻以兵五万致讨合境悉罹其祸后?败 【玉堂闲话】

鲍靓上京行达龙山见前一少年姿容整茂徒行甚徐靓乘名马密逐数里终不能及意甚异之问曰视似有道者少年荅曰我中山阴长生也

【大兴元年八月二十上京靓字太玄阴长生晋元帝时地仙出道学传】

二十一日

孔子生有二苍龙自天而下来附征在之房因梦而生夫子有二神女擎香露于空中而来以浴征在天帝下奏钧天之乐列于颜氏之房空中有声言天感生圣子故降以和乐笙镛之音异于世俗又有五老列于征在之庭则五星之精也 【按孔子之生春秋左传不书公羊谷梁二传并于襄公二十一年书之公羊书十有一月庚子谷梁书十月庚子说者谓春秋于是年书十月庚辰朔则庚子乃十月二十一日而十一月无庚子当以谷梁为是襄公十月二十一日即今之八月二十一日也又孔氏子孙相传者以孔子生于八月二十七日比出自山堂肆考又事文类聚以孔子生于五月四日或误孔子未生时有麟吐玉书于阙里人家文曰水精之子系哀周素王故二龙绕室五星降庭征在贤明知为神异乃以绣绂系麟角至鲁定公二十四年鲁人锄商田于大泽得麟以示夫子系角之绂尚在焉夫子知命之将终乃抱麟解绂涕泣滂沱】

褚渊薨 【褚渊字彦回河南阳翟人也建元四年八月二十一日薨于私第春秋四十有八文选曰渊神茂初学业隆弱冠孝敬淳深尽欢朝夕总熊黑之士率不贰心之臣康国祚于缀旒拯王维于已坠云云】

使者持命至 【元刘因字梦吉二岁日记千言六岁能诗七岁能属文偶腹痛下血不已八月二十一日使者持命至因初闻之惶怖无地不知所措徐而思之窃谓供职虽未能扶病而行而恩命则不敢不扶病而趋即日拜受留使者候病稍退与之俱行出左编】

苏东坡贬惠州是日过虔州与王岩翁同谒祥符宫老苏曾携东坡自虔州归其日感伤流涕 【宋哲宗绍圣元年老苏携过虔州时东坡年十二至绍圣元年四十七年而东坡年五十九矣出长公外纪】

然灯佛生 【藏经】

诗

香山居士留遗迹天竺禅师有故家空咏连珠吟迭壁已亡飞鸟失惊蛇林深野桂寒无子雨浥山姜病有花四十七年真一梦天涯流落泪横斜【老苏曾携东坡自虔州归是时老苏谓东坡曰虔州天竺寺有白乐天亲书诗后东坡过虔州四十七年矣其亲书诗已亡仅有石刻存耳八月二十一日感泣不已乃作是诗】

二十二日

石勒死【先苻惑逆行勒八月二十二日死出晋书】

镇海迎丘处机【字通密师重阳祖师处机遣阿里鲜诣金世宗稟论道日期八月二十二日田镇海来迎上遣镇海曰便欲见耶□□憩耶师曰入见是望既见赐醪酪竟乃辞上曰师每日来就食可乎师曰山野修道之人惟爱静处上令从便有磻溪鸣道集行于世出左编】

沐浴令人无非祸【云笈七签】

方丈台昭灵李真人降【翰墨大全】

诗

孤松吟风细泠泠独茧长锁女娲笙陋哉石鼎逢弥明蚯蚓窍作苍蝇声铍中宫商自相赅昭文无亏亦无成东坡醉熟呼不醒但云作劳吾耳鸣【刘羲仲八月二十二日钱饮东坡闻笙箫声杳杳若在云霄间抑扬往反甚中音节徐而察之则出于双铍水火相得自然吟啸食顷乃已】

二十三日

贞观八年是日星孛于虚危历于玄枵太宗谓侍臣曰是何妖也虞世南对曰齐景公时有彗星晏子对曰公穿池畏不深筑台恐不高行刑恐不重是以有彗景公惧而修德十六日而星灭臣闻若德政不修麟凤数见终无所补苟政教无阙虽有灾愆何损于时伏愿陛下勿以功高古人而务大勿以太平日久而骄逸慎终如始彗何足忧帝深嘉纳之【唐书】

郭子仪屯扶风【唐肃宗劳飧诸将遣攻长安谓子仪曰事之济否在此行也对曰此行不捷臣必死之于是子仪八月二十三日先行屯扶风至九月十三日广平乃发也出实录】

仆固怀恩上书自叙功伐曰广德元年八月二十三日刺肝沥血谨顿首上书宝应圣文神武皇帝陛下臣家本蕃夷代居边塞爰自祖父早沐国恩臣年未弱冠即蒙上皇驱策出入死生竭力疆场叨承先帝报功时年已授特进洎乎禄山作乱大振王师臣累任偏裨决死靖难上

以安社稷下以拯生灵仗皇天之威神灭狂胡之丑类云云
【仆固怀恩铁勒部落仆骨歌滥拔延之曾孙讹谓之仆固出旧唐书】

金主哀宗生于翼邸 【承安三年八月二十三生仁圣无子养为己子出金史】

智才潭州龙牙山僧宋高宗绍兴年是日俄集众生示曰涅槃生死尽是空华佛及众生并为增语汝等诸人合作么生众背下语不契师喝曰苦苦复曰白云涌池明月当天言讒輒然而逝火浴获舍利五色并灵骨塔于寺之西北隅 【楚通志】

诗

年年八月二十三长庚此夜照江南南山已为吾皇祝更愿我公如老聃 【事文类聚】

二十四日

东汉顺帝是日荧惑入轩辕郎顗曰天遣荧惑入轩辕以悟主上 【东汉郎顗字雅光比海安丘人也父宗学京氏易善风角顗少传父业昼研精义夜占象度阳嘉年顗谓顺帝曰八月二十四日戊辰荧惑历舆鬼东入轩辕出后星北东去四度北旋复还轩辕者后宫也荧惑者至阳之精也天之使也而出入轩辕绕还往来易曰天垂象见吉凶其意昭然可见礼天子一娶九女嫡媵毕具今宫人寺御动以千计或生而幽隔人道不通郁积之气上感皇天故八月二十四日遣荧惑入轩辕以悟主上出史纂左编】

隋文帝仁寿宫八月天雨金银花至是日卯时永安宫北有自然种种音乐震满虚空
【仁寿二年出隋纪】

吴越钱俶以天成四年是日生至端拱元年是日卒 【吴越钱俶字文德杭州临安人祖鏐因黄巢之乱据有吴越奄有勾吴之地不忘象魏之心宋太宗雍熙元年封汉南国王四年春出为武胜军节度改封南阳国王俶久被病诏免入辞将发赐玉束带金唾壶碗盂等俶四上表让国王改封许王至端拱元年徙封邓王会朝廷遣使赐生辰器币与使者宴饮至暮有大流星堕正寝前光烛一庭是夕暴卒年六十俶以八月二十四日生亦以八月二十四日卒人皆异之出宋史世家传】

彭抗真人举家二十六口白日升天 【彭抗字武阳兰陵人仕晋为尚书左丞密修仙业师事许真君纳女为真君子妇后致政挈家居豫章再诣真君门下尽传其道宋高祖永初二年八月二十四日举家升天出列仙传】

马钰真人是日长安祈雨有诗云一犁沾足待何时五五不过二十五明日雨足 【马钰初名从义字宜甫钰字玄宝更之也号丹阳子宁海人八月二十四日长安祈雨有诗出史纂左编】

二十五日

宋真宗是日真游殿上梁召近臣焚香因宴于长春殿帝作七言诗令近臣继和
【祥符七年玉海】

卫州进士高郢上书曰太后圣德不必以一寺增辉国家永图以百姓为本舍人就寺何福之为且无寺犹可无人可乎况陛下当卑宫室以夏禹为法而崇塔庙踵梁武之风也【唐代宗大历元年鱼朝恩奏以先所赐庄为章敬寺以资章敬太后冥福穷壮极丽尽都市之财不足用故高郢八月二十五日上书云云出郢集】

以吕佑之等直昭文馆【宋太宗淳化元年八月一十五日以吕佑之等直昭文馆先是但有直史馆至是始命佑之等分直备三馆职谈苑曰淳化中复置直史馆疑唐有是职也出事物纪原】

交趾贡异兽宋仁宗是日御崇政殿召辅臣等观之司马光作交趾献奇兽赋其状熊颈而鸟喙豨首而牛身与夫雕题卉服之士南金象齿之珍款紫闼而盥入充彤庭而并陈翔舞太和涵濡茂泽殊俗向臻灵兽来格云云【嘉佑三年八月二十五日宋史】

东坡游赤壁秋涛方涨水面十里【东坡游赤壁者三今人知其二者据二赋也二赋在元丰六年而第一游在六年前八月二十五日也观跋龙井题名记曰予谪黄州参寥使人示以题名时去中秋十日秋涛方涨水面十里等语则二十五日是第一游也出七修类稿】

诗

凉秋涉仲管佳月从下弦【事文类聚】

二十六日

晋愍帝是日天有声震地夜如昼晓起视西北间有光明照地
【建兴十七年八月二十六日晋书】

炀皇帝是日御龙舟幸江都以左武卫大将军郭衍为前军李景为后军文武官五品以上给楼船九品以上给黄箴舳舻相接二百余里【隋书】

宋太宗车驾幸国子监谒文宣王庙命博士李宽讲周易泰卦赐彩段百匹移幸玉津园习射
【端拱元年八月二十六日玉海】

知龙州王称上东都事略

【宋孝宗淳熙十三年八月二十六日上事略百三十卷明年春除直秘阁出会要】

寿星现 【南极老人星现于真宗八月二十六日出翰墨大全】

二十七日

宋太宗谓丞相曰朕昨日听说泰卦文理深奥之以为君臣鉴戒与卿等遵守之赵普顿首谢
【端拱元年八月二十七日玉海】

宋英宗以是日葬 【治平四年宋史礼志】

代宗诏郭子仪与马磷合攻吐蕃 【唐代宗大历二年吐蕃至泾西诏郭子仪自河中帅甲士三万镇之八月二十七日又诏统精卒一万与马磷合攻之是时京师戒严出汾阳家传】

咸通末年翰林舍人兰陵公自右史窜黔南秋八月二十七日泝三峡次秭是时蜀水方涨公积悸而寢梦神人赤发碧眸自云险不足惧公异之再寐又梦公诘其所自则曰我黄魔神居紫极之隅将佑助明公出于此境公自是抵于黔又还于罗每陟险如有神助焉 【楚通志】

元太祖赐丘处机葡萄酒瓜茶 【处机字通密号长春子元太祖谓师曰师每日来就食可乎师曰山野修道之人惟爱静处上令从便八月二十七日赐葡萄酒等物出史纂左编】

诸佛庆会东海 【藏经】

诗

推挤不去已三年鱼鸟依然笑我顽人未放归江北路天教看尽浙西山尚书清节衣冠后处士风流水石间一笑相逢那易得数诗狂语不须删

路转山腰未足移水清石瘦便能奇白云自古东西岭明月谁分上下池黑黍黄粱初熟后朱柑绿橘半甜时人生此乐须天赋莫遣儿郎取次知 【东坡与毛令方尉熙宁七年八月二十七日游西菩提寺作二首至今西菩山明智院石刻存焉】

二十八日

宋仁宗幸瑞圣园射上中的十一 【宝元二年八月二十八日】

宋孝宗御书汉议郎崔寔政论赐宰臣虞允文等允文曰寔所谓师五帝式三王弃苟全之政蹈稽古之踪此圣学之所缉熙特稷契之佐伊尹之辅未如卒章所云臣所甚惧也惟陛下选建其人极子三五之隆 【干道六年以上玉海】

崔光本字长仁是日帝见有物出于太极之西序敕以示光本光本曰八月二十八日物出于

太极之西序臣按其形即庄子所谓蒸成菌者也又云朝菌不终晦朔雍门周所称磨萧斧而伐朝菌指言蒸气郁长非有根种柔脆之质凋殒速易不延旬月无拟斧斤【魏书】

四天会事日【道经】

诗

喜临晚节安康久两日三秋催肃霜【事文类聚】

二十九日

袁充知天文上表陈嘉瑞曰去年八月二十九日夜大流星如斗出王良北正落突厥营声如崩墙占坠贼所贼必败帝大悦【袁充字德符本陈郡阳下人也年十余岁其父党至门冬初充尚衣□衫客戏充曰袁郎子絺兮绌兮凄其以风充荅曰惟絺与绌服之无斁以是大见嗟赏隋炀帝大业六年迁内史舍人其后天下乱盗贼并起帝心不自安充上表陈嘉瑞云云出隋书】

唐高宗京东西二市置常平仓置常平司官【永徽六年八月二十九日出会要】

谢晦卒【谢晦庙在岳州府黄山刘宋谢晦刺荆州尝过黄山顾瞻久之未几卒于八月二十九日枢过此山不肯去因葬焉民为立祠宋封显应公每年荆州刺史祭以八月二十九日出岳州府志】

牛文信真人上升【列仙传亦出翰墨大全】

诗

阴阳在天地鼓吹犹橐钥烦蒸翕已尽灏气乃浮薄群山翠相抱尘霭如洗濯川源亦虚彻派别归众壑器音灭蛙蚓劲意动鵬鸞蝇蚊自不容虽有类钳縛驱之旧苦众忽去宁匪乐俯仰自醒然意适忘体瘼天运虽已晏生意固未剥姜芋圃可掘禾黍田始获脱苞紫栗迸透叶红梨渥幽花媚清景鲜藜耀新萼西风动孤格露晓愈修擢能终犯寒沍讵可忽纤弱况当九日近家酿成已昨温颜几杖适弱质衣冠恪闺门自可会非必千里约箏匏出人指迢迢奋宫角初言小人献终拜长者酢清言喜自洽细故忧可略幸无职事顾况荷租赋薄读书有休暇得醉且吟噓【曾巩字子固八月二十九日小饮】

三十日

金主世宗诏百姓自二月一日至八月三十日并禁绝饮宴【金主诏百姓不许杀生祈祭若遇节辰及祭天日许得饮会亦不许赴会恐妨农功虽闲月亦不许痛饮犯者抵罪出金史】

元人林静是夜梦羽客持龟蛇施施而来谓静曰子能往鳌峰乎吾迟子矣【林静嗜道家言事玄武神尤谨以瑶台玄史为之号一日出游虎林忽遇羽客髭髻而方瞳揖静曰吾与子生同里何遽忘之耶问其里居姓名笑而不荅强之则曰李自然也客鳌峰之紫阳庵言讫飘然而逝八月三十日夜梦羽客持龟蛇云云静异之明日静往鳌峰逢龟蛇出洞中已而不见静因斲地获石类皂卵涤而视之玄武神黄帕首按剑坐云中龟蛇在下所现之像毫末备悉静曰此吾事玄武神甚谨故感而有此所谓同里及李自然云者盖示万物之理同出自然出宋濂集】

诗

尘纓忽解誠甚喜世网重来未可知莫忘全吴馆中梦岭南泥雨步行时
【白居易宝历二年八月三十日夜梦后作】

弱质有孤念独往穷名山那知岁月逝白首尘埃间今朝定何期凭高睨清湾群贤一戾止共此一日闲晤言不知疲林昏鸟飞还胜践可无纪重来谅非艰留语岩上石毋使门常关
【朱文公八月三十日浮云亭次叔通韵】

日涉编卷九

楚应城陈阶升也甫编辑

邑人徐养叔弘甫校刻

陈菌伯祥甫

陈茗伯取甫

陈时升暘国甫

程有年耳雍甫全阅

九月〔一〕

九月建戌戌灭也言万物皆衰灭也【合璧事类】

无射戌之气也九月建焉【周礼】

日在房昏虚中旦柳中【礼记】

日月会于大火而斗建戌之辰【月令】

晚秋者天将摇落其岁之晏乎【韩皋云】

季秋行春令则暖风至民懈怠师旅兴行夏令则大水殃民行冬令则多盗边境不宁土地分裂【吕氏春秋】

为玄【尔雅】

为季秋亦曰暮秋末秋杪秋秘秋暮?季?【梁元帝纂要】

文武百寮择胜地追赏为乐【唐德宗时出南部新书】

邑人掘蛇黄冈深七八尺有大者如鸡子小者如弹丸其色紫磨之可治肿毒【黄蛇冈在平南县出蛇黄载广西浔州府志】

四民并籍野饮宴 【荆楚岁时记】

天东南有声如风水相激三夜乃止 【陈宣帝大建十三年陈书】

天东南有声如虫飞渐移西北 【陈宣帝大建十四年陈书】

天赤气见于西北长二十丈广八九尺食顷乃灭 【高祖太和十六年魏书】

天西北有赤气似火燭北镇反乱之征 【肃宗正光三年魏书】

夜有流星起中天首如釜尾如二百斛船长十余丈声如群鸭明若火炬过月下西流须臾有声砉砉坠地有大声如坏屋者三在陈蔡间 【元和十二年唐书】

有大星自西南流于东北小者如斗相随天尽赤声如雷
【占曰流星为贵使是年汲桑杀东燕王腾遂据河北沈约宋书】

雹落大如蒜子 【永明元年南齐书】

风中有黑子占曰黑者阴也臣有蔽明主者 【永宁元年晋书】

天雨尘土 【庆元六年】

天雨尘土 【嘉泰元年以上宋史】

淮南地生毛或白或苍长者尺余遍居人床下扬州尤甚 【垂拱元年唐书】

雍州新豐县有山涌出高二十丈有池周三百亩池中有龙凤之形禾麦之异武后以为休应名曰庆山 【垂拱二年唐书】

黄河是月水名登高水 【水衡记】

泸州盐井竭遣刘晚入视忽有声如雷火焰突出晚被伤 【端拱元年五行志】

夹江县民王谊得黑石二皆丹文其一云君王万岁其一云赵二十一帝緘其石以献
【兴国四年五行志】

胶东下密人年七十余生角角有毛 【汉景帝二年九月生角时胶西济南齐四王有举兵反谋由吴王鼻起连楚赵凡七国下密县居四齐之中角兵象上乡者也老人吴王象也年七十七国象也天戒若曰人不当生角犹诸侯不当举兵以乡京师也祸从老人生七国俱败京

房易传曰家宰专政厥妖人生角出通考】

会稽剡县木生如人面后王敦作乱

【晋明帝太宁元年五行志前汉哀成之世并有此妖人貌备具】

豫州万岁涧广数丈有树连理隔涧腾枝相通越壑跨水为一干 【升明二年九月南齐书】

凤凰集东海遣使祠其处 【汉昭帝始元三年宋书符瑞志】

大雨鼠巢树上 【光武六年汉书】

豫州有猪生子一头二身八足 【高祖延兴元年九月魏书】

长安马生人 【唐僖宗中和元年九月通考】

满子县马生人 【晋愍帝建兴二年九月京房易传曰上亡天子诸侯相伐厥妖马生人是时帝室衰微不绝如线胡狄交侵兵戈日逼□而帝亦沦陷通考】

诗

江南季秋天栗熟大如拳枫叶红霞萃芦花白浪穿

【刘蕃诗状江南九月蕃登天宝六年进士】

异乡寒觉早故国信来稀秋风江上望一鴈正南飞 【乐天】

心逐南云逝形随北鴈来故乡篱下菊今日几花开 【隋江总九月至微山亭】

万叶风声利一山秋气寒晓霜浮碧瓦薄月度朱栏 【权常侍】

荆溪出白石天寒红叶稀山路寒无雨空翠湿人衣 【王维】

井梧分坠砌寒鴈远横空雨久莓苔紫霜浓薜荔红 【徐锴】

地僻门深少送迎披衣闲坐养幽情秋庭不扫携藤杖闲踏梧桐黄叶行

【白居易晚秋闲居】

九月湘江水漫流沙边惟览月华秋金风浦上吹黄叶一夜纷纷满客舟 【戎昱宿湘江】

秋丛遶舍似陶家遍绕篱边日渐斜不是花中偏爱菊此花开后更无花

【郑谷字微之题九月菊】

阴阳为炭地为炉铸出金钱不用模莫向人前逞颜色不知还解济贫无
【皮日休字袭美襄阳人题金钱花】

九月徐州新战后急风杀气满山河惟有流沟山寺下门前依旧白云多
【白居易过流沟寺】

秋风落叶满空山古寺残灯石壁间昔日经行人去尽寒云夜夜自飞还 【皎然晚投山寺】

霜草苍苍虫切切村南村北行人绝独出门前望野田月明荞麦花如雪 【白居易村夜】

塞月沉沉洞房静真珠帘外梧桐影秋霜欲下手先知灯底裁缝刀剪冷

碧空溶溶月华静月里客愁吊孤影花开残菊倚疏篱叶下衰桐落寒井

塞鸿飞急觉秋尽邻鸡鸣时知夜永凝伫不语空所思风吹白露衣裳冷 【王维】

谁将陶令黄金菊幻作酴醾白玉花小草真成有风味东园添我老生涯 【山谷】

爽气澄兰沼秋香动桂林露凝千片玉菊散一

金日吐高低影云垂点缀阴蓬瀛不可望泉石且娱心 【太宗秋日】

晨起动征铎客行悲故乡鸡声茅店月人迹板桥霜槲叶落山路枳花明驿墙因思杜陵梦凫
鴈满回塘 【温庭筠秋晚商山早行】

闰节开重九真游下太千花寒仍荐菊座晚更披莲刹风回雕辇幡横间彩旃还将西梵曲助
入南熏弦 【李峤】

闰月再重阳仙舆历宝坊帝歌云稍白御酒菊犹黄风铎宣行漏天花拂舞行豫游多景福梵
宇自生光 【宋之问】

重阳登闰序上界（口十）时巡驻辇天花落开筵妓乐陈城端刹柱见云表露盘新临睨光
辉满飞文动睿神 【刘宪以上三首和圣制闰九月九日登装严总持二寺阁】

八月九日芦花飞南溪老人垂钓归秋山入帘翠滴滴野艇倚槛云依依却把渔竿寻小径闲
梳鹤发对斜晖翻嫌四皓曾多事出为储王定是非 【张志和】

晓烟茅舍月初日枣林霜 【欧阳公】

木落千山瘦天高一鴈横 【吴正仲】

霜洲枫落尽月馆竹生寒 【僧尚能】

寒露

秋分后十五日斗指辛为寒露谓露冷寒而将欲凝结也 【孝经纬】

九月寒露为节者九月之时露气转寒故谓之寒露 【三礼义宗】

正阴云出如冠纓 【易通卦验】

寒露日鸿鴈来宾 【后五日雀入大水为蛤后五日菊有黄花鸿鴈来宾□以仲秋先至者为主季秋后至者为宾通书作来滨滨水际也亦通菊有黄花草木皆华于阳独菊华于阴故桃桐之华皆不言色而独菊言者其色正应季秋土旺之时也】

霜降

寒露后十五日斗指戌为霜降气肃露凝结而为霜也故云蛰见而陨霜 【孝经纬】

青女出以降霜 【青女霜神也又高诱注曰青女乃青腰玉女司霜雪者出淮南子】

霜阴阳之气也阴气盛则凝而为霜 【大戴礼】

霜者yin精冬令也四时代谢以霜收杀 【春秋考异】

展禽曰春风鼓百草敷蔚吾不知其茂秋霜降百草零落吾不知其枯 【符子】

霜降太阴云出鬼上如羊下如蟠石 【易通卦验】

豊山有九鍾是知霜鸣 【郭璞注曰霜降则鍾鸣故言知也出山海经】

霜降曰豺乃祭兽 【月令】

北方白鴈秋深乃来来则霜降谓之霜信 【古今诗话】

霜降则百工休乃命有司曰寒气总至民力不堪其皆入室

【霜降清风戒寒所以令人入室】

霜降后天子乃教于田猎以习五戎班马政草木黄落乃伐为炭

霜降后天子乃以尝稻先荐寝庙

霜降后合秩刍养牺牲以供皇天上帝名山大川四方之神以祠宗庙社稷之灵为人祈福
【以上月令】

霜降而妇功成嫁娶者行焉

【王肃注曰季秋霜降嫁娶始于此又诗曰将子无怒秋以为期出家语】

诗

青女横霜夜神垆盛冻天 【王宏】

天凝露以降霜兮本叶落而陨枝 【潘安仁赋】

霜降秋早寒禾穗未熟皆青干长吏明知不申破急敛暴征求考课 【杜陵叟霜降节诗】

天地之气严凝为霜候高秋于玉管体正色于金方表肃杀而顺时戒节协变化而开阴阖阳
激清风而增厉净皓月而浮光惊鸿鴈之嗷嗷落□葭之苍苍所以从地而升应律而降咏团
扇而见托班姬岂恨于长门履坚冰以是阶袁安欲惊于陋巷达重阳而首出启沍寒以先期
阴与律而相感寒与气而相资百工由是休矣万物于焉原夫日次于氐月穷于戌当青女以
纪候从白露以受质洞庭之叶惊波豊山之鍾应律云云 【崔损霜降赋】

九月

一日

徽宗诏颁朔布政自十月为始是日上御明堂颁天运政治及八年岁运历数于天下
【政和七年宋史礼志】

唐玄宗每岁荐衣于陵寝 【五月五日荐衣扇通考】

万年县女子刘凝静是日乘白马着白衣男子从者八九十人入太史局升令厅床坐勘问比
有何灾异太史令姚玄辩执之以闻是夜彗见西方天市中长五尺渐小向东行出天市
【高宗永隆二年唐书天文志】

大星陨于境内声如雷未几孟珙薨【孟珙字璞玉薨之夕大风发屋折木讎至帝震悼辍朝封吉国公谥忠襄庙曰威爱珙忠可贯金石在军中与参佐部曲论事言人人异珙徐以词组折衷众志皆愜谒士游□老校退卒壹以恩意抚接退则焚香扫地隐几危坐若萧然事外远货色绝滋味学邃于易亦通佛学自号无庵居士出宋史】

司马温公薨太皇太后闻之恸上亦感涕不已二圣皆临其丧哭之哀甚【天佑元年九月一日温公薨年六十八赠太师温国公出山堂肆考】

至元五年九月一日放鴈获者勿杀【郝经字伯常官至国子祭酒经还汴中民射鴈金明池得系帛书诗云露落风高恣所如归期回首是春初上林天子援弓缴穷海累臣有帛书后题曰至元五年云云郝经书于忠勇军营新馆其忠诚如此出元史】

金主以为天寿节【金史】

南斗降【道经】

太上老君于玉天琼房金阙上宫校集灵篇【道经】

诗

藜杖侵寒露蓬门启曙烟力稀经树歇老困拨书眠秋觉追随尽来因孝友偏清谈见滋味尔辈可忘年【杜子美九月一日过孟十二仓曹十四主簿兄弟】

二日

（口员）霜杀稼

【汉元帝永和元年九月二日先陨霜杀桑是时石显用事天下大饥五行志】

陨霜伤谷【吴孙权嘉禾三年九月朔陨霜班同书九月二日五行志】

唐德宗是日敕今方隅无事烝庶小康其正月晦日三月三日九月九日宜任文武百寮择胜地追赏为乐【贞元元年南部新书】

唐宪宗出内库罗绮犀玉金带赐裴度【元和十二年玉海】

宋太宗赐胡旦已下绿袍靴笏【兴国三年自是以为定制玉海】

波斯大商李苏沙是日进沉香亭子材拾遗李汉谏曰沉香为亭子不异瑶台琼室上怒优容之【唐敬宗本纪】

天宝中河南缑氏县仙鹤观每年九月二日夜有一道士得仙其夜皆不扃户以求上升之应张竭忠令二勇者以兵器潜觐之是夜见一黑虎入观须臾衔出一道士二人射之不中竭忠申府请弓矢大猎于太子陵东石穴中格杀数虎或金简玉策或冠披人发甚多
【白孔六帖】

太素三元君朝真日 【道经】

作墨法用鸡子白真珠麝香合以和墨宜用九月二日 【抱朴子】

三日

哀帝以是日生于大内中号干和节群臣表曰陛下九五飞龙四大应运国称利见天表殊休当诞圣之日感真人以卫室居在藩之际实羽客以献符敢循典故爰定美文 【天中记】

肃宗以景云二年是日生于东宫之别殿祥光照室即位后号天成地平节 【玄宗在东宫为大平公主所忌宫中左右持两端而潜附太平者必阴伺察事虽纤介皆闻于上太子心不自安后时方娠太子密谓张说曰用事者不欲告多息胤恐祸及此妇人密令说怀去胎药而入太子于曲室躬自煮药醺然似寐梦神人覆鼎既寤如梦如是者三太子异之以告说说曰天命也无宜他虞既而太平诛九月三日生肃宗于东宫别殿出册府】

宋英宗宣仁圣烈皇后高氏于哲宗元佑八年是日崩于崇庆宫遗诰皇帝皇帝成服三日内听政 【高后葬于永厚陵宋史】

宋皇太后崩于寿康殿 【元和八年九月三日皇太后崩于寿康殿谥宣仁圣烈皇后毕仲游代宰相作哀册文有云似郤而复凝月虽辉而如惨云云出文鉴】

宋孝宗诏明堂免奏祥瑞曰朕自有真祥瑞豊年是也百姓家给人足瑞莫大焉
【淳熙六年玉海】

诗

一道残阳铺水中半江瑟瑟半江红谁怜九月初三夜水似真珠月似弓
【白居易九月初三暮江吟】

东篱菊开风露香北山岁岁先重阳彩衣斑斑映银烛儿孙各献一般菊去年开迟排不周今年喜有两中秋一般菊荐一杯酒争征前贤祝翁寿或诵尧夫人寿篇或咏痴鱼白乐天两翁胸次虽各别六十三时俱头白如翁精采真天人应物无滞凝于神逆顺境中有定力火炼精金色愈出替得儿孙亦白头我翁绿鬓照清秋长生共说团栾话家庆年年可图尽
【彭虚寮九月初三日寿北山叔六十三古诗】

四日

光宗以是日为重明节 【宋史】

宋高宗谓辅臣曰学写字不如便写经书不惟可以学字又得经书不忘
【绍兴十三年玉海】

道人曾志静告其徒曰吾九月初四为衡山之游至期正坐而化 【志静庐陵人自少不御酒肉端毅寡言忽遇异人授以道术自是杜门辟谷十余年异人来视之曰未也又数年复至曰可也既葬有自衡山来者持志静书勉其徒学道云宋志化二年坐化出吉安府志】

五日

唐敬宗宴于宣和殿陈百戏 【宝历二年玉海】

宋太祖诏选乐工八百三十人隶太常习鼓吹 【建隆四年诏玉海】

宋英宗诏以九月是日开讲至重阳罢 【先是仁宗率二月开经筵至重午罢八月复开久至罢吕公着乞依先帝故事上从之圣政录】

梁武帝于寺中设无碍大会遣皇太子王侯朝贵等奉迎舍利供养风景明和观者百数十万人 【先武帝到寺礼拜设无碍大会大赦天下以金钵盛水泛舍利其最小者隐钵不出武帝礼数十拜舍利乃于钵内放光旋回武帝谓大僧慧念曰弟子欲请一舍利还台供养至九月五日又设无碍大会遣皇子等奉迎出梁书】

韩明府修孔子庙碑曰永寿二年岁在涪滩霜月之灵皇极之日盖九月五日也
【韩名敕字叔节出集古录】

诗

龙之来兮乘其阳跃于泉兮临高冈龙之至兮归有德符于黄兮土之色精曜曜光雄雄上不在天兮接于物下不在田兮蟠于空列四灵智称其首居五位色表其中将銜甲以无比与负舟而不同明皇家之玉气符历数于圣躬飞烟喷雾若动若顾声虽兢兢非同三尺之剑色乃煌煌下映五花之树诚帝王之嘉兆宁朝夕之可遇何蛇螭之足言凉腾黄之匪喻同翠龟之荐绿图彰大人兮告元符览史墨之言未之闻也验登殷之祀不其然乎 【景龙二年秋九月五日黄龙见于上党伏牛山之南冈留久之彰圣人之德也潘炎于是作黄龙见赋】

六日

宋仁宗哲宗徽宗亲祀明堂 【嘉泰七年元佑元年政和七年皆以九月六日亲祀出通考】

宋太祖皇太后杜氏崩太常少卿冯吉请二尊谥曰明宪皇后是日群臣奉册宝告于太庙
【建隆二年宋史礼志】

宋高宗赐邓名世出身充史馆校勘
【绍兴四年邓名世上春秋四谱六卷九月六日赐出身出玉海】

薛道光尸解作颂曰铁马奔入海泥蛇飞上天蓬莱三岛路元不在西边 【道元阆州人尝为僧号紫阳云游长安寿一百十四岁于宋光宗绍熙二年九月六日尸解作颂明年沙道昭复见紫阳于霍童山出史纂左编】

孟盛子上升 【孟名之生汉将军武帝遣入北山采药弃官学道号孟盛子受法于清灵裴真人周游名山日行百里九月六日上升出楚通志】

诗

满城风雨近重阳无奈黄花恼意香雪浪翻天迷赤壁令人两望忆潘郎

满城风雨近重阳不见修文地下郎想得武昌门外柳垂垂老叶半青黄

满城风雨近重阳安得斯人共一觞欲问小冯今健否云中孤鴈不成行 【谢无逸思潘邠老满城风雨近重阳之句九月六日去重阳四日风雨大作无逸遂用邠老之句广为三绝】

黄菊尚迟三日约碧桃已作十分开 【事文类聚】

七日

宋真宗是日宴近臣于龙图阁之崇和殿命侍讲学士邢昺赴曹州刑部尚书温仲舒宋白侍郎郭贽预焉昺视壁挂尚书礼记图指中庸篇凡为天下国家有九经事因讲大义皆有伦理在位聳听上嘉纳之群臣皆呼万岁即席赋诗二首以宠其行命群臣咸赋及行又令近臣祖送会于宜春苑 【景德四年玉海】

欧阳修作六一居士传 【欧阳修熙宁三年九月七日曰六一居士初谪□山自号醉翁既老而衰且病将退休于颍水之上则又更号六一居士客有问曰六一何谓也居士曰吾家藏书一万卷集录三代以来金石遗文一千卷有琴一张有棋一局而常置酒一壶客曰是为五尔柰何居士曰以吾一翁老于此五物之间不为六一乎客笑曰子欲逃名者乎而屡易其号此庄生所谓畏影支乎日中者也云云出文鉴】

润州鹤林寺有杜鹃花每春烂熳周宝镇浙西谓道人殷七七曰鹤林之花君能非时开否曰可乃九月七日宿鹤林寺中以俟杜鹃花开 【至九日杜鹃烂熳如春出续仙传】

全椒县有丁氏妇本丹阳人年十六适全椒民家其姑严酷笞捶不可堪九月七日缢死遂有灵江南妇女是日不作事避之呼为丁姑今祠尚在 【太平广记】

诗

怀山不能寐中宵命行轩亭午思畏景薄暮登危岵峻极踰百磴萦纡欲千盘行行遂曛黑月落天风寒羽人候中途良朋亦林端问我何所迫而尝兹险艰疲劳既云极饥渴不能言授装卧中丘幸此一室宽怒号竟永夕落枕无时安旦起辟幽户竹树青檀栾驚喜非昔睹披寻得新观淹留十日期俯仰有余欢寄语后来子勿辞行路难
【未文公先一日发潭溪夜登云谷九月初七日赋诗】

八日

唐高宗改九成宫为万年宫 【永徽二年至干封二年二月初十复为九成宫玉海】

哲宗召辅臣观谷稻于后苑 【元佑三年玉海】

刘鋹僭位是夜众星北流归朝之兆 【南汉刘鋹年十六僭伪位司天监周杰筮之遇复之豐杰曰二封皆土为应土之数五二五十也上下各五将五百五十五乎及鋹之败果五十五年又广州童谣曰羊头二四白天两至识者以羊是未之神是岁岁在辛未擒鋹天两者王师如时两之义前一年九月初八日夜众星皆北流知星者言刘氏归朝之兆鋹体质丰硕尝以珠结鞍勒为戏龙之状极其精妙以献太祖太祖曰鋹好工巧习以成性若以习巧移于治国岂至灭亡哉出宋史世家传】

王勃年十三侍父宦游是日舟次遇老叟曰子非王勃乎来日重九南昌都督命客作滕王阁序子有清才盍往赋之勃曰此去七百余里今已九月八日矣夫何复言叟曰吾助清风一席勃登舟翌日昧爽抵南昌 【摭言】

见义里有京兆人杜子休宅时有赵逸之晋朝旧事多所记录指子休园中乃晋太康龙骧将军王浚平吴之后建寺之处掘之月日如其言得石铭其铭曰晋太康六年乙巳九月甲戌朔八日辛巳后子休舍宅为灵隐寺 【伽蓝记】

诗

已是人间寂寞花解怜寂寞傍贫家老来不得登高看更甚残春惜岁华
【司空图九月八日作】

明日重阳今日归布帆丝雨暮霏霏行过鹤渚知堪住家在龙沙意有违
【皎然九月八日送萧少府归洪州】

圃畦新雨润愧子废鉏来竹杖交头柱柴扉隔径开欲栖群鸟乱未去小童催明日重阳酒相
迎自醅醕 【晚晴吴郎见过北舍杜工部作】

九日明朝是清樽强自开萧萧疏雨暗滚滚大江来野菊闲无数沙鸥静不猜何须骑马饮此
兴亦悠哉 【张栻号南轩九月八日作】

长年身外事都捐节序惊心一慨然正是山川秋入梦可堪风雨夜连天桐梢槭槭增凄断灯
烬飞飞落小圆湔洗此情须痛饮明朝试访酒中仙
【秦少游九月八日夜大风雨寄王定国】

月入秋帷病枕凉霜飞夜簟故衾香可怜吹帽狂司马空对亲春老孟光不作雍容倾座上翻
成肮脏倚门傍人间此会论今古细看茱萸感叹长 【明日重九东坡以病不赴述古召饮】

九日

岁往月来忽复九月九日为阳数两月日并应故曰重阳 【魏文帝书】

授衣之月落帽之辰 【六帖】

是日马射或云秋金之节武习射象立秋之礼 【晋书】

明宗生号应圣节 【天中记】

陈秀公生 【陈秀公名旭后改升之拜相翰墨大全】

宋武帝为宋公在彭城尝登项羽戏马台至今相承为故事

高祖登高飚馆在孙陵寺冈特呼为九日台 【以上南齐书】

唐明皇登壶关山时东北有紫云现光彩照日 【瑞应录亦出山两潞州志】

唐太宗蓬莱殿宴群臣酒赐湖南新橘 【合璧事类】

龙沙在郡北带江沙甚洁白高峻而陂有龙形俗为九日登高处 【豫章记】

九井山即殷仲文是日从桓公九井赋诗之所 【丹阳有九井山姑熟记】

望楚山旧名马鞍宋武陵王骏为刺史改为望楚山骏后龙飞人号为凤岭巔有三磴刘弘山简是殿宴赏于此【襄阳记】

登高山其形突兀旧有花药圃岁是日官属于此登临【登高山在肇庆府封川县广东志】

池州府有齐山因唐刺史齐映得名唐杜牧是日登山有江涵秋影鴈初飞之句至宋吴中复登高亦有诗当时齐映为州日从此山因姓得名却自牧之赋诗后每逢秋至菊含情【一统志】

湖山平正可容数百人坐民俗是日菊酒燕会于此山者三四百人登之见邑屋悉委江海分明【临海记】

迎秋台乃后唐庄宗时筑宋都人于此登高【开封府志】

登高岭邑人载酒囊茱游赏于此故名【汀州府志岭在宁化县】

九日冈其顶颇平可坐百人邑人登游其上【赣州府志冈在信奉县】

蒙山一峰孤秀高出众山士人登高于此【太原府志山在平定州上有晋山神祠】

紫金坛每岁郡人登高于此【怀庆府志紫金坛在太行之阳诸峰之上】

辉县有共山俗呼九山以九日登临故名昔共伯逍遥得道于此【卫辉府志】

九仙山越王无诸九日尝宴于此【九仙山一名于山世传何氏兄弟于此登仙九域志】

孟嘉为征西桓温参军温甚重之是日温游龙山僚属毕集时参佐?立着戎服有风至吹嘉帽落嘉不知觉温敕左右勿言以观其举止良久如厕温令取还之时孙盛在坐桓授纸笔命嘲之置嘉坐处嘉还见之笑请纸作答了不容思其文甚美【晋书】

南昌府帅宴僚属于滕王阁帅有婿吴子章喜为文词帅欲夸之乃宿构滕王阁序俟宾合而出为之若即席就者帅授简诸客王勃辄受是时勃年最少帅密嘱数吏伺勃下笔即口报至落霞秋水句帅矍然曰此天才也顷而文成帅大悦子章惭而退【摭言】

魏奉古授雍丘尉尝九日公燕有客草序五百言奉古言此旧文援笔到疏之草序者默然自失到座抚掌奉古徐笑曰适览记之非旧习也由是知名时挺莅汴州召奉古前曰此聪明尉耶他日持旼目令示奉古一览便讽千余言挺惊起曰仕宦且四十年未尝见此【合璧事类】

韦绶为学士以心疾还第德宗是日作黄菊歌顾左右曰安可不示韦绶即遣使持赐绶遽奉和附进【唐书】

宁康三年是日上讲孝经谢安侍坐陆纳卞耽执读谢石袁宏执经车胤王温摘句【埤史】

刘梦得欲用（鱼羔）字作九日诗以不见经传不复作宋子京有九日食（鱼羔）咏曰飏馆轻霜拂曙袍糗餐花饮斗分曹刘郎不敢题（鱼羔）字虚负诗中一世豪遂为绝唱【闻见录】

唐萧瑀不解射是日赐宴较射矢俱不中鹄欧阳询咏之曰急风吹缓箭弱手御强弓欲高翻复下应西还更东借问谁为此只应是宋公【太平广记】

重阳日当有疏风冷雨【荆楚岁时记】宋康伯可在翰苑曰尝重九遇雨奉敕撰词伯可口占望江南一阙进云重阳日阴雨四垂垂戏马台前泥拍肚龙山会上水平脐直浸到东篱茱萸【莢胖】菊蕊湿滋滋落帽孟嘉寻弱笠休官陶令觅蓑衣两个一身泥【山堂肆考】

李义山乃令狐楚故吏楚子绹继相殊不展分重阳日义山诣绹厅事题云曾共山翁把酒危霜天白菊正离披十年泉下无消息九日尊前有所思莫学汉臣裁苜蓿还同楚客咏江篱郎君官重施行马东阁无由得再窥绹见诗乃闭此厅终身不处【北窗琐言】

谢无逸以书问潘大临近作新诗否答曰秋来景物件件是佳致昨日清卧闻搅林风雨声遂起题壁曰满城风雨近重阳忽催租人至败意止此一句奉寄

宋韩忠献尝遇重阳置酒私第惟欧阳文忠公与一二执政而苏明允乃以布衣参其间都人以为异礼席间赋诗明允有佳节屡从愁里过壮心还倚醉中来之句其志气不少衰如此按明允苏洵字【以上山堂肆考】

魏武帝与鍾繇书曰九月九日草木遍枯而黄菊纷然独秀今奉一束【白孔六帖】

僧皎然九日与陆羽煎茶东坡诗明年桑苎煎茶处忆着衰翁首重回按皎然名清昼唐湖州人谢灵运之孙羽字鸿渐号桑苎翁【山堂肆考】

唐明皇重阳日猎沙苑射中飞鴈带箭去益州道观有道士徐佐卿寄寓忽自外持一箭归曰吾行山中为飞箭所伤已无恙因挂箭于壁书其日月且曰后十年箭主到此付之后明皇幸蜀至观乃见箭【集异纪】

穆宗纳后欲用九月九日是忌月范汪问王彪之荅田礼无忌月不敢以所不见便谓无之博士曹耽荀纳等并谓无忌月之文不应有妨王洽曰若有忌月当复有忌岁【晋书】

乐游园汉宣帝所立唐长安中太平公主于原上置亭游赏其地四望宽敞每重阳士女游戏就此祓禊【三月上巳亦然】

九日登高幄幕云布车马填塞绮罗耀日馨香满路朝士词人赋诗【西京杂记】

陶潜九日无酒坐宅边东篱下菊丛中摘菊盈把未几望见白衣人至乃王弘送酒便即酣饮【续晋阳秋】

袁师德给事高之子九日出（鱼羔）谓坐客曰某不忍食俛首久之谓音似父名【隋唐嘉话】

汉戚夫人侍儿贾佩兰后出为扶风人段儒妻说在宫时九月九日佩茱萸食蓬饵饮菊花酒令人长寿【西京杂记】

唐尹氏姿容甚丽性识敏慧不因保母而妙善唱歌因重阳与群女戏登南山文峰而同辈命之歌乃颦眉缓颊怡然一曲声达数十里【江南野史】

二社重阳尚食（鱼羔）而重阳为盛大率以枣为之或加以栗亦有用肉者【岁时杂记】

都人重九各以粉面蒸（鱼羔）相遗上插剪彩小旗糝钉果实如榴栗银杏松实之类【梦华录】

洛阳人家重阳作迎凉脯羊肝饼佩瘦水符【金门岁节记】

日精治墙皆菊花茎之别名九月律中无射而数九俗尚九日而用候时之草也【风土记】

茱萸为辟邪翁菊花为延寿客故重九日假此二物以消阳九之厄【仙书】

采菊花与伏苓松脂久服令人不老【太清草木方】

汝南桓景随费长房游学长房谓曰九月九日汝家有厄急去令家人作绛囊盛茱萸系臂登高饮菊花酒可解此厄归如言还见鸡犬牛羊一时暴死长房闻之曰代之矣九日登高饮酒带茱萸囊始此【续齐谐记】茱萸椒也至重九成熟赤色可采费长房云插头髻辟恶【风土记】

张道陵汉永寿二年九日与夫人雍氏登云台峰白日升天时年一百二十三岁【道陵初入蜀居鹤鸣山炼丹修道感老君授以秘录保宁府志】

王可交华亭人业耕钓一日擢舟入江忽见中流有彩舫载七道士远闻有呼可交名者顷之

舟近舫侧呼可交登舫一道士曰好骨相合为仙一道与之二栗食之甘如饴命黄衣送上岸觅所乘舟不得乃在天台山瀑布寺前僧迎问之可交曰今早离家盖三月三日僧言九月九日已半年余矣后绝谷往四明山不出【松江府志】

蜀中落魄仙姓张尝卖鼠药于梓州狱吏王昌遇者市药以归鼠食之皆翼而飞后昌遇至泸又遇之乃易其药饵之遂名昌遇为易玄子取马令乘以归焉乃龙也归梓后以九月九日飞升至今初八夜即其地为药市【泸州志】

德贤上犹人号栖真尊者宋治平间结庵□山习禅元丰五年九日忽自图其容于壁间对众说偈云片云归去本无心流水下山非有恋言讫而化弟子收灵骨建塔凡有祷屡应焉【江西南安府志】

诗

九日重阳节开门有菊花不知来送酒若个是陶家【王勃】

九月九日眺山川归心归望积风烟他乡共酌金花酒万里同悲鸿鴈天【卢照邻】

节过重阳菊委尘江边病起杖扶身不知此日龙山会谁是风流落帽人【赵嘏寄韦舍人】

欲从携手登高去一到门前意已无那得更将头上发学他年少插茱萸【朱放九日期登山不得往因赠杨凝】

无限青山行已尽回看忽觉远离家逢高欲饮重阳酒山菊今朝未见花【张籍重阳日至峡道】

黄花紫菊傍篱落摘菊泛酒爱芳新不堪今日望乡意强插茱萸随众人【杨衡九日作】

江涵秋影鴈初飞与客携壶上翠微尘世难逢开口笑菊花须插满头归【杜牧九日】

莫将边地比京都八月严霜草已枯今日登高樽酒里不知能有菊花无【普□九日】

赐酒盈杯谁共持宫花满地独想想思思只傍花边立尽日吟君咏菊诗【白居易禁中九日对花酒忆元九】

蓓庭萧瑟故人稀何处登高且送归今日暂同芳菊酒明朝应作断蓬飞【王之涣九日送别】

怜君卧病思新橘试摘犹酸亦未黄书后欲题三百颗洞庭须待满林霜

【韦应物故人重九日求橘】

独在异乡为异客每逢佳节倍思亲遥知兄弟登高处遍插茱萸少一人 【王维】

天边今日又重阳陇树红飞鴈叫霜来日预期扶宿酒未应篱菊减秋香 【宇文虚中】

今日潘怀县同时陆浚仪坐开桑落酒来把菊花枝天宇清霜净公堂宿雾披晚酣留客舞鳧
鵠共差池 【子美重九日杨奉先会白水崔明府】

缀席茱萸好浮舟菡萏衰百年秋已半九日意兼悲江水清源曲荆州此路疑晚年高兴尽摇
荡菊花期 【子美九日曲江曲】

可讶东篱菊能知节候芳细枝青玉润繁蕊碎金黄爽气浮朝露浓姿带夜霜泛杯传寿酒应
共乐时康 【九日释广宣菊花咏应制】

瑞塔千寻起仙輿九月来茱房陈宝席菊蕊散花台御气鹏霄迥升高凤野开天歌将梵乐空
里共徘徊 【李峤九日登慈恩寺浮图应制】

老去悲秋强自宽兴来今日尽君欢羞将短发还吹帽笑倩傍人为正冠蓝水远从千涧落玉
山高并两峰寒明年此会知谁健醉把茱萸仔细看

风急天高猿啸哀渚清沙白鸟飞回无边落木萧萧下不尽长江滚滚来万里悲秋常作客百
年多病独登台艰难苦恨繁霜鬓潦倒新停浊酒杯 【以上工部】

今日云景好水绿秋山明携壶酌流霞攀菊泛寒荣地远松石古风扬弦管清窈觴照欢颜独
笑还自倾落帽醉山月空歌怀友生 【李太白九日攀音蹇说文攀拔取也】

十日

宋神宗徽宗高宗亲祀明堂 【熙宁四年宣和三年绍兴十年俱九月十日通考】

唐高宗以是日小重阳百僚追赏帝赋诗以赐 【麟德十年艺文志】

京师士庶多于重九后一日再会谓之小重阳 【岁时记】

唐文宗太和八年是日召李宗闵授中书侍郎平章事代李德裕出德裕为兴元节度使德裕
自陈恋阙不愿出藩追敕守兵部尚书宗闵奏制命已行不宜自便

【德裕字文饶赵郡人父吉甫德裕幼有壮志苦心力学尤精西汉书旧唐书】

东坡云九月十日君猷置酒秋香亭有拒霜独向君猷开坐客喜笑以为非使君莫可当作定风波词以纪之词曰两两轻红半晕腮依依独为使君回若道使君无此意何为双花不向别人开但看低昂烟雨里不已劝君休诉十分杯更问樽前狂副使来岁花开时节与谁来
【山堂肆考】

红巾犯省治 【元至正壬辰年湖州黑气亘天雷电异常雨以物若果核与雨杂下五色间错光莹坚固破其实食之似松子仁人皆曰娑婆树子此三月时也至九月十日红巾犯省治雨核之地悉被兵火后又湖州陷仪凤桥四向焚戮特甚此盖雨核时桥四向为最多后池州亦然池州之祸尤惨也出辍耕录】

树癭裂得婴儿 【巴而木的斤亦都护亦都护者高昌国主号也先世居畏儿之地有和林山二水出焉一夕有神光降于树在两河之间人即其所而候之树乃生癭若怀妊状九日十日而树癭裂得婴儿者五上人收养之其最稚者曰不可罕既壮遂能有其民人土田而为之君长传三十余君是为玉伦的斤数与唐人相攻战久之议和亲以息民罢兵于是唐以金莲公主妻的斤之子葛历出史纂左编】

诗

九日不出门十日见黄菊灼灼尚繁英美人无消息 【贾岛九月十日对菊】

昨日登高罢今朝更举觞菊花何太苦遭此两重阳 【李白】

节去蜂愁蝶不知晓庭和露折残枝自缘今日人心别未必秋香一夜衰
【郑谷题九月十日菊】

汉江天外东流去巴塞连山万里秋节过重阳人病起一枝残菊不胜愁
【陈羽九月十日即事】

柳吴兴近无消息张长公贫苦寂寥唯有角巾沾雨至手持残菊向西招
【李益九月十日雨中过张伯雄期柳雄未至】

晚雨秋阴酒乍醺感时心绪杳难平黄花冷落不成艳红叶飘扬带鼓声背世返能厌俗态偶缘犹未望多情自从霜鬓班班白不学安仁却自惊 【李后主九月十日偶书】

十一日

禁苑树无风而摧折连根而拔者不知其数至十四日乃止
【唐宪宗元和十五年九月十一日出五行志】

宋真宗宴近臣于长春殿饯河阳三城节度使张旻赴任以王旦在殡不举乐
【天禧二年宋史礼志】

翰林侍读学士李淑以是日出守河州宋仁宗制五言六韵诗赐之 【嘉佑二年玉海】

宋王旦卒年七十四 【王公旦以明道建元之初抗章引年朝廷不欲夺其志许以本官致仕命一子自布衣试秘书省校书郎盖所以享耆德而嘉廉退也以景佑二年九月十一日卒滕宗谅作志铭铭曰建水之灵武夷之美猗欤王公才为时生贤推仕汉帝选登羸直如朱经莹若壶冰守藩方入出趋台阁德化优柔文锋错落播在民谣赓于圣作辞绝累句言无宿诺致致于君归全返真雅合天道光昭缙绅有典有则不缙不磷毒鍾玉福庆延后昆云云】

谢迭山与魏容斋书曰某自九月十一日离嘉禾即不食烟火 【书云某所以宁为民不为官者忠臣不事二君烈女不更二夫大元以礼招徕上有尧舜下有巢由上有汤武下有随光夷齐夷齐之死而不仕者正欲使天下万世知大兀之量可为尧舜汤武能使谢某不失臣节某自九月十一日离嘉禾即不食烟火今则并勺水一果不入口矣惟愿速死出全编】

梓州罢药市 【蜀梓州易玄子以九日上升今梓州每于初八夜易玄子龙池中买药谓之药市成都九日为药市人尽入市吸药气九日雨则仙人在其中宋燕肃知郡事展三日至十一日而罢出事文类聚】

诗

灯光欲凝不惊风月色初晴若发蒙羁客不眠诗未就游人半醉夜方中荒城熠耀相明灭野水芙蓉乱白红知欲访僧同寂寂应怜病懒畏熈熈宿雨初干试火城端居无计伴游行厌看门外繁星动想见僧窗一点明老罢逢春无乐事梦回孤枕有乡情重因佳句思樊口一纸家书百镒轻 【苏子由九月十一日书事】

十二日

宋仁宗改元嘉佑 【至和三年九月十二日出宋史】

唐代宗大历元年鱼朝恩奏以先所赐庄为章敬寺以资章敬太后冥福卫州进士高郢是日上书曰古之明王积善以致福不费财以求福修德以消祸不劳人以禳祸今兴造急促昼夜不息愁痛之声盈于道路以此望福臣恐不然陛下回正道于内心求微助于外物徇左右之过计伤皇王之大猷臣窃为陛下惜之 【出郢集】

宋孝宗幸秘书省受朝右文殿移御秘阁观累朝御书上手以光尧太上皇帝所书琴赋示群臣 【淳熙五年九月十二日玉海】

东坡在儋耳是日与客饮酒小醉信笔书曰吾始至南海环视天水无际凄然伤之曰何时得出此岛耶已而思之天地在积水中九州岛在大瀛海中中国在少海中有生孰不在岛者覆盆水于地芥浮于水蚁浮于芥茫然不知所济少焉水涸蚁即径去见其类出涕曰几不复与子相见岂知俯仰之间有方轨八达之路乎念此可以一笑【长公外纪】

诗

独步溪头夜初寂扫空尘念心清凉月明眼底见秋色境静鼻根归桂香【王十朋九月十二夜作自序云时独步梅溪翫月人迹悄然秋色满眼微风不动岩桂自香初不劳思偶成一绝盖心境中静时语也】

玉轴牙签焕宝章簪绅侍列映秋光宴开芸阁儒风盛坐对蓬山逸兴长稽古有文惭菲德礼贤下士法前王欲臻至德观熙洽更罄嘉谋为赞襄【淳熙五年九月十二日孝宗临幸秘省赐丞相史浩以下官诗】

麟阁龙旗日月章中兴再见赭袍光仰观焜耀人文盛始识扶持德意长功利从今卑管宴浮华自昔陋卢王愿将实学酬天造敢效明河织女襄【吕伯恭九月十二日和孝宗韵】

十三日

宋徽宗孝宗亲祀明堂【宣和七年淳熙九年俱九月十三日通考】

邢昺知曹州宋真宗赐宴宜春苑【景德四年九月十三日赐宴出会要】

潞州献瑞应图唐玄宗是日谓宰臣曰朕在潞州靖共职业不知此事昔史馆惟书灾异令王者修德故春秋不书祥瑞惟记有年遂敕天下毋得奏祥瑞【开元十三年】

宋仁宗御阁召贾昌期讲干卦用九曰外以刚健决事内以谦恭应物诏褒荅以卦义付史馆【以上王海皇佑四年】

癸亥十年九月乙亥朔十三日丁亥北燕伯使使者蒙獠册命大兰王曰惟君禀太阴之沉精标群形于玄质体肥腩而洪茂长无心以游税资参养于人主虽无爵而有秩此君之纯也君昔封国殷商号曰豕氏业隆当时名垂后世此君之美也白躋彰于周诗涉波应乎隆象歌咏垂于人口经千载而流响此君之德也君相与野游唯君为雄顾群数百自西徂东俯歆沫则成雾仰奋鬣则生风猛毒必噬有敌必攻长驱直突阵无全锋此君之勇也【大兰王九锡文宋袁淑】

马希萼遣朗兵及蛮兵与刘彦（王昝）战于湄州彦（王昝）还走士卒溺死者数千人【后汉隐帝干佑二年楚王希广以朗州与山蛮入寇诸将屡败忧形于色刘彦（王昝）言于

希广曰朗州兵不满万焉不满千都府精兵十万何忧不胜愿假臣兵万余人战舰百十五艘径入朗州縛马希萼以解大王之忧王悦以彦（王侑）统兵入朗州父老争以牛酒犒军曰百姓不愿从乱望都府之兵久矣九月十三日希萼遣兵战于湄州彦（王侑）还走楚王希广闻之涕泣出湖湘故事】

元人郑仲涵生 【仲涵生于泰定丙寅九月十三日仲涵学举子业场口不合乃弃去潜心秦汉诸文章未几人弃去取群圣之经而专温之穷道德生命之秘质于濂洛关闽之说母病逾年仲涵不离侧夜则泣祷于天请以身代母病华思西域瓜既食而卒仲涵终身不忍食瓜出宋濂集】

董文炳是日疾笃洗沐而坐召文忠等曰吾以先人死王事恨不为国死边今至此命也愿董氏世有男能骑马者勉力图报则吾死瞑目言毕就（衽去壬改尤）卒 【文炳字（汀去丁改彦）明警敏善记诵自幼俨如成人爲橐城令明于听断以恩济威吏抱案求署字不敢仰视后知枢密院八月天寿节礼成赐宴帝命坐论宗室大臣曰文炳功臣也理当坐后文炳疾敕赐御医九月十三日疾笃就（衽去壬改尤）卒出北史】

十四日

宋太祖是日幸阅士卒骑射张乐赐从官饮 【干德四年】

宋真宗是日皇太子朝谒太庙乘金辂 【太宗即仁宗天禧二年以上玉海】

唐神尧拜河东节度使领大使击龙门贼母端儿九月十四日夜过寒津口时明月方出白露初澄于小桥下有二人语言明日母大郎死神克因驻马问二人再拜泣言某一人汉兵也昨奉东岳命兵神付龙门助将军讨贼某二人埋骨在此因少憩亦自感伤欲先报于将军耳神尧讶其言诘其姓氏俱笑忽不见明日破贼发七十三矢皆中而复得其矢信乎圣王所向至灵亦先为佐佑焉 【柳宗元龙城录】

诗

去年秋雨时我在广陵归今年中山去白首归无期
【东坡以端明侍读学士出知定州九月十四日雨中作示子由】

十五日

唐太宗灵州地震有声如雷 【贞观二十年五行志】

宋哲宗迺英殿讲论语终篇赐执政讲读史官燕于东宫又遣中使赐御书诗各一首东坡得紫薇花绝句其词曰丝纶阁下文书静钟鼓楼中刻漏长独坐黄昏谁是伴紫薇花对紫薇郎

【元佑二年九月十五日昱日各以表谢又进诗一篇东坡集】

宋孝宗淳熙十四年是日陈贾作御史台厅壁记曰宋朝三院御史皆得论政事糾官邪元豐紹聖着于令甲其用峻故其选精一时列职其间悉繇天子亲擢太上中兴大明国是耳目所寄必惟共人绍兴更化诏除公正之士以革締交合党之风盖欲遵用忠纯体国之人以成笃厚之政先后丁宁昭若日月龙蛇飞动琬琰光辉圣意相传家法不改实我宋维持纪纲之盛事云云 【事文类聚】

羊角哀梦左伯桃云与荆将军墓邻数苦我九月十五日幸兵于冢上助我 【春秋燕人羊角哀与左伯桃为死友闻楚王贤一人同往见之至梁山道遇雨雪计不能俱全伯桃乃并衣粮与角哀入空树中饿死角哀至楚为上大夫乃告楚王备礼葬于莆塘在溧水县四十里一夕角哀梦伯桃云与荆将军墓邻数苦我九月十五日幸兵于冢上助我哀泣曰冢上安知汝之胜负开棺自刎而死就葬于墓中出山堂肆考】

范式字巨卿与汝南张伯元为友二人春别京师以暮秋为期伯元是日杀鸡以待巨卿母曰相去千里汝何信之也言未卒而巨卿至 【汉书】

朱熹生 【熹以建炎四年九月十五日午时生剑南尤溪之寓舍幼颖悟庄重能言父指示曰此天也问曰天之上何物父异之就传授以孝经一阅封之题其上曰不若是非人也尝从群儿戏沙上独端坐以指画沙视之八卦也少长厉志圣贤之学于举子业初不经意晚年以野服见客朱熹字仲晦出史纂左编】

元人白斑卒 【斑出刺得宜文化大行后谢事养痾海陵远近学徒担簦相从者殆无虚日与韵间胜友曳朮游衍御杯赋诗所居西湖有泉自天竺来及门而汇榜之曰湛洲因以自号晚归老栖霞又号栖霞山人文宗天历元年九月十五日卒斑字庭玉年八十一出宋濂集】

诗

八月繁云连九月两回三五晦漫漫一年怅望秋将尽不得嫦娥正面看
【徐凝九月望夕雨】

江南地暖少严冬九月炎凉正得中溪上玉楼楼上月清光合在水晶宫
【阳汉公九月十五翫月】

白露下众草碧空卷微云孤光为谁来似为我与君水天浮四座河汉落酒樽使我冰雪肠不受曲药熏尚恨琴有弦出鱼乱湖纹哀弹本旧曲妙耳非昔闻良时失俯仰此见宁朝昏悬知一生中道眼无由浑 【东坡九月十五夜观月听琴西湖示坐客】

十六日

唐玄宗敕诸郡风伯坛置在社坛之东雨师坛于社坛之西其祀风伯请用立春后丑祀雨师
请用立夏后申 【天宝四载九月十六日敕通考】

宋太祖诏于东京旧城南建武成王庙与国学相对命左谏议大夫崔颂中使卢尔德岳董其
役乃命颂检阅唐末以来谋臣名将勋绩尤著者具名以闻
【建隆三年九月十六日诏玉海】

杨廷秀曰予于绍兴壬子九月十六日以废疾至自金陵深念平生无他好独好泉石而所居
乃土山安所得石忽有遗予以怪石予甚喜亟召匠钉埴为假山友人王才臣见之谯予曰先
生居真山而又为假山将谁给予笑曰予敢给人聊以自给耳才臣曰有石而无泉非阙与予
偶思去假山三十步而近旧有一泉而湮即命浚焉泉冽以猛因接筒引之又于假山之前甃
一小方塘植以芙蕖杂以荇藻云云 【泉石膏肓记】

程伊川以白夹被被体坐竹床 【伊川年七十四得风痺疾大观元年九月十六先生以白夹
被被体坐竹床与尹焞举手相揖焞还次日有叩门者报先生卒出明道集】

唐人刘助尸解 【助少时有二道士访其庐与之谈甚异之二道授以餐松服石之法又谓助
曰偕来度汝君勿泄吾王屋真人也后服丹饮气九月十六日尸解兄瞻在京师其日遇一道
士问曰弟助已为仙矣忽失所在后郴人蒋椿往陕西见助从一道士策驴而行此事七月二
十五日亦载刘助字符德出郴阳仙传】

诗

绣裳画袞云垂地不作成王剪桐戏日高黄伞下西清风动槐龙舞交翠壁中蠹简今千年漆
书科斗光射天诸儒不复忧吻燥东宫赐酒如流泉酒酣复拜千金赐一纸惊鸾回凤字苍颜
白发便生光袖有骊珠三十四归来车马已喧阗争看银钩墨色鲜人间一日转万口喜见云
章第一篇玉堂昼掩文书静铃索不摇钟漏永莫言弄笔数行书须信时平有主圣犬羊散尽
沙漠空撻烽夜到甘泉宫似闻指挥筑上郡已觉谈笑无西戎丈思天子师文母终闭玉关辞
马武小臣愿对紫薇花试草尺书招赞普

【元佑二年哲宗先一日赐紫薇花绝句东坡九月十六日进诗谢】

十七日

肃宗车驾幸彭原命郭子仪赴天德军伐叛蕃
【至德元载九月十七日幸彭原出实录汾阳家传云驾幸在十九日非也】

宋真宗御崇政殿试贤良方正 【景德三年出选举志】

唐懿宗是日贼四面斩关而入时昏雾极甚咫尺莫辨 【咸通九年贼逼徐州或劝崔彦曾奔

兖州彦曾怒曰吾为元帅陷而死职也立斩言者居民鼓噪动地民在城外者贼抚慰无所侵扰由是人争归之民助贼推草车塞门而焚之九月十七日贼斩关而入出实录】

欧阳询上艺文类聚

【唐高祖武德七年九月十七日给事中欧阳询奉敕撰艺文类聚成上之出会要】

元国子博士吴师道葬 【师道少勇于学文辞惊人许文懿公以朱子之学淑学者师道持所悟识造门质难许公礼重之于至治元年举进上至正四年九月十七日葬铜山师道字正传兰溪人出宋濂集】

程伊川卒 【文观元年九月十七日卒得风痺疾出明道集】

淮南副使陆洎卒 【陆洎与李承嗣最善承嗣与诸客访之洎曰明年此月当与诸君长别矣承嗣问其故洎曰吾向梦人以骑召未止太明寺西数里至一大府署曰阳明府下马入一室中有顷吏引立阶下有二录衣使捧一案案上有书一紫衣取书宣云洎三世慈孝功成业就冥后受此官司阳明府侍郎判九州岛都监来年九月十七日本府上事语毕复以骑送归奄然遂悟天命已定不可改矣客等至次年九月十六日候之曰君昨年言明日当上事今何无恙洎曰明日当行承嗣讥其为妖洎曰君与我有缘他日当十邻明日十七日果卒葬于菜蔓湾承嗣为楚州刺史葬洎墓之北出稽神录】

天曹增福相公生 【翰墨大全】

诗

惟彼神蓍生而有知用知不测明以稽疑擢九尺之纤干伏千年之宝龟德圆而神兮无幽不及其生三百兮其用五十惟圣人之观象乃神动而鬼八列八卦以效变翹孤莖而子立蓍之立兮发其祥吾君得之尊以光明乎太极演彼归藏因卜祝之符瑞应天人之会昌 【景龙二年九月十七日上使韩从礼蓍筮卦未成蓍自立从礼曰大人之瑞也潘炎于是作神蓍立赋】

十八日

赤气竟天其光烛地经三日乃止 【唐景龙元年天文志】

亲祀明堂 【宋高宗绍兴元年通考】

唐贞观二十三年是日太尉无忌奏请视朝坐日高宗曰朕即大位自今已后每日常坐【通典亦出事物纪原】

宋孝宗幸玉津园宴射赋七言诗赐曾怀以下与宴者皆和 【淳熙元年玉海】

北斗星降 【道经】

忌远行 【云笈七签】

诗

锡宴朝野洽追欢尧舜情秋堂丝管动水榭烟霞生黄花媚新霁碧树含余清同和六律应交泰万宇平睿藻下中天湛恩阐文明小臣谅何幸亦此彰华英
【权德舆九月十八日奉和圣制因书所怀】

十九日

齐东昏侯永元元年是日地五震有童谣云野猪虽嗥嗥马子空间渠不知龙与虎饮食江南墟七九六十三广莫人无余乌集传舍头今汝得宽休但看三八后摧折景阳楼 【识者解云陈显达属猪崔慧景属马非也东昏侯属猪马子未详梁王属龙萧颖胄属虎崔慧景攻台顿广莫门死时年六十三乌集传舍即所谓瞻乌爰止于谁之屋三八二十四起建元元年至中兴二年二十四年也摧折景阳楼亦高台倾之意也今汝得宽休言天下将去乃得休息也出南齐书】

宋太宗幸金凤园 【建隆四年九月十九日出会要】

唐懿宗咸通十年庞勋是日死先闻里小儿竞歌之曰得节不得节不过十二月即庞勋九年十月十七日作乱十年九月十九日就戮通其闰月计之正一岁而灭 【庞勋袭宋州陷其南城刺史郑处冲守其北城贼知有备舍去度汴南掠亳州沙陀追及之勋引兵循涣水而东将归彭城为沙陀所逼官军大集数贼万余人皆溺死降者千人九月十九日勋亦死而人莫之识数日乃获其尸贼宿迁等诸寨皆杀其守将而降初庞勋之求节也必希岁内得之小儿乃歌曰得节不得即不过十二月计勋作乱至就戮之日一岁而灭出彭城纪乱】

宋高宗是日言者请依雍熙故事赐新进士儒行篇以励士检有旨添赐中庸送秘府校勘正字张（山匀木）校中庸高闾校儒行篇阅奏儒行虽间与圣人之意合而其词类战国纵横之学盖汉儒杂记决非圣人格言止赐中庸庶几学者知圣学渊源奏可 【绍兴五年宋史】

吴中有一书生皓首称胡博士教授诸生忽不见至九月十九日士人相与登山游观闻讲书声命仆寻之见空冢中群狐罗列见人即走老狐独不去是前皓首书生也 【搜神记】

九月十九日日展重阳 【事文类聚三月十三日日展上巳】

北斗大帝下降 【道经】

二十日

唐代宗吐蕃寇泾原节度使高晖以城降之 【代宗广德元年吐蕃入寇边将告急程元振皆不以闻九月二十日吐蕃寇泾原高晖为之卿导诏以雍王适为关内元帅郭子仪为副元帅出镇咸阳以御之子仪闲废日久部曲离散至是召募得二千骑而行至咸阳吐蕃帅吐谷浑党项民羌二十余万众弥漫数十里自司竹园循山而东子仪使判官中书舍人王延昌入奏请益兵凤翔府盩厔县有司竹园出段公家传】

王师讨之是日城陷 【英显王庙在梓州梓潼县本梓潼神也旧记曰神本张亚子仕晋战死而庙存唐明皇狩蜀神迎于万里□追命左丞相咸平中益卒为乱王师讨之忽有人呼曰梓潼神遣我来九月二十日城陷□克州以状闻故命追封英显王出事物纪原】

东坡是日别南北山道友去杭与杨元素同舟而陈令举张子野皆从之 【东坡熙宁七年杭州通判以子由在济南求为东州守既得请九月二十日去杭别南北山道友长公外纪】

宜斋戒沐浴鸡鸣时沐浴令人辟兵 【风土记】

天帝游东井 【道经】

诗

岐阳九月天微雪已作萧条岁暮心短日送寒砧杵急冷官无事屋庐深愁肠别后能消酒白发秋来已上簪近买貂裘堪出塞忽思乘传问西林 【东坡九月二十日怀子由】

参横斗转欲三更苦雨终风也解晴云散月明谁点缀天容海色本澄清空余鲁叟乘桴意粗识轩辕奏乐声九死南荒吾不恨兹游奇绝冠平生 【东坡九月二十夜渡海】

二十一日

唐高祖诏置常平监官以均天下之货 【武德元年九月二十二日诏出会要】

武则天永昌元年是日敕免张楚金等死陈子昂上疏曰九月二十一日敕免张楚金等死初有风雨变为景云臣闻阴惨者刑也阳舒者德也圣人法天天亦助圣云云 【子昂疏】

宋哲宗御迓英阁召讲读官讲书读宝训赐御书诗一首上书姓名于后
【元佑五年九月二十一日玉海】

元人许有壬卒【有壬幼颖敏读书一目五行尝阅衡州淨居院碑文千言一览辄背诵无遗元英宗至治二十四年九月二十一日卒有壬历事七朝垂五十年遇国家大事无不尽言皆一根至理而曲尽人情当权臣恣睢之时稍忤意辄诛窜随之有壬绝不为巧避计有壬善笔札工辞章欧阳玄序其文谓其雄浑閎隲涌如层澜谥曰文忠有壬字可用年七十八出元史许有壬传】

菩提达磨造于南海【菩提达磨祖师者南天竺国香至王第三子达磨者通大之义也达磨往震旦作佛事造于南海实梁晋通七年庚子岁九月二十一日也出左编】

二十二日

宋高宗内出亲书大有大畜二卦与孟子之言七篇凡十扇遣中使宣示宰执【建炎二十九月二十二日玉海】

杯渡僧卒于赤山湖【杯渡者不知姓名尝乘杯渡水故世人呼此僧为杯渡有齐谐妻病笃杯渡一咒□愈元嘉三年九月二十二日辞谐卒于赤山湖谐迎尸还葬至四年有一僧来云是杯渡弟子家师欲来相见荅曰杯渡已死何得复来顷之杯渡□谐大惊礼拜之出高僧传】

诗

月入千江体不分道人非复人间人钟山南北安禅地香火他时共两身【王荆公九月二十二日夜梦高邮土山道人赴蒋山北□云峰为长老已而坐化复出山南兴国寺与衍公同卧一榻片竹数寸土绕生丝属荆公藏之荆公弃弗取】

二十三日

亲祀明堂【宋神宗元豐三年通考】

宋真宗召宗室近臣对清景殿内出御制赐皇太子元良述六艺箴各一卷又作七言十韵诗赐宰臣寇准等遂宴于殿内【天禧二年玉海】

宋仁宗奉天书至长春殿【宋真宗干兴元年崩仁宗即位召辅臣赴会庆殿见先帝生平服御玩好之具帝与辅臣议及天书皆先帝尊道膺受灵贶之瑞不可久留人间宜于永定陵奉安九月二十三日奉道天书至长春殿帝上香再拜奉辞出宋史礼志】

诗

才名旧楚将妙略拥兵机玉垒虽传檄松州会解围和亲知计拙公主漫无归青海今谁得西

戎实饱飞【广德元年九月二十三日杜工部在阆州祭房管作此警急诗至十月吐蕃陷京师十二月吐蕃陷松维州出年谱】

二十四日

周世宗生百寮上表曰寿丘降迹爰符出震之期里社应祥式契乘干之运候属澄河时当降圣鹄水鹈林望尧云而献祝柏圭谷璧趋禹会以骏奔请以二十四日为天清节所冀金相玉振负宝历以弥新地久天长焕文编而不朽从之【天中记】

宋太宗幸潜龙园临水谓近臣曰朕不至此已十年今池边之木已成林矣
【淳化三年九月二十四日出会要】

庾翼于康帝即位欲率众北伐是日行至夏口上表曰臣以胡寇有弊亡之势颺率所统致讨山北并分见众略复江夏数城臣等以九月十九日发武昌以二十四日达夏口辄简卒搜乘停当上道【翼字雅恭庾亮之弟也风仪秀伟少有经纶大略与殷浩并才名冠世翼欲北伐上疏于康帝曰贼季龙年已六十奢淫理尽丑类怨叛又欲决死辽东孰虽骁果未必能固若比无掣肘之虏则江南将不异辽左矣辄率南郡太守王愨期江夏相谢尚寻阳太守袁真西阳太守曹据等精锐三万风驰上道并发所统六州奴及车牛驴马百姓嗟怨帝及朝士皆止之翼不从违诏九月二十四日辄行至夏口复上表出晋书庾异传】

二十五日

宋徽宗颁鹿鸣宴乐章五曲乐育人才贤贤好德烝我髦士利用宾王云云
【政和二年音乐志】

范希文以是日作岳阳楼记记有霪雨霏霏连月不开阴风怒号浊浪排空日星隐曜山岳潜形商旅不行檣倾楫摧薄暮冥冥虎啸猿啼云云

天符节【翰墨大全】

无诤慧初常德府德山僧是日上堂顾视大众曰见么在天成象在地成形在日月为晦为朔在四时为寒为暑鼓之以雷霆润之以风雨又曰一趯趯翻四大海一拳拳倒须弥山佛祖位中留不住又吹渔笛汨罗湾九月二十五聚头相共举瞎却正法眼拈却云门普德山不会说禅赢得村得社舞呵呵呵啰哩遂起舞下座【楚通志】

南极长生大帝降现【道经】

诗

兵作洛阳千里伴老刘因疾驻行轩今朝独自山前立雪满三峰倚寺门
【元祜与太白同之东洛至栎陟太白染疾驻行祜九月二十五日至华岳寺雪后望山】

二十六日

宋太宗诏来年正月亲耕 【雍熙四年九月二十七日诏出通典】

海陵王之子广阳是日生 【滕王广阳母南氏本民家婢随元妃入宫海陵王幸之有娠正隆二年九月二十六日生广阳十月满月海陵今施在京贫民出金史】

右羽林大将军建昌王攸宁除纳言着紫带金龟 【唐武后天授二年攸宁借紫衫金带九月二十六日着紫带金龟则借紫之制自则天攸宁始也出事物纪原】

任宗谊以是日葬须城县
【宋大观二年葬宗谊字仲宜除知淄州借紫加勋骑都尉载墓铭】

南斗星下降 【道经】

二十七日

宋明帝是日白气见东南长二丈形状长大猛过彗星占曰除旧布新易主之象
【太始三年南齐书天文志】

宋太宗皇太子谒太庙乘金辂
【至道元年九月二十七日常朝则乘马皇太子即真宗出宋史】

绍圣二年九月二十七日苏东坡在惠州皇华馆思无邪斋记外祖程公遗事 【记曰公讳仁霸眉山人以仁厚信于乡里蜀平中朝士大夫憚远宦阙选士人有行义者掇公掇录事参军眉山尉有得盗芦菰根者实窃而所持刀误中主人尉幸赏以劫闻狱掾受赇掠成之太守将虑囚囚坐庑下泣涕衣尽湿公适过之知其冤咋谓盗曰汝冤盍自言吾为汝直之盗果称冤移狱竟杀盗公坐诛囚罢归不及月尉掾皆暴卒后三十余年公昼日见盗拜庭下曰尉掾未定服待公而决前此地府欲召公暂对我叩头争之曰不可以我故惊公是以至今公寿尽今日我为公荷担而往暂对即生人矣子孙寿禄朱紫满门矣公具以语家人沐浴衣冠就寝而卒其幼时闻此语言已而外祖寿九十舅氏始贵显寿八十五曾孙皆仕有声同时为监司者三人玄孙宦学益盛而尉之子孙微矣予记公之遗事以遗程氏出事文类聚】

俨公禅师与门人告别跌坐而化 【俨公禅师曹氏子儿时独不戏九岁乐为僧父不能夺其志抱经笥入岫嵎山从名师至元和十三年九月二十七日跌坐而化出刘禹锡碑记】

清源真人生 【翰墨大全】

二十八日

宋太宗校猎近郊帝御弧矢射走兔四御制猎诗群臣属和 【兴国二年玉海】

瀛国公以是日为天瑞节 【纂记渊海】

星源诞圣日 【婺源庙记】

诗

寒包已向青春发又见秋深特地开应笑菊残无意思不能邀赋洛阳才
【梅尧臣九月二十八日题牡丹】

九月二十有八日天愁无光月不出浮云蔽天众星没举手向空如抹漆天昏地黑有一物不见其形但闻其声其初切切凄凄或高或低乍似玉女调玉笙众管参差而不齐既而咿咿呦呦若轧若抽又如百两江州车回轮转轴声哑呕鸣机夜织锦江上群鴈惊起芦花洲吾谓此何声初莫穷端由老婢扑灯呼儿曹云此怪鸟无匹俦其名为鬼车夜载百鬼凌空游其声虽小身甚大翅如车轮排十头 【梅尧臣作鬼车古风鬼车即车载板亦名逆鸢】

二十九日

唐光宅元年是夜有星如半月见西方 【天文志】

王镇恶率龙骧将军蒯恩百舸前发 【镇恶剧人也镇恶王猛之孙或荐镇恶于高祖高祖谋讨刘毅镇恶曰有事西楚请赐给百舸为前驱义熙八年刘毅有疾求遣从弟兖州刺史蕃为副贰高祖伪许之大军西讨转镇恶参军加振武将军高祖至姑熟遣镇恶率龙骧将军蒯恩百□前□是九月二十九日也出王镇恶传】

元人星吉北面再拜曰臣力竭不能报国言毕而绝 【星吉字吉甫谥忠肃至正十一年贼巢据彭泽吉甫欲攻之而江州食粮匱乃谕民输财麦令士卒守小孤山自驻番阳口阨江湖要冲以图恢复然乱已久湖广江浙无援助者或请去就食东南图再举吉甫曰吾受命守江西此江西地也死则死此去将何之贼知兵食俱竭帅大舶载苇蔽江而下杜上下流纵火焚攻数千兵战死吉甫犹坚坐大呼曰杀贼杀贼俄而贼射吉甫中目什舟中贼素识吉甫名不忍害贼以刀胁吉甫降吉甫骂不已贼终不敢害吉甫不食九日九月二十七日自力起北面再拜曰臣竭力不能报国言毕而绝年五十七出宋濂集】

诗

指麾八荒定怀柔万国夷单于陪武帐日逐卫文擺端扈朝四岳无为任有司共乐还讌宴欢此大风诗【唐太宗幸庆善宫宴从臣子渭滨作】

三十日

东汉安帝延光三年是日日有食之【京房占曰骨肉相贼】
在氏十五度为宿宫宫中宫也时上听中常侍江京樊豐等讒言废皇太子【通考】

元顺帝天甫明西南方天裂红光烛地移时始复又白虹贯日
【至正己亥年九月三十日出元史】

魏主珪以是日甲子进军攻之太史令龟崇曰不吉昔纣以甲子亡谓之疾日兵家忌之珪曰纣以甲子亡武王不以甲子兴乎崇无以对【晋武帝隆安元年九月魏主珪自将围中山中山饥甚慕容麟帅二万余人出据新市九月三十日甲子魏主进军攻之出晋书】

黄山谷卒【黄山谷作承天院记朝廷谓其幸灾谤国以崇宁二年自鄂谪宜州独赴贬所崇宁四年九月十日卒出楚通志】

包廷藻生【号南涧眉目秀整倍书学文皆过人五岁见伯父记饮中八仙及大历十才子随记随失南涧牵衣问曰翁何健忘耶儿虽耳闻已熟于心矣因历数以对翁大惊及长锐然尚友古人朝负耒出耕稍暇躬亲杵臼井灶之事及入夜方悬灯挟册琅琅声不绝四方来从以讲解章旨为第一义廷藻字文叔合肥孝肃公拯之裔于咸淳乙丑年九月三十日出生出宋濂集】

马钰从学于祖师祖师青巾白袍坐白龟于碧莲上祖师回身侧卧东南而去九月三十日乡人云集钰师抱琴作归山操云能无为兮无不为能无知兮无不知知此道【兮谁】不为为此道兮谁复知风萧萧兮木叶飞声嗷嗷兮鴈南飞嗟人世兮日月催老欲死兮犹贪痴伤人世兮魂欲飞嗟人世兮心欲摧难可了兮人间非指青山兮当早归青山夜兮明月辉青山晓【兮明】月归饥餐霞兮渴饮溪与世隔兮人不知无乎知兮无乎为此心灭兮那复为天庭复有双华飞登三宫兮游紫微
【马钰初名从义字宜甫钰字玄宝更之也号丹阳子宁海人从学祖师出史纂左编】

诗

为客无时了悲秋向夕终瘴余夔子国霜薄楚王宫草敌虚岚翠花禁冷蕊红年年小摇落不与故园同【杜工部九月三十日作】

日涉编卷十

楚应城陈阶升也甫编辑

邑人徐养量叔弘甫校刻

王城元美甫

寇可教宅虚甫

弟陈垠博也甫全阅

十月〔一〕

十月建亥亥劾也言阴气劾杀万物也【合璧事类】

应鍾亥之气也十月建焉【周礼】

日在尾昏危中旦七星中【礼记】

闭蛰而烝【亥月昆（上?下虫）闭户万物皆成左传】

招摇指玄爨松燧火【淮南子】

北方之神颡顓乘坎执樞司冬【汉魏相上书】

天根见而水涸【天根见而水涸水涸而成梁故夏令曰十月而成梁不使民患涉也国语】

孟冬行春令则冻闭不密地气发泄民多流亡行夏令则暴风数起蛰虫复出行秋冬则霜雪不时土地侵削【吕氏春秋】

为阳【尔雅】

冬曰玄冬亦曰玄英【梁元帝纂要】

冬曰孟冬亦曰上冬曰阳月【梁元帝纂泣纯阴用事嫌于无阳故曰阳月】

良月【十月也就盈数也左传】

景曰寒景时曰寒辰节曰严节 【梁元帝纂要】

天时和暖似春谓之小春 【荆楚岁时记】

汉代以豚酒入灵女之庙击筑奏上弦曲连臂踏地歌赤凤来巫俗也 【搜神记】

爪哇国风俗游山有山马可乘跨或乘软兜乐有横笛鼓板亦能舞 【外夷传亦出一统志】

邕管溪峒风俗以是月挈取鹅之软毛为被以御寒故柳宗元柳州峒氓诗有鹅毛御腊缝山罽之句 【山堂肆考】

日旁有黑气如人形跪手捧盘向日盘中气如人头 【宪宗元和二年十月】

日昼昏凡十日乃明 【宋文帝元嘉四年十月以上通考】

月晕左角 【天兴五年十月月晕左角太史令晁崇奏角（上?下虫）将死上虑牛疫乃命诸军解重焚车牛果大疫死者十八九宫中所驭巨犊数百同日毙于路侧首尾相属麋鹿亦多死后魏书天文志】

紫云如盖黄云如龙凤青云如竹木名梢云 【祥符元年封泰山十月出宋史】

风曰寒风劲风严风厉风哀风阴风 【梁元帝纂要】

雾赤为兵青为殃 【望气经】

雨谓之液雨百虫饮此藏蛰俗呼为药水 【荆楚岁时记】

天雨土 【绍兴四年十月宋史】

天雨木冰 【熙宁三年十月八年正月九年三月亦雨木冰冰者冰土带木也五行志】

信州及邵武天雨黍饶州建宁天雨黑子大如黍菽衢州天雨黍民取而食之
【元至正辛卯年十月元史亦出草木子】

黄河是月水名复槽水 【水衡记】

吴十二年杨林江水出火可以燃物 【九江国志】

宋文帝元嘉二十五年青州城南远望见地中如水有影谓之地镜 【通考】

蚩尤冢每岁是月有气如匹绛自上属下号曰蚩尤旗 【皇览冢墓记冢在东郡寿张县】

朱鸟门鸣昼夜不绝 【王莽天凤三年十月朱鸟门鸣崔发等曰虞帝辟四门达四聪鸣者明当修先圣之礼招四方之士也于是令群臣皆贺所举士行从朱鸟门入而对策焉出通考】

佛像是月动夏人入寇又动而州大火

【熙宁二年十月依智高叛佛像复动知州钱师孟投其像于江中出宋史】

遂阳乡柱仆地生枝如人形身青黄色面白头有须发 【汉哀帝建平三年十月遂阳乡在汝南西平县京房易传曰王德衰下人将起则有木生为人状出通考】

武义县木根有万宋年岁四字 【政和三年十月宋史】

松树变为柏 【长寿二年十月旧唐书】

凤凰十一集杜陵 【汉宣帝神爵四年】

凤凰集东海遣使祠其处 【汉昭帝始元三年】

凤凰五高八九尺毛羽五彩是月集颍川郡群鸟从之行列盖地数顷留十七日乃去
【汉光武建武十七年以上宋书符瑞志】

有兽入吴兴一角而麟趾 【天佑二年吴越备史】

诗

江南孟冬天荻穗软如绵绿绢芭蕉裂黄金橘柚悬 【谢良辅状江南十月】

（上?下虫）声已尽菊花干五老松阴向晚寒对酒看山俱惜去不知残日下阑干
【朱庆余十月西亭晚宴】

重裘暖帽宽毡履小阁低窗深地炉身稳心安眠未起西京朝士得知无
【白居易十月即事】

南路蹉跎客未回常嗟物候暗相催四时不变江头草十月先开岭上梅
【樊晃十月南中感怀】

今年十月温风起湘水悠悠生白苹欲寄远书还不敢却愁惊动故乡人
【戴叔伦十月寄京洛旧游】

寒江近户漫流声竹影临窗乱月明归梦不知湖水阔夜来还到洛阳城
【戎昱十月寄湖南张郎中】

荷尽已无擎雨盖菊残犹有傲霜枝一年好景君须记正是橙黄橘绿时

红梨无叶底花身黄菊分香委路尘岁晚苍官纔自保日高青女尚横陈
【以上东坡十月作】

何处初寒好初寒邾鄆城垂绅多俊彦列第尽公卿裘马过从盛门阑洒扫清谁家拥兽炭尽日管弦声 【司马公十月作】

玉壶银箭稍难倾缸花夜笑凝幽明碎霜斜舞上罗幕烛龙雨行照飞间珠帷怨卧不成眠金风刺衣着体寒长眉对月斗弯环 【李贺十月乐词】

孟冬寒风起东壁正中昏 【谢灵运】

孟冬十月北风裴徊蛰鸟潜藏熊罴窟栖 【魏武帝】

立冬

立冬木歿水相火囚金休

霜降后十五日斗指干为立冬冬者终也万物皆收敛也 【孝经纬】

立冬房四度 【律历志】

立冬冬至行北方黑道曰北陆 【汉书】

律中应钟水始冰地始冻 【应者应也钟者动也言万物应阳而动不藏也月令】

斗柄北指而天下皆冬 【鹖冠子】

天气上腾地气下降闭塞而成冬 【礼】

阴云出而黑 【易通卦验】

立冬北方广莫风至 【一名寒风八方之风应时而至出符瑞图】

以风鸣冬 【韩子】

仲尼问剡子曰丹鸟氏司闭者也立秋来立冬去 【左传】

立冬不周风至水始冰荠麦生雀入水为蛤 【易通卦验】

立冬十月节水始冰水不冰即阴之有贫地始冻地不冻即灾咎之征野雉化为蜃不为蜃时多（汀去丁改？）妇 【周书时训】

春官宗伯以玄璜礼北方 【立冬为黑精之帝故玄璜以象冬物之坏蛰周礼】

立冬先三日太史谒于天子曰某日立冬盛德在水天子乃迎冬于北郊可以筑城郭造宫室穿窬窖修囷仓 【月令】

天子始裘 【月令】

立冬干主风用事人君当兴边兵治城郭行刑决罪 【京房易古】

立冬日日中阳台真人会集 【登真要诀】

立冬忌北风主殃六畜 【臞仙月占】

诗

日行北陆又冬时江荻飕飕岸草衰木落惊寒山露骨池冰结冻水生皮频添兽炭供炉火细切羊羔泛酒卮莫道园林俱索寞菊残犹有傲霜枝 【吴彦声】

十月严阴盛霜气下清台 【郭元振】

北风飘飘天作恶枯林已久叶可落 【山谷】

履此玄英感兹阳月知盛德之在水慨穷阴之杀节 【吴淑立冬赋】

小雪

立冬后十五日斗指亥为小雪天地积阴温则为雨寒则为雪时言小者寒未深而雪未大也 【孝经纬】

小雪为中者气叙转寒雨变成雪故以小雪为中 【三礼义宗】

小雪之日虹藏不见 【后五日天气上腾地气下降后五日闭塞而成冬虹藏不见礼记注曰

阴阳气交而为虹此时阴阳极乎辨故虹伏虹非有质而曰藏亦言其气之下伏耳月令】

小雪日虹不收藏妇不专一 【周书时训】

诗

甲子徒推小雪天刺桐犹绿槿花然阳和长养无时歇却是炎洲雨露偏
【张登小雪日戏题】

时候频过小雪天江南寒色未多偏枫汀尚忆逢人别麦陇惟应欠雉眠更拟结茅临水次偶
因行药到村前 【诗言服药后行以倡导之】 邻翁意绪相安慰多说明年是稔年
【陆龟蒙小雪后书事】

伟兹雪之霏霏应玄冥而不失其期赋象于虹藏之日成形于冰冻之时委地则微庶表三冬
之候翻空虽小那无六出之姿当其寒气初升阴风始变既淅淅于遥野却飘摇于广甸边城
一望龙山之净色犹晞上苑再瞻凤阙之清光未遍眇若毫端轻飞可观细细而千岩送冷飘
飘而万物迎寒云云 【林滋小雪赋】

十月〔二〕

一日

先天节 【大中祥符五年闰十月一日圣祖下降日为先天节出宋朝会要亦出事物纪原】

玄宗御勤政楼四科举人问策外更试诗赋各一道
【天宝十三载制举试诗赋自此始出玉海】

唐太宗诏令就京城闲坊为诸州朝集使造邸第三百余所 【梁州都督窦轨请入朝唐太宗
曰君臣共事情犹父子外官久不入朝情或疑惧朕亦须数见之问以人间风俗太宗又谓侍
臣曰古者诸侯入朝待以客礼汉家故事为诸州刺史郡守创立邸舍至贞观十七年十月一
日下诏为朝集使造邸第太宗亲观焉出通考】

宋太宗出飞白书一轴赐宰臣李昉等曰朕退朝之暇未尝虚度光阴观书之外留意于真草
近又学飞白书此虽非帝王事业然不愈于游畋声乐乎昉等顿首谢
【雍熙三年□月一日玉海】

宋高宗是日登舟巡幸淮甸驻蹕扬州 【建炎元年十月一日宋史礼志】

王荆公是日永昭陵奏告仁宗皇帝旦表伏以月乘该阕时御闭藏岁回薄以将更物盛多而

可享恭惟尊谥皇帝德符穹昊功济黎元方求大隗之居遂兆成周之葬光灵在望感恻交怀
【临川集】

宋朝旧规十月朔一日赐翰林对衣红锦袍淳化二年是日代以细花盘鹑锦袍下丞相一等
【苏续志】

峡人十月一日多以蒸𦵏为节物荆楚人多食𦵏糟或作糖故老杜是日诗曰蒸𦵏如千室𦵏
糟萃一样 【事文类聚】

都城士庶皆出城飧墓禁中车马朝陵如寒节 【梦华录】

十月一日拜坟拜之感霜露也 【程氏遗书】

京师沃酒炙𦵏肉于炉中围坐饮啖谓之暖炉 【岁时杂记】

有司进暖炉炭民间皆置酒作暖炉会 【梦华录】

东女国风俗每是日令巫者𦵏酒肴诣山中散糟麦空中呼鸟俄有鸟如雉飞入巫者之怀剖
腹视之有谷来岁必登若有霜雪必有大灾俗名为鸟山人死则纳肉于金瓶中埋之
【神异记】

道家以是日为民岁腊三万六千神气其日可谢罪祈求延年益寿 【道家有五腊正月一日
为天腊五月五日为地腊七月七日为道德腊十月一日为民岁腊至十二月正腊日为王侯
腊王侯腊五帝校定生人处所分野降出道经】

达磨祖师至金陵武帝问曰朕即位以来造寺写经度僧不可胜纪有何功德祖曰并无功德
帝曰何以无功德祖曰此但小果如影随形虽有非实帝曰如何是真功德祖曰净智妙圆体
自空寂如是功德不以世求 【菩提达磨大师者南天竺国香至王第三子也达磨者通大之
义也武帝遣使𦵏诏迎请十月一日至金陵出左编】

崔希真是日雪遇老父于门献松花酒老父曰花酒无味乃于怀中取丸药置酒中味极美后
问天师师曰此真人葛洪第三子其药乃千岁松胶也 【原化记】

东皇大帝生辰 【道经】

王长真人降现

马元约天师上升 【以上翰墨大全】

宜修成福斋 【摄生图】

西天王降犯之一年死 【三元延寿图】

诗

有瘴非全歇为冬亦不难夜郎溪日暖白帝峡风寒蒸暑如千室焦糟萃一桮兹辰南国重旧俗自相欢 【工部夔州十月一日作】

寒山十月旦霜叶一时新似烧非因火如花不待春连行排绛帟乱落剪红巾鲜驻蓝鼻看风前唯两人 【白居易十月一日和杜录事题红叶】

屋角羲娥转两轮今朝水帝又司辰山家尝稻知良月野径寻梅见小春一岁坐看除得尽百年正与死为邻谁能忍许无穷事闭阁开炉但饮醇 【曾茶山十月一日作】

十月一日天子来青绳御路无尘埃宫泉内里汤各别每个白玉芙蓉开朝元阁向山上起城绕青山龙暖水夜开金殿看星河宫女知更明月里武皇得仙王母去山鸡昼鸣宫中树温泉决决出宫流宫使年年修玉楼禁兵除尽无射猎日西麋鹿登城头梨园弟子偷曲谱头白人间教歌舞 【王健题温泉宫】

二日

侍读真德秀进大学衍义上曰有补治道 【宋理宗端平二年十月二日出会要】

宋仁宗庆历三年南蕃涂渤国遣使奉表贡佛金骨真珠犀牛头象齿 【玉海】

禅师道广瞑目而寂异香盈室 【道广禅师郴州人往衡州参超和尚超独重之众僧谓问来参禅独道广得真谛超对众僧曳禅杖顿地二下无有解者是夕三更时大开禅门惟道广一人至超密将铁筋昼灰尽传诀旨附衣钵实时潜奔天宝元年大旱郡守冯君雱祀无应师曰此旱魃肆霍竟诣滇武二水合流处正坐水面谓人曰雨即至矣明年冬十月二日告寂异香盈室出郴阳佛传】

紫琼真人降生 【饶州德兴张君范讳模是月之二日生后闻道改名道心出道书】

下元周真君生

张虚静天师生 【以上翰墨大全】

诗

彷彿曾游豈夢中欣然雞犬識新豐吏民驚怪坐何事父老相携迎此翁蘇武豈知還漠北管寧自欲老遼東嶺南萬戶皆春色會有幽人客寓公

【東坡十月二日到惠州作禮記諸侯不臣寓公蓋言公爵而寄寓者也】

三日

唐文宗太和九年曲江新造紫雲樓彩霞亭仇士良是日以百戲于銀台門迎文宗文宗好為詩誦杜甫曲江行云江頭宮殿鎖千門細柳新蒲為誰綠

【天寶已前曲江四岸皆有行宮台殿故為樓殿以壯之】

宋仁宗賜致仕太子太傅杜衍襲衣笏頭金帶 【皇佑二年十月三日出通典】

宋高宗書車攻詩賜宰臣趙鼎等又宣諭曰朕觀鴻鴈車攻乃宣王中興之詩當與卿等夙夜勉勵修政事攘夷狄鼎曰陛下游戲翰墨之間亦不忘恢復臣等敢不自勉

【紹興五年十月三日以上玉海】

宋太宗靈駕發引 【至道三年太宗崩于萬歲殿宋史禮志】

蜀後主王衍幸秦州 【後主王衍有節度使王承休以邪穢笑狎見寵一日謂後主曰秦州多出國色密愿取秦州子女教以歌舞伎樂令畫工圖真及錄名氏以獻後主擬十月三日幸秦州布告中外咸使聞知由是中外切諫不從母后泣而止之以至絕食出太平廣記】

戴洋善風角妙解占候小数及祖約鎮譙城謂約曰十月三日必有賊到譙城主簿王振以洋為妖言約知有神術而让振振后有罪被收洋救之曰振不識風角非有宿嫌約义之即原振至是日石勒騎果到譙城 【戴洋字國流年十二病死复苏說死時上蓬茅昆仑等山既而遠歸逢一老父謂之曰汝後當得道及長善風角占候知十月三日賊到譙城如其言洋謂約曰賊必向城父可遣騎水南追之步軍于水北斷要路賊必敗約竟不追賊乃掠城父婦女輜重而去約將魯延求追賊洋曰不可約不從使兄子智与延追之賊伪弃妇女輜重走智与延等爭物賊还掩之智延仅以身免士卒皆死出晋書戴洋傳】

太子少保薛稷雍州長史李晋中書令崔湜蕭至忠岑义等皆外飾忠鯁內藏諂媚胁肩屏气而舐痔折肢阿附太平公主是日家破身戮 【金載】

李吉甫薨 【貞元有袁隱居者家于湘楚間善陰陽占訣時吉甫謫官一日隱居來謁吉甫吉甫嘗聞其名即延語与吉甫命筭隱居曰公真宰相也壽至九十三吉甫曰吾之先未及七十者何敢望九十三乎隱居曰連筭舉數乃九十三年其後吉甫果相憲宗皇帝節制江南再入相而薨年五十六時元和九年十月三日也計其歲月日亦符九十三之數豈非懸解之妙乎出宣室志】

四海三元龙王奏水府曰龙聚日 【道经】

四日

帝系谱曰伏羲十月四日人定生 【孝经河?云伏羲在亥得人定之时伏羲人头蛇身按尧始四时成岁此曰伏羲十月四日不知何据】

元顺帝至正六年中书省奏以十月四日皇帝亲祀太庙制曰可以太师右丞相马扎儿台为亚献官枢密知院阿鲁秃为终献官 【元史】

官军与回纥夹击而贼大败 【郭子仪等与贼遇于新店依山而阵子仪等初战不利贼逐之下山回纥自南山袭其背于黄埃中发十余矣贼惊顾曰回纥至矣遂溃官军与回纥夹击之贼十月四日大败出汾阳家传】

霞卿真人湛然真人妙然真人蓬莱真人水清真人人乔真人人想真人眇水真人琼君真人太清真人降现 【翰墨大全】

十月四日勿责罚人故刑官罢刑大忌 【法天生意】

五日

唐高宗狩于陆浑亲御弧矢获兔鹿制冬狩诗 【龙朔元年玉海】

苏东坡久不得子山书忧不去心以周易筮之得涣六三
【宋哲宗祥符元年十月五日出长公外纪】

宋人胡瑗葬于乌程 【胡瑗先生在湖州从学者去来常数百人各以其经转相传授东南之士莫不以仁义礼乐为学嘉佑元年迁太子中允充天章阁侍讲四年卒于杭州五年十月五日葬于乌程胡瑗字翼之庐陵欧阳修作墓志出宋文鉴】

吴俗以十月五日为五风生日太湖渔者千余家盛陈牲醴飧并湖诸神祠祈是日有风则每五日风雨如期而至终岁皆然可以扬帆取鱼谓之五风信 【天中记】

修三会斋勿行谴责 【摄生?】

六日

唐高宗十月五日狩于陆浑县是日至飞山顿帝亲御弧矢获四鹿及兔数十头
【龙朔元年出通考】

唐玄宗幸花清池诏高力士潜搜外宫得弘农杨玄琰女于寿邸上甚悦册为贵妃歌曰汉王重色恩倾国御宇十年求不得杨家有女初长成养在深闺人不识天生丽质难自弃一朝选在君王侧回眸一笑百媚生六宫粉黛无颜色春寒赐浴花清池温泉水滑洗凝脂侍儿扶起娇无力始是新承恩泽时云鬓花颜金步摇芙蓉帐暖度春宵春宵苦短日高起从此君王不早朝【唐开元中四海无事玄宗在位岁久政无小大委于丞相深宫游宴以声色自娱宫女虽多无悦目者十月六日幸花清池诏高力士潜搜外宫得弘农杨玄琰女于寿邸出长恨传】

宋仁宗是日灵驾发引英宗以梓宫升龙輶祖奠与皇后步出宣德门群臣辞于板桥【宋史礼志十月十五日奉安梓宫】

宋仁宗迁座于永昭陵【仁宗崩于福宁殿殡于殿之西阶十月六日迁座于永昭陵韩琦作哀册文有风云惨郁以生悲臣妾涕号而思殉云云出文鉴】

拂菻贡方物

【宋神宗元丰四年十月六日拂菻一名大秦在西海北唐开元献狮子二出会要】

天曹诸司五岳五帝注生籍日【道经亦出翰墨大全】

诗

风高月暗水云簧淮阳夜发朝山阳山阳晓雾如细雨炯炯初日寒无光云收雾卷已亭五有风北来寒欲僵忽惊飞雹穿户牖迅駈不复容遮防市人颠沛百贾乱疾雷一声如颓墙使君来呼晚置酒坐定已复日照廊（怯去去改晃）疑所见皆梦寐百种变怪旋消亡共言蛟龙厌旧穴鱼鳖随徙空陂塘愚儒无知守章句论说黑白推何详惟有主人言可用天寒欲雪饮此觴【苏东坡十月六日记所见】

七日

宋太宗以是日为干明节群臣上寿崇德殿寿表云干元发祥万物资始以圣继圣谓之大明顺合二义之称用表无强之庆【兴国二年十月七日出合璧事类】

郭子仪誓师【唐代宗广德二年十月七日子仪誓师曰明日有寇尔其备之及夜出兵数万阵于西门之外广布旗帜如十万军未曙怀恩吐蕃回纥吐浑等已阵于干陵北长二十里怀恩等初谓无备欲袭之既见阵大骇不敢战涉泾而退初军中偶语夜中出兵与鬼斗耳及未曙而寇至军中所以服子仪之先知也出汾阳家传】

八日

东汉安帝武库火烧兵器 【元初四年二月乙亥朔日有食之在奎九度史官不见七郡以闻奎主武库兵是年十月八日武库兵器火烧出通考】

唐太宗是日山南献木连理交错玲珑长孙无忌曰自顷嘉祥杂沓陛下推而不居遂令史官阁笔无以示后因相率贺帝曰瑞应之来朕当苦心劳力以荅天地何烦致贺
【贞观十六年十月八日】

唐高宗显庆三年太常丞吕才奏张华博物志白雪是天帝使素女鼓五十弦瑟曲名调高和寡自宋玉以来未有歌白雪者

宋仁宗宴射太清楼帝中的者四 【景佑二年十月八日以上玉海】

宋高宗崩 【淳熙十四年十月八日崩孝宗号恟擗踊踰二日不进膳寻谕宰执王淮欲不用易月之制如晋武魏孝文实行三年之丧自不妨听政准等奏通鉴载晋武帝虽有此意后来只是宫中深衣练冠帝曰当时群臣不能将顺其美司马光所以讥之后来武帝竟欲行之淮曰记得亦不能行帝曰自我作古何害淮曰御殿之时人主哀经群臣吉服可乎出宋史礼志】

真如禅师无疾说偈曰昨夜三更风雷忽作云散长空前溪月落言讫告寂
【宋哲宗绍圣二年十月八日告寂禅师目睛齿爪不坏弟子塔于京潭出楚通志】

张廋举进士元和十三年居长安升道里街是夜廋在月下忽异香满院俄闻履声见数青衣拥门而入曰步月逐胜不必远游此院藤架可矣遂引少女七八人容色奇绝服饰华丽廋走避堂中垂帘望之诸女徐行直诣藤下须臾陈设床榻杯杓又执乐者十人执拍板者二人左右侍立者十人坐上一人曰不告主人而张乐可乎命一青衣传语曰姊妹步月偶入贵院廋闭门叩之不应于是坐上一人命奏丝竹音曲清亮廋曰若非妖狐必是鬼魅顷之尽还廋潜取一盞以衣系之及明解视乃一白角盞奇不可名院中香气数日不歇 【续玄怪录】

诗

良月八日夜未央清都绛阙鸾凤翔 【事文类聚】

九日

齐武帝永明八年十月朔土雾竟天浓厚勃勃如火烟气入人眼鼻至是日辰时开除
【南齐书五行志】

宋徽宗是日翰林承旨张康国撰景钟铭铭曰皇帝践位之五年崇宁甲申考协钟律保合太和云云 【通典】

靖康二年宋钦宗到燕京见金主是日少帝复至燕京与契丹耶律延禧同拘管鸛翼府
【窃愤录】

修撰司马光请写仁宗英宗实录留本院 【熙宁二年十月九日出会要】

东坡云岭南气候不常菊花开时即重阳凉天佳月即中秋十月九日菊始开乃与客作重阳
因次和陶九月九日诗诗曰今日我重九谁谓秋冬交黄花与我期草中实后凋香余白露干
色映青松高 【合璧事类】

斗星降日 【东斗帝君道经】

诗

霜飐协律应佳辰蓂莢尧阶九叶新 【事文类聚】

十日

宋苍梧王元徽四年填星守太微宫 【十月十日占曰有亡君之戒出南齐书天文志】

唐文宗生于长庆宫至太和七年中书门下奏云陛下驭三统之元膺千年之运当诞圣之日
为河清之祥夫四时成岁百谷成实必在首冬用成神化臣等请以十月十日为庆成节是日
于宫中奉迎太皇太后与昆弟诸王盛陈宴乐群臣诣延英门奉觞上千万岁寿州府置宴一
日上悦从之 【文宗穆宗第二子出实录】

宋徽宗五月五日生以俗忌因改作十月十日生宰臣章惇等请立天宁节表云诗纪生民易
称出震时惟阳月瑞集枢星肇开震夙之祥永御光华之旦离明继照敷同四海之欢天德出
宁请祝万年之寿 【出合璧事类以俗忌出异闻集】

谢石宣和间至京师以拆字言人祸福求见者但随意书一字即就其字离拆而言无不奇中
者宋徽宗因书一朝字令中贵人持往试之石见字以手加额曰朝字离之为十月十日字非
十月十日所生之天人而谁书也一座尽惊中贵驰奏 【徽宗召石至后苑令左右及宫嫔书
字示之皆据字论说祸福俱有精理缘此四方求见者其门如市有朝士其室怀妊过月手书
一也字令其夫持问之石详视字谓朝士曰此阁中所书否曰何以言之石曰谓语助者哉焉
乎也因知是公内助所书尊阁盛年三十一否曰是也以也字上为三十下为一字也又尊阁
父母兄弟近身亲人皆无一人存者以也字着人则是他字今独见也字而不见人故也又尊
阁其家物产亦当荡尽否以也着土则为地字今又不见土也曰诚如所言朝士即谓之曰此
皆非所问者但贱室以怀妊过月方窃忧之所以问耳石曰是必十三个月也以也字中有十
字并两傍二笠下一画为十三也石熟视朝士曰有一事似涉奇怪固欲不言朝士固请其说
石曰也字着（上?下虫）为蛇字今尊阁所妊殆蛇妖也然不见虫蛊则不能为害以药下验

之无苦也朝士大与其说固请至家以药投之果数百小蛇都人益共神之出天中记】

显祖文宣皇帝讳洋字子进神武第二子帝登阼改年为天保士有深识者曰天保之字为一大人只十帝其不过十乎又洗谣曰马子入石室三千六百日帝以午年生故曰马子三台石季龙旧居故曰石室三千六百日十年也又帝曾问太山道士曰吾得几年为天子荅曰得三十年道士出帝谓李后曰十年十月十日得非三十也吾甚畏之过此无虑人生有死何得致惜但怜正道尚幼人将夺之耳帝及期而崩 【北史齐本纪】

唐太宗幸洛阳宫 【贞观十六年太宗本纪】

晋高祖葬于显陵寿安县

梁太祖葬于宣陵洛京伊阙县 【以上通考】

苏子瞻是夜解衣欲睡月色入户欣然起行念无与乐者遂至承天寺访张怀民相与步于中庭庭前积水空明水中藻荇交横盖竹柏影也友人曰何夜无月何处无竹柏但少闲人如吾两人耳 【神宗元豐六年十月十日出卧游录】

钦绪与妖人李广弘谋反广弘始为浮屠妄曰我尝见岳渎神当作天子又妄曰神戒我十月十日约钦绪夜击鼓噪凌霄门焚飞龙廐神策将魏循以神策兵十月十日迎广弘禽之广弘临刑色自如 【唐书列传】

诗

气转小春才十日紫府名仙方降谪 【古风事文类聚】

十一日

宋太祖校猎近郊 【干德六年玉海】

宋真宗召近臣于玉宸殿观刈小香占城稻赐宴安福殿上作七言诗从臣皆贺
【天禧二年玉海】

李愬擒吴元济 【十月十一日节度使李愬袭破悬瓠城擒天元济裴度先遣宣慰副使马总入城安抚裴度当元和长庆间乱臣贼子惮度之威棱有奉使绝域者四夷君长必问度之年齿几何状貌孰似天子用否其畏服如此出旧唐书】

女仙谢自然有仙来召即乘麒麟升天初服天衣以旧着衣留绳床上仍下降着旧衣置天衣于鹤背将去云去时乘麟来时乘鹤 【十月十一日出集仙记】

十月十一日黍臠俗谓之秦岁首未详黍臠之义【荆楚岁时记】

诗

新冬十叶各添一良辰喜是翁生日【古风事文类聚】

十二日

宋仁宗庙中行礼月色皎然有黄云捧月【嘉佑四年】

宋神宗熙河奏捷紫宸殿称贺上解所服白玉带赐宰臣王安石
【熙宁六年十月十二日出通典】

苏东坡入翰林知制诰【元佑元年出宋学士集】

苏东坡游惠州东北二十里之白水山佛迹岩浴于汤池【绍圣元年十月十二日循山而东有悬水百仞八九折折处辄为潭水涯有巨人迹数十所谓佛迹也出长公外纪据卧游录绍圣二年三月四日复游】

宋景濂与祖同以是日生【濂生于元武宗至大庚戌年六岁入小学其师包文叔授以季澣蒙求一日而尽自后日记千余言九岁即能诗出小传】

汝南屈雍妻王生男从腹下而出其母自若无他异痛【黄初五年出魏志】

诗

何人守蓬莱夜半失左股浮山若鹏蹲忽展垂天羽根珠互连络崖峤争吞吐神工自炉（备去人改革）融液相缀补至今余隙罅流出千斛乳方其欲合时天匠麾月斧帝觞分余沥山骨醉后土峰峦尚开阖涧谷犹呼舞海风吹未凝古佛来布武当时汪罔氏投足不盖梅

【汪罔氏即防风氏也】青莲虽不见千古落花雨双溪汇九折万马腾一鼓奔雷溅玉雪潭洞开水府潜鳞有饥蛟掉尾取渴虎我来方醉后濯足聊戏侮回风卷飞雹掠面过疆弩山灵莫恶剧微命安足睹此山吾欲老慎勿厌求取溪流变春酒与我相宾主当连青竹竿下灌黄精圃【东坡十月十二日游白水山佛迹岩作】

元符庚辰岁孟冬十二日壬子丞太宗碌碌奉朝籍圣主访落初听言劳日昃谏路员有阙求人恐不及谁谓方遴选邂逅首疏述诏旨忽中授闻命旦夕惕不是忧不合爱君忧失职既忧亦复喜不是贪禄秩平生慕古人素愿或可毕精神倍疏淪激昂登文石青云开九天清光亲咫尺每见情益交肝胆尽剖析敬承丁宁训重许以忠直自喜千载遇奋身遑他恤志欲收主威力先排巨室切齿愤钦永刻意望夔稷不数千羊皮岂让一狐腋勤勤履霜戒不复虑不密

问夜欲自劳百疏意何益哀哉爱君心不能当众嫉投湘为独醒得罪因怀璧云云
【宋哲宗元符二年十月十二日任伯雨述怀诗出宋文鉴】

十三日

唐代宗生于东都上阳宫之别殿玄宗幸汝州之温汤有望气者云宫中有天子气玄宗即日还宫是夜帝降诞独孤及表置天兴节其日庆云见常袞贺表曰十月良月远膺盈数之期后天奉天近和下元之历从风萧索抱日紫回色涵流渚之虹影杂绕枢之电 【肃宗吴皇后坐父事没入掖庭玄宗幸忠王邸见王服御萧然傍无媵侍命高力士选掖庭宫人以赐之而吴后在籍中顷之后侍寝厌不寤吟呼若有痛气不属者肃宗呼之不解秉烛视之良久方寤肃宗问之后手掩其左胁曰妾梦有神人长丈余操剑谓妾曰帝命与汝作子自左胁以剑决而入腹痛殆不可忍及今未之已也肃宗验之于烛下有若縊而赤者存焉遂生代宗以开元十四年十月十三日出生柳氏旧闻】

史洪肇与杨颁王章等入朝坐广政殿东庑甲士数十人自内出擒洪肇颁章斩之并族其三家 【干佑三年洪肇字符化李业等乘间譖之以谓洪肇威震人主不降必为乱隐帝颇欲除之由是与业等密谋禁中十月十三日擒洪肇斩颁章出五代史】

苏东坡惠州到任

【宋哲宗元佑二年十月十三日到任寓居嘉佑寺是时侍妾朝云随之出长公外纪】

程颐母侯氏生 【母善诗有夜闻鸣鴈题曰何处惊飞起離離过草堂早是愁无寐忽闻意转伤良人沙塞外羈妾守空房欲寄回文信谁能付与将夫人弟可世称名儒才自谓不如夫人卒于皇佑四年生于景德元年十月十三日享年四十九追封上谷郡君出宋文鉴】

南斗星降日 【道经】

诗

当年飞下蕊宫仙良月平分两日前萱草忘忧方半百蟠桃未熟待三千
【庆女人出事文类聚】

君不见西汉元光元封间河决瓠子二十年巨野东倾淮泗满楚人恣食黄河鱣万里沙回封禪罢初遣越巫沉白马河公未许人力穷薪（芎去丁改刍）万计随流下吾君仁圣如帝尧百神受职河神骄帝遣风师下约東北流夜起澶州桥东风吹冻收微渌神功不用淇园竹楚人种麦满河淤仰看浮槎栖古屋 【熙宁十年河决澶渊注巨野入淮泗自澶魏以北皆绝流而齐楚大被其害至十月十三日澶州大风终日而河流一枝已复故道东坡喜而作河复歌】

十四日

唐懿宗生以其日为延庆节 【唐宣宗长子太和七年十月十四日生于藩邸天中记】

宋高宗次泗州 【建炎元年十月十四日至二十七日扬州驻蹕出通考】

龟兹国风俗每是日作乐至岁穷始罢 【酉阳杂俎】

取枸杞煎汤沐浴令人光泽不病 【云笈七签】

海蟾帝君降生 【帝君姓刘名操字宗成而海蟾子其号也改名玄英仕辽为宰相遇纯阳即解相印是日诞生出道书】

马练师乘青骡升仙 【集仙录】

诗

西狩观周俗南山历汉宫荐鲜知路近省敛觉年丰阴谷含神爨汤泉养圣功益龄仙井合愈疾醴源通不重鸣岐凤谁矜陈宝雄愿将无限泽沾沐众心同
【唐玄宗十月十四日幸凤泉汤作】

周狩闻岐礼秦都辨凤名献禽天子孝存老圣皇情温润宜冬幸游畋乐岁成汤云出水殿暖气入山营坎意无私劫干心称物平帝歌流乐府溪谷也增荣 【张说和玄宗幸凤泉汤】

翠柏不知秋空庭失摇落幽人得佳荫露坐方独酌月华稍澄穆露气尤清薄小儿亦何知相与翁正乐铜炉烧柏子石鼎煮山药一杯赏月露万象纷酬酢此生独何幸风缆欣初泊誓逃颜跼网行赴松乔约莫嫌风有待漫欲戏寥廓冷然心境空髣佛来笙鹤
【东坡十月四日以病在告独酌】

镕铅煮白石作玉真自欺琢削为酒杯规模定州瓷荷心虽浅狭镜面良渺弥持此寿佳客到此不容辞曹侯天下平定国岂其师一饮至数石温克颇似之风流越王孙诗酒屡出奇喜我有此客玉杯不徒施请君诘欧阳问疾来何迟呼儿扫月榭扶病及良时
【东坡十月十四日独酌试乐玉滑盏有怀诸君子明日望夜月庭佳景不可失作诗招之】

十五日

大中祥符元年是日诏封泰山上通泉庙为灵泐侯亭亭山为广禅候峰山神为灵岩侯祥符二年是日诏泰山天齐王加号仁圣天齐王祥符七年是日封泰山三郎威雄将军为炳灵公
【据五代会要后堂长兴四年封泰山三郎为威雄大将军上不豫泰山僧进药小康僧请封

之据宋朝会要庙在兖州泰山下即泰山神三郎也】

唐玄宗年七岁是日车骑至朝堂金吾将军武懿宗忌上严整诃排仪仗因欲折之上叱之曰吾家朝堂于汝何事敢迫吾骑从则天闻而特加宠异之【唐书】

唐武宗临朝谓宰相曰雄真良将【会昌三年石雄代引兵踰乌岭破贼五寨杀获数千得雄捷书甚喜十月十五日临朝云云出伐叛记】

宋太宗夜御东华门【三元不禁夜是夜为下元出山堂肆考】

金主章宗命给米诸寺自十月十五日至次年正月十五日作糜以食贫民【明昌四年金史】

宋胡翼之葬于乌程【胡瑗先生字翼之其在湖州弟子数百人各以其经转相传授莫不以仁义礼乐为学先生初以布衣见天子论乐拜秘书省校书郎嘉佑元年迁太子中允天章阁侍讲东归之日太学诸生与朝廷贤士大夫送之路人嗟叹以为荣卒于杭州享年六十七十月五日葬于乌程出墓表】

宋韩琦五代祖葬【祖讳义宾以博学高节不仕王绍鼎雅知其名屡荐补节度副记室事以龙纪元年十月十五日附葬于先莹出五代祖莹记】

杜牧之太和五年十月望半夜时舍外有疾呼传緘者牧之曰必有异亟取火来及发之果集贤学士沈公书一道曰亡友李贺且死以其文求序【牧之作李贺集序云亦出合璧事类】

东坡后赤壁赋曰十月之望步自雪堂将归于临皋二客从予过黄泥之阪霜露既降木叶尽脱人影在地仰见明月顾而乐之行歌相荅予乃摄衣而上履巉岩披蒙茸踞虎豹登虬龙攀栖鹘之危巢传冯夷之幽宫盖二客不能从焉【合璧事类】

焉耆国王始出游至岁尽止【焉耆曰东高昌西龟兹南尉犁北乌孙俗尚娱遨七月七日祀生祖十月十五日王出游出唐书】

高句丽国东有穴号隧神每以是日祭之礼义甚盛王与妃嫔登楼大张乐宴饮【高句丽其先出夫余王尝得河伯女曰闭于室内为日所照引身避之日影又逐既而有孕生一卵夫余王弃之与犬豕皆不食弃于路牛马避之独众鸟以毛茹之王剖之不能破还其母母以物袞置暖处有一男破而出及长字之曰朱蒙夫余之臣以朱蒙非人所生欲谋杀之其母告朱蒙朱蒙东南走中道遇大水欲济无梁追者甚众朱蒙告水曰我是日子河伯外孙于是鱼鳖成桥朱蒙得渡至纥升骨城□马号曰高句丽因以高为氏出四裔考】

太平兴国五年下元京城始张灯

【张灯七月中元亦然如正月上元之夕至淳熙元年始罢容斋随笔亦出天中记】

戚夫人入灵女庙以豚黍乐神吹笛击筑歌上灵之曲既而相与连臂踏地为节歌赤凤来
【西京杂记】

下元日九江水帝十二河源溪谷大神与暘谷神王水府灵官校定生人罪福

下元日三品解厄水官主录百司检察人间善恶上诣天阙进呈
【以上出正一旨要亦出山堂肆考】

下元节俗传水官解厄之辰相效持斋诵经 【宣府镇志】

鍾离飞升

衡岳阿真人上升 【以上集仙录】

诗

小阳春动严风冽寒桃烂熳如锦缬天上人间乐事同姮娥亦爱好时节直待盈盈到三五云
头放出团圆月此时天降玉麒麟不数当年珠树列 【事文类聚】

庐阜东北际峒嶢五峰尊中岩穷林绕青天白云屯郡阁有佳眺徙倚空朝昏今晨幸休假发
轶北郭门牵萝出林端蹑后跻云□高寻却深窈小憩欣潺湲古殿宿寒霭新蕙丽朝暎扶藜
陟东冈夙昔规层轩却倚千寻峭前窥百泉奔长风卷浮埃江湖渺相吞结架虽未谐雄瑰已
难论同来俱胜流晤语仍王孙已践支许诺不惭夙尚魂赋诗纪兹日岁晚期相敦
【下元节假行视陂塘因与宾友携儿甥出郭登山归赋诗呈郡中诸寮友朱文公作】

十六日

唐玄宗幸汝州广成汤 【开元十四年十月十六日玉海】

宋太宗宴宰相亲王以下及契丹使高丽使诸川进奉使于崇德殿以干明节罢大宴故也是
后宴外国使为常其君长来朝先遣使迎于候馆 【兴国三年出宋史礼志】

宋孝宗幸茅滩大阅上亲御甲冑指授方略戈甲耀日旌旗蔽天六师欢呼犒费有加焉
【干道四年出经武要略】

荆湖南北风俗以为盘古氏生日以候月之阴阳 【昔古传盘古左手为东岳右手为四岳腹
为中岳首为南岳足为北岳盘古氏神灵一日九变盖元混之初陶融造化之主也真源赋谓

元始应世万八十年为一甲子出路史】

东华帝君升仙 【帝君王姓玄甫其名也得老子之道隐昆仑五台是日上紫府洞天自称少阳帝君后于终南山凝阳洞授道经离先生出道书】

诗

青女嫦娥作下元昨宵蟾桂十分圆手持太乙长生篆来寿方壶不老仙 【事文类聚】

一暑一寒有明有晦神道无迹天工罕代乃置挈壶是惟熙载气均衡石晷正权概世道交丧礼术销亡遽迁水火争倒衣裳击刁舛次丛木乖方爰究爰度时惟我皇方壶方次圆流内袭洪杀殊等高卑异级灵虬承注阴虫吐（口翕）悠往悠来鬼出神入微若抽茧逝如激电耳不辍音眼无留眄铜史司刻金徒抱箭履薄非兢临深罔战授受靡愆登降弗爽唯精唯一可法可象月不知来日无藏往分以符契至犹影响合昏暮卷蓂莢晨生尚辨天意犹测地情况我神造通幽洞灵配皇等极为世作程

【陆偁天监六年十月十六日作新漏刻铭进御先以旧漏乖舛乃敕治之】

十七日

宋太宗晋天福四年生母杜氏梦神人捧日以授已而有娠遂生帝于浚仪官舍是夜赤光上腾如火闾巷闻有异香太平兴国二年宰臣上表请以是日为干明节淳化元年改为寿宁节太宗神功圣德文武皇帝讳灵初名匡义改赐光义帝幼不与他儿戏皆畏服

【出天中记据合璧事类太宗十月七日生两日俱载】

宋仁宗猎于杨村上亲射鹿及雉兔遣使荐太庙既而召父老临问赐饮食茶彩而退宰臣昌期等奏陛下顺时畋猎登庙俎以昭孝阅军实以讲武饮耆年以养老赐田夫以劝农一出而四美具望宣什史馆从之 【庆历五年出稽古录】

元顺帝亲祀昊天上帝于圆丘以太祖皇帝配享右丞相脱脱为亚献官太尉枢密知院阿鲁秃为终献官 【至正三年元史】

东莱吕成公官秘书至淳熙七年是日升为著作郎 【出宋学士集】

苏轼是日上疏曰臣近以左臂不仁两目昏暗有失仪旷职之忧坚乞一郡伏蒙圣慈降诏不允遣使存问赐告养疾恩礼之重万死莫酬云云 【事文类聚】

十八日

唐懿宗十四年是日疾甚制曰朕守大器之重居兆人之上日慎一日如履如临吁旻劳怀寢

兴思理涉道犹浅导化未孚实有虑于阙政且无暇于怡神竟未少瘳日加寝剧谋于卿士思
阐鸿猷皇储第五男晋王俨孝敬温恭宽和博厚俾崇邦本允（口十）人心即日懿宗崩俨
登皇帝位即僖宗也【唐书】

宋真宗后苑观滑州所献白鹿因作赋赋曰瞻彼中林震于珍物牲牲于野标一角以为奇濯
濯其仪阅千龄而成白宛如雍時之符来伏文王之囿云云【天禧三年玉海】

五百罗汉会经曰【藏经】

十九日

宋太祖将议巡幸遣王仁珪李仁祚焦继勋同修洛阳宫室【开宝八年十月十九日遣王仁
珪等同修明年帝至洛阳睹其壮丽仁珪等并进秩出通略】

马韶谓程德玄曰明日乃晋王利见之辰德玄惶骇【马韶赵州平棘人习天文三式开宝中
太宗以晋王尹京申严私习天文之禁韶素与太守亲吏程德玄善德玄每戒韶不令及门九
年十月十九日既夕韶忽造德玄恐甚诘其所以来韶曰明日乃晋王利见之辰德玄惶骇止
韶一室遽入白太宗太宗命德玄以人防守之将闻于太祖及诘旦太宗入谒果受遗践祚韶
以赦获免踰月起家太平兴国三年擢太仆寺丞出宋史】

宋宁宗生为天佑节寻改为瑞庆节【出宋史】

卢仙降于女仙谢自然之庭自辰至未方去降时鸾鹤千万众仙毕集或乘麒麟或鸾或龙
【贞元十年十月十九日集仙记】

诗

姑苏台上春光泄菊老寒轻香未歇人言太守是龚黄天为吾君生稷契【出事文类聚】

昔有佳人公孙氏一舞剑器动四方观者如山色沮丧天地为之久低昂（火霍）如羿射九
日落矫如群帝骖龙翔来如雷霆收震怒罢如江海凝清光绛唇珠袖两寂寞晚有弟子传芬
芳临颖美人在白帝妙舞此曲神扬扬与余问答既有以感时抚事憎惋伤先帝侍女八千人
公孙剑器初第一五十年间似反掌风尘湏洞昏王室梨园弟子散如□女乐余安映寒日金
粟堆南木已拱瞿唐石城草萧瑟玳筵急管曲复终乐极哀来月东出老夫不知其所往足茧
荒山转愁疾【杜工部大历二年十月十九日夔州别驾元特宅见临颖李十二娘舞剑器壮
其蔚跂问其所师曰余公孙九娘弟子也因作剑器行】

皇佑辛卯冬十月十九日御史唐子方危言初造膝曰朝有巨奸臣介所愤嫉愿条一二事臣
职敢妄率宰相文彦博邪行世莫匹曩时守城都委曲媚贵昵银珰插左貂穷腊使驰驿邦媛

将夸侈中金赍十镒为我寄使君奇文织纡密遂烦西蜀巧日夜急鞭扶红经纬金缕排科斗
八七比比双莲花篝灯戴星出几日成一端持行如鬼疾云云 【梅圣俞书审诗】

二十日

东汉郎顗阳嘉年谓顺帝曰十月二十日太白与岁星合于房心太白在北岁星在南相离数
寸光芒交接房心者天帝明堂布政之宫今太白从之交合明堂金木相贼而反同合此以阴
陵阳臣下专权之异也

【郎顗字雅光父宗苍风角顗专父业昼研精义夜占象度出史纂左编】

庆元二年是夜三更后月出时临安嘉兴两郡人木寝者皆见其团圆如望夕 【宋宁宗庆元
二年十月二十日太史奏为上瑞其地当十岁大稔其冬不雪明春无雨民极以为忧下诏惻
怛恳祈中夏尔足果大稔出夷坚志】

宋太祖崩遗诏以日易月皇帝三日而听政 【开宝九年十月二十崩皇帝即太宗】

仁宗太皇太后崩于庆寿宫 【神宗元丰二年】

参知政事窦偁卒宋太宗亲幸其第临丧痛哭设奠还宫

【兴国七年十月二十日卒以上宋史礼志】

吕仲实忠肃公东归 【忠肃公初为集贤学士因议钱币与丞相脱脱不合于元至正庚寅十
月二十日翩然东归公蚤师萧贞敏公传道德性命之学真知实践故立朝大节极有可法出
宋学士集】

苏东坡作修丹赞信笔直书不加点审殆是天成非以意造云饮食之精草木之华集我丹田
我丹所家我丹伊何铅汞丹砂客主相守如巢养鸦培以戊己耕以赤蛇化以丙丁滋以河车
乃根乃株乃实乃华昼炼于日赫然丹霞夜浴于月皓然素葩金丹自成曰思无邪

【宋哲宗绍圣元年十月二十日作赞出长公外纪】

三十代天师张继先生于蒙谷庵 【继先字嘉闻蹄翛然子宋元佑七年十月二十日生五岁
不吉一日闻鸡鸣忽笑赋诗曰灵鸡有五德冠距不离身五更张大口唤醒梦中人宋徽宗崇
宁三年召见上曰卿居龙虎曾见龙虎否对曰居山虎则当见今日方睹龙颜上悦上问以修
丹之术若何对曰此野人事也非人主所宜嗜陛下清静无为同符尧舜足矣出史纂左编】

诗

喜见江梅漏小春飞来五叶砌边萸和熏爱日如迟日光动文星映寿星 【事文类聚】

孟冬寒气至北风何惨栗愁多知夜长仰观众星列三五明月满四五蟾兔缺客从远方来遗我一书札上言长相思下言久离别置书怀袖中三岁字不灭一心抱区区惧君不识察
【古乐府十月二十日作】

二十一日

大明节【梁太祖十月二十一日出玉海】

宋太祖校猎于近郊【建隆四年宋史】

宋真宗御集英殿为饮福宴【真宗祥符年命枢密副使张升望告昊天上帝皇帝服通天冠绛纱袍执圭乘舆至大庆殿门外降舆乘大辇至天兴殿荐享毕乘大辇还宫更服靴袍御紫宸殿群臣百官称贺大赦至二十一日诣诸观寺行恭谢礼御集英殿为饮福宴】

宋神宗葬于永裕陵【元豐八年以上宋史礼志】

李绩平高丽还【唐高宗干封元年十月二十一日还出册麻元龟】

巢谷升仙【巢谷字符修与二苏同乡年一百一十七岁瞳子碧光炯然以十月二十一日遍告邑中闭户而去出夷坚志】

诗

谁把璇玑运花工参旗又挂玉梅东三三律管声余亥九九元经赴起中【事文类聚】

二十二日

文宗开成三年是夜彗星长三丈五尺【十月十九日夜彗星见长二丈余二十日夜长二丈五尺二十一夜长三丈至二十二日夜长三丈五尺出唐书】

宋孝宗太祖七世孙也父秀王母张氏梦府君拥一赤羊来遗之曰以此为识已而有娠以建炎元年是日生于秀州青衫闸之官舍红光满室如日正中绍兴三十二年受禅以生日为会庆节吴芾表云佑格高穹方启明昌之运庆锺良月聿逢震夙之期【秀州外医张浩云少为德清闸官一日过嘉兴忽睹丞厅赤光昭天疑为回禄亟入视之乃赵县丞室中适兑娠是诞育孝宗也出史事实】

陈抟字图南号扶摇子亳州真源县人也是日化形于莲花峰下张超谷中【出史纂左编据翰墨大全七月二十二修类稿七月二十九西岳志七月三十抟与老子同乡里生而不能言至四五岁戏涡水之滨有青衣媪召置怀中乳之自是始能言聪悟过人及长习经史一览

无遗先生曰吾向所学足以记姓名而已吾弃此游泰山之巅长松之下与安期黄石辈论出世法合不死药安可与世俗辈脂韦汨没出入生死轮回间乃尽弃家业惟携一石铛而去至端拱元年十月二十二日化形】

二十三日

唐文宗以新授同州刺史白居易为太子少傅分司以汝州刺史刘禹锡为同州刺史【太和九年十月二十三日玉海】

宋真宗崩仁宗即位是日祔帝于太庙第七室【干兴元年宋史礼志】

翰林学士赵概上所著书宋仁宗以为四门助教【嘉佑元年十月二十三日出玉海】

豐乐里开业寺是日有神人足迹甚长自寺门外至佛殿先是有客宿于寺梦一人长二丈余披金甲立于寺门外俄而以手开其门俛而入寺行至佛殿顾望久之客惊而寤及晓视其门已开矣即以梦告于寺僧共见神人之迹寺僧告于京兆京兆以闻肃宗命中使验之如其言【至德二年宣室志】

诗

风吹仙梦到江南长记初冬二十三道入胡山重敞阁堂登眉寿半垂帘【事文类聚】

二十四日

唐玄宗大搜于凤泉汤【开元三年十月二十四日玉海】

宋真宗祥符五年诏以十月二十四日圣祖降延恩殿日为降圣节【唐会昌元年诏以圣祖降改为降圣节则宋朝用唐遗也出事物纪原】

宋仁宗宴近臣于太清楼饯翰林学士孙奭知兖州【天圣九年玉海】

诗

气候随时应初寒雪已盈乾坤一色白池万重清是处人烟合无穷鸟雀惊忻然不成下连把玉壘倾【伊川十月二十四日早始见雪登白云台闲望道走书呈尧夫先生出击壤集】

壬子初逢雪未多仍却晴人间都变白林下不胜清寒士痛遭恐穷民恶着惊杯觞限新法何故便能倾【伊川奉和十月二十四日初见雪呈相国元老出击壤集】

潮阳南去倍长沙恋阙那堪又忆家心讶愁来惟贮火眼知别后自添花商颜暮雪逢人少邓鄙春泥见驿踪早晚王师收海岳普将雷雨发萌芽【韩昌黎元和十四年三月至潮州十月二十四日以宪宗加号量移袁州刺史闻命即日上道未能携家故有此诗】

二十五日

宋徽宗以是日为天符节【政和二年宋史】

董文忠鸡鸣将入朝忽病仆帝遣中使持药投救不及遂卒甚悼惜之谥忠贞【文忠字彦诚王鄂尝言诗因问文忠能之乎文忠曰吾少读书惟知入则孝于亲出则忠于君诗非所学也元世祖即位置符宝局以文忠为郎居益近密尝呼董八盖董俊之第八子也十月二十五日入朝病卒出元史】

老君过关度尹真人日【升仙记亦出翰墨大全】

贞元十年是日有大鸟集长安形类鸾而毛彩异之名曰天雀曰神雀降则国家尝有大福遍身毛孔中血出沾衣作道陂山水横纹洗之转觉分明向日视之色似金手触之如金声【太平广记】

诗

新甲下元后先庚大雪前九天元降圣同日更生贤【事文类聚】

沔彼流水兮清且涟漪度水为梁兮斯焉在斯成金桥之巨丽得铁锁之宏规当其受以全模观其曲面经始也则大火朝流成功焉乃天根夕见彰于圣德发于讴歌千人唱万人和丹雘蜿蜒倚晴空之蜨蛸瑰材栴比超渡海之鼃鼃人且告符功惟用壮非填鹄之可比法牵牛而为状鹤鸣处于鴈覆晴川异东明击水而徒步

【三国志大余国传注云东明走以兮击水鱼鳖浮为桥】非秦帝驱山而着鞭惟彼童谣兮言犹在耳大人应运兮奉天而起乘彼桥以径度按周道以如砥于是提三尺乘六龙怀万邦入九重【金桥在上党南二里常有童谣云圣人执节渡金桥景龙三年十月二十五日帝经此桥之京潘炎作金桥赋】

二十六日

宋真宗祥符五年礼仪院请改文子为通元真人【唐天宝元年李林甫奏文子号通玄真人庾桑子号洞灵真人至宋祥符十月二十六日改为通元出事物纪原】

宋真宗诏大官进蔬食宰臣请御常膳【祥符三年玉海】

苏东坡在杭州与晦老全翁元之敦夫游南屏寺 【宋哲宗元佑五年十月二十六日至十二月又游小灵隐听林道人弹琴是时坡年五十五出长公外纪】

诗

后夜龙作云天明雨填渠梦回闻剥啄谁呼赵陈予 【元佑六年颖州久旱苏东坡闻颖上有张龙公神祠灵异乃斋戒遣男迨与州学教授陈履常往祷之迨亦颇信道教沐浴斋居而往明日当以龙骨至天色少变十月二十六日景颺履常二欧阳作诗有后夜龙作云云云景颺拊掌曰句法甚新前此未有季默曰有之长官清客吏请客曰主簿少府我即此语也相与笑语至三更归时星斗灿然就枕未几而雨已鸣檐矣至朔旦日作五人复会于郡斋叹龙公之盛德嘉诗语之不谬季默欲书以为异日一笑景颺出适诗云吾侪归卧髀骨裂会友携壶劳行役东坡笑曰是儿也好勇过我】

二十七日

宋太祖干德六年是日和岷言汉获天马赤鴈神龟白麟之瑞并为郊歌国朝合州进瑞木成文驯象从南方自至秦州获白鸟黄州获白雀并合播在管弦荐于郊庙诏岷作瑞文驯象玉鸟皓雀四瑞乐章以备登歌 【玉海】

胡马当来饮淮水 【戴洋字国流妙解占候小数吴末为台吏知吴将亡托病不仕祖约府内地忽赤如血洋曰按河?征亡地赤如升血当有下犯上恐十月二十七日胡马当来饮淮水至期石勒骑大至攻城其日西南兵火俱发约大惧会风回贼退时传言勒遣骑向寿阳约曰必无此事寻而传言果妄晋书戴洋传】

紫微北极大帝下降 【道经】

二十八日

唐代宗诏追诸道兵屯西郊 【代宗大历八年吐蕃寇邠州郭子仪遣朔方兵马使浑瑊战于宜禄官军大败马磷出兵击之又败磷遣军斫吐蕃营破之十月二十八日代宗诏追诸道兵屯西郊吐蕃始退宜禄地名出唐历】

宋真宗召辅臣至苑中山亭观太宗圣制四部群书又至玉宸殿作五言诗王旦等皆赋 【祥符四年玉海】

枢密使王钦若上纂集圣祖事迹十二卷以先天纪为名 【祥符八年玉海】

二十九日

宋真宗诏皇太子宗室近臣诸帅赴玉宸殿翠芳亭观稻赐宴仍以稻分赐之
【景德四年宋史礼志】

长沙王思规为海盐令是日卒先忽见一吏问此谁吏荅曰召海盐令为主簿因出板置床前吏又曰期限尚远在十月二十九日若不信我到七月望日中时视天上当有所见思规敕家人至期看天闻有雷声空中见人垂旒罗列如送葬状后思规卒二十九日也 【甄异录】

三十日

汉高帝三年十月甲戌晦日有食之在斗二十度燕地也后二年燕王臧荼反诛立卢绾为燕王

东汉明帝永平八年十月壬寅晦日有食之既在斗十一度斗吴也广陵王天文属吴后二年广陵王荆坐谋反自杀 【以上文献通考】

唐高祖武德三年是夜有流星坠于东都城内殷殷有声高祖谓侍臣曰此何祥也起居令人狐德棻曰昔司马懿伐辽有流星坠于辽东梁水上寻而公孙渊败走晋军追之至其星处斩之此王世充灭亡之兆也 【唐书天文志】

诏象州澄海指挥名曰忠敢 【宋真宗景德四年十月三十日诏象州澄海指挥名曰忠敢以城守之功也大中祥符九年诏广南东西荆湖南路选兵合澄海名曰忠敢分三指挥以备蛮寇出事物纪原】

张憬藏谓蒋俨曰公十月三十日午时卒俨后如其言 【憬藏许川长杜人少工相术与袁天纲齐名太子詹事蒋俨年少时尝遇憬藏因问禄命憬藏曰公从今二年当得东宫掌兵之官秩未终而免职免职之后厄在三尺土下又经六年据此合是死征然后当享富贵名位俱盛年至六十一为蒲州刺史十月三十日午时禄绝尝奉使高丽被莫辞支囚于地窖中经六年然后得归及在蒲州年六十一矣至开元五年十月三十日召妻子与之告别自云当列出考异】

日涉编卷十一

楚应城陈阶升也甫编辑

邑人徐养量叔弘甫校刻

周治隆庞父甫

何呈瑞穆之甫

陈时育茂之甫

孙陈道统继之甫仝阅

十一月〔一〕

十一月建子子孳也言阳气至此更孳生也【合璧事类】

黄锺子之气也十一月建焉【周礼】

日在斗昏东壁中旦轸中【礼记】

仲冬日出于辰入于申【尚书考灵曜】

日月会于星纪而斗建子之辰【月令】

招摇指子【淮南子】

天以为正周以为春【后陈宠传】

仲冬行春令则虫败民疾行夏令则雾冥雷发行秋令则国有大兵【吕氏春秋】

为辜【尔雅】

月曰畅月【氏人空闲无所事作故曰畅月月令】

晋魏间宫中以红线量日影冬至后日添长一线【岁时记】

唐宫中以女功揆日之长短冬至后比常日增一线【文昌杂录】

天裂于天汉之旁【顺帝至正己丑年元史】

夜日出高三丈中有赤青珥【晋元帝大兴元年诏曰天灾谴诫所以彰朕之不德群公卿士各上封事具陈得失无所讳出晋书】

日食星昼见【宋文帝元嘉五年十一月】

寿星临帝座【康节云嘉佑八年冬十一月京师有道人卜于市貌古不兴常类饮酒无算未尝觉醉人异之近侍辽帝引见赐酒一石饮及七斗次日司天台奏寿星临帝座仁宗时天下熙熙无物不春宜寿星游戏人间】

河阴有赤雪二顷【晋武帝太康七年十一月赤雪后帝崩王宫遂乱出宋书】

大雪盈三尺不止天地晦冥或雪未下时阴云中有雪丝长数寸坠地
【钦宗靖康元年闰十一月宋史五行志】

纷雾如雪【大历二年十一月旧唐书】

昏雾四塞经三日乃止【景龙三年十一月占曰雾连日不解其国昏乱白孔六帖】

阴雾疑冻封树木不解【永徽二年十一月刘向以为木少阳贵臣象此人将有害则阴气胁木先寒故得雨而冰也亦谓之树介介者兵象也五行志】

秦州神亭治北雾开如日初耀中有白鹿白狼见【调露元年十一月白孔六帖】

永安村大风雪夜半若数千人行声语笑歌哭杂扰凝寒阴黑咫尺莫辨及旦有人马鸟兽蹄迹流血污染十余里入山乃绝【绍兴二十年十一月永安村在建昌军新城县五行志】

大风雷雨居民瓦屋皆动【咸淳四年闰十一月宋史】

雨雹杀人大者方圆二尺【高祖承明二年十一月魏书】

雨火有声如鼓【威烈王二年十一月晋有火下于北方通考】

雨土【元豐二年十一月五年亦雨土宋史】

行都雨木【绍兴五年十一月与唐贞元陈留雨木同占吏部侍郎彭龟年上疏论韩侂胄擅

朝误国宋史】

地生毛 【绍熙四年十一月宋史】

黄河是月水名蹙凌水 【水衡记】

洛阳宫西宜秋里忽地生石高三尺如香炉形
【武帝太康十年十一月地生石明年宫车宴驾晋书】

京都地震从东南隐隐有声屋瓦皆摇 【魏明帝青龙二年十一月宋书】

吴郡娄县地中有犬子声掘之得雌雄各一还置窟中覆以磨石经宿失所在 【惠帝元康三年十一月此天戒若曰帝既衰弱藩王相譖故有大祸后元帝太兴四年庐江灊县何旭家地中亦有犬子声掘之得一母犬青兔状甚羸瘦走入草中不知所在视其处有二犬子一雌一雄其后旭里中为蛮所没出晋书】

许州开元观老君像自动 【干德五年十一月知州宋偓以闻宋史】

高祖与沙门道登幸侍中省见鬼衣黄褶裤帝以为人叱之而退
【太和十六年十一月纪异录】

金主宣宗官中有狐狼鬼夜哭于辇路乌鹊夜惊飞鸣蔽天 【至十二月宣宗崩出金史】

枹罕羌妓产一龙子色似锦文常就母乳遥见神光少得就视
【晋愍帝建兴二年十一月此亦皇之不建于是帝竟沦没出宋书】

襄州民刘士家生木有文如鱼龙凤鹤之状 【太平兴国六年十一月五行志】

成都栗树结实食之如李 【长庆三年十一月五行志】

凤凰见济阴已氏 【汉桓帝元嘉元年十一月宋书符瑞志】

乌鹊巢帝帐幄驱不能止 【大业十三年十一月隋炀帝寻逢杀通考】

洛州猫鼠同处 【唐高宗龙朔元年十一月五行志】

干陵赤兔见 【永泰二年十一月五行志】

汾州有青龙白龙见白龙吐物空中有光如火至地陷入地二尺掘之得玄金

【唐太宗真观二十年十一月玉海】

诗

江南仲冬天紫蔗节如鞭海将盐作雪山用火耕田 【吕渭状江南十一月】

素手抽针冷那堪把剪刀明朝驿使发一夜絮征袍 【李白】

浩汗霜风刮天地温泉火井无生意泽国龙蛇冻不伸南山瘦柏消残翠
【岑参冬十一月夜作】

不用裁为鸣凤管不须截作钓鱼竿千花百草凋零后留向纷纷雪里看 【白居易题窗行】

四郊飞雪暗云端惟此宫中落便干绿树碧帘相掩映无人知道外边寒 【吴融华清宫】

风恶波狂身似闲满头风雪背青山相逢略问家何在回指芦花满舍间 【僧贯休题渔者】

天津桥下冰初结洛阳陌上行人绝榆柳萧疏楼阁间月明直见嵩山雪 【孟郊洛桥晚雪】

雪天留饮故情欢银烛金炉夜不寒欲问吴江别来意青山明月梦中看
【王昌龄李仓曹宅夜饮】

十里黄云白日曛北风吹鴈雪纷纷莫愁前路无知已天下谁人不识君 【高适别董大】

夫戍萧关妾在吴西风吹妾妾忧夫一行书信千行泪寒到君边衣到无 【王驾古意】

宫城团迴凛严光白天碎碎堕琼芳挝钟高欢十日酒却天凝寒作君寿御沟泉合如环素火
井温泉在何处 【李贺乐词】

雪花无有蒂冰镜不安台

【梁帝十一月诗后侯景之乱人以为讖谓无蒂是无帝不安台台城不安也】

况复岁云暮凜凜冰霜辰 【韦应物】

渔舟上急水猎火着高林 【杜甫】

大雪

小雪后十五日斗指壬为大雪言积阴为雪至此栗烈而大也 【孝经纬】

大雪十一月节月之初气也言大阴之气以大水凝为雪故曰大雪 【历义疏】

阴雨出而分

大雪鱼负冰 【郑玄曰鱼上近冰也以上易通卦验】

大雪日鹖鸟不鸣 【后五日虎始交后五日荔挺出月令】

大雪日鹖鸟犹鸣者国有讹言虎不交将帅不和荔挺不出卿士专权 【周书时训】

大雪后君子处必掩身无躁事欲静以待阴阳之所定 【顺时气也月令】

诗

薄暮雪云低清宵意惨凄方听飘牖急已报与阶齐疏箔穿飞蝶空庭聚戏倪新晴思访客愁绝满城泥 【陆放翁大雪诗】

冬至

冬至木胎水旺火死金废 【言木孕于水之中也】

大雪后十五日斗指子为冬至阴极而阳始至日南至渐长至也 【孝经纬】

斗指子为冬至有三义一曰阴极之至二曰阳气始至三曰日行南至故谓之至 【孝经说】

冬至之为极者有三意焉昼漏极短去极极远略影极长极者至而极还之辞也
【月令章句】

日短星昴以正仲冬

【尚书孔安国注曰日经冬至日也星昴西方白虎七宿之昴宿并见以正冬之三节也】

地皇氏以十一月为冬至 【出通历高氏小史亦云】

冬至德气为土土色黄故曰黄钟 【晋志】

冬至黄钟之音调君道得 【礼仪志】

阳气渐萌于黄钟之宫 【杨子】

冬至子之半 【邵子】

冬至成天文 【易通卦验郑玄注曰天文谓三光运行而照天下】

调律者度竹为管芦葶为灰列之九闭之中漠然无动寂然无声纤尘不形冬至夜半黄钟以应 【太玄经】

阳气为火火胜故冬至燥 【淮南子】

冬至日在牵牛景长一丈三尺 【夏至日在东井景长尺有五寸周礼】

冬至之日日出辰入申昼行地上百四十六度强夜行地下二百一十九度少弱 【天文录】

冬至日行远道周四极命之曰玄明天 【吕氏春秋】

日冬至则斗北中绳阴气极阳气萌故曰冬至为德

冬至日在骏狼之山 【以上淮南子】

日之行天至于巽维东南角极之于北故曰冬至 【历义疏】

赤土国直崖州南度海经鸡笼岛冬至之日影在北夏至之日影在南开户皆向北 【洽闻记】

冬至三光微 【周髀云】

冬至五星如连珠 【武帝元封元年十一月甲子朔冬至五星如连珠出汉史】

冬至后月养魄于广寒之宫 【卜洲记】

阳云出箕如树木之状 【易通卦验】

冬至东北方融风至 【一名炎风符瑞?】

黄帝得宝鼎神策是岁己酉朔日冬至得天地之纪终而复始 【史记】

僖公五年辛亥朔日南至公既视朔遂登观台以望而书礼也凡分至启闭必书云物为备故也 【左传】 冬至之日蚯蚓结 【后五日麋角解后五日水泉动月令】

冬至之日蚯蚓不结君政不行鹿角不解兵不藏水泉不动阴不成伤 【周书时训】

孤竹之管云和之琴瑟冬至日于地上圆丘奏之 【春官大司乐】

冬至之日北宫御女衣黑采击磬石 【淮南子】

冬至广莫风至诛有罪断大刑 【易通卦验】

冬至始人主致八能之士或调黄钟或调六律或调五行或调律历或调阴阳或调正德 【易通卦验郑玄注曰致八能之士者言选于人众之中取习晓者使之调为谐调和之意也】

冬至始人主于群臣左右从乐五日天下之众亦家家从乐五日以迎日至之礼
【郑玄注曰从者就也冬至君臣俱就大司乐之宫临其肆乐祭天圆五之乐祭莫大于此】

冬至之日荐黍糕先荐玄冥以及祖祢其进酒肴及谒贺君师耆老一如正日 【崔寔月令】

冬至前后君子安身静休百官绝事不听政择吉辰而后省事听事之日百官皆衣绛
【续汉书礼仪志】

魏晋冬至日受万国及百寮称贺因小会其仪亚于岁朝故曰亚岁 【沈约宋书】

冬至日立仗百官皆备珂伞列烛有至五六百炬谓之火城宰相火城将至则众火皆扑灭以避宰相 【出国史补元日亦然】

上御含元殿受朝太史奏曰朔日至历数之先嘉辰之会按乐汁图征曰朔日冬至圣主厚祚又按春秋感精符曰冬至阴云迎日者来岁大美此并圣德光被上感天心请付有司以彰嘉瑞从之 【唐玄宗实录】

宋仁宗天圣六年十一月出秘阁校理范仲淹通判河中时癸亥日南至 【冬至也】
帝率百官朝皇太后于会宁殿仲淹疏曰奉亲于内自有家人礼与百官同列北面而朝可乎
【全编】

宋哲宗冬至日赐御筵于吕公着私第且赐酒果烛且传宣继烛 【元佑四年合璧事类】

开元二年冬至交趾国进犀一株色黄如金使者请以金盘置于殿中温然有暖气问其故使者对曰此辟寒犀也

冬至日大雪忽霁因寒所结溜皆为冰条妃子使侍儿敲下二条玩之明皇问妃子曰所玩何物耶妃子笑而荅曰妾所玩者冰筋也明皇谓左右曰妃子聪慧可爱 【以上天宝遗事】

梁传岐为始新令有囚当死会冬至岐乃放其还家曹吏固争曰古者有此今不可行岐曰某若负信县令当坐竟如期而反太守深相叹异遽以状闻 【南史】

梁席阐出为东阳太守在郡有能名冬至悉放狱中囚依期而至 【梁书】

传贤字仲舒迁廷尉每冬至断狱迟回流涕 【后汉书】

周嵩母李氏尝冬至饮酒举觞赐三子曰吾本渡江托足无所不谓尔等并贵列吾目前吾复何忧嵩起曰恐不如尊旨伯仁志大而才短重名而识暗好乘人之弊此非自全之道嵩性抗直亦不容于世唯阿奴碌碌当在阿母目下耳阿奴谡小字也后果如其言 【晋书】

庾狄伏连冬至之日亲表称贺其妻为设豆饼伏连问此豆何因而得妻对曰于马豆分减伏连大怒 【齐书】

庞籍帅延安日冬至夜恍惚间见天象成文云庞籍后十年作相当以仁佐天下驻视久之方减后十年果为相 【曲洧旧闻】

冬至献履所以迎福践长 【曹植云】

近古妇人常以冬至日上履袜于舅姑践长至之义也 【后魏崔浩女仪云】

冬至先后各五日买白犬养之以供祖祢 【崔寔月令】

冬至日钻燧改火可去瘟疫 【续汉书礼仪志】

冬至阳气归内腹中热物入胃易消化 【南阳张平子养生集要】

共工氏子不才以冬至日死为疫鬼畏赤小豆是

日以赤小豆煮粥禳之 【四时纂要】

诗

献寿人皆庆南山复北堂从今千万日此日又初长 【姚合和李舍人冬至日】

景移风度攻日至晷迁换眇眇负霜鹤皎皎带云鴈 【鲍昭】

冬至至后日初长远在剑南思洛阳青袍白马有何意金谷铜驼非故乡 【工部】

日近山红暖气新一阳先入御沟春闻闲立马重?此沐浴明年称意身
【王建冬至后招子秀才】

清斋独向丘园拜盛服想君兴庆朝明日一阳生百福不辞相望阻寒宵
【权德舆冬至宿斋时郡臣南内朝谒因寄】

十一月中长至夜三千里外远行人若为独宿杨梅馆冷枕单床一病身
【白居易冬至宿杨梅馆】

至日观书不几行梅梢横月欲昏黄汉宫红影无人见未必能添一线长 【方巨山】

井底微阳回未回萧萧寒雨湿孤茭何人更似苏夫子不是花时独肯至
【东坡冬至日游吉祥寺】

新阳气候未全佳尚纵寒威压岁华赖有椒觞供卯酒不妨和雪看梅花 【韩子苍】

何者谓之几天根理极微今年初尽处明日未至时此际易得意其间难下辞人能知此意何
事不能知 【郡雍冬至作】

天宫初动磬缇室已飞灰暮风吹竹起阳云覆石来析冰开荔色除雪出兰栽惭无宋玉辨滥
次楚王台 【兰谔】

灵象将数回四气凭时散阴律鼓微阳太明将起旦感兴时未多心随游化难式宴集中堂嘉
宾盈朝馆 【陈薪涂妻李氏冬至作】

天时人事日相催冬至阳生春又至刺绣五纹添弱线吹葭六管动浮灰岸容待腊将舒柳山
意冲寒欲放梅云物不殊乡国异教儿且覆掌中杯
【工部小至诗阳为大阴为小冬至阴极故曰小至】

年年至日常为客忽忽穷愁泥杀人江上形容吾独老天涯风俗自相亲杖藜雪后临丹壑鸣
玉朝?散紫宸心折此时无一寸路迷何处见三秦 【工部冬至诗】

愆阳值岁晏忽复层阴结一雨散霏微千林共骚屑端居遗簿领远意怀幽洁旷虑守微痼殊
方感新节岂伊田庐念丘垄摧心折还登东岭冈瞻伫何由歇 【宋文公冬至阴雨作】

十一月〔二〕

一日

周建子以十一月朔为岁首

义熙元年至元熙元年皆是日日蚀蚀从上始占曰臣民失君之象
【晋安帝义熙元年恭帝元熙元年沈约宋书】

武帝元封元年十一月甲子朔一日冬至五星如连珠 【汉史】

晋惠帝永康元年十一月戊午朔旦大风从西北折木飞石 【后赵王伦篡位】

十有一月朔巡狩至于北岳 【书】

唐高宗幸东都 【上元元年玉海】

唐僖宗皇帝晏驾 【光启十一月一日晏驾昭宗即位耆旧传】

宋真宗封泰山以是日幸曲阜备礼谒先圣庙内外设黄麾仗孔氏宗属并陪位帝服靴袍行献礼又幸叔梁纥堂命官分奠七十二弟子先儒洎叔梁纥颜氏初有司定议肃揖帝特展拜以表严师崇儒之意复幸孔林以树拥道降舆乘马至文宣王墓设奠再拜 【祥符元年追谥曰玄圣文宣王祭以大牢修饰祠宇乃追封叔梁纥为齐国公颜氏鲁国夫人伯鱼母开官氏鄆国夫人出宋史礼志】

宋太宗诏百官次对 【淳化二年十一月一日出六典】

元和元年是日斩刘辟西川之乱十二年是日斩吴元济淮西之乱十三年是日斩李锜浙西之乱宪宗诛三贼皆同月同日自古未有 【宪宗御兴安门受淮西之俘以吴元济斩于独柳树妻沈氏没干掖庭第二人子二人亦诛之出卓异记】

柳泌是日言于唐宪宗曰天台山神仙所聚多灵药虽知之力不能致诚得为彼长吏庶几可求上信之 【台州因天台得名旧唐书】

波斯国人庶以上各相命诏设会作乐 【七月七日亦然出北史】

奉印肃禅师于塔 【印肃号普庵袁州之宜春人也书偈毕跏趺而逝冬十一月一日奉金身于塔弟子应世书请临江良斋谢公谔铭其塔出禅林集】

僧智兴鸣钟声振地狱 【唐京师大庄严寺僧智具洛州人也励行坚白诵经持律不辍昏晓至大业五年仲冬次当直殿鸣钟其寺僧三果者有兄从炀帝南幸江都中路身亡骤无讣也通梦于妻曰吾行至彭城不幸身死无善行今坠地狱备经五苦赖今十一月一日僧智兴鸣钟发向声振地狱同受苦者一时解脱今生乐处思报其恩汝可具绢十疋谢之妻惊而寤白

其事人无信者后凶计至与梦符如数以绢诣寺谢之寺众咸问智兴何缘鸣钟乃感斯应智兴曰余闻罽𑖇吒王受苦闻钟得脱出高僧传】

葛仙翁受太上三天金简策书王洪轨真人升仙 【以上翰墨大全】

诗

微霰霏霏点玉堂词头夜半揽衣忙分光御烛星辰烂拜赐宫壶雨露香醉眼有花书字大老人无睡漏声长何时却逐桑榆暖社酒寒灯乐未央

【苏子瞻直玉堂十一月一日锁院苦寒诏赐宫烛法酒】

窗前暗响鸣枯叶龙公试手初行雪映空先集疑有无作态斜飞正愁绝众宾起舞风竹乱老守先醉霜松折恨无翠神点横斜祗有微灯照明灭归至尚喜更鼓永晨起不待铃索掣未嫌长夜作衣棱却怕初阳生眼纒欲浮太白追饮赏幸有回飊惊落屑模糊桧顶独多时历乱瓦沟裁一瞥汝南先贤有故事醉翁诗话谁续说当时号令君听取白战不许持寸铁 【东坡元佑六年十一月一日祷雨张龙公得小雪与客会饮聚星堂忽忆欧阳文忠公作守时雪中约客赋诗故作之】

二日

梁太祖南郊 【开平三年】

后周世宗葬于庆陵 【庆陵在郑州管城县以土通考】

宋仁宗遣内侍就辅臣第赐飞白书各一轴张士逊等入朝奏曰陛下万几之烦翰墨不倦神笔奇奥旷古未有上曰朕听政之暇无所用心以此自娱耳 【宝元二年十一月二日玉海】

敕叔梁纥追封齐国公颜氏追封鲁国太夫人
【宋真宗祥符元年十一月二日敕出宋朝会要】

宋程端厚献圣德诗 【高宗绍兴十一年十一月二日献出会要】

元人白斑葬钱塘县栖霞山 【字廷玉天历元年九月卒是年十一月初二日葬其子遵治命题曰西湖诗人白君之墓先生初出刺得宜文化大行后谢事养痾海陵远近檐簪相从者殆无虚日与韵朋胜友曳杖游□□杯赋诗所居西湖有泉白天竺?及门而汇曰湛渊因以自号出宋濂集】

僧请梁武帝于寺发般若经二塔俱发光 【武帝初到寺以金钵水泛舍利钵内放光武帝遣皇太子王侯朝贵等迎舍利供养其日风景明和观者数万人共所设金银供具等物并留寺

供养施镇一万为寺基业至十一月初二日寺僧又请武帝于寺发般若经二塔俱放光出梁书】

满头花生 【韩侂胄爱姬三夫人号满头花十一月初二日生史纂左编】

诗

阳萌两日寿星光天佑生贤侍玉皇上世勋庸满锺鼎后昆风骨总侯王 【事文类聚】

三日

宋徽宗南郊 【大观四年出通考】

宋徽宗加神宗哲宗徽号皇帝御大宝殿奉神宗册宝授大师鲁国公蔡京载以玉辂奉哲宗册宝授少师太宰何执中载以金辂并诣太庙幄殿奉安 【政和三年十一月三日至四日皇帝诣景灵宫行礼赴太庙宿斋五日服袞冕恭上神宗哲宗册宝于本室出宋史礼志】

苏轼奏曰臣伏见熙宁以来高丽人屡入朝贡至元丰之末十六七年间馆待赐予之费不可胜数两浙淮南京东三路筑城造船建立亭馆调发农工侵渔商贾公私告病朝廷无丝毫之益夷虏获不赀之利 【宋哲宗元佑四年十一月三日奏出文编】

杜希全与朱泚战于漠谷官军不利 【自是泚益骄大出史纂左编】

侂胄早朝筠复白其事 【侂胄十一月二日酣饮至五鼓其夕周筠以覆帖告变时侂胄已被酒视之曰这汉胡说于烛上焚之初三日将早朝筠复白其事侂胄叱之曰谁敢谁敢遂升车而去甫至六部桥忽有声喏于道傍者问为何人曰夏震时震领兵三百俟于此复问何故曰有旨太师罢平章事语未毕健卒百余人拥其轿以出至玉津园夹墙内槌杀之出左编】

杨正见升仙 【正见者眉州通义县民杨宠女也聘同郡王生一日舅姑会宾客市鱼使正见脍之正见怜鱼尚活不忍烹至日昃而盘饌未备舅姑责之正见惧窜于邻里行数十里花木异于人世又至一山舍有女冠在焉正见以其故白之女冠曰子有好生之心因留宿使正见汲泉汲泉处有一婴儿洁白见人且喜且笑正见抱之而归渐近家儿已殁矣视之若草木之根重数斤女冠见而识之乃茯苓也命洁甑蒸之会山中粮尽女冠出山求粮忽风雨不能归正见饥甚闻甑中香窃食之女冠归叹曰神仙自有定分吾不为风雨所阻汝岂能食此灵药耶自是正见光彩射人常有群仙降其室后白日升天时开元二十一年十一月三日也升仙处即邛州满江县出集仙录】

太上大道君登玉霄琳房四盼天下 【道经】

四日

汉安帝京师地动其日戊辰三者皆土位在中宫【戊干辰支皆土也并地动故言三者】杨震上疏曰臣蒙恩备台辅不能奉宣政化调和阴阳令十一月四日京师地动地者yin精当安静承阳而今摇动者阴dao盛也此中臣近官持权用事之象望陛下奋干刚之断弃骄奢之臣以承皇天之戒【震前后所言转切而樊丰等皆侧目愤怨以其名儒未敢加害会河间男子赵腾上书指陈得失帝怒震上疏救之杨震字伯起弘农华阴人博览无不穷究出杨震传】

唐高祖诏皇族子弟功臣子弟于秘书外省别立小学【武德元年十一月四日诏玉海】

唐高宗狩于华山之曲武原【上元元年玉海】

宋仁宗以新制风角集占三卷赐辅臣其风角谓候四方隅之风以占吉凶【康定元年出备边要览】

耶律楚材善律历术数帝是日出猎楚材以太乙数推之亟言其不可左右皆曰不骑射无以为乐帝即日出猎崩于行在所【元史】

五日

宋神宗是日冬至祀昊天上帝于圜丘以太祖配帝服靴袍乘辇至大次有司请行礼【元丰七年】

宋真宗赐辅臣玉清昭应宫甘露歌其歌曰名神浆称天酒考祥图兮嘉应之首降仁寿零未央观旧史兮太宁之祥【祥符九年】

宋孝宗御书御制用人论赐宰臣陈俊卿等略云邪佞乱真比比皆是知人则哲帝王所难哲王用人广独智以照临稽众论而遴选择不厌精任不厌久【干道五年】

江南李煜吴越钱俶各遣子弟至朝太祖是日宴于崇德殿【开宝四年以上玉海】

唐丞相王涯有郑注之祸【丞相王涯太和九年掌邦赋其子仲翔尝一日避暑于山亭忽见家童数十皆无手并至仲翔方食顷之不见仲翔惊即白于涯涯不听是岁冬十一月五日果有郑注之祸出宣室志】

诗

楼头禁鼓试初挝催草江淮督使麻落纸一帘风雨疾不知斜墨阵翻鸦

【十一月五日锁学士院洪恣夔作】

卧闻落叶疑飘雨起对空庭盖卷风政自摧颓同病鹤况堪吟讽类寒虫忽思有客浑如我却
念题诗不似公已分蠶盐终白首可因霜雪媿青铜

【赵昌父十一月五日晨起书呈叶德璋司法】

六日

晋康帝是日彗星见亢长七尺白色占曰亢为朝廷主兵丧二年康帝崩

【建元元年天文志】

齐武帝是月土雾竟天浓厚至是日未时小开其雾浓密如火烟辛渗入人眼鼻

【南齐书五行志】

宋徽宗以为天应节 【宋徽宗政和三年十一月六日祀昊天上帝于圜丘太师蔡京奏天神
降格实为大庆乞付史馆帝出手诏播告天下御制天真示现记寻以天神降日为天应节出
宋史礼志】

宦官刘季述等外结蕃侯以为党援是日季述矫诏以皇太子监国遂废昭宗居东内夺传国
宝授太子昭宗以何皇后宫嫔数人随行幽于东宫季述手持银挝于上前以挝画地数上罪
状令李师虔以兵围之鎔锡锢其扁鐻时方凝冽嫔御无被哭声闻于外 【唐时宦官刘季述
王奉先为两军中尉出徐彦□镇南海崔彻秉政而排摈宦官季述等外结蕃侯十一月六日
季述矫诏遂废昭宗于东宫亢墙通食者两月后崔彻等谋诛季述复迎昭宗即位改元天复
元年出旧唐书】

宋仁宗天安殿恭谢天地次太庙

【明道元年十月修宫室成诏十一月六日恭谢天地出礼志】

宋仁宗以皇太子生宴辅臣宗室于太清楼读三朝宝训赐御诗 【宝元二年玉海】

惟俨禅师告寂 【惟俨禅师澧州药山僧年七十依潮阳西山慧照禅师出家后从马祖得道
师一夜登山经行忽云开见月大□一声应澧阳东九十里许居民尽谓东家明晨迭相推问
太和八年十一月六日乃告寂塔于院东隅唐文宗谥弘道大师塔曰化城出楚通志】

七日

唐德宗亲飨庙 【贞元六年通考】

唐宪宗是日以山人柳泌为台州刺史令入天台山采药 【元和十三年谏官论之不纳】

宋太祖幸镇宁军节度使张令铎第视疾 【开宝二年以上玉海】

善会禅师召门徒曰吾与众僧话道累岁佛法深旨各应自知吾今幻质时尽即去汝等善保护如吾在日言讫奄然而逝 【善会禅师澧州夹山僧幼岁出家后得道从者甚众谓门徒曰劳持生死法唯向佛边求目前迷正理拨火觅浮沤唐中和元年十一月七日召门徒言讫告寂出楚通志】

道宁禅师酉时跏趺而逝 【道宁禅师潭州开福寺僧壮为道人于崇果寺执浴一日将濯足偶诵金刚经至于能生信心以比为实句遂忘所知忽垂足沸汤中后祝发蒋山依雪宝老良禅师至徽宗政和三年十一月示寂舍利五色归藏于塔出禅宗志】

诗

庆阳至七日和气渐舒徐敬为图南祝一瓣问兴居 【事文类聚】

八日

唐德宗诏有事于南郊太庙从官吏将士等一切并令自备食物
【贞元六年十一月八日诏玉海】

唐中宗宋高宗亲飧庙 【宋宗神龙元年高宗绍兴十三年出通考】

宋真宗修尚书省龙图学士陈尧咨总其事 【天禧四年十一月八日出会要】

宋高宗是日修太后殿亲书慈宁之殿 【绍兴九年玉海】

唐柳宗元卒 【元和十四年十一月八日卒年四十七韩子为作墓志铭极称其以柳易易播之事为笃于交道且言子厚斥不久穷不极虽有出于人其文学词章必不能自力以致必传干后如今无疑也虽使子厚得所愿为将相于一时以彼易此孰得孰失必有能辨之者】

王洪临真人升仙 【列仙传】

诗

奔走人间无已时夜总喜对出尘姿移灯看影怜渠瘦掩户留香笑我痴冷艳照杯欺曲蘖孤标逼砚结冰澌本至难入繁华社莫向春风怨不知
【陆放翁十一月初八日夜灯下对梅独酌累日劳甚自慰】

鹤飞去兮西山之缺高翔而下览兮择所适翻然敛翼宛将集兮忽何所见矫然而复系独终

日于涧谷之间兮啄苍苔而履白石鹤归来兮东山之阴其下有人兮黄冠草屨葛衣而鼓琴躬耕而食兮其余以汝饱归至归至兮西山不可以久留

【东坡元豐元年十一月初八日作放鹤招鹤歌】

九日

唐德宗亲飧庙 【贞元九年通考】

梁武帝诏大通七年十一月九日以前在民间无问多少凡所未入者皆赦除之诏曰用天之道分地之利盖先圣之格训也凡是桑田废宅公创之外悉分给贫民 【出梁书】

宋太宗诏曰国家先定车服制度闻上庶尚有奢侈于是鞍辔服带幘头巾子并为条制复禁泥金真珠服饰 【端拱二年十一月九日诏】

宋高宗建阁藏圣制诏曰载稽帝世之隆无若尧章之焕揭名层宇列职清箱置学士侍制直阁 【淳熙十五年十一月九日建阁以上玉海】

宋孝宗郊祀改元淳熙 【干道九年十一月九日出宋史】

东坡是夜梦与人论神仙道术因作一诗八句觉后录呈子由弟前四句析尘妙质本至空更积微阳一线功照夜一灯常耿耿闭门千息自蒙蒙后四句不甚明补成之养成丹灶无烟火点尽人间有晕铜寄语山神停伎俩不闻不见我何穷

丘处机葬

【处机至元六年赠长春演道主教真人十一月九日大葬四方哀恸如丧其亲出左编】

东斗南斗下降 【道经】

诗

九日驱驰一日闲寻君不遇又空还怪至诗思清人骨门对寒流雪满山

【韦应物十一月九日访隐不遇】

十日

唐高祖讲武于同官县 【武德八年十一月十日讲武虞世基讲武赋曰上林从幸相如颂德长杨校猎子云为赋选羽林于七郡诏蹶张于五营命司马以示法帅掌固而清甸导甸始以前驱伏钩陈而后殿云云出会要】

唐玄宗开元十二年群臣屡上表请封禅以十三年十一月十日有事于泰山张说首建封禅之议而源干曜不欲为之由是与说不平

翰林侍讲学士孙奭知兖州帝是日作七言诗宠其行诏近臣皆赋
【宋仁宗天圣元年以上玉海】

仙女萼绿华于晋穆帝升平三年是日下降于羊权家自云南山人又云我本姓杨又云是九疑山中得道罗郁也赠权诗一篇火浣布一条金玉绦脱各一枚谓权曰慎勿泄我下降之事泄之则彼此获罪言毕化形而去今在廂东山中 【真诰】

神霄玉清王诞日 【翰墨大全】

诗

月管循环届仲冬莫生十叶气葱葱梅花香里开华宴拍酒尊前拜寿翁 【事文类聚】

古渡风沙卷夕霏小江烟浪皱春漪天于麦陇犹慳雪人向梅梢大欠诗顿辔青骢飞脱兔离弦白羽啸寒鸱牙门列校俱慄锐檄与河边秃发知
【曾茶山淳熙十四年十一月初十日海云回接骑城北时吐蕃出没大渡河水上范石湖】

十一日

后晋高祖霜露着草木皆为冰 【天福十二年十一月旦日天大昏雾木有水至十一日霜露皆为冰时魏府杜重威叛讨降之至?年正月二十七日高祖崩出通考】

唐高宗于阳城周公测景所得土圭长丈二尺七寸 【调露元年】

唐玄宗以贡举人谒先师 【开元七年以上玉海】

宋太祖幸封禅寺观新锺 【开宝三年通典】

高袞上二都赋 【宋高宗建炎十五年玉海】

天仓开日宜入山修道修启福斋 【仙经】

诗

礼圣至群彦观光在此时闻歌音乍远合乐和还迟调朗能偕竹声微又契丝轻冷流龔虞繚绕动纓綏九变将随节三终必尽仪国风由是正王化自雍熙

【唐玄宗十一月十一日以贡举人谒先师闻雅乐吕灵作】

蔼蔼观光士至同鹄鹭群鞠躬遗像在稽首雅歌闻度曲飘清汉余音遏晓云两楹凄已合九仞杳难分断续同清吹洪纤入紫氛长言听已罢千载仰斯文 【题同前王起作】

十二日

宋真宗命学士宗谔祭河渚 【祥符元年玉海】

宋英宗命韩琦判永兴兼陝府西路经略安抚使手札趣令治装 【治平四年玉海】

宋哲宗诏礼部立诗赋式取士 【元佑二年玉海】

智雨禅师寂灭

【宋太宗至道三年十一月十二日告寂寿八十一涟水人传法于仁辩长老出楚通志】

女仙谢自然上升 【翰墨大全】

十三日

唐中宗是日冬至祀圜丘于南郊 【中宗景龙三年十一月十三日乙丑冬至阴阳人卢雅侯艺等请奏促冬至就十二日甲子以为吉会右台侍御史唐绍奏曰礼所以冬至祀圜丘于南郊夏至祭方泽于北郊者以其日行躔次极于南比际也日北极当晷度循半日南极当晷度环周是日一阳又生为天地交际之始故易曰复见天地之心乎即冬至卦象也一岁之内吉莫大焉甲子但为六甲之始一年之内隔月常运既非大会晷运未周唯总六甲之辰助四时而成岁今欲避环周以取甲子是背大吉而就小吉也太史令傅孝忠奏曰南陆北陆并日校一分若用十二日甲子即欠一分未南极即不得为至上曰俗谚云冬至长于岁亦不可改竟依绍议以十三日乙丑祀圜丘出通考】

宋高宗是日太史令胡平言车驾至青城阴雾收敛登坛至礼毕天气澄肃星月明莹回銮肆赦有彩云之瑞乞宣付史馆从之上因是亲制喜霁诗宰辅从臣皆和以进 【绍兴十九年玉海】

太常少卿段成式与温庭筠友善成式六月卒是日冬至大雪忽有扣门者仆夫视之乃隔扉授一竹筒云段少卿送书?庭筠初以为误发护书上无字开之乃成式手札也庭筠大惊乃焚香再拜而读辞曰恻发幽门哀归短数云云 【温段二子皆传其事出太平广记】

朱橘立化 【朱橘号翠阳居淮西安庆之望江六岁而怙恃俱失及长喜阅道释之书乃厌薄名利钦慕修炼所至名山胜地必欲登览意在得师以证入道橘后为寇所挠入闽至惠州之

博罗县有乡人陈六者留之是时道成矣忽谓乡人陈六曰吾将去矣汝盍为我?之橘乃坐化于旅馆中陈乃与馆主谋之扛抬橘于门首殡埋之乃复苏又谓陈六曰吾今当立化于县衙前陈从其言化后用泥塑之骇而聚观者千余人忽博罗狼吏醉呼而前曰汝假为坐化又复假为立化遂执凳鞭之惟见堆泥堕地而已众人方知橘示神变而尸解时宋理宋淳佑二年十一月十三日也出史纂左编】

海空智藏天尊降日 【道经】

十四日

诏河渚进号为顺圣灵源公 【宋真宗大中祥符元年十一月十四日诏河渚进号至仁宗康定二年诏封四渚皆为王按唐会要天宝六载封河为灵源公济为清源公江为广源公淮为长源公又按三代命五岳视三公四渚视诸侯】

唐高宗是日雨木冰 【仪凤三年五行志】

唐懿宗生于藩邸 【懿宗生于太和七年十一月十四宣宗长子母曰元昭皇太后晁氏帝即位年二十七姿貌雄丽有异稠人藩邸时疾郭叔妃侍医药见黄龙出入于卧内妃以异告帝曰慎勿复言又尝大雪数尺而帝寝室之外独无人皆异之出旧唐书】

宋真宗次澶州宴从臣父老于驻蹕延禧殿 【祥符元年玉海】

十五日

孝武帝是日太白填星合于厄占曰天子失土 【孝建六年南齐书天文志】

宋太祖亲飨庙 【干德元年】

宋太宗南郊 【太平兴国三年以上通考】

孟子卒

【孟子卒于赧王二十六年正月十五日即今之十一月十五日也寿八十四出孟谱】

建安十二年之夜月色皎洁长江一带如横素练曹操置酒于舟中顾夏口樊山等处曰吾自起兵以?澄清四海所未得者江南也吾得此可以富国强兵今有百万雄师何患功业不成于是命左右行酒至夜半乃止 【三国志】

东坡是日有菊花开时即重阳之语故记其在海南蓺菊花九畹以十一月望日与客泛酒作重九云 【出容斋续笔又长公外纪云东坡在儋州有移永州之命李公弼林子中自番禺追

钱至清远峡同游广陵寺至十一月十五日东坡舟行时东坡年六十五】

占城国风俗以是日为冬至人皆相贺州县以土产物帛献其王 【占城国在中国之西南其俗与大食国相类无丝茧以白（迭毛）布缠其胸垂至于足衣衫窄袖撮发为髻市无缙钱止用金银其王脑后髻髻散披古贝衣带金花冠七宝装纓络为饰股胫皆露蹠革履无袜妇人亦脑后撮髻其服及拜揖与男子同王每午坐禅椅官属谒见膜拜一而止白事毕复膜拜一而退出通考】

诗

东林气微白寒鸟高高翔吾亦别兹去北山归草堂仲冬正三五日月遥相望萧萧过颖上朧朧辨少阳春冰生积雪野火出枯桑独往路难尽穷阴人易伤伤此无依客如何度雪霜
【崔曙十一月十五日早发交崖山还太室】

十六日

宋太祖干德元年礼仪使陶谷十一月十六日行南郊礼上是日服袞冕执圭合祭天地于圜丘以皇弟开封尹光义为亚献兴元尹光美为终献将升坛有司具黄褥为道上曰朕洁诚事不必如此命彻之还宫将驾金辂顾左右曰于典故可乘辇否对以无害乃乘辇以南郊礼成大宴广政殿号曰饮福自是为例 【出通考】

唐玄宗是日以周武王汉高祖于京城内同置一庙并置官吏 【出通考】

肃宗是日有女尼真如忽见二皂衣引至一所见天帝出宝授真如曰汝往令刺史崔旌进达于天子肃宗寢疾方甚视宝召代宗谓曰今上天赐宝祚汝宜宝受之代宗即日以宝应纪年
【唐书】

天禧年宋真宗考选一百四人以郭祜第一是日宣翰林学士钱惟演盛度枢密直学士王晦叔龙图阁待制李虚已李行简覆考举人有讼不平者及奏名郭祜依旧其余覆落
【出容斋四笔】

彭思永以疾终 【彭思永字季长上书告老迁户部侍郎致仕熙宁三年十一月十六日卒年七十有一任官四十五年精于吏治事业磊落然德性之美心术之淳世尤尊之出行状】

天竺国是日为冬至则麦秀 【西域志亦出天中记】

十七日

唐太宗诏罪人无得鞭背又诏死刑皆三覆奏

【贞观四年十一月十七日诏太宗尝览明堂针灸图见人之五脏皆连背出刑法志】

王仲舒卒 【唐穆宗长庆三年十一月十七日卒年六十二天子为之罢朝赠左散骑常侍远近相吊曾为拾遗朝退天子谓宰相曰第几人非王某耶是日方与阳城更疏论裴延龄诈妄士大夫重之仲舒字弘中出志铭】

苏辙妻德阳邵夫人史氏生 【出苏氏谱】

启福之辰

天帝游东井

西斗降 【以上道经】

十八日

宋神宗有事于南郊 【熙宁元年十一月十八日有事于南郊御札有十天正之辰修郊见之礼方且进祈茂祉以大芘黎元昭格至精以终熙事云云出宋文鉴】

宋仁宗改元宝元 【景佑五年玉海】

宋真宗因雪宴近臣于崇文院帝作瑞雪五言诗令馆阁即席和进 【景德四年玉海】

西方妙善弥陀佛生 【藏经】

十九日

侯景以是日僭位 【大宝二年至明年三月十九弃城逃窜出北齐书】

晋安王子勋是日戒严戎服出厅事集僚佐使潘欣之口宣旨曰少主昏狂悖戾并是诸君所见闻顾命重臣悉皆诛戮驱逼王公幽辱太后不逞之从共成其衅京师诸王并见囚逼委厄虎口思奋莫因身义兼家国岂可坐视横流今便欲举九江之众驰檄近远以谋王室于诸君何如四座未荅录事参军陶亮曰少主昏狂丑毒已积伊霍行之于古殿下当之 【于今】鄱州士子世习忠节况属千载之会请效死前驱 【邓琬字符琬豫章南昌人也宋废帝狂悖无道乃遣使赍药赐晋安王子勋死使至子勋帅潘欣之等驰以告琬涕泣请计琬曰身南土寒士蒙先帝殊恩以爱子见托岂得借门户百口当以死报幼主昏暴社稷危殆虽曰天子事犹独大今便指率文武直造京邑与群公卿士废昏立明景和元年十一月十九日子勋即日戒严戎服出厅事集僚佐使潘欣之口宣旨云云出宋书】

神宗幸尚书省顾执政曰新省弘壮与官制相称次至仆射厅 【元豐六年玉海】

程明道祭富韩公 【元豐六年十一月十九日遣外甥张敷祭大尉文忠公文有我公道行乎重熙累洽之运而身享乎尊富安荣之完勋业揭乎日月闻望塞乎天渊云云出明道集】

廉希宪卒 【至元十七年十一月十九日卒年五十追封魏国公谥文正希宪字善甫布鲁海牙子也世祖为皇帝希宪年十九得入侍见其容止议论恩宠殊绝希宪笃好经史手不释卷一日方读孟子闻召急怀以进世祖问其说以性善义利仁暴之旨为对世祖嘉之目曰廉孟子由是知名后至元元年丁母忧勺水不入口者三日恸则呕血庐于墓傍宰臣以忧制未定欲极力起之夺情起服希宪虽不敢违旨然出则素服从事入必缞经及丧父亦如之出史纂左编】

粘罕元帅围京城 【宋钦宗靖康元年二月二日金人围汴城三月三日金人北去至十一月十九日粘罕元帅再围京城出七修类稿】

日光天子生

诸天华严菩萨及文殊佛出世 【以上佛书】

北阴圣母元君下降 【道经】

诗

连日寒殊甚衰年无一能砚呵磨墨冻瓶晒插花水浮世无根絮余生有发僧苏门如可即端合事孙登 【赵宾旸次韵方万里寒甚送酒时戊寅十一月十九日】

不饮胡为醉兀兀此心已逐归鞍发归人犹自念庭闱今我何以慰寂寞登高回首坡陇隔惟见乌帽出复没苦寒念尔衣裘薄独骑瘦马踏残月路人行歌居人乐僮仆怪我苦凄惻亦知人生要有别但恐岁月去飘忽寒灯相对记畴昔夜雨何时听萧瑟君知此意不可忘慎勿若爱高官职 【东坡十一月十九日与子由别于郑州西门之外马上赋此寄之】

从知崧岳储神日正在文殊出世时 【事文类聚】

二十日

宋仁宗改元庆历 【康定二年玉海】

宋仁宗南郊 【庆历元年】

宋太宗亲飨庙 【雍燕元年以上通考】

宋真宗御龙图阁诏近臣观太宗草行飞白篆籀八分书及画 【咸平四年玉海】

孔明沐浴散发登坛

【祭风坛名七星坛建于南屏山后有诗曰诸葛身亡千载后再无人上七星坛出三国志】

金主章宗崩 【泰和八年出金史】

王志都有知己者早亡一日现形谓志都曰吾念卿无妇欲为卿得妇送至卿家十一月二十日可扫除庭户设床席待之志都如其言至是日天忽大风白日昏黑见床上有一妇自称庄严内外惊怖无敢近者惟志都知之须臾妇起而坐志都曰汝是谁妇曰我河南人父为清河太守不知何由至此志都具语其意妇曰君之知己令我为君妻遂成夫妇

【志都往诣妇家大喜亦以为天相与也后生一男为南郡太守出太平广记】

诗

匝路亭亭艳非时裊裊香素娥唯与月青女不饶霜赠远虚盈手伤离适断肠为谁成早秀不待作年芳 【李义山十一月二十日至扶风见梅花】

二十一日

唐玄宗祀后土于睢上其文曰恭惟坤元道昭品物广大茂育畅于生成庶凭休和惠及黎献博厚之位粤在汾阴肃恭时巡用昭旧典敬以琮币牺牲粢盛庶品备兹瘞礼式展礼毕令所司刊石于祠所 【玄宗欲幸太原中书令肃嵩上言云陛下开元十一年亲祀后土为苍生祈谷自是神明昭佑累年豐登有祈必报且汉武帝祀睢上前后数次伏请准旧事至后上行报赛之礼上从之至十一月二十一日祀后土于睢上出通考】

宋太宗有事于南郊 【太宗即位之八年泰山父老千余人诣阙请东封帝谦让未遑厚赐以遣之明年宰臣宋琪率文武官僧道者上表以请乃诏以十一月二十一日有事于泰山命翰林学士扈蒙等详定仪注既而干元文明殿灾诏停封禅而以十一月二十一日有事于南郊出宋史礼志】

帝御紫宸韩约奏曰金吾左仗院石榴树夜?有甘露乃蹈舞再拜宰相百官相次称贺李训奏曰甘露降祥俯在宫禁陛下宜亲幸左仗观之上乘软舁出紫宸门由含元殿东阶升殿上令宰相两省官先往视之既还曰臣等恐非真甘露不敢轻言言出四方必称贺上曰韩约妄耶 【李训肃宗时宰相揆之族孙也始名仲言进士擢第形貌魁梧神情丽落辞敏智捷善揣人意后为礼部侍郎同平章事赐金紫太和九年十一月二十一日帝御紫宸出旧唐书】

唐高宗讲武（汀去丁改？）水之南行三驱礼设次于尚书台以观之许州长史封道弘奏台本汉南郡太守马融讲尚书于此因以为名今陛下亲降此台以观教习请改为讲武台从之【显庆二年出会要】

宋真宗召近臣至太清楼观太宗御书赐宴楼下上作太清楼阁书歌二首【天禧二年】

宋太宗改元雍熙【兴国九年以上玉海】

宋神宗舍人院试刘蒙等二十一人出身【熙宁三年十一月二十一日出会要】

后汉隐帝崩【葬颍陵在许州阳翟县出通考】

周茂叔窆于德化县德化乡潘兴嗣为之铭曰人之不然我独然之义贯于中贵于自期澌澌日甚风俗之偷乃如伊人吾复何求志固在我寿则有命道之不行斯谓之病【茂叔于神宗熙宁六年卒于九江郡之私第享年五十七至十一月二十一日窆于德化乡出宋文鉴】

二十二日

天雨木冰凝寒冻冽【唐玄宗开元二十九年十一月二十二日宁王见而叹曰谚云树稼远官怕必有大臣当之后王薨出五行志】

宋太祖召陈搏问享国长短【太祖即位十一月二十二日召陈搏问享国长短曰今年是庚甲么睡而不荅曰睡到五更醒方问此事回首举杖画地作又木字讫投杖而睡太祖命箠之得离之明夷搏用杖画灰作两封象太祖曰朕寿几何搏拜曰万岁陛下终于火日之下离为火日陛下之子孙尽矣出陈搏传】

侯景立萧正德为帝【十一月二十二日景立萧正德为帝即伪位景自为相国天柱将军正德以女妻之景魏之怀朔镇人也出侯景传】

柏梁煮【徐广曰十一月二十二日也出史记】

二十三日

宋真宗召近臣观书于龙图阁杨亿吕夷简与上作诗五章分赐王旦等【祥符九年】

宋徽宗改元崇宁【靖国元年以上玉海】

秦王平薛仁杲凯旋献俘太庙【唐高祖武德元年十一月二十三日出会要】

三十代天师张继先索笔作颂曰一面青铜镜数重苍玉山恍然夜船发移迹洞天内宝殿香云合无人万象闲西山一红日烟雨落潜潜书终而化【继先字嘉闻号翛然子生于宋元佑七年五岁不言一日闻鸡鸣忽笑赋诗曰灵鸡有五德冠距不离身五更张大口唤醒梦中人后寓天庆观钦宗靖康丙午年十一月二十三日作颂而化金人犯汴京师亦以是陷出史纂左编】

断崖禅师生【生于宋理宗景定癸亥年十一月二十三日断崖禅师俗姓杨氏父大有母张氏生师于湖州德清县能食不茹葷酒六岁始能言但从其母诵法华经于人世事懵然无所知姿貌嶷然志若有所待有禅者过之诵高峰上堂语曰欲穷千里目更上一层楼师忽言曰此大善曰识必能为人拔钉去楔再能与往见之乎母惊异之出史纂左编】

南斗生辰

南斗六司星君奏长生箓【以上道经】

二十四日

宋太祖南郊【开宝元年又建隆四年十一月二十四日改元干德皆出通考】

夏王赵德明薨宋仁宗乘輿至幕殿服素服太常博士引太常卿当御座前跪奏请皇帝为夏王赵德明薨举哀【宋史礼志】

宋孝宗幸白石大阅时大阴暝迨出郊风日开霁诸军欢腾观者山峙皇帝登坛举黄旗诸军皆拜举红旗向台合围赉将士有差【干道二年宋史】

吴直方生【直方字行可生于宋恭帝德佑乙亥年十一月二十四日行可自幼有大志至元末庙堂用事者颇擅威福上与大臣谋罢其政柄行可实协赞之上念其功召至便殿赐以黄金系带超拜集贤直学士会脱脱入相中书国有大政多咨行可行可每引古义告之言无不听民被其泽行可致仕遂以集贤大学士荣禄大夫食俸赐终身又赐田一千九百余亩寻谢不受出宋濂集】

诚敬夫人庙每岁以是日祭之【诚敬夫人庙在高州府电白县名州县俱有行祠夫人洗氏京凉人陈高州太守冯宝妻隋初平陈岭南共推洗氏为主保境拒守既而降隋厥后高州刺史李迁仕及番禺夷王仲宣等反夫人又皆讨平之累封谯国夫人卒谥诚敬宋苏轼诗冯洗古烈妇翁媪国于兹策勋梁武后开府隋文时三世更险易一心无磷淄锦伞平积乱犀渠破余疑岁以十一月二十四日祭之出广东志】

南斗星降【道经】

诗

玉楼春信梅传早三八芳辰阳复后 【事文类聚】

二十五日

唐刑部尚书颜真卿献韵海镜源诏付集贤院

【代宗大历十二年十一月二十五日韵海三百六十卷出会要】

唐宪宗以中书舍人裴度为御史中丞 【元和九年玉海】

宋仁宗天圣二年加上真宗谥曰文明武定章圣元孝皇帝又庆历七年加上真宗谥曰膺符稽古成功让德文明武定章圣元孝皇帝

【天圣二年庆历七年皆十一月二十五日出宋史礼志】

宋高宗诏曰国家遭金人侵逼何时休息朕取十一月二十五日移蹕前去浙江为迎敌计惟我将士人民念国家涵养之恩二圣拘縻之辱悼杀戮焚惨之祸与其束手待毙曷若并计合谋同心戮力奋励而前以存国家 【金人侵逼高宗为退避之谋自南京移淮甸自淮甸移建康而会稽播迁之远极于海隅遣使哀祈无不曲尽累年卑屈卒未见从建炎三年诏出宋史】

宋孝宗书白居易七德舞赐翰林学士周必大 【淳熙元年玉海】

元人宋本卒 【宋本字诚夫大都人自幼颖拔异群儿既成童聚经史穷日夜读之句探字索必贯通乃已善为古文词元顺宗元统元年十一月二十五日卒年五十四自承务郎十转至太中大夫本性高抗不屈持论坚正制行纯白不可干以私又笃朋友之义坚若金石人有片善称道不少置尤以植立斯文自任出元史宋本传】

北斗星降 【道经】

掠剩大夫降犯之短命 【三元延寿书】

诗

平分冬气恰经旬天应新阳产异人 【事文类聚】

二十六日

宋太祖南郊 【干德元年出通考】

宋太祖校猎于近郊 【建隆二年出玉海】

宋钦宗靖康元年京城陷金人入城是日粘罕遣使入城求两宫幸虜营议和割地事
【七修类考】

宋人孙侔卒 【孙侔字少述世吴兴人侔方四岁从其母胡氏家扬州母亲教之侔虽幼已惕然能自伤其孤悲泣力学七岁能属文既长读书精识玄解能得圣人深意多所论譔庆历皇佑间与临川王安石南豐曾巩知名于江淮间安石谓淮之南有贤人焉天章阁待制王鼎以女妻之侔自奉俭约家人化之阖门雍雍如也元豐三年除通直郎致仕七年十一月二十六日卒太常博士赞曰独贫而足独穷而乐云云林希作传出宋文鉴】

朱橘生 【朱橘号重阳居淮西安庆之望江橘之生也母严氏梦吞一星光大如斗已有娠十五月母常忧焉一日遇道人于门首手持一物如橘谓其母曰食此子生矣母喜而受之请问名氏道人乃出袖中一扇示之上有鞠君子三字曰吾姓名也言讫遂失所移时而橘诞时十一月二十六日也父异之因名曰橘及六岁而怙恃俱失喜阅道释之书后因临池顾影悠然惊悟乃厌薄名利钦慕修炼过惠州博罗一日市中遇一道人手握一橘状若风狂且行歌而笑吟曰橘橘橘无人识惟有姓朱人方知是端的众皆骇之莫晓其意独橘有所感随之郊外无人之境乃拜而问曰真人非鞠君子乎道人惊曰子何人也橘以姓名告乃悟昔时之事后橘尸解于宋理宗淳佑二年十一月十三日出史纂左编】

妙果天尊降现 【道经】

诗

春风岭上淮南村昔年梅花曾断魂岂知流落复相见蛮风蜚雨愁黄昏长条半落荔枝浦卧树独秀桃榔园岂惟幽光留夜色直恐冷艳排冬温松风亭下荆?束里两株玉蕊明朝瞰海南仙云娇堕砌月下缟衣?扣门酒醒梦觉起绕树妙意有在终无言先生独饮勿叹息幸有落月窥清樽

罗浮山下梅花村玉雪为骨冰为魂纷纷初疑月挂树耿耿独与参横昏先生索居江海上悄如病鹤栖荒园天香国艳肯相顾知我酒熟诗清温蓬莱宫中花鸟使绿衣倒挂扶桑瞰抱丛窥我方醉卧故遣啄木先敲门麻姑遇君急洒扫鸟能歌舞花能言酒醒人散山寂寂惟有落蕊粘空樽 【松风亭下梅花盛开东坡十一月二十六日作】

二十七日

后汉高祖葬于肤陵 【十一月二十七日葬陵在洛京都城县出通考】

宋真宗方就寝见神人星冠绛衣 【真宗谓辅臣曰朕去年十一月二十七日夜将半方就寝

忽室中光曜见神人星冠绛衣吉日至月三日宜于正殿建黄箓道场降天书大中祥符三篇朕竦然起对顷之不见命笔识之后斋戒于朝元殿建道场以伫神贶适皇城司奏左承天门屋南角有黄帛曳鸱尾上帛长二丈许緘物如书卷缠以青缕二道封处有字隐隐益神人所谓天降之书也王旦等皆再拜称贺帝即步至承天门瞻望再拜遣二内臣升屋捧之下旦跪捧而进帝再拜受之帛上有文其书黄字三幅词内书洪范老子道德经等语出宋史】

宋光宗感疾【绍兴二年十一月二十七日亲郊于圜坛为值雨望祭殿行礼风雨大至上震惧始感疾出通考】

林独秀进孝经解赐束帛【宋高宗绍兴十一年十一月二十七日出会要】

曹彬等擒李煜【升州行营擒李煜露布曰曹彬等于十一月一十七日齐驱战士直取孤城奸臣无漏干网中李煜生擒于麾下千里之氛霾顿息万家之生聚寻安其在城官吏僧道军人百姓等久在偏方困于雪政喜逢荡定皆遂舒苏望天朝而无不涕洟乐皇花而惟皆鼓舞有以见穹旻助顺海岳知归当圣明临御之期是文轨混同之日卷甲而兵锋永戢垂衣而帝祚无穷臣等俱乏将材谬司戎律遥禀一人之睿略幸成九伐之微劳其江南国主李煜并伪署臣僚已下若干人既就生擒合将献捷出宋文鉴】

谢灵运生【灵运为永嘉太守郡有名山水肆意遨游理人听讼不复关怀诗画兼绝文帝称为二宝出事文类聚】

张咏窆于陈州【咏字复之稟尊严之气凝隐正之量儿时即览群书后知陈州以大中祥符八年卒宋真宗闻计震嗟追赠尚书左仆射十一月二十七日窆于陈州宛丘县宋祁作行状出宋文鉴】

刘玄英化鹤冲天【玄英号海蟾子初名操后得道改称焉燕地广陵人也以明经擢第燕王刘守光为相素喜性命之说崇黄老之教一日忽有道人至谒海蟾乃邀坐堂上道人自称正阳子向海蟾寅清静无为之宗金液还丹之要既竟乃素鸡卵十枚金钱十文以一文置之几上累十卵于钱若浮图状海蟾惊异之叹曰危哉道人曰人居荣禄之场履忧患之地其危有甚于此者海蟾因此大悟解印辞朝易服从道有诗云抛离火宅三千指屏去门兵十万家纪当时之实也后丹成尸解有白气自顶门出化为鹤飞而冲天其上升日十一月二十七日也出左编】

印肃禅师生【印肃号普庵袁州宜春人生于乡之太平里初师未生时邻夜有望其室者祥光烛天远近相愕已而莲生道周或现阡陌众愈异之及师生五相豐润即善世言时宋徽宗政和五年十一月二十七日也师梦一僧点其胸曰汝也日当自省既悟白母黄氏视点红莹大似世之櫻珠出左编】

二十八日

唐太宗诞皇孙宴官寮于弘教阁 【贞观十七年玉海】

裴度自蔡州入朝 【度贞元五年擒吴元济蔡人大悦乃约法唯盗贼斗杀外余尽除之于是蔡之遗黎始知有生人之祭十一月二十八日度自蔡州入朝留副使马总为彰义军初度入蔡州或谮度没入元济妇女珍宝上疑之欲尽诛元济□将封二剑以授梁守谦使往蔡州度路遇守谦乃复与守谦入蔡州量罪加刑不尽如诏出唐书】

元人朱震亨生 【震亨字彦修号丹溪从许文懿公讲学于东阳八华山中闻天命人心之秘恍然有悟见有夸多斗靡者辄语之曰圣贤一言终身行之不尽奚以多为及自为文章以理为宗居室垣墉敦尚俭朴服御惟大布宽衣仅取菽体藜羹糗饭安若八珍豪家以水陆之羞交错席上者正襟默坐未尝下箸惟欲闻人之善随闻随录生于至元辛巳十一月二十八日卒于至正戊戌年所居丹溪学者尊之而不敢字故因地称之曰丹溪先生出宋濂集】

勇悟真人上升 【翰墨大全】

二十九日

宋真宗诏加岳后号东岳淑明后南岳景明后西岳肃明后北岳清明后中岳正明后
【大中祥符四年宋朝会要亦出事物纪原】

阮田夫李道儿等殒废帝于后堂 【太宗明皇帝讳或字休炳小字荣期文帝第十一子也废帝景和未上入朝被留停都废帝诛害宰辅杀戮大臣恒虑有图之者疑畏诸久并拘之收上付廷尉一宿上先与腹心阮田夫李道儿等密共合谋于是废帝左在常虑祸及人人有异志惟有将军宋越谭金童太一等数人为之腹心故莫敢动是夕越等并外宿田夫道儿等殒废帝于后堂十一月二十九日也事定上未知所为建安王体仁便称臣奉引升西堂登御座召见诸大臣于是事起仓卒上失履跣出宋书明帝本纪】

诗

春江绿涨蒲萄醅武昌官柳知谁栽忆从樊口载春酒步上西山寻野梅西山一上十五里风驾两腋飞崔嵬同游困卧九曲岭褰衣独到吴王台中原北望在何许但见落日低黄埃归至解剑亭前路苍崖半入云涛堆浪翁醉处今尚在石臼杯饮无樽罍尔至古意谁复嗣公有妙语留山隈至今好事除草?束常恐野火烧苍苔当时相望不可见玉堂正对金銮开岂知白首同夜直卧看椽烛高花摧江边晓梦忽惊断铜环玉锁鸣春雷山人怅空猿鹤怨江湖水生鸿鴈至请公作诗寄父老往和万壑松风哀 【东坡十一月二十九日作】

三十日

东汉明帝日食 【永平十八年十一月甲辰晦日有食之在斗二十一度是时明帝既崩马太

后制爵禄故阳不胜出通考】

汉文帝二年日食诏举贤良方正能直言极谏者颍阴侯骑贾山上书言陛下使天下举贤良方正之士天下之士莫不精白以承休德乃直与之驰驱射猎一日再三出臣恐朝廷之废弛百官之堕于事也上嘉纳其言 【出山堂肆考亦出纂记渊海】

潼关是夜暴风山如吼雷河喷石鸣群鸟乱飞潼关倾侧 【唐懿宗咸通六年出五行志】

宋钦宗靖康元年手札趣张叔夜入卫与金兵战是日至都帝御南熏门见之军容甚整入对言贼锋方锐愿如唐明皇之避禄山暂诣襄阳帝登城叔夜陈兵玉津园铠甲光明拜舞城下帝益喜 【叔夜字稽仲后与金人大战帝遣使赏蜡书以褒宠叔夜出宋史列传】

诗

天工未放三阳生留得阶前一叶萸 【事文类聚】

日涉编卷十二

楚应城陈阶升也甫编辑

邑人徐养量叔弘甫校刻

饶可久无缺甫

周光曙楸将甫

弟陈（士?）清也甫全阅

十二月〔一〕

十二月建丑丑纽也言终始之际故以纽结名也【合璧事类】

大吕丑之气也十二月建焉【周礼】

日在婺女昏娄中旦氐中【礼记】

夏曰嘉平殷曰清祀周曰大蜡汉改为腊【风俗通】

星回岁终阴阳已交【前汉书】

地以为正商以为春【后陈宠传】

季冬行春令则胎夭多伤国多逆气行夏令则冰消雪无春来多疫行秋令则白露降四民灾【吕氏春秋】

为涂【尔雅】

曰季冬亦曰暮冬【梁元帝纂要】

小岁【魏旧制群臣季冬朝贺服裤褶行事谓之小岁诏罢之出通鉴】

卒岁【白孔六帖】

月归【淮南子曰天圆地方道在中央日为德月为刑月归而万物死日至而万物生注云月

归谓十二月尽也日至谓得春夏之日至】

村民腊日击细腰鼓而宴戴胡头及作金刚刀以逐疫谚曰腊鼓鸣春草生 【荆楚岁时记】

岁暮腊埋圆石于宅隅杂以桃核七枚则无鬼疫 【淮南万毕术】

蜀风俗每岁冬春之交于两渠中可以流觴官吏士庶宴赏 【有篆水在广安州江中滩石纵横湍流奔急呼为三十六滩其间有两渠冬春之交宴赏出顺庆府志】

天西北裂有光如火 【梁武帝太清三年】

天开自西北至东南其内有青黄杂色隆隆若雷声 【陈后主至德元年夜以上南史】

日有影如三日状占在危宿幽州之野 【真宗景德元年时契丹举兵压境出宋史】

浓霜着屋瓦皆成百花之状 【天圣中青州笔谈】

雷雨雹大如马头 【武帝元封三年汉纪】

天雨黑水盈川 【淳熙十一年戊午夜畿县新城深浦通考】

天雨黄土 【治平元年宋史】

河东天雨肉 【愍帝建兴元年后刘石拥兵帝竟□遇害墨子曰殷纣灭年天雨肉晋书】

冰有文如画佳卉茂木华叶相敷变态奇出春暄乃止
【绍兴七年十二月时张宗元出抚淮西军寓建康盘冰有文出宋史】

黄河是月水名蹙凌水 【水衡记典十一月同】

乐平县河冲里田陇数十百顷田中水类为物所吸聚为一直行高平地数尺不假堤防而水自行里南程氏家井水溢亦高数尺夭矫如长虹声如雷穿墙毁楼二水斗于杉墩且前且却约十刻乃解各复故 【高宗绍兴十四年闰十二月宋史五行志】

沧州地震涌出沙泥般板胡桃螺蚌之属 【熙宁元年宋史】

石泉军地震三日有声如雷屋瓦皆落时绵竹有冤狱 【干道四年宋史】

有赤物陨于太极殿前初下锤皆鸣俄而国亡 【陈后主至德二年南史】

柩有声如牛【僖公三十二年十二月晋文公卒殡于曲沃出绛柩有声如牛刘向以为近鼓妖也丧凶事声牛怒象也如将有急怒之谋以生兵革之祸时秦穆公遣兵袭郑晋要之□□以败其师晋不惟旧而听虐谋结怨强国四被秦寇祸流数世凶恶之效也出左传】

澧州献瑞木有文曰太平之道【庆历三年】

元氏县王真屋柱槐木再生枝叶高四十余丈【政和四年以上宋史五行志】

群鸟夜集于太行山上【五行志亦出白孔六帖】

凤凰见上党高都是月又见河南山阳【晋武帝泰始元年】

凤凰集上林【汉宣帝神爵四年以上宋书符瑞志】

陕州有雉二首向背而连颈者栖集仓庀群雉数百来斗杀之【光启元年唐五行志】

白象见零陵又见安成【文帝元嘉二年宋书符瑞志】

二龙戏于馆门之外【太宗生于武功之别馆时有二龙戏于馆门之外三日两去旧唐书】

诗

江南季冬天红蟹大如（鱼扁）湖水龙为镜炉峰气作烟【丘丹状江南十二月】

芝兰种不荣荆?束剪不去二者无奈何徘徊岁将暮【邵子吟】

乱飘僧舍茶烟湿密洒歌楼酒力微江上晚来□画处渔人披得一蓑归【郑谷雪中偶题】

风卷长空暮雪晴江烟先洗柳条轻檐前数片无人扫又得书窗一夜明【戎昱霁雪】

寒花带雪满山腰着柳冰珠满碧条天色渐明回一望玉尘随马渡蓝桥【元稹西归】

帘外寒江千里色林中尊酒七人期宁知腊日龙沙会却胜重阳落帽时
【权德与腊日龙沙会】

宴宿春闱岁欲除严风密雪绝双鱼思君独步西垣里日日含香草诏书
【权德与贡院对雪寄崔阁老】

落雪临风不厌看更多还恐蔽林峦愁人正在书窗下一片飞来一片寒【僧清江微雪】

新阳气候未全佳尚纵寒威压岁华赖有椒觞供卯酒不妨和雪看梅花 【韩子苍】

起来呵手画双鸦醉脸轻匀衬眼霞真态生香谁画得玉钗纤手嗅梅花 【东坡】

日脚淡光红洒洒薄霜不销桂枝下衣稀和气排冬严已就长日辞长夜 【李贺乐词】

金吾除夜进傩名画裤朱衣四队行院院烧灯如白日沉香火里坐吹笙 【王建宫词】

闰历先春破腊寒彩花金胜宠千官冰从太液池边动柳向灵和殿里看瑞气因风飘禁仗暖晖依日上仙盘须知圣运随生殖万国年年共此欢 【宋郊闰十二月望日禁中作】

日躔星纪大吕司辰玄象改次庶众更新岁事告成八蜡报勤 【裴秀】

小寒

冬至后十五日斗指癸为小寒阳极阴生乃为寒今月初寒尚少也 【孝经纬】

小寒为节者亦形于大寒故谓之小言时寒气犹未极也 【诗含神露】

小寒月之初气也阴气未极故曰小寒 【历义疏】

合冻苍阳云出氐 【易通卦验】

小寒日鴈北乡 【后五日鹊始巢后五日野鸡始雊月令】

小寒鴈北乡鴈不北乡即臣不怀君鹊始巢鹊不巢即边方不宁 【又曰一国不宁】
野鸡始雊野鸡不雊即国乃大水 【周书诗训】

将帅讲武习射御角力 【备田猎也】

乃教田猎以习武戎班马政乃（衽去壬改昔）百神于南郊为来年祈福于天宗天宗日月星辰之属 【以上月令】

大寒

小寒后十五日斗指丑为大寒至此栗烈极也 【孝经纬】

大寒在冬至后二气积寒而未温也 【天文录】

大寒者上形于小寒故谓之大十一月一阳爻初起至此始彻阴气出地方尽寒气并在上寒气之逆极故谓大寒 【诗含神露】

大寒月之中气言十二月已半阴气大极故曰大寒 【历义疏】

冬至阳始起反大寒何也阴气推而上故大寒 【白虎通】

降雪黑阳云出心 【易通卦验】

大寒日鸡始乳中气也 【后五日鸛鸟厉疾后五日水泽腹坚陈氏曰冰之初凝水面而已至此则彻上下皆疑故云腹坚腹犹内也月令】

大寒鸡始乳鸡不乳即淫妇乱男鸛鸟厉疾鸟不厉疾即国不除奸水泽腹坚不腹坚即言无所从 【周书时训】

立土牛六头于国郡县城外丑地送大寒 【历志】

始渔天子亲往尝鱼先荐寝庙

冰方盛命取而藏之

飨国典论时令以待来岁之宜 【正月悬法象魏故于此与公卿先飨之以上月令】

十二月〔二〕

一日

殷建丑以十二月朔为岁殷天裂西南 【顺帝至正己酉年元史】

填星荧惑辰星合于南斗 【宋孝武帝孝建三年占曰改立王公出南齐书天文志】

太甲惟三祀十有二月朔以冕服奉嗣王归于亳 【虫书】

德宗贬中书侍郎平章事陆贽为太子宾客 【贞元十年后又贬为中州别驾出旧唐书】

宋太宗大雨雪喜御玉华殿诏宰臣及近臣谓曰春夏以来未尝饮酒今得此嘉雪思与卿等同醉又出御制雪诗令侍臣属和 【雍熙二年玉海】

眉州布衣苏洵是日上书曰翰林学士欧阳修奏臣所著权书行?鱼论几策二十二篇乞赐甄

录陛下过听召臣赴阙臣本田野匹夫名姓不登于州闾今一旦卒然被召臣不幸有负薪之疾不能奔走道路以副陛下搜扬之心忧惶负罪无所容处 【宋仁宗嘉佑三年出文编】

遣中使帅僧众迎佛指骨 【宪宗元和十三年功德使上言凤翔法门寺塔有佛指骨相传三十年一开开则岁丰人安?岁应开请迎之至十二月一日上遣中使帅僧众迎之出旧唐书】

婆斯国人庶以上各相命召设会作乐以极欢娱 【婆斯国百姓女年十岁以上有姿貌者王收养之有功勋人即以分赐死者多弃尸于山以丧葬之事号为不净以六月为岁首至十二月一日人庶以上设会作乐云云出北史】

洛那国人庶以上各相命召设会作乐以极欢娱
【洛那国故大宛国也设会作乐七月七日亦然出魏书】

于阗国俗以是日肆筵设席拍手拨胡琴唱歌 【出通考】

淮阳郡以是日种谷 【淮阳郡西北接南阳县有温泉其下流百里恒资以灌溉每十一月一日种谷至明年三月新谷便登重种一年三熟出盛弘之荆州记】

八仙聚会蓬莱日 【集仙录】

诗

今朝腊月春意动云安县前江可怜一声何处送书鴈百丈谁家上濂船未将梅蕊惊愁眼更取椒花媚远天明光起草人所羨肺病几时朝日边

寒轻市上山烟碧日满楼前江雾黄负盐出井此溪女打鼓发船何郡郎新亭举目风景切茂陵著书消渴长春花不愁不烂熳楚客唯听棹相将即看燕子入山扉岂有黄鹂历翠微短短桃花临水岸轻轻柳絮点人衣春来准拟开怀久老去亲知见面稀他日一杯难强进重嗟筋力故山达 【工部十一月初一日作】

首路栗亭西尚想凤凰村季冬携童稚辛苦赴蜀门南登木皮岭艰险不易论汗流被我体祈寒为之暄远岫争辅佐千岩自崩奔始知五岳外别有他山尊仰干塞大明俯入裂厚坤再闻虎豹斗屡局风水昏高有废阁道摧折如短辕下有冬青林石上走长根西崖特秀发焕若灵芝繁润聚金碧气清无沙土痕忆观昆仑图目系玄圃存对此欲何适默伤垂老魂
【十二月一日工部自陇右赴剑南过木皮岭作】

二日

混元皇帝降于朝元阁 【唐玄宗天宝七载十二月二日降于朝元阁改为降圣阁山会要】

宋真宗生以为承天节 【初干德五年五星如连珠聚于奎当鲁分从镇星辰见东方占曰有德受庆大人奄有四方子孙蕃昌明年元德皇后李氏梦以裙承日有娠十二月二日生真宗于开封第赤光照室左是指有文成天字至道三年即位以生日为承天节群臣上寿于崇德殿晏殊作承天节述圣赋杨亿作承天节颂出天中记】

窦参薨 【参字时中父审言参习法令通政术性矜严强直加检校司徒兼中书令诸使副元帅贞元十五年十二月二日薨于镇废朝五日群臣于延英奉慰诏赠太师谥曰忠武出旧唐书】

东坡与欧阳叔弼季默夜坐

【哲宗元佑六年十二月二日夜坐记道人问真说时东坡年五十六出长公外纪】

好道者登山 【左慈闻江东有勾曲山斋戒三月而登山乃得其门入洞虚造阴宫三茅君授以神芝三种故好道者欲求神仙宜先斋戒俟十二月二日登山茅君即授以要道得人洞门三月十八日亦然出茅君传】

列子游勾曲山 【太极真人东海青童等出翰墨大全】

诗

长淮久无风放意弄清快今朝雪浪满始觉平野隘两山控吾前吞吐久不暇孤舟系桑本终夜舞澎湃舟人更传呼弱缆恃菅蒯平生傲忧患久已恬百怪鬼神欺吾穷戏我留一噫瓶中尚有酒信命谁能戒 【东坡十二月二日作庄子云大块噫气其名为风则今以噫言风矣】

三日

唐德宗赐文武官绶袍 【贞元八年玉海】

元宪宗桓肃皇帝生 【韩蒙哥睿宗拖雷之长子也十二月三日生时有黄忽荅部知天象者言帝后必大贵故以蒙哥为名蒙哥华言长星也出元史】

周瑜聚众将曰吾非不欲尽忠报国奈天命绝何汝等善事吴侯共成大事言毕而亡
【建安十五年十二月三日卒寿三十六出三国志】

遣使祭贞石 【肃宗上元十七年八月四日原州昌松县鵠池谷有石青质白文成字曰太平天子五王六王七王十凤毛才子及七佛八菩萨等语原州奏闻上十二月初三日遣使祭之曰天有成命表瑞贞石文字昭然历数准永出五行志】

陆九渊命扫洒焚香 【宋陆九渊字子静究心典籍见于躬行十二月三日有疾接见属僚与

论政理加平时宴息静室命扫洒焚香新衣幅巾端坐家人进药却之不复言后数日卒出左编】

北斗北极降 【道经】

诗

久客见华发孤棹桐庐归新月无朗照落日有余辉渔浦风水急龙山烟火微特惊沙上鴈一背南飞 【潘阆岁暮初三日自桐庐归钱塘晚泊渔浦作】

穷冬月末两三日半百年过六七时龙尾趁朝无气力牛头参道有心期荣华物外终须悟老病傍人岂得知犹被妻儿教渐退莫求致仕且分司惟生一女纔十二抵欠三年未六旬婚嫁累轻何怕老饥寒心惯不忧贫紫泥丹笔皆经手赤绂金章尽到身更拟踟蹰觅何事不归嵩洛作闲人 【白乐天戊申十二月三日咏怀】

四日

唐高宗崩 【崩于弘道元年十二月四日葬干陵在京兆府奉天县界出通考】

宋真宗命石保吉赐契丹使宴射于土津园

【景德元年十二月四日赐宴自后使至赐宴此其始也出事物纪原】

黄巢陷京师 【广明元年先黄巢攻潼关官军大溃燔惊西市唐僖宗夜自阅远门出趋骆谷十二月四日贼至昭应陷京师矣时巢众累时为盗行伍不胜其富遇穷民于路而慰晓之曰黄王为生灵不似汝家不措汝辈但各安家业贼众竞投物遗人出旧唐书】

衡山道士弥明旧与刘师服进士相识是夜抵其住宿有校书郎侯喜能诗夜与刘说诗弥明在其侧貌极丑白须黑面长颈结喉又作楚语喜视之若无人弥明忽轩衣张眉指炉中石鼎谓喜曰子云能诗能与我赋此乎即援笔题其首曰巧匠琢山骨剗中事煎烹喜缀之曰外苞干藓文中有潜浪惊弥明哑然笑曰子诗如是而已乎乃坐而高吟曰龙头缩菌蠢豕腹胀彭亨旨在讥喜也侯刘相顾惭骇曰尊师非常人也某等愿为弟子弥明曰何当出灰池无许离蜩螗谬居鼎鼐间长使水火争形模妇女笑度量儿童轻徒尔坚贞性不过升合盛宁依暖热辈不与寒凉并忽罗翻溢愆实负任使诚陋质荷斟酌狭里愧提擎岂能煮仙药但未污羊羹区区徒自效琐琐安足呈难比俎豆用不为手所撻愿君勿嘲笑此物方施行吟毕即袖手竦肩倚北墙坐谓二子曰吾闭口矣二子大惧皆起立床下再拜而弥明鼻息如雷鸣顷之弥明不见二子惊惋自责若有失者 【仙传拾遗亦出韩愈序】

九垒土皇君上诣荅和天奏九地得仙人名 【道经】

五日

唐代宗以诸州府学博士改为文学品秩同参军 【大历十四年十二月五日汉郡国皆有文学掾则文学汉官也肃宗时颜真卿曰文学盖复汉旧号也出事物纪原】

宋真宗宴尚书省五品诸军都指挥使以上契丹便于崇德殿不举乐以明德太后丧制故也 【景德二年时契丹初来贺承天节择膳夫五人赏本国异味就尚食局造食诏赐膳夫衣服银带器帛】

宋高宗谓辅臣曰孔子作经经之祖左氏作传史之祖 【绍兴六年以上玉海】

诗

八年十二月五日雪纷纷 【白乐天】

六日

唐庄宗与皇后如张全义第全义大陈贡献酒酣皇后奏称妾幼失父母见老者辄思之请父事全义帝许之全义惶恐固辞再三强之竟受皇后拜复贡献谢恩 【同光二年十二月六日后命翰林学士赵凤草书谢全义凤密奏自古无天下之母拜人臣为父者帝嘉其直然卒行之自是后与全义日遣使往来问遗不绝出后唐纪】

宋人田述古卒 【述古字明之以哲宗元符三年十二月六日卒享年七十蚤孤游学京师甫冠补太学生事安定胡先生为弟子勤学好问以乡荐不中第叹曰得失命也乃慨然发愤隐居讲诵二十余年不复出哲宗嗣位搜访遗逸除襄州司法参军述古曰老矣不任为吏出宋文鉴】

天仓开宜入山修道 【内景经】

诗

薄晚蓬山下直余笑看六出点衣裾絮飞帘外无萦绊花落阶前不扫除松鬣垂身全类我竹头抢地最怜渠短檠便可捐墙角剩有窗光映读书 【曾茶山十二月六日大雪作】

七日

宋哲宗生于宫中赤光照室及即位群臣请以十二月七日为兴龙节表云梦日储祥预席有开之庆奉符践祚适丁利见之期上批荅曰赤断锡符获成洪绪冬成肃物用纪诞辰卿等对扬甲观之祥愿上兴龙之节既以申盛礼于两宫亦以同欢心于万国

【哲宗讳煦神宗第六子母曰钦圣皇后朱氏熙宁九年哲宗生出合璧事类】

欧阳永叔王原叔二翰林韩子华吴长文二舍人是日同过司马君实旧庐值出不及见君实于是作诗诗曰枯竹为门扉不可容车骑况如郑广文无毡藉宾位穷冬月破七贵客联玉轡传骑肃里闾下榻呼童稚问我何所往共留墙上字儿愚不知谁金章言照地既居卿大夫恨莫亲帝簪星躔回已高麟距宁复致戢戢邻巷居相见窃自喟岂料瘦老翁能令贤达至昔时蓬蒿径安有此盛事 【十二月七日同过出事文类聚】

勃泥国以是日为岁节 【以十二月七日为岁节地热多风雨国人宴会鸣鼓吹笛击钹歌舞为乐无器皿以竹编贝多叶为器盛食食讫弃之王所居室覆以贝多叶民舍覆以草其地无麦有麻稻无蚕用吉贝花织成布饮椰子酒出宋史外国传】

不宜水陆远行凶 【遵生八笺】

夜犯掠剩大夫降恶病死 【三元延寿图】

诗

天风淅淅飞玉沙诏恩归沐休早衙遥知清虚堂里雪正似蓑卜林中花出门自笑无所诣呼酒持劝惟君家踏冰凌兢战疲马扣门剥啄惊寒鸦羡君五字入诗律欲与六出争天葩头风已倩檄手愈背痒恰得仙爪爬银瓶浮蚁酒紫碗铺栗盘龙茶幅巾起作鸛鹄舞迭鼓谁掺渔阳挝九衢灯火杂梦寐十年聚散空咨嗟明朝握手殿门外共看银阙瞰朝霞 【十二月七日兴龙节侍宴前一日微雪东坡与子由同访王定国小饮清虚堂定国出诗皆佳子由又言昔与孙巨源同过定国感念存亡悲叹久之夜归各赋一篇以示定国】

八日

唐德宗腊八日畋于苑中止其多杀行二驱之礼 【贞元十一年通考】

唐敬宗猎还宫与中官刘克明田务成许文端打球军将苏佐明王嘉宪石定宽等二十八人饮酒帝方酣入室更衣殿上烛忽灭克明等同谋害帝实时殁于室内时年十八 【宝历二年十二月八日旧唐书】

宋哲宗本七月生为兴龙节群臣复请以八日为兴龙节不以先一日者以避僖祖忌故后一日 【天中记】

宋太宗因子年以来冬无雪至是日雪深尺余上喜赐近臣宴于中书诏令尽醉上赋诗亲以八分书遣中使就宴所赐之 【淳化二年出玉海】

宋太祖谥孔子曰至圣 【建隆五年十二月八日出会要】

民间用各色米豆果实合而煮之谓之腊八粥无不食者 【宣抚镇志】

东京作浴佛会以诸果品煮粥谓之腊八粥 【出风土记据山堂肆考南方专用腊月八日浴佛宋朝东京十二月初八日都城诸大寺作浴佛会并造七宝五味粥谓之腊八粥】

佛腊月八日降伏六师投佛请死 【投佛请死言佛以法水洗我心垢则设浴之事西域旧俗亦今腊月灌佛之始出俗缘记亦出事物纪原】

沐浴转除罪障 【荆楚岁时记】

八日佛道成据经佛初成道于泥莲池故北人以是日灌木佛像岁时杂记僧家以乳簟胡桃百合等造七宝粥亦谓之咸粥供佛及僧道檀越 【天中记】

佛图澄卒 【澄姓白氏西域人身八尺姿甚美少出家晋永嘉四年适洛阳念神咒使鬼神见千里外事如面又听铃音知一切兴亡休咎事不爽至穆帝永和四年十二月初八日卒石虎殓澄以杖钵内之棺中窆于临漳西紫陌之地澄死之日有见于流沙虎疑其不死开棺视之惟杖钵存空棺中澄左胁乳旁有一孔约大四寸通彻腹内时以絮塞之夜欲读书辄拔出其絮则一室澜明又斋日至水边引肠涤之已而复纳于中后谓弟子法□□戊申祸乱将萌己酉石氏当灭吾及未乱当先化矣石氏即石勒出高僧传】

诗

腊月风和意已春时因散策过吾邻草烟漠漠柴门里斗迹重重野水滨多病所须惟药物差科未动是闲人今朝佛粥更相馈更觉江村节物新 【陆放翁十二月八日步至西村作】

石壁开金像香山绕铁围下生弥勒见回向一心归松竹禅庭古楼台世界稀夕岚增气色余照发光辉讲席邀谈柄泉堂施浴衣愿承功德水从此濯尘机
【孟浩然十二月八日于剡县石城寺作】

九日

唐高祖幸涇阳之华池校猎 【武德五年十二月九日校猎谓群臣四今日畋乐乎苏世长进曰不满十旬未为乐也出通典】

唐高祖以武功宫改为庆善宫 【武德六年十二月九日改为庆善至贞观六年九月太宗幸庆善宫宴从臣于谓滨上赋诗云指麾八荒定怀柔万国夷单于陪武帐日逐卫文旛端展朝四岳无为任百司共乐还讌宴欢此大风诗云云出会要】

宋太宗大雪诏近臣及中书令各赋诗上制瑞雪歌赐之【端拱二年玉海】

宋英宗召辅臣观御篆孝严殿额于迎阳门遂御延和殿赐茶【治平元年玉海】

僧神光大雨雪坚立不动【菩提达磨祖师者南天竺国香王第三子也有僧神光者十二月九日夜大雨雪坚立不动迟明积雪过膝祖师曰汝久立雪何事光悲泪曰惟愿慈悲开甘露门广度庸品祖师曰岂可以小德小智轻心慢心欲冀真乘光闻至教乃以利刀自断左臂置于祖师前祖师曰诸佛最初求道为法忘刑出史纂左编】

诗

挂帆望烟渚整棹别津亭风水已云便我行安得停离樽枉群贤浊醪愧先倾谈笑不知远但觉江流清猎猎甘蔗洲茫茫白沙汀斯须复回首祇有遥山青野色一似暝月光晶孤明中流漾华日极浦涵疏星酒酣客散归茫然独宵征起视天宇阔此身一浮萍难追五湖游未愿三闾醒且咏招隐作孤舟转（立令）潺

【朱文公十二月九日与诸贤同舟乘风顷刻千里江空月明饮酒甚乐分韵得星字】

十日

宋太祖出元化门校猎【建隆二年出玉海】

程全进孝经解命为大学职事【宋高宗绍兴十年十二月十日出玉海】

夏侯威得疾【朱建平沛国人也善相术效验非一相夏侯威曰君四十九位为州牧而当有厄后夏侯威为兖州刺史年四十九十二月初十日得疾念建平之言自分必死后三十日病差设酒以待宾曰明日年便五十或不死也威罢客之后夜半卒出三国志魏书】

萼绿华仙人降现【翰墨大全】

诗

十莢尧莫开翠羽一番潘貌蒸红颊【事文类聚】

十一日

宋真宗是日亲飨庙将祀汾阴【祥符三年通考】

宋高宗是日谕辅臣曰刘光世喜书前日来乞朕所临兰亭叙亦以一本赐之因论书法甚详及法帖曰其间甚有可议如古帝王帖中有汉章帝千文千文是梁周兴嗣所作何缘章帝书

之举此一事其它可知岂不误后学者 【玉海绍兴七年】

田布会诸将复议兴师 【田布弘正第三子始弘正为田季安裨将镇临清布年尚幼知季安身世必危密白其父帅其所镇之众归朝弘正甚奇之后弘正移镇成德军以布为河阳三城怀节度使父子俱拥节旄同日拜命布以卫军三万余讨贼结垒于南宫县之南时史宪诚阴有异志而卫军骄侈怯于格战又属雪寒粮饷不给以此愈无斗志宪诚从而间之布还魏州十二月十一日会诸将复议兴师而将卒益倨布以宪诚离间度众终不为用即日密表陈军情略曰臣观众意终负国恩臣既无功不敢忘死出旧唐书】

张禔卒 【朝奉郎尚书司封员外郎张禔以皇佑二年十二月十一日卒王荆公为之志铭曰有嘉张君质静宽徐进非所好人用称誉视利在前蹲循弗趋退施一州用智之余嘻其葬矣次有铭书出临川集】

诗

隆寒徙季月初沐履浹辰 【事文类聚】

十二日

穆宗入海日故是日忌离家 【让国皇帝穆宗亲兄不为太后所爱故穆越次而让皇不肯臣穆宗遂造舡入海不知其处入海时留语四句刻于玉碑上云小山压大山大山全无气羞见本邦人将身投化外国人以十二月十二日入海也故是日忌离家出白孔六帖】

安禄山为河北河东采访使举范阳之兵诣阙陷东都 【禄山十二月十二日陷东都颜杲卿忠诚感发恐危宗社时从弟真卿为平原太守初闻禄山逆谋阴养死士为拒贼之计至是告杲卿相与起义兵犄角断贼归路出旧唐书】

鹓鹄起 【鹓鹄正月飞后巢中不复起十二月十二日起南人设网取之出酉阳杂俎】

玉晨大道君登玉霄琳房四顾天下太素三元□朝真谓之百福日 【道经】

十三日

唐代宗生于上阳宫 【代宗肃宗长子开元十四年十二月十三日生于东都上阳宫初名俀年十五封广平王玄宗诸孙百余上为嫡皇孙字量弘深宽而能断喜惧不行干色仁孝温恭动必由礼幼而好学尤专礼易玄宗钟爱之旧唐书】

宋真宗命乔希颜等巡铺 【太宗雍熙二年诏贡上礼部引试分差官廊下巡铺勿容私相教授至真宗景德四年十二月十三日命希颜等巡铺自此巡铺遂为定制出宋朝会要】

宋高宗是日施谔上行都赋【建炎十七年出玉海】

安德王延宗受敕守并州【延宗幼为文宣所养年十二置腹上令溺已脐中抱之曰可怜止有此一个问欲作何王对曰欲作冲天王文宣问杨愔愔曰天下无此郡名愿使于安德于是封安德焉后延宗败前在邺厅事见两日相连置以十二月十三日晡时受敕守并州明日建尊号不问日而被围经宿至食时而败年号德昌好事者言其得二日云出北齐书】

黄巢以是日僭位国号大齐年称金统仍御楼宣赦且陈符命曰唐帝知朕起义改元广明以文字言之唐已无天分矣唐去丑口而安黄天意令黄在唐下乃黄家日月也土德在金子以金上宜改年为金统

【巢贼十二月十三日僭位巢曹州冤句人本以贩盐为事干符中岁荒为盗旧唐书】

唐时戴可师是日围贼于都梁山贼已就降而可师自恃兵强不为备贼将王弘立者将兵数万人快捷方式赴救奔突而前官军溃乱遂为所败可师并监使将校已下咸没于阵【出纪乱】

天帝游东井

天元太乙朝元【以上道经】

十四日

宋真宗召近臣至龙图阁阅书又幸资政殿作诗命即席皆赋【祥符五年玉海】

海陵嫡母徒单氏生【徒单氏宗干之正室也徒单无子次室李氏生长子郑王充次室大氏生三子长即海陵也徒单氏遇下有恩大氏事之甚谨相得欢甚天德四年海陵迁中都独留徒单于上京徒单尝忧惧每中使至必易衣以俟命大氏在中都尝思念徒单谓海陵曰永寿宫待吾母子甚厚慎勿忘也十二月十四日生海陵使秘书监往上京上寿后大氏病笃恨不得一见临终谓海陵曰汝以我之故不令永寿宫偕来中都我死必迎致之事永寿宫当如事我出金史】

诗

南溪得雪真无价走马来看及未消独自披榛寻履迹最先犯晓过朱桥谁怜破屋眠无处坐觉村饥语不嚣惟有暮鸦知客意惊飞千片落寒条【东坡十二月十四日夜微雪往南溪小酌】

十五日

隋炀帝是夜通汉镇北有赤气 【袁充字德符性好道术颇解占候隋炀帝大业六年迁内史舍人从征辽东拜朝请大夫秘书少监其后天下乱盗贼并起帝不自安充以天文上表曰去年十一月二十日夜有流星赤如火从东北向西南落贼帅卢明月营破其撞车至十二月十五日夜通汉镇北有赤气突厥将亡之应也帝大悦帝每欲征讨充皆预知之出隋书】

王文殊思父北望长悲 【文殊字令章吴兴故鄣人父入魏文殊思慕泣血终身蔬食不衣衾服麻缁而已吴兴太守谢聘为功曹不就每于十二月十五日未尝不北望长悲如此三十余年后太守孔琇之表其行改所居为孝行里出齐书】

占城国风俗城外縛木为塔王及人民以衣物香药置塔上焚之以祭天 【占城国在中国之西南风俗以十二月十五日祭天人有疾病旋采生药服食地不产茶亦不知酝酿之法止饮椰子酒食槟榔刑禁亦设枷锁小过以四人拽伏于地藤杖鞭之二人左右更互捶朴出宋史外国传】

张继先入见徽宗徽宗曰澥池水溢民罹其害故召卿治之命下即书铁符令弟子祝永佑同中官投澥池顷雷雨昼暝有蛟蟹死于水上 【继先字嘉闻号翛然子此三十代天师也宋徽宗崇宁二年澥州奏盐池水溢上以问道士徐神翁对曰蛟蟹为害宜宣张天师命有司聘之十二月十五日天师入见即书铁符投澥池后奏盐课复常出史纂左编】

西斗星降 【道经】

诗

闰历先春破腊寒彩花金胜宠千官冰从太液池边动柳向灵和殿里看瑞气因风飘禁仗暖晖依日上仙盘须知圣运随生殖万国年年共此欢 【宋郊十二月十五日立春禁中作】

十六日

武则天封嵩山为神岳 【通天元年出武后传】

玄宗是日亲征禄山使太子监国制书云今亲总六师率众百万铺敦元恶巡抚洛阳 【天宝十四载出唐历亦出幸蜀记】

唐太宗问子孙长久之道萧瑀对以封建上然之始议封建 【贞观二年十二月十六日出会要】

元顺帝至正年是日用白黑羊毛为线帝后及太子自顶至手足皆用羊毛线缠系之坐于寝殿蒙古巫覡念咒语本银槽贮火置米糠于其中沃以酥油以其烟薰帝之身断所系毛线纳诸槽内又以红帛长数寸帝手裂碎之唾之者三并投火中即解所服衣帽付巫覡谓之脱旧

灾迎新福【元史】

外夷南诏以是日为星回节登避风台命清平官赋诗略曰避风善阐台极目见藤越

【国名】忽尔古与今依然烟与月自我居震旦【谓天子为震旦】

翊卫赖稷契不觉岁云暮感极星回节元昶【谓朕为元谓郎为昶】同一心子孙堪貽厥
【彼国谓词臣曰清平官出玉溪编】

天竺国以是日为腊腊则麦熟【西域诸国志】

诗

腊月初飞二萼莫祥开崧岳庆生申【事文类聚】

十七日

孝宗诏太上皇帝圣寿无疆新岁七十以十二月十七日立春行庆寿礼是日早文武百僚并簪花赴文德殿立班听宣庆寿赦【隆兴二年出宋史】

孝宗诏西湖系放生池不得采捕【淳熙十三年玉海】

太微玄清左夫人与太元夫人降曲勾金坛【道经】

诗

凭高游自快遐瞻落日孤云□水兼万顷泽空□雪意一枝梅笑破冬严擎苍未减飞扬兴引
满何辞斗石添杨柳催春兼警客荒沟照影弄纤纤

从今羞复立功名鹵莽因循已半生心遣我愚应有谓眼看人智亦何成梦为蝴蝶因观化目
送飞鸿谩寄情堪笑妻儿怀土甚谪期未满足已流行【张宛丘十二月十七日移病家居】

灯烬不挑垂暗蕊香炉重拨尚余熏清风欲起雅翻树缺月初升犬吠云闭眼此心新活计随
身孤影旧知闻雷州别乘应危坐跨海清光与子分
【东坡十二月十七日夜坐达晓寄子由】

十八日

宋咸上注周易十卷诏褒谕【仁宗至和元年玉海】

老君降

北斗降 【以上道经亦载翰墨大全】

十九日

唐高宗亲飨庙 【通考总章元年】

宋太祖始猎于近郊赐宰臣至诸军□校锦□□亲御弧矢中兔三从官称贺
【建隆二年玉海】

黄潜善由右仆射拜左相 【宋高宗建炎六年宋濂集】

黄山谷发鄂渚 【山谷作承天院塔记朝廷谓其幸灾谤国以崇宁癸未二年自鄂谪宜州十二月十九日发鄂渚宋濂集】

苏东坡于宋仁宗景佑二年是日生至元符三年东坡因诞辰置酒赤壁矶下倨高峰俯鹘巢酒酣笛声起于江上客有郭尤二生颇知音谓东坡曰笛声有新意非俗工也使人问之则进士李委闻东坡生日作一曲曰鹤南飞以献呼之使前则青巾紫裘腰笛而已既奏新笛又快作数声嘹然有穿云裂石之声坐客皆饮满醉倒委袖出佳纸一幅曰吾无求于公得一绝句足矣坡笑而从之诗曰山头孤鹤向南飞载我南游到九疑下界何人也吟笛可怜时复犯龟兹 【诗话亦出长公外纪】

诗

与公同丙子三万六千日 【东坡十二月十九日赠长芦长老】

二十日

秘书监胡旦是日上唐乘七十卷五代史略四十二卷演圣通论七十二卷将帅要略五十三卷仁宗诏以旦子彤为监簿 【天圣五年出玉海】

迎什入关 【鸠摩罗什天竺人善经律其人大德智符坚以吕光伐龟兹载至中国姚秦弘始三年十二月二十日迎什入关待以国师礼优宠之出高僧传】

沐浴去灾 【云笈七签】

天河相交行道犯之促寿 【三元延寿书】

诗

季冬两十鸡鸣初僚吏造府如云趋绣轴捧星香拥炉共庆此日生真儒 【事文类聚】

二十一日

仁宗诏正旦日食自是日不御前殿减常膳 【嘉佑四年出玉海】

理宗淳熙五年太史奏来岁正旦日食诏以十二月二十一日避正殿减膳命有司讲行厥政凡可以消弭灾变者直言无隐 【出山堂肆考】

太宗御丹凤楼观酺召侍臣赐饮自楼前至朱雀门张乐又集开封府诸县及诸军乐人列于御街音乐杂发观者溢道纵士庶游观迁市肆百货于道之左右召畿甸耆老列坐楼下赐之酒食赐群臣宴于尚书省仍作诗以赐 【雍熙元年十二月诏曰王者赐酺推恩与众共乐所以表升平之盛事契亿兆之欢心累朝以来此事久废二十一日御丹凤楼出宋史礼志】

核肤有青昔之兆 【段思平有异兆蒙主杨于贞忌之使人索捕思平逃匿饥摘野桃剖之核肤有文曰青昔思平拆之曰青乃十二月昔乃二十一日今杨氏政乱吾当以是日举义乎遂借兵军至河尾是夕思平梦人斩其首又梦玉瓶耳缺又梦镜破惧不敢进兵其军师董迦罗曰三梦皆吉兆也公为大夫夫去首为天天子兆也玉瓶去耳为王王者兆也镜中有影如人有敌镜破则无影无影则无敌矣三梦皆吉兆也思平乃决明旦遂引兵渡江逐杨氏而有蒙国改国号曰大理时晋天福二年出滇记】

王晋卿致墨于东坡 【元佑二年十二月二十一日王晋卿致墨于东坡二十六丸凡十余品杂研之作数十字以观其色之浅深若果佳当捣合为一品亦当为佳墨东坡昔在黄州邻近四五郡皆送酒东坡合置一器中东坡笑曰昔酒合一器中谓之雪堂义樽今又不为雪堂义墨耶出长公外纪】

诸天上真朝元日 【道经】

诗

春到梅稍许样妍更经九日是新年晓来忽听儿童语此夕人间诞女仙
【事文类聚庆女人】

二十二日

万寿节 【唐庄宗十二月二十二日出玉海】

宋太祖崩于开宝九年太宗嗣位是日改为太平兴国元年 【容斋续笔】

宋太宗是日郊祀毕赐宰臣文武等宴于尚书省帝作诗以赐其日晚又宣旨曰今日卿等宴会恐未尽欢可更赐来日宴群臣献歌诗赋颂者数十人并付史馆于是饮三日

【雍熙元年玉海】

戴洋谓刘胤曰十二月二十二日庚寅勿见客 【戴洋吴兴长城人也好道术妙解占候小数洋往寻阳刘胤镇寻阳胤问洋曰我病当差不洋曰不忧使君不差忧使君今年有大厄使君年四十七行年入庚寅太公阴谋曰六庚为白兽在上为客星在下为害气年与命并必?当忌十二月二十二日庚寅勿见客胤曰我当解职将还野中治病洋曰使君当作江州不得解职及期为郭默所害据戴洋传被害在十二月二十四日此出史纂左编】

丹阳羽化胡璋徐绍祖等见瑞鹤蟠绕空际丹阳三髻现于彩云之上

【丹阳祖师弟子也十二月二十二日羽化出左编】

王（上一吉下二吉）生 【王（上一吉下二吉）京兆咸阳人母感异梦而妊二十有四月生于宋徽宗政和二十年十二月二十二日师自幼不群及长体貌雄伟美须髯倜傥尚文好属文才思敏捷至正隆四年师忽叹曰孔子四十不惑孟子四十不动心予犹碌碌如此不亦愚乎年至四十有八所遇者皆唐纯阳子吕仙翁之化身也师性少检束时人目之曰害风师受而不辞关中谓狂者为害风正月四日已载王（上一吉下二吉）事此日载王（上一吉下二吉）之诞辰也王（上一吉下二吉）号重阳子出史纂左编】

马钰枕肱而逝 【马钰字宜甫十二月二十二日夜将二鼓风雨大雷师东首枕肱而逝索笔书颂云长年六十一在世无人识烈雷吼一声浩浩随风逸元至元六年赠丹阳抱一无为真人出左编据道书事在二月二十二日未知孰是俱录】

太平护国天尊降 【藏经】

二十三日

宋徽宗宣和七年是日上御玉华阁召宰执吴敏等对至日晡时决内禅之议擢吴敏为门下侍郎草传位诏是夕命太子入居禁中覆以御袍太子俯伏感泣力辞 【翌日又固辞不从乃即大位御垂拱殿见宰执百官时日有五色晕挟珥赤黄色有重日相摩荡久之乃隐是时金人入寇猖獗出史纂左编】

毕诚卒 【毕诚字存之郢州须昌人也太和中进士擢第在相位以疾固辞十二月二十三日卒诚谨厚长于文学尤精吏术出旧唐书】

秦桧是日诞辰高宗诏曰省所奏辞免生日赐宴朕闻圣贤之兴必五百岁君臣之遇盖亦千载夫以不世之英值难逢之会则其始生之日可不为天下庆乎式燕乐衍所以示庆也非乔岳之神无以生申甫非宣王之能任贤无以致中□今日之事不亦臣主俱荣哉宜服异恩无

守冲节所请不允 【绍兴十三年出宋史】

五岳之神下降人间 【道经】

诗

纔争七日春来到梅吐南枝消息早 【事文类聚】

二十四日

玄宗亲祀九宫神于东郊

【天宝三载术士苏嘉庆上言请于城东置九宫神坛其年十二月二十四日亲祀通考】

晋安帝四黑龙登天 【安帝元熙元年二十四日四黑龙登天传曰冬龙见天子亡社稷大人应天命之符金雌诗亡大火有心水抱之悠悠百年是其时火宋之分野水宋之德也金雌诗又曰云出而两渐欲举短如之何乃相咀交哉乱也当何所惟有隐岩殖水黍西南之朋困桓父两云玄字也短者云昨短也岩隐不见惟应见谷殖禾谷边则圣暉炳明也易曰西南得朋故能困桓父也刘向讖曰上五尽寄致太平草付合成集群英前句则陛下小讳后句则太子讳也出宋书符瑞志】

宋太宗幸讲武台 【兴国二年上将有事于晋阳习武事也明年遂平河东】

宋徽宗赐太师蔡京以下赴睿谋殿宴景龙门观灯续有旨宣太传王黼赴宴
【以上玉海宣和六年】

刘玄英降世 【玄英号海蟾子初名操后得道改称焉十二月二十四日降世十一月□十七日上升元至元六年褒赠海蟾明悟弘道真君出全真传】

阴子方晨炊而灶神见子方再拜受庆家有黄羊因以祀之自是已后暴至巨富
【出后汉书酉阳杂俎云灶神名隗状如美女又曰姓张名单字子郭又曰名壤子】

吴中以是夜祀灶神谓灶神翌日朝天白一岁事故先一日祷之 【风土记】

楚俗以竹枝扫屋尘换炉火夜具酒果送灶神朝帝 【楚志】

北人名为交年家家用饼糖酒果祀灶祈福

【出宣抚镇志岁时记亦云交年节都人于交年日以酒抹灶门谓醉司命】

夜床底点灯谓之照虚耗 【琐碎录】

云南风俗祀祖如中州上冢之礼 【天下一统志】

诗

古传腊月二十四灶君朝天欲言事云车风马少留连家有杯盘丰祀典猪头烂熟双鱼鲜豆沙甘松粉饵圆男儿酌献女儿避酬酒烧钱灶君喜婢子斗争君莫闻猫犬触秽君莫嗔送君醉饱登天门盂长杓短勿复云乞取利市归来分 【范至能十二月二十四日祭灶词】

二十五日

奏到之日 【唐高祖武德五年二月朔太子与刘黑闥战黑闥遁至馆陶又二月二十五日官军至馆陶黑闥败走至十二月二十五日奏到之日也黑闥临刑叹曰我幸在家鉏菜为高雅贤辈所误至此旧唐书】

吴中煮赤豆作糜暮夜合家同享云能避瘟气虽远出未归者亦留贮口分至襁褓小儿及僮仆皆预 【荆楚岁时记又共工氏有不才之子以冬至死为疫鬼畏赤小豆故冬至日作赤豆粥以禳之与前事相似】

尹喜邀老君归其家曰某蠢愚不知所问愿请益老君曰子欲修身养性行道纪形结气成神终始无穷者莫先以静故天静以为定神静以为变人静以为生将静之时反听内观心不妄念口不妄言形不妄动子欲静神先沐浴斋戒然后精炼己身乃可入室或丹蛇来者子心或王母来降或道身应见此皆身中之神试子尔但勿惊怖

【尹喜得老君秘再拜稽首辞疾去官十二月二十五日邀老君归其家云云出史纂左编】

三清玉帝司会之日 【道经】

诗

酡颜玉碗捧纤纤乱点余花唾碧衫歌咽水云凝静院梦惊松雪落空岩

空花落尽酒倾缸日上山融雪涨江红焙浅瓯新火活龙团小碾斗晴窗 【十二月二十五日大雪始晴东坡梦人以雪水煮小团茶使美人歌梦中作回文诗觉而记其一句云乱点余花唾碧衫意用飞燕唾花故事也后续之为二绝】

家家腊月二十五淅米如珠和豆煮大杓輶铛分口数疫鬼闻香走无处镏姜屑桂浇蔗糖滑甘无比胜黄粱全家团栾罢晚饭在远行人亦留分襁褓中孩子强教尝余波遍沾获与臧新元（口十）气调玉烛天行已过来万福物无疵疠年谷熟长向腊残分豆粥

【宋范至能古诗载于山堂肆考】

二十六日

太白犯填星于斗占曰天子失土 【大明二年十二月二十六日出南齐书】

天雄军德博州天降红雪尽血雨 【宋仁宗庆历三年十二月二十六日出五行志】

宋仁宗命杨绘为集贤校理

【嘉佑三年杨绘献书意诗旨春秋辩要十二月二十六日命为集贤校理出会要】

宰相王旦诞辰真宗诏赐羊三十口酒五十壶米面各二十斛

【十二月二十六日生祥符五年诏赐宋史】

二十七日

宋真宗命王旦为兖州太极观奉上册使赵安仁副之 【真宗天禧元年十一月奉宝册仙衣于文德殿乃斋于天安殿后室四鼓帝诣天安殿酌献天书毕大驾赴玉清昭应宫袞免升大初殿奉册讫奠玉帛荐饌三献饮福登歌二舞望燎如祀昊天上帝仪分遣摄殿中监上紫微大帝绛纱袍七元辅弼真君红绡衣翊圣保德真君皂袍帝改服靴袍诣宝符阁焚香群臣诣集禧殿门表贺帝又服袁冕诣天兴殿奉上圣祖天尊大帝册宝仙衣毕改服诣保宁阁焚香还宫命诸州设罗天大醮先建道场至二十七日命王旦为兖州太极观奉上册使赵安仁副之出宋史礼志】

东坡夜梦数吏人持纸请祭春牛文东坡取笔疾书其上云三阳既至庶草将兴爰出土牛以成农事衣被丹青之好本出泥涂成毁须臾之间谁为喜愠吏微笑曰此两句复当有怒者傍出一吏云不妨不妨此是唤醒他

【东坡梦于神宗元丰六年十二月二十七日时在黄州年四十七出长公外纪】

诗

道人晓出南屏山为试点茶三昧手忽惊午盏兔毛斑打作春瓮鹅儿酒天台蕊花世不见玉川风腋今安有先生有意续茶经会使老谦名不朽 【南屏谦师妙于茶事自云得之于心应之于手非可以言传学到者十二月二十七日闻东坡游落星寺远来设茶东坡作诗赠之】

舄汤旧得茶三昧觅句近窥诗一斑清夜漫漫因搜搅斋肠那得许坚顽

【东坡十二月二十七日重赠老谦】

二十八日

日有戴气太史奏君德至于天为万民爱戴则有是瑞

【淳熙六年宋孝宗于是议蠲税玉海】

唐睿宗立春御宣政殿命太常卿于休烈读时令 【干元元年十二月二十八日立春玉海】

蜀后主王衍国灭 【蜀后主王衍于老君殿中列唐朝十八帝车驾往谒识者以为拜唐乃归命之先兆也先是司天监胡秀材进历移闰正月近臣曰宜用唐国闰月也因改闰十二月街衢卖历者云只有一月也是年十二月二十八日国灭北梦琐言】

管辂字公明是日吏部尚书何晏请之邓扬在晏许晏谓辂曰闻君着爻神妙试为作一卦知位当至三公不又问梦见青蝇数十头来在鼻上驱之不肯去此何故辂曰愿君上追文王六爻之旨下思尼父象象之义然后三公可决青蝇可驱也扬曰此老生之常谭辂荅曰夫老生者见不生常谭者见不谭晏曰过岁更当相见 【十二月二十八日何晏请之云云辂还邑舍其以此言语舅氏舅氏责辂言太切至辂曰与死人语何所畏耶舅氏大怒谓辂狂悖岁朝西北大风尘埃蔽天十余日闻扬晏皆诛然后舅氏乃服辂容貌粗丑无威仪而嗜酒饮食言戏不择非类故人多爱之而不敬出管辂传】

修迎新斋 【内景经】

太上老君降伏九十六种邪魔 【藏经】

诗

百日归期恰及春余年乐事最关身出门便旋风吹面去马联翩鹊啁人却对酒杯浑是梦试拈诗笔已如神此灾何必深追咎窃禄从来岂有因

平生文字为吾累此去声名不厌低塞上纵归他日马城东不斗少年鸡休官彭泽贫无酒隐几维摩病有妻堪笑睢阳老从事为予投檄向江西

【东坡十二月二十八日谪授检校水部员外郎贵州团练副使作】

二十九日

太白蚀月 【璞上疏曰去年十二月二十九日太白蚀月月者属坎群阴之府所以昭察幽情以佐太阳精者也大白金行之星而来犯之天意若曰刑理失中自坏其所以为法者也臣术学庸近不练内事占卦所及敢不尽言是时阴阳错缪刑狱繁兴郭璞字景纯河东闻喜人有郭公者客居河东精于卜筮璞从之受业公以青囊中书九卷与之自是遂洞五行天文卜筮之术禳灾转祸虽京房管辂不能过帝见而嘉之出郭璞传】

后周太祖亲飨庙 【广顺三年通考】

唐太宗从太上皇阅武于城西而还置酒未央宫 【贞观八年玉海】

唐玄宗有龙见于池敕太常韦绛草祭仪绛奏牲用少牢乐用锺鼓奏姑洗歌南宫
【开元十八年十二月二十九日龙见于池玉海】

宋徽宗诏景龙门预为元夕之具特赐公师宰执以下宴御制诗四韵赐太师蔡京
【政和三年玉海】

陈师道卒 【师道字无已号后山彭城人以建中靖国元年十二月二十九日卒年四十九除
官得一正字在元符三年庚辰冬其除官之日有诗诗曰扶老趋严召徐行及圣时端能几字
正敢恨十年迟肯着金根误宁辞乳妪讥向来忧畏出不尽鹿门期出遗编】

华严菩萨生辰 【藏经】

诗

东去长安万里余故人那惜一行书玉关西望堪肠断况复明朝是岁除
【岑参十二月二十日玉关寄长安友】

三十日

汉文帝二年是日日食帝谓群臣曰人主不德则天示之灾以戒不治朕不能治盲群生上以
累三光之明不德大矣其悉思朕之过失及知见之所不及以告朕 【山堂肆考】

日穷于次月穷于纪星回于天数将几终岁且更始

日月其除

送寒迎春 【以上六帖】

三百六旬之尽七十二候之穷 【荆楚岁时记】

汉武于岁除狩河间见清光自地属天望气者曰下有贵子上求之见一女子在空室中姿色
殊绝两手皆拳数百人擘之不舒上次被即舒号拳夫人即钩弋也后人因效之为藏钩之戏
【汉武故事】

唐贞观初天下义安时属除夜太宗盛饰宫掖明设灯烛盛奏乐歌乃延萧后观之后曰隋主
淫侈每除夜殿前诸院设火山数十爇沉香木根每一山焚沉香数车火光暗则以甲煎沃之
焰起数丈香闻数十里 【纪闻又出外史】

唐景隆二年中宗敕中书门下与学士诸王驸马除夕入阁守岁设庭燎置酒奏乐酒酣上谓御史大夫窦从一曰闻卿久无伉俪朕甚忧之今夕岁除为卿成礼从一但唯唯拜谢俄而内侍引烛笼步障金缕罗扇自西廊而上扇后有人衣礼衣花钗令与从一对坐上命从一诵却扇诗数首扇却去花易服而出徐视之乃皇后老乳母王氏也上谓侍臣大笑诏封莒国夫人【嫁为从一妻俗谓乳母之婿曰阿（上父下者）从一每谒见及进表状自称翊圣皇后阿（上父下者）时人谓之国（上父下者）从一欣然有自负之色故唐人成婚之夕有催妆却扇诗李商隐代董秀才却扇诗云莫将尽扇出帷来遮掩春山滞上才若道团圆是明月此中须放桂花开出唐纪】

吴越王钱镠尝于除夜命诸子及诸孙鼓胡琴一再行遽止之曰人将以我为长夜之饮【九国志又出山堂肆考】

岁除大傩选中黄门子弟十岁以上十二岁以下百二十人为傩子皆赤帟皂衣执靴而行【出东汉后纪又礼乐志傩逐鬼疫也阴阳之气不节厉鬼从而为祸故天子使方相氏黄金为四日熊皮为帽口作傩傩之声以驱鬼疫薛综注傩之为言善也善男幼子也西京赋傩子善童】

岁除太常卿领官属乐吏并护童傩子千人晚入内至夜于寝殿前傩蜡燎沉檀炷煌如昼其夕赏赐甚多【南部新书】

前岁一日击鼓驱疫疠之鬼谓之逐除亦曰傩【吕氏春秋】

岁除日傩皆作鬼神状二老人名为傩翁傩母【李绰秦中岁时记】

吴越钱俶传佐卒弟侬以次立岁除画工献钟馗击鬼图上胡进思见之大悟知侬将杀已是夕拥兵废侬迎俶立之

西方深山中有长人丈余人见之则病寒热名曰山（彳杲）人每以竹着火中爇爇有声则山鬼惊遁故今除夕爆竹是其遗意【神异经】

李畋邻人仲叟家为山魃【音肖独足鬼】

所崇叟求报谢而妖弥盛畋谓曰公除夕于庭中爆竹数十竿叟然其言妖止【异闻录】

爆竹之傩人家各于门首燃薪满盆贫富皆尔谓之相暖热【吴中风土记】

吴俗村落以秃帚麻秸竹枝等燃火炬縛于长竿之杪以照田烂然遍野以祈丝谷【山堂肆考】

有商人过清湖见清洪君君以一婢名如愿许之商有所求悉能致之后除夕将旦如愿晚起

商人挾之走入粪堆不见今吴俗除夜将晚鸡鸣婢获持杖击粪壤致词以致市利谓之打灰堆【岁时记亦出山堂肆考】

吴俗分岁罢小儿绕街呼叩云卖汝痴卖汝呆世传吴人多呆故儿辈讳之欲卖其余范至能有卖痴呆词除夕更阑人不睡厌禳钝滞迎新岁小儿呼叫走长街云有痴呆召人买二物于人谁独无就中吴依仍有余巷南巷北卖不得相逢大笑相揶揄栎翁块坐重檐下独要买添令问价儿云翁买不须钱奉赠痴呆千百年
【揶揄两手相笑也除夜谓之分岁出山堂肆考】

贾岛常以岁除取一年所得诗稿祭以酒醑曰劳吾精神以是补之【金门岁节记】

裴度除夜叹老至晚不寐炉中焚商陆火凡数添【唐书】

洪矩吴时作庐陵郡载土船头归除日矩指船头云无物载土耳【宣城记】

昔有人居草庵中每岁除夕遗间里药一贴令囊浸井中至元日取水置于酒尊名曰屠苏合家饮之不瘟疫【山堂肆考】

都下寺院每用岁除鍛磨是日作鍛磨斋【僧园逸记】

都人除夜请僧道看经备酒果送神帖灶马于灶上以酒糟抹灶门曰醉司命夜于灶里点灯谓之照虚耗【梦华录】

除夜祭先竣事长幼聚饮祝颂而散谓之分岁【风土记】

蜀风俗晚岁相馈问谓之馈岁酒食相邀为别岁除夕达旦不眠谓之守岁【苏轼云】

岁除家家具有菰谓宿岁之储以迎新年相聚酣饮留宿岁饭至新年则弃之街衢以为去故纳新云

晋博士张亮议曰腊接也祭宜在新故交接也俗谓腊之明日为初岁【白孔六帖】

洛阳人家除夜以铜刀刻门埋小儿砚点水盆灯【山堂肆考】

腊日以后叟妪各随其侪为藏彊分二曹以较胜负即藏钩也【风土记彊音枢】

广宁真君上升【郝大通号广宁子宁海人也初名璘号恬然子虽入道而志不苦励长真王阳二师激劝之至岐山遇异人授以金丹口诀为改名号修行赵魏间道成脱化出道书】

诗

旅馆寒灯独不眠客心何事转凄然故乡今夜思千里霜鬓明朝又二年 【高适】

金吾除夜进傩名画裤朱衣四队行院院烧灯如白日沉香火里坐吹笙 【王建】

病眼少眠非守岁老心多感又临春火销灯尽天明后便是平头六十人 【白居易除夜】

事关休戚已成空万里相思一夜中愁到晓鸡声绝后又将憔悴见春风 【来鹄除夜】

缙室重飞玉管灰物华全为斗杓回依依残腊无情别历历新春满眼来 【司马光除夕】

漏箭更筹日夜催万牛不挽白驹回梅花雪片岁除尽萱草柳芽春将来 【曾吉甫】

比量旧岁聊堪喜流转殊方又可惊明日岳阳楼上去岛烟湖雾看春生 【陈去非除夕】

暮景斜芳殿年华丽绮宫寒辞去冬雪暖带入春风阶馥舒梅素盘花卷烛红共欢新故岁迎送一宵中

岁阴穷暮纪献节启新芳冬尽今朝促年开明日长冰消出镜水梅散入风香对饮欢经夜倾壶待曙光 【以上唐太宗守岁】

今岁今宵尽明年明日催寒随一夜去春逐五更来气色空中改容颜暗里摧风光人不觉已着后园梅 【王諲】

远客襄阳郡来过海伴家樽开柏叶酒灯发九枝花妙曲逢卢女高才得孟嘉东山行乐意非是竞繁华 【张子客除夜乐城逢孟浩然】

守岁阿戎家椒盘已颂花盃簪喧枥马列炬散林鸦四十明朝过飞腾暮景斜谁能更拘束烂醉是生涯 【杜工部】

岁序已云殚春心不自安聊开柏叶酒试荐五辛盘金薄围神燕朱衣印鬼九梅花应可折惜为雪中看 【庾肩吾】

犹残一夜腊并见两年春物以终为始人从故得新迎春朝剪彩守岁夜倾银恩赐随佳节无功祗自尘 【王介甫除日立春】

岁晚身何托灯前客未空半生忧患里一梦有无中发短愁催白颜衰酒借红我歌君起舞潦倒略相同 【陈师道除夜对酒赠少章】

乾坤空落落 岁月去堂堂 末路惊风雨 穷边饱雪霜 命随年欲尽 身与世俱忘 无复屠苏梦 挑灯夜未央 【文天祥除夜】

一尊聊有天涯忆 百岁翻然醉里眠 酒醒灯前犹是客 梦回江北已经年 佳时流落真何得 胜事蹉跎只可怜 惟有到家寒食在 春风因泛潏溪船 【王安石除夜寄弟】